

আবার দৃষ্টী শক্তিহীন হইল। বন্ধু! নিকটে কি গ্রাম আছে? আমি আর চলিতে পারি না। বড়ই ক্ষুধা পাইয়াছে; আমাকে কিছু খাইতে দাও।” আগন্তুক এই বলিয়া বৃক্ষতলে বসিয়া পড়িল। অন্ধ যুবা কহিল, “আপনি বিশ্রাম করুন। নিকটেই আমাদের গ্রাম। আমি একজন লোক ডাকিয়া দিতেছি। জনাব! আমরা হিন্দু, আমাদের ঘরে আপনাদের যোগ্য আহার ত মিলিবে না।”

মুসলমান বোধ হয় ক্ষুধার তাড়নায় পাগলের মত হইয়া উঠিয়াছিল। সে বলিয়া উঠিল, “ঈশ্বরের দোহাই, বন্ধু! তুমি আর বিলম্ব করিও না,—আমার ক্ষুধা তৃষ্ণার যন্ত্রণা অসহ্য হইয়া উঠিয়াছে। মানুষে যাহা খাইতে পারে, তাহা পাইলেই আমি তাঁহার আহার হয় নাঃ।

• রমণী। হরির-কুটের সন্দেশ আছে। তুমি —
আমি লুচি ভাজিয়া আনিতেছি।

ব্রাহ্মণ। দেখ বড়বো, যা রয় সয় তাই ভাল বেশী বাড়ি-বাড়ি করিও না। আমি জীবিত থাকিতে যদি হরিনারায়ণ বিজালকারের বাড়ীর প্রসাদ স্নেহ যবনের—

রমণী সহসা ব্রাহ্মণের মুখে হস্তার্পণ করিয়া কহিল, “দেখ ভট্টাচার্য্য মহাশয়, যে কথা রাখিতে পারিবে না, তাহা বলিও না। সে মুসলমান হউক, আর যাহাই হউক, অতিথি। অভুক্ত অতিথি গ্রাম হইতে ফিরিয়া গেলে অকল্যাণ হইবে। ঠাকুরপো! তুমি ব’স।”

“বৌদিদি! আমি রাজাদাদার সঙ্গে চলিলাম। তুমি খাবার একধানা কলাপাতায় বান্ধিয়া রাখিও,—আমি অন্ধ-দণ্ডের মধ্যেই ফিরিয়া আসিব।”

যুবা প্রস্থান করিল। ব্রাহ্মণ দ্বার রুদ্ধ না করিয়াই গায়িতে বসিল,—

“ওমা শ্রামা হরমনোমোহিনী,

(আমি) তোমায় সেধে বেড়াই কেঁদে হরসুদীবিনাসিনী—”

দ্বিতীয় পরিচ্ছেদ

ছোট রায়

গ্রামের অপর প্রান্তে এক প্রকাণ্ড অট্টালিকার দ্বিতলে এক মসীবরণা, প্রকাণ্ডকায়া, বিরলকেশা রমণী তাম্বুল সজ্জা করিতে-ছিলেন। তাঁহার সম্মুখে রক্ত-নির্মিত প্রকাণ্ড তাম্বুলাধার,— তাহার উপরে ক্ষুদ্র বৃহৎ অসংখ্য আধারে বহু উপকরণ। সম্মুখে দুই তিনজন দাসী,—কেহ রূপার কাটিতেছে, কেহ বা পান হিঁড়িতেছে। আরো দুইজন দাসী রূপার থালায় পান সাজাইয়া গৃহিণীর সম্মুখে ধরিতেছে,—তিনি কেবল প্রত্যেক পানে মসলা দিতেছেন; কারণ অঙ্গচালনা তাঁহার পক্ষে অসম্ভব। গৃহিণী যে স্থানে উপবিষ্টা, তাহা একটা দীর্ঘ দরদালান। তাহার এক

পাখে প্রশস্ত কাশ্মীরি গালিচা, সম্মুখে সতরকীর উপর তাহুল-সজ্জা বিস্তৃত। দরদানানের অপর প্রান্তে এক গৌরবর্ণ ঘুবা প্রবেশ করিল এবং গৃহিণীকে জিজ্ঞাসা করিল, “বৌঠান! কর্তার আমলের সোণার বাটাটা কোথায়?”

• গৃহিণী সম্মুখের দাসী হস্তস্থিত রজতপাত্র হইতে মুখ না তুলিয়াই কহিলেন, “তা আমি কি জানি,—ভাঙারে গিয়া দেখ।”

দেখিয়াছি “ভাঙারে নাই।” “তবে হয়ত চুরি গিয়াছে।”

“ভাঙারী বলিল আপনার হুকুমমত তাহা উপরে আসিয়াছে।”

“আমি কি তোমার পানের বাটা চুরি করিয়া রাখিয়াছি না কি?”

“ওনিলাম সে বাটা ঈশ্বরগঞ্জে গিয়াছে।”

ঈশ্বরগঞ্জের নাম শুনিয়া গৃহিণী প্রশস্ত বদন উত্তোলন করিলেন।

- স্বর্গোল আবলুস বৃক্ষ কাণ্ড সদৃশ বাহু কাণ্ডের তাড়নায় রজতপাত্রে সজ্জিত তাহুল চারিদিকে ছড়াইয়া পড়িল এবং পাত্রধারিণী দাসী ধরাশয়্যা গ্রহণ করিল। গৃহিণী কহিলেন, “যত বড় মুখ নয়, তত বড় কথা! ঈশ্বরগঞ্জের লোক কি খাইতে পায় না, যে, রায় গোষ্ঠীর বাসন চুরি করিতে আসিবে? তুই আমার অগ্নে মামুষ তোর এ কথা বলিতে লজ্জা হয় না? আমার স্বামীর বাসন,— আমি যাহা খুসী করি না কেন তাহাতে কাহার কি! তবুও যদি এক পয়সা রোজগারের ক্ষমতা থাকিত। আমি দেখিয়া লইব, তুই কি করিয়া আর এ বাড়ীতে বাস করিস!”

এই বলিয়া গৃহিণী দরদালান ত্যাগ করিয়া শয়নকক্ষে প্রবেশ করিলেন এবং দ্বার বন্ধ করিয়া দিলেন। ঘুবার মুখ ক্রোধে

রক্তবর্ণ হইয়া উঠিয়াছিল। সে হইয়া একটা বিকট উত্তর দিতে যাইতেছিল—সহসা তাহার পশ্চাৎ হইতে একজন তাহার মুখ চাপিয়া ধরিল। যুবা আরো রাগিয়া গিয়া, নবাগতের হাত ধরিয়া তাহাকে দরদালানে টানিয়া আনিল। আগন্তুক উভয় হস্তে তাহাকে জড়াইয়া ধরিয়া কহিল, “দাদা! তুমি কিছু বলিতে পাইবে না। যাহা বলিতে হয় বড়দাদা আসিলে বলিও।”

প্রথম যুবা আগন্তুককে বাহু পাশে আবদ্ধ করিয়া কিয়ৎক্ষণ স্তম্ভিত হইয়া রহিল। প্রায় অর্দ্ধ দণ্ড কাটিয়া গেল। দাসীরা তাহাদিগের ভাব গতিক দেখিয়া যে যে দিকে পথ পাইল, সরিয়া পড়িল। উত্তর না পাইয়া গৃহিণীর মনে বোধ হয় সন্দেহ হইয়াছিল; তিনি দুয়ারের ফাঁক দিয়া তাহাদিগকে দেখিতে-ছিলেন। পুরুষ দুইজনকে অনেকক্ষণ নীরব দেখিয়া তাঁহার সাহস বাড়িয়া গেল। তিনি কবাট খুলিয়া বলিলেন, “মারিবি নাকি, অস্বাভাবিক!”

আগন্তুক যুবাকে দৃঢ়তর ভাবে জড়াইয়া ধরিল এবং কহিল, “দাদা! দোহাই তোমার, কিছু বলিও না।”

যুবা দীর্ঘশ্বাস ত্যাগ করিয়া বলিল, না ভাই, কিছু বলিব না। সে গৃহিণীর দিকে কিরিয়া কহিল, “বোঁঠাণ্! আমি দৈবরাজের গোলাম কায়েত নহি। রায় বংশে কেহ কখনো জ্বীলোকের সঙ্গে হস্তক্ষেপ করে নাই। তুমি বড় ভাইয়ের স্ত্রী,—মাতৃতুল্যা। আজ তুমি আমার চোখ ফুটাইয়া দিয়াছ। যে গৃহে তুমি বাস করিবে সে গৃহের অন্ন আর এ মুখে তুলিব না।”

যুব। এই বলিয়া দূর হইতে গৃহিণীকে প্রণাম করিল, এবং আগন্তকের হাত ধরিয়া অট্টালিকা ত্যাগ করিল। পথে আসিয়া আগন্তক জিজ্ঞাসা করিল, “দাদা! কোথায় যাইতেছ?”

“যে দিকে হুই চোখ যায়। ভাইটী, তুমিও আমার সঙ্গে চল, তোমার মুখ চাহিয়া বহু অপমান, যন্ত্রণা ও লাঞ্ছনা সহ করিয়াছি। ভূপ্! আজি আর পারিলাম না। তালুক-মূলুক, ঘর-বাড়ী—আমাদের যাহা ছিল, দাদা সমস্তই নিজে লইয়াছেন। বাবার আমলের অস্থাবর যাহা কিছু ছিল, তাহা প্রায় সমস্তই ঈশ্বরগণ্ডে গিয়াছে। একজোড়া সোণার বাটা অবশিষ্ট ছিল—এখন তুমি বড় হইয়াছ, আর কিসের জন্ত অপমান সহ করিব ভাই?”

অন্ধের দৃষ্টিহীন নেত্রদ্বয় ভ্রাতার মুখের দিকে ফিরিল। সে ক্রুদ্ধকণ্ঠে জিজ্ঞাসা করিল, “দাদা! বাড়ী ছাড়িয়া যাইব? তবে কি বাড়ী আমাদের নহে?”

“না ভাই—বাড়ী দাদার, অর্থাৎ বৌদিদির। পাছে আমাদের অংশ দিতে হয় সেই ভয়ে দাদা বাড়ীর জমি বৌদিদির নামে খরিদ করিয়াছেন।”

“তবে কোথায় যাইব?” “যেখানে ভগবান্ আশ্রয় দেন।” “বিদ্যালঙ্কার-বাড়ী গেলে হয় না?” “না ভাই, এ গ্রামে আর একদণ্ড থাকিব না। তুমি কি আমার সঙ্গে যাইবে?”

অন্ধ উভয় হস্তে ভ্রাতার কণ্ঠ আলিঙ্গন করিয়া ক্রুদ্ধকণ্ঠে বলিল, “দাদা! আমি তোমাকে ছাড়িয়া এক দণ্ডও বাঁচিব না। তুমি যে স্থানে যাইবে, আমি তোমার সঙ্গে যাইব। কিন্তু

তোমাকে একদণ্ড অপেক্ষা করিতে হইবে। আমি গঙ্গার ধারে অশ্বখ-তলে এক অতিথি রাখিয়া আসিয়াছি, তাহার ব্যবস্থা না করিয়া যাইতে পারিব না।”

“ভূপ্! এখন কোথায় কি পাইবি তাই, যে অতিথিকে খাওয়াইবি?” “তুমি সে চিন্তা করিও না দাদা,—আমি ভট্টাচার্য্য-বৌকে খাবারের ব্যবস্থা করিতে বলিয়া আসিয়াছি। তুমি কি মনে কর যে, বৌঠান্ আমার অনুরোধে কোন দিন একটা কুকুরের এক মুষ্টিও অন্ন দিবে?” “কিন্তু ভূপ্! এখন বিছালঙ্কার বাড়ী গেলে ধরা পড়িয়া যাইব।” “তুমি না হয় তফাতে থাক।” “না, চল যাই,—সুদর্শনকে বলিয়াই যাইব।” “অমন কাজটা করিও না দাদা ;—তাহা হইলে ভট্টাচার্য্য দাদা গ্রামময় ঢাক পিটাইয়া বেড়াইবে।” “ভাল, কিছু বলিব না। কিন্তু চল, তাহার সহিত দেখা করিয়া যাই,—আর হয় ত এ গ্রামে ফিরিব না।”

উভয়ে বিছালঙ্কারের বাড়ীতে উপস্থিত হইল। দূর হইতে সুদর্শন ভট্টাচার্য্যের গীতধ্বনি শ্রুত হইল। জ্যেষ্ঠ কনিষ্ঠকে কহিল, “ভূপ্! সুদর্শন আলাপ করিতেছে, এখন কি বিরক্ত করিব?” “দাদা! বিলম্ব করিলে চলিবে না, আমার অতিথি বড়ই ক্ষুধার্ত।”

উভয় ভ্রাতা দ্বারে করাঘাত করিল। সুদর্শন বিষম ক্রুদ্ধ হইয়া বলিয়া উঠিল, “ভূপেটা বুঝি! দাঁড়া তোমার মাথা ভাঙ্গিব।” কিন্তু সে রুদ্ধ-দ্বার মুক্ত করিয়া, দেখিল, সম্মুখে আর

একজন দাঁড়াইয়া আছে। তখন সে ব্রাহ্মণ-স্বলভ ক্রোধ বিস্তৃত হইয়া বলিয়া উঠিল, “কে, ছোটরায়! আয় ভাই, একটা নূতন গান বাঁধিয়াছি।” যুবা ব্রাহ্মণকে আলিঙ্গন করিয়া পরে প্রণাম করিল, এবং কহিল, “দাদা! তোমার নূতন গান শুনিতে অনেক বিলম্ব হইবে, আমি এখন বিদেশে চলিয়াছি, আশীর্বাদ কর।”

এই সময়ে দুইটা রমণী কক্ষে প্রবেশ করিল। একজন সধবা, অগ্র জন বিধবা। সধবা কদলীপত্রে-জড়িত কিছু খাণ্ড অন্তরে হস্তে দিয়া বলিলেন, “ঠাকুরপো! ফিরিবার সময় এই পথ দিয়া যাইতে ভুলিও না,—তোমার জন্ম প্রসাদ রাখিয়াছি।”

বিদেশ-যাত্রার কথা শুনিয়া হৃদর্শন ভট্টাচার্য্য কিংকর্তব্য-বিমূঢ় হইয়া গিয়াছিল। সে হঠাৎ বলিয়া উঠিল, “আ মর মাগি, রাখ তোর প্রসাদ! অসীম আর ভূপেন যে বিদেশে চলিল!” রমণীদ্বয় আশ্চর্য্য হইয়া সমস্তরে বলিয়া উঠিল, “বিদেশ! কোথায়?” যুবা কহিল, “দিল্লী।”

বিধবা আশ্রু-সম্বরণ করিতে না পারিয়া কাঁদিয়া ফেলিল; এবং অন্ধের হস্তাকর্ষণ করিয়া তাহাকে ক্রোড়ে টানিয়া লইল। ব্রাহ্মণ বীণা পরিত্যাগ করিয়া যুবার স্বন্ধে হস্তার্পণ করিয়া কহিল, “হ্যারে অসীম! তোরা চলিয়া যাইবি, আমি কাহাকে লইয়া থাকিব?”

যুবা কহিল, “ভয় কি দাদা! আমরা ফিরিলাম বলিয়া। তুমি মন দিয়া গান বাঁধিতে থাক,—আমরা আসিয়া এক মজলিসে

সমস্ত গান শুনিয়া লইব। আর বিলম্ব করিব না, সওয়ারী দাঁড়াইয়া আছে।”

উভয় ভ্রাতা, হৃদর্শন, তাহার পর ভগিনীকে প্রণাম করিয়া বিদ্যালঙ্কার-গৃহ পরিত্যাগ করিল। আশ্র-পনসবেষ্টিত ক্ষুদ্র গ্রাম পরিত্যাগ কালে, পদশব্দ শুনিয়া উভয় ভ্রাতা চমকিয়া দাঁড়াইল। পরক্ষণেই একটি রমণী দ্রুতপদে তাহাদের নিকটে আসিল। যুবা জিজ্ঞাসা করিল, “কে?” রমণী কহিল, “দাদা! আমি ছুগী। অন্ধ ব্যগ্রকণ্ঠে জিজ্ঞাসা করিল, “কে দিদি? তুমি অন্ধকারে বাগানে আসিলে কেন?” রমণী তাহাকে ক্রোড়ে আকর্ষণ করিয়া যুবাকে কহিল, “দাদা! আমার একটি অনুরোধ রাখিতে হইবে।” “কি অনুরোধ দিদি?” “দেখ দাদা! তোমরা, পুরুষেরা যাহা কথায় প্রকাশ কর না, তাহা মুখের ভাবে প্রকাশ হইয়া যায়। সে মুখের ভাবের ভাষা পুরুষে সহজে বুঝিতে পারে না, কিন্তু রমণী তাহা সহজেই পারে। আমি বেশ বুঝিয়াছি, তোমরা গ্রাম পরিত্যাগ করিতেছ। কি জন্ত পরিত্যাগ করিতেছ, তাহা সকলেই জানে। দেখ দাদা! তোমার মত আমিও ভূপ্কে তিন বৎসরের ভেলে মাতুষ্য করিয়াছি; স্মতরাং আমিও তাহার উপর কিছু দাবী রাখি। এই পুঁটুলিতে যাহা আছে, তাহা আমার স্বামীর সম্পত্তি; স্মতরাং এখন ইহাতে আমি বাতীত আর কাহারও অধিকার নাই। আমি। ইহা ভূপ্কে দিলাম, ইহা তাহার জন্ত ব্যয় করিও।”

দুর্গাঠাকুরাণী যুবাব হস্তে একটা গুরুভার পদার্থ দিয়া দ্রুতপদে চলিয়া গেল। এই সময় আশ্রবৃক্ষের নিম্নের অন্ধকার হইতে একজন পুরুষ বাহির হইয়া আসিয়া জিজ্ঞাসা করিল, “তোমরা কি চাও?” যুবা জিজ্ঞাসা করিল, “কেন?” কণ্ঠস্বর শুনিয়া সে ব্যক্তি প্রণাম করিল এবং কহিল, “কে, ছোট হজুব? অন্ধকারে চিনিতে পারি নাই, আমি নবীন।”

তৃতীয় পরিচ্ছেদ

অতিথি

- গ্রাম-সীমা পরিত্যাগ করিয়া যুবা অন্ধ বালককে জিজ্ঞাসা করিল, “ভূপ্! তোর অতিথি কে ভাই?” বালক কহিল, “একজন চোগ্তাই।” “চোগ্তাই?” “হাঁ দাদা! খাটি মোগল! বাঙ্গলা বা হিন্দী একেবারে বুঝে না। শিকার করিতে গিয়া পথ হারাইয়া ফেলিয়াছে। কথা বুঝে না বলিয়া সারা দিন থাইতে পায় নাই। বোঁঠানের কাছে যে কিছু পাইব না, সে ত জানাই কথা। আমি ভট্টাচার্য্য-বোঁকে খাবার করিতে বলিয়া, তোমাকে ডাকিতে যাইতেছিলাম। দাদা! তাঁহাকে সহরে পৌছাইয়া দিতে হইবে।”

“ভালই হইয়াছে ভাই। সহরে গেলে বড় দাদার লোকে আমাদের সহজে মারিতে পারিবে না।” “হাঁ দাদা, বড়দাদা

আমাদের মারবে কেন ?” “কি বুঝিবে ভাই ! বিষয় বড়ই জঞ্জাল ।” “বিষয় ত আমরা লিখিয়া দিয়াছি দাদা, তবে আমাদের মারবে কেন ?” “পাছে আর কখনো দাবী করি। বিষয়ের কথা যদি নবাব-সরকারে বা বাদশাহের দরবারে পৌঁছে, তাহা হইলে বড়দাদার বড়ই অপমানের কথা ।” “দাদা ! তবে চল না নবাবকে বিষয়ের কথা বলিয়া দিই ।” “নবাব বড়দাদার বড়ই বাধ্য, তাঁহাকে দিয়া আমাদের কোন উপকার হইবে না ।” “বাদশাহও কি বড়দাদার বাধ্য ?” “না । বাদশাহের দর-বারেই যাইব মনে করিয়াছি । বড়দাদার অবিচার দেখিয়া, অনেক দিন ধরিয়াই সঙ্কল্প করিয়া রাখিয়াছি যে, একদিন দিল্লী যাইব । আজই সে সঙ্কল্প কার্য্যে পরিণত করিব । তোর অতিথি কোথায় ?” “ঐ যে ।”

এই সময়ে সেই পথভ্রান্ত মুসলমান অশ্বখ-তলের অন্ধকার হইতে ডাকিয়া জিজ্ঞাসা করিল, “দোস্ত ! তুমি কি সেই ?”

ভূপেন্দ্র পার্শ্বিতে জবাব দিল, “জনাব ! অপরাধ মাফ করিবেন,—আপনার জন্ত খাণ্ড সংগ্রহ করিতে বিলম্ব হইয়া গিয়াছে ।” “তুমি যে মোটের উপর ফিরিয়া আসিয়াছ, এই জন্ত ঈশ্বরকে ধন্যবাদ দিতেছি । অন্ধকার হইয়া গেল, রাত্রিতে নদী পার হইব কি করিয়া ?” “সে ব্যবস্থা করিয়া আসিয়াছি ।” “বন্ধু ! তুমি একজন কেরেশ্‌তা ।”

উভয় ভ্রাতা অশ্বখ-মূলে কদলীপত্র বিছাইয়া খাণ্ডডবা

সাজাইয়া দিল। তাহাদিগের অতিথি অত্যন্ত ক্ষুধার্ত হইয়াছিল ; সে অল্পমতির অপেক্ষা না করিয়াই থাইতে আরম্ভ করিল। ক্ষুধা কিয়ৎপরিমাণে প্রশমিত হইলে, আগন্তুক জিজ্ঞাসা করিল, “দোস্ত ! তোমার সঙ্গে কে ?” ভূপেন্দ্র কহিল, “ইনি আমার জ্যেষ্ঠ। ইহাকে ডাকিতে গিয়াই বিলম্ব হইয়া গিয়াছে।” “বন্ধু ! তুমি বোধ হয় আমাকে পথ দেখাইয়া লইয়া যাইবে ?” “হাঁ।” এই এই সময় ভূপেন্দ্র কহিল, “আমরা দুইজনেই যাইব।” আগন্তুক বিস্মিত হইয়া জিজ্ঞাসা করিল, “তুমিও যাইবে ? অন্ধকারে তোমার কষ্ট হইবে না দোস্ত ?” ভূপেন্দ্র কহিল, “অন্ধকারে অনেক দূর চলিয়া আসিয়াছি জনাব, এখনো বহুদূর যাইতে হইবে।” “কতদূর আসিয়াছ ?” “বিশ বৎসরের পথ।” “অঃ ! সে কথা ভুলিয়া গিয়াছিলাম, মাফ করিও দোস্ত ! আলোক ও অন্ধকার যে তোমার নিকট সমান, তাহা মনে ছিল না। তোমরা কি আজই রাত্রিতে ফিরিয়া আসিবে ?” “না, রাত্রিতে সহরে থাকিয়া সকালে অন্ত্র যাইব।” “কোথায় যাইবে ?” “সে কথা পরে বলিব। এখন চলুন, রাত্রি বাড়িয়া চলিল।”

অশ্বখ-তল ত্যাগ করিয়া তিনজনে নদীর দিকে চলিল। নদীতীরে বেণু-কুঞ্জের মধ্যে একখানি ক্ষুদ্র পর্ণ-কুটীরে ক্ষুদ্র প্রদীপের স্তিমিত আলোকে একজন মত্তস্থ জাল বুনিতেছিল। ভূপেন্দ্র তাহাকে দূর হইতে ডাকিল, “কেনা দাদা !” ধীরে ধীরে রাখিয়া জিজ্ঞাসা করিল, “কে ? খোকাবাবু ? অন্ধকারে

এতদূর কেন আসিয়াছ ভাই?" ভূপেন্দ্রের পশ্চাৎ হইতে তাহার জ্যেষ্ঠ বলিয়া উঠিল, "কেনা! আমি আসিয়াছি, শীঘ্র বাহিরে আয়।" তাহার কথা শুনিয়া ধীবর চমকিত হইয়া উঠিল; এবং জাল দূরে ফেলিয়া দিয়া কহিল, "হুজুর, যাই।" কুটীরাভ্যন্তর হইতে এক রমণী জিজ্ঞাসা করিল, "কে গা?" ধীবর তাহাকে ধমক দিয়া কহিল, "থাম মাগি, কাহাকে কি বলিস্। হুঁস্ থাকে না। দেখিতেছিহুঁ না, ছোটরায় আর খোকাবাবু আসিয়াছে।"

এই সময় ভূপেন্দ্র কহিল, "কেনা দাদা! নাও ঠিক কর,— আমরা সহরে যাইব।" "ছিপ্ আনিব? না, পান্সী বাহির করিব?"

"পান্সী।" কুটীরের নিম্নে একখানি ছোট পান্সী বান্ধা ছিল, ধীবর একখানি দাড় লইয়া পান্সীতে উঠিল এবং ভূপেন্দ্রের হস্তে হাল্ দিয়া নৌকা কিনারে টানিয়া আনিল; সকলে নৌকায় উঠিলে, সে নৌকা ছাড়িয়া দিল। নৌকা অল্প দূর উজাইয়া লইয়া গিয়া, কেনারাম পাড়ি জমাইল; এবং অল্পক্ষণে ভূপেন্দ্রকে কহিল, "খোকাবাবু! কোথায় যাইতেছে?" ভূপেন্দ্র কহিল, "কেন, বলিলাম যে সহরে যাইব?"

"এত রাত্রিতে সহরে?" "নিমন্ত্রণ আছে।" "বড় কর্তার নিমন্ত্রণ নাই?" "তিনি অনেক রাত্রিতে দরবার হইতে ফিরিবেন, যাইতে পারিবেন না।" "এ বেটা কে? মুসলমান দেখিতেছি।" "হ্যাঁ, চোগ্তাই।" "চোগ্দার ত ব্রাহ্মণ? এ বেটা নিশ্চয়"

মুসলমান।” “মুসলমান-ই ত! চোগ্তাই মানে মোগল, চোঙ-দার নয়।” “ও বাবা, তাই বুঝি! খোকাবাবু, এ বেটা বাঙ্গলা বুঝে না কি?” “না, তুমি নিশ্চিত থাক, ও বাঙ্গলা, হিন্দী কিছুই বুঝে না।” “বাঁচলাম। বেটা যাইবে কোথায়?” “লালবাগে।” “লালবাগে শুনিয়াছি বাদশাহের নাতি থাকে। সেখানে গেলে রাত্রে ফিরিতে পাইব ত?” “ভয় কি কেনাদাদা, আমরা সঙ্গে রহিয়াছি।”

দেখিতে-দেখিতে নৌকা পরপারের নিকটে আসিল। তাহা দেখিয়া জ্যেষ্ঠ কনিষ্ঠকে কহিলেন, “ভূপেন! দেখ, ত, দুর্গা কি দিয়া গেল।” ভূপেন্দ্র বস্ত্রমধ্য হইতে একটা থলিয়া বাহির করিয়া জ্যেষ্ঠের হস্তে দিল। তিনি তাহা পরীক্ষা করিয়া কহিলেন, “এ যে সমস্তই মোহর!”

“আমি তাহা স্পর্শ করিয়াই বুঝিয়াছিলাম।”

“শুনিয়া দেখ।” ভূপেন্দ্র শুনিয়া কহিল, “এক হাজার এক।” “সে যে অনেক টাকা রে।” “দুর্গা-দিদির স্বামীকে ত্রিপুরার মহারাজা প্রণামী দিয়াছিলেন।”

এই সময় পান্সী তীরে লাগিল। নদীবক্ষে বিস্তৃত বালুকা-ক্ষেত্র, এবং নদীতীরে স্নদৃশ, সুরম্য, নবনির্মিত মুর্শিদকুলি খাঁর নগর। নৌকা হইতে তীরে নামিয়া অসীম ধীবরকে কহিলেন, “কেনারাম! তুমি ফিরিয়া যাও। বাড়ী ফিরিয়া রায়-গৃহিণীকে হিও, ছোটরায় বিদায় হইয়াছে,—আর তাহার অন্ন ধংস রিতে আসিবে না।” বৃদ্ধ ধীবর ভাগীরথীর জলে দাঁড়াইয়া

মুদ্র নোকার কণ্ঠ আকর্ষণ করিতেছিল ;—সে অত্যন্ত বিস্মিত হইয়া জিজ্ঞাসা করিল, “সে কি কথা, ছোট হুজুর !”

“সত্য কথা । কেনারাম ! বড় কর্তাকে বলিও, অন্নক্ষয়ের ভয়ে গৃহিণী আমাদিগকে বিদায় করিয়াছেন । ভূপেন্ ! কেনাকে একটা মোহর দে ।” ভূপেন্দ্র যখন বুদ্ধকে মোহর দিতে গেল, তখন কেনারাম তাহাকে জড়াইয়া ধরিয়া কাঁদিয়া উঠিল, এবং কহিল, “থোকা ভাট ! থোকা ভাই ! তুই কোথা যাবি ভাই ?”

আগন্তুক মুসলমান বিস্মিত হইয়া তাহাদিগের বিদায় অভিনয় দেখিতেছিলেন । তিনি এই সময় অসীমকে জিজ্ঞাসা করিলেন, “দোস্তু ! তোমরা কি দেশ ছাড়িয়া যাইতেছ ?” উত্তর হইল, “ই, জনাব !”

“কেন ?” “উদরাম উপার্জনের জন্য ।” “কোথায় যাইবে ?” “জনাব ! অপরাধ মাক্ করিবেন, এই প্রমুখীর উত্তর দিতে পারিব না । আর যাহা জিজ্ঞাসা করিবেন, তাহারই উত্তর পাইবেন ।” “এই বুদ্ধ নাবিক কে ?” “আমার পিতার পুরাতন ভৃত্য ।”

মোগল বস্ত্রমধ্য হইতে একটা থলিয়া বাহির করিয়া, কয়েকটা মুদ্রা অসীমকে প্রদান করিলেন এবং কহিলেন, “ইহা তোমার ভৃত্যকে দাও ।”

অসীম দেখিল মুদ্রা কয়টা স্বর্ণমুদ্রা । সে মোগলকে কহিল, “জনাব ! এ যে আশরুফি !”

মুসলমান কহিলেন, “তাহাতে কি হইয়াছে ?”

ক

“আমি মনে করিলাম যে, আপনি তুল করিয়া টাকার বদলে মোহর দিয়াছেন।”

“না, জানিয়াই দিয়াছি।”

ভূপেন্দ্র বহু কষ্টে বৃদ্ধ ধীবরের আলিঙ্গন-মুক্ত হইয়া সৈকত ত্যাগ করিল। নদীতীরে রাজপথে জনৈক মুসলমান অশ্বরোহী নিশ্চল পাষণ-প্রতিমার স্থায় দাঁড়াইয়া ছিল। মোগল তাহাকে দেখিয়া জিজ্ঞাসা করিলেন, “দোস্তু তুমি কি আহদী?” অশ্বরোহী তাহার কণ্ঠস্বর শুনিয়া, অশ্ব হইতে লাফাইয়া পড়িয়া অভিবাদন করিল। মোগল পুনর্বার জিজ্ঞাসা করিলেন, “তোমার নাম নাম কি?” অশ্বরোহী কহিল, “জনাব! আমি লুৎফুল্লা। আপনি ফিরেন নাই বলিয়া চারিদিকে সওয়ার ছুটিয়াছে।”

• “লালবাগ কতদূর?”

“পাও কোশ্।”

“আমি তোমার ঘোড়া লইয়া চলিলাম। তুমি এই দুইজন হিন্দুকে গোসলখানায় লইয়া আইস।”

চতুর্থ পরিচ্ছেদ

গৃহভাগ

হিজরার ১১২৫ সাল ভারতবর্ষের ইতিহাসে একটা চিরস্মরণীয় বৎসর। এই বৎসর আওরঙ্গজেবের পুত্র শাহ আলম বহাদুরের

মৃত্যু ও মোগল-গৌরব-রবির অবসান হইয়াছিল। এই সময়ে আওরঙ্গজেবের বংশধরগণের মধ্যে যে গৃহবিবাদ আরম্ভ হইয়াছিল, তাহার ফলে পঞ্চাশ বৎসরের মধ্যে দিল্লীর বাদশাহ দাক্ষিণাত্যবাসী মারাঠার ভিক্ষান্নভোজী হইয়া উঠিয়াছিলেন,— শাহজহানের বিশাল সাম্রাজ্য ধ্বংস হইয়া গিয়াছিল। শাহ আলম বহাদুর বৃদ্ধ বয়সে সিংহাসন লাভ করিয়াছিলেন ; এবং তাঁহার অভিষেকের সময় হইতেই তাঁহার পুত্রদিগের মধ্যে বিবাদের সূত্রপাত হইয়াছিল।

আওরঙ্গজেব যখন জীবিত, তখনই শাহ আলমের মধ্যম পুত্র আজীম-উশ্-শান পিতামহের প্রিয়পাত্র হইয়া উঠিয়াছিলেন। তিনি বহু কাল বাঙ্গলার সুবাদার ছিলেন। আওরঙ্গজেবের মৃত্যুর অল্প দিন পূর্বে তিনি তাঁহার দ্বিতীয় পুত্র ফরুক্‌সিয়রকে প্রতিনিধিস্বরূপ ঢাকায় রাখিয়া দিল্লী যাইতে আদিষ্ট হইয়াছিলেন। ফরুক্‌সিয়র কিছু দিন ঢাকায় বাস করিয়া, ১৭১২ খৃষ্টাব্দে অর্থাৎ ১১২৪ হিজরায় মুরশিদাবাদে আসিয়াছিলেন।

আওরঙ্গজেবের বিশ্বাসের পাত্র, মহারাষ্ট্রদেশে রাষ্ট্র-ব্যাপারে লক্ষপ্রতিষ্ঠ জফরকুলি খাঁ মুর্শিদকুলি খাঁ উপাধি পাইয়া সুবা বাঙ্গলা বিহার উড়িষ্যার রাজস্ব-বিভাগের দেওয়ান নিযুক্ত হইয়াছিলেন। তখন আজীম-উশ্-শান বাঙ্গলার সুবাদার। উক্ত প্রকৃতি আজীম-উশ্-শানের সহিত দেওয়ান মুর্শিদকুলির সম্ভাব ছিল না। অল্প কাল মধ্যে আজীম-উশ্-শান মুর্শিদকুলিকে হত্যাকরিবার চেষ্টা করিয়াছিলেন। দেওয়ান বাদশাহের অনুমতি

লইয়া ঢাকা বা জহাঙ্গীর নগর হইতে রাজস্ববিভাগ মখসুসাবাদে স্থানান্তরিত করিয়াছিলেন। আওরঙ্গজেবের রাজত্বকালে মখসুসাবাদ দেওয়ানের নামামুসারে মুর্শিদাবাদ নাম গ্রহণ করিয়া বাঙ্গলার একটা প্রধান নগর হইয়া উঠিয়াছিল। এই সময় হইতে ঢাকা শ্রীহীন হইতে আরম্ভ হয় ; এবং অল্প দিন মধ্যেই রাজধানী ও মুর্শিদাবাদে স্থানান্তরিত হয়।

বাদশাহী রাজস্ববিভাগ ঢাকা হইতে মুর্শিদাবাদে আসিলে, বহু উচ্চপদস্থ হিন্দু কর্মচারী পূর্ববঙ্গ পরিত্যাগ করিতে বাধ্য হইয়াছিলেন। তাঁহারা বিদেশে আসিয়া ধর্ম্মাঙ্ক মুর্শিদকুলির নগরে বাস করেন নাই। মুর্শিদকুলি বাদশাহ আওরঙ্গজেবের একজন প্রিয় ছাত্র। হিন্দুধর্ম্মের প্রতি তাঁহার বিদ্বেষ মরণকাল পর্য্যন্ত বিদ্যমান ছিল। এইজন্য কানুনগোই হরনারায়ণ রায় প্রমুখ কর্মচারিগণ ভাগীরথীর পশ্চিমপারে একখানি নূতন গ্রাম স্থাপন করিয়া তথায় বাস করিয়াছিলেন। এই গ্রামের নাম ডাহাপাড়া অর্থাৎ ঢাকাপাড়া। মোগল-সাম্রাজ্যের অতীত গৌরবের চিহ্নস্বরূপ ডাহাপাড়া গ্রাম এখনও মুর্শিদাবাদের পরপারে বিদ্যমান আছে।

১৭১২ খৃষ্টাব্দে ডাহাপাড়া একখানি গওগ্রাম ছিল। কানুনগোই হরনারায়ণ রায় তখন এই গ্রামের অধিকারী। তাঁহার পিতা হরিনারায়ণ রায় দীর্ঘকাল রাজস্ববিভাগ পরিচালনা করিয়া প্রভূত অর্থ ও যশোপার্জন করিয়া ছিলেন। তাঁহার মৃত্যুর পরে তাঁহার জ্যেষ্ঠ পুত্র হরনারায়ণ আওরঙ্গজেবের আদেশে কানুনগোই নিযুক্ত হইয়াছিলেন।

যেদিন পথভ্রান্ত মোগল ডাহাপাড়া গ্রামে আসিয়াছিলেন, সেইদিন রাত্রির দ্বিতীয় প্রহরের শেষভাগে হরনারায়ণ কাছারী করিয়া গৃহে ফিরিতেছিলেন। কাছুনগোইএর বৃহৎ ছিপ্ ডাহাপাড়ার ঘাটে আসিয়া লাগিল। চারি পাচজন মশালচি ঘাটে অপেক্ষা করিতেছিল। তাহারা ছিপ্ দেখিয়া মশাল জ্বালিল। মশালের আলোকে অন্ধকার ঘাট দিনের মত উজ্জ্বল হইয়া উঠিল। হরকরা, আসা ও সোটাবরদার-পরিবৃত হইয়া সুবা বাজলার কাছুনগোই হরনারায়ণরায় ছিপ্ হইতে নামিলেন। এই সময়ে ঘাটের পার্শ্বস্থিত বৃক্ষতল হইতে এক বৃক্ষ আসিয়া তাহার পদতলে আছাড়িয়া পড়িল। হরকরা ও আসাবরদারেরা তাহাকে তকাৎ করিয়া দিতেছিল,—কিন্তু হরনারায়ণ তাহাদের নিষেধ করিয়া, বৃক্ষকে জিজ্ঞাসা করিলেন, “কিরে কেনা, কি হইয়াছে?” বৃক্ষ কঁাদিতে-কঁাদিতে কহিল, “হজুর! সৰ্কনাশ হইয়াছে! ছোট কর্তা আর থোকাবাবু গ্রাম ছাড়িয়া চলিয়া গিয়াছে।”

“কোথায় গিয়াছে?” “তাহা ত বলিতে পারি না হজুর! তবে তাহারা একেবারে গিয়াছে, আর আশ্রয় নাই।” “তুই কেমন করিয়া বুঝিলি যে, আর আসিবে?” “আমাকে যে বলিয়া গেল।” “তাহারা কোন্ দিকে গেল, বলিতে পারিস?” “আমি পান্সী করিয়া তাহাদের লালবাগের ঘাটে রাখিয়া আসিয়াছি।” “লালবাগ?” “হাঁ, হজুর।” “সঙ্গে আর কে ছিল?” “একজন মুসলমান।” “মুসলমান কোথা হইবে?”

আসিল?" "তাহা বলিতে পারি না হজুর।" "সে দেখিতে কেমন?" "গোরবর্ণ, পাতলা চেহারা; অন্ধকারে মুখ ভাল দেখিতে পাই নাই। পিঠে বন্দুক আর ধনুক, কোমরে তলোয়ার।" "তুই কাদিস্ কেন?" "হজুর খোকাবাবু—"
"ভয় নাই, তুই ঘরে যা, আমি কালই তাহাদের ফিরাইয়া আনিব।"

বুদ্ধ ধীরে চোখ মুছিতে-মুছিতে বিদায় হইল। অন্তরবর্ণ-পরিবেষ্টিত হইয়া হরনারায়ণ গৃহে চলিলেন। তাঁহার অট্টালিকার নিম্নতলে বৈঠকখানায় এক প্রোঢ় ব্রাহ্মণ একাকী নিবিষ্ট মনে সতরঞ্চ খেলিতেছিল। সুবা বাঙ্গলার প্রতাপাসিত কাননগোই গৃহে ফিরিলেন,—আমলা চাকর নফর ব্যতিব্যস্ত হইয়া উঠিল,—কিন্তু ব্রাহ্মণের চৈতন্য হইল না। বৈঠকখানার দ্বারে দাঁড়াইয়া হরনারায়ণ তাহাকে জিজ্ঞাসা করিলেন, "কি ভট্‌চাক, এখনও বাড়ী ফির নাই যে?" ব্রাহ্মণ মুখ না তুলিয়াই কহিল, "তুমি যাও, যাও,—বিলম্ব করিও না,—কাপড় ছাড়িয়া আইস। এতক্ষণে তিনবাজি খেলা হইয়া যাইত।"

"রাত্রি কত, খবর আছে?"

"এই চারি দণ্ড।" "ঐ শোন, দ্বিতীয় প্রহরের নহবৎ বাজিল।" "দ্বিতীয় প্রহর? এত দেৱী করিয়া আসিলে কেন?" "আজ আসল তুমার জমা'র খসড়া শেষ হইল।" "ঝাড়ু মারি তুমার জমার মুখে। একটা দিন মাটি হইয়া গেল!" "তুমি পলাইও না। গুনিতেছি, অসীম ও ভূপেন চলিয়া

গিয়াছে। পরামর্শ করিয়া যাহা একটা ব্যবস্থা কারতে হইবে।”

হরনারায়ণ অন্তরে প্রবেশ করিলেন। কাছুনগোইএর প্রাসাদের দ্বিতীয় তলে প্রশস্ত দরদালানে বহু-নারী-পরিবেষ্টিত রায়গৃহিণী দরবার করিতেছিলেন। সেই দরবারে, কুলমহিলা ও দাসী-বেষ্টিতা গৃহিণীর মসনদের নিকটে একজন মাত্র পুরুষ বসিয়া ছিল। গৃহিণী সহস্র বদনে তাহার সহিত আলাপ করিতে ছিলেন। কর্তার পদশব্দ শুনিয়া গৃহিণীর প্রসন্ন মুখ সহসা অপ্রসন্ন হইয়া উঠিল। হরনারায়ণ দরদালানে প্রবেশ করিলে, অস্থচরীন্দ্র অবগুষ্ঠন টানিয়া পলাইল। নবীন ভূমিষ্ঠ হইয়া প্রণাম করিল, গৃহিণী মুখ বাকাইলেন। হরনারায়ণ যেন তাহা দেখিয়াও দেখিলেন না। তিনি হাসিয়া কহিলেন, “শুনিলাম, অসীম আর ভূপেন না কি রাগ করিয়া চলিয়া গিয়াছে?” গৃহিণীর বিপুল নাসিকায় বৃহৎ নথ প্রবল বেগে ঢুলিয়া উঠিল। ক্ষুদ্রকায় হরনারায়ণ প্রমাদ গণিলেন। তিনি পুনরায় কহিলেন, “ছোট কর্তার মাথাটা একটু বিগড়াইয়াছে বলিয়া বোধ হইতেছে।” এইবার গৃহিণীর সর্কাজ জলিয়া উঠিল। তিনি মুখ বিপরীত দিকে ফিরাইয়া, গুরুগম্ভীর কণ্ঠে কহিলেন, “আজ কিছুদিন দুধ দিয়া কালসাপ পোষ!” হরনারায়ণ এইবার সাহস পাইলেন। তিনি গৃহীণীর মসনদের দিকে অগ্রসর হইয়া জিজ্ঞাসা করিলেন, “যাইবায় সময় কি তোমাকে কিছু বলিয়া গিয়াছে?” গৃহিণীর মুখ ফিরিল না,—তিনি উত্তর দিলেন না। তাঁহার প্রিয় বয়স্কা

দাসী রতনমণি ঈষৎ অবগুষ্ঠন টানিয়া, দ্বারের অন্তরাল হইতে কহিল, “কর্তা ! আমাকে ঈশ্বরগঞ্জে পাঠাইয়া দেন,—আমি নিত্য-নিত্য মনিষের এত অপমান সহিতে পারিব না।” হরনারায়ণ তাহাকে দ্বিজাশা করিলেন, “কেন গো রতন ! আজ আবার কি হইল ?” রতন মুখ বাঁকাইয়া কহিল, “আজ ঈশ্বরগঞ্জের বাবুরা চোর হইয়াছে।” এইবার গৃহিণীর বরবপু ফিরিল, সর্ষাঙ্গের অলঙ্কার ঝঙ্কার করিয়া উটিল, তাঁহার রক্ত-নেত্রের ক্রুর দৃষ্টির উত্তাপে হরনারায়ণ যেন ঝলসিয়া গেলেন। গৃহিণী গর্জন করিয়া কহিলেন, “আর ঈশ্বরগঞ্জের চোদপুরুষের সংবাদটা বলিতে পারিলি না ?”

আওরঙ্গজেবের ছাত্র কূটনীতিবিশারদ হরনারায়ণ বুঝিলেন, যে রণনীতিকুশলা গৃহিণী দুর্ভেদ্য ব্যাহ সাজাইয়া বসিয়াছেন ; এখন ভ্রাতার পক্ষ অবলম্বন করিলে, তাঁহার পরাজয় নিশ্চিত। তখন তিনি বিচক্ষণ সেনাপতির ন্যায় সন্ধির ব্যবস্থা করিয়া কহিলেন, “তাই ত, ভাই বলিয়া এতদিন কিছু বলি নাই,—কিন্তু তাহার অত্যাচার ক্রমশঃ অসহ্য হইয়া উঠিয়াছে—” গৃহিণী অবসর বুঝিয়া হুঙ্কার করিয়া উঠিলেন। প্রিয়া দাসী রতনমণি অশ্রুহীন নেত্রে বস্ত্র মার্জনা করিয়া, তাহা রক্তবর্ণ করিয়া তুলিল। হরনারায়ণ এই অবসরে গৃহান্তরে পলায়নের উপক্রম করিতে ছিলেন ; তাহা দেখিয়া গৃহিণী বলিয়া উঠিলেন, “যাও কোথা, গুণের ভাইয়ের গুণের কথাটা একবার শুনিয়া যাও।”

“আবার কি ?” “আবার কি ! তোমার প্রাণের বন্ধু হরি-

নারায়ণের রূপসী, বিহ্বলী, সতীলক্ষ্মী কন্যা দুর্গা ঠাকুরাণীর সহিত—”

“রাখে মাধব, বল কি !”

“বলি কি, এই নবীনের মুখে শুন। আজ রাত্রিতে কিরীটে-
শ্বরীর পথের ধারে, ষষ্ঠিতলার মাঠে, গাছতলার অন্ধকারে
ভট্টাচার্য্যের কন্যা প্রাণেশ্বরের গলা জড়াইয়া হাপুস্ নয়নে
কাঁদিতোছিল। নবীন তাহার নিজের চোখে দেখিয়া আসিয়াছে,
নিজের কাণে শুনিয়া আসিয়াছে। দুর্গার প্রাণেশ্বর কে জান ?
তোমার সৌন্দর্য লক্ষণ !”

এই সময়ে নরহৃন্দরকুলতিলক নবীন বলিয়া উঠিল, “আজ্ঞে
হজুর, ভয়ে বলি, কি নির্ভয়ে বলি ? দুই দণ্ড রাত্রিতে ষষ্ঠিতলার
মাঠ পার হইতেছিলাম। কিরীটেশ্বরীর পথের ধারে ছোট হজুর
আর দুর্গা ঠাকুরাণী—”

হরনারায়ণ অবশিষ্টের জন্ত অপেক্ষা না করিয়া রণে ভঙ্গ দিলেন।

পঞ্চম পরিচ্ছেদ

অনুসন্ধান

সত্বর বস্ত্র পরিবর্তন করিয়া হরনারায়ণ অল্প পথে সদরে
কিরিয়া আসিলেন। বিচালকর তখন সতরঙ্গের গুটি সাজাইয়া
অপেক্ষা করিতেছিলেন, হরনারায়ণ তাঁহাকে দেখিয়া বলিলেন,
ভট্টাচার্য্য ! আজ হাতীর দাঁতের সতরঙ্গ উঠাও, দুনিয়ার সতরঙ্গ

খেলায় দুইটা বড় চাল দিতে চাহি, মাথাটা ঠাণ্ডা করিয়া “একটা পরামর্শ দাও দেখি?” বিজ্ঞানকার মস্তক সঞ্চালন করিয়া কহিলেন, “দেখ এ হাতীদাঁতের সতরঞ্জের তুল্য জিনিষ আর নাই; তুমি ইহার মর্ম্ম বুঝিয়াও বুঝিলে না। অনিত্য সংসার চিন্তায় দিন কাটাইলে, সংসারে তোমার কে আছে বল দেখি?” “বাজে কথা রাখ, এই সংসারে যতক্ষণ আছি, নিত্য হউক অনিত্য হউক, ততক্ষণ এই সংসারের চিন্তা লইয়াই থাকিতে হইবে। দেখ বিজ্ঞানকার, আজ এক চালে জ্ঞাতি শত্রু দুইটাকে বাড়ী হইতে তাড়াইয়াছি।” “কাজটা কি ভাল করিয়াছ ভাই?” তোমার মাতৃ-গর্ভজাত না হইলেও অসীম ও ভূপেন তোমার পিতার ঔরসজাত সন্তান। তুমি নিঃসন্তান, তোমার সন্তান লাভের আশা অতি অল্প। হরনারায়ণ! দিন ফুরাইয়া আসিয়াছে হিসাব নিকাশের সময় অতি নিকট, অনাথ বালক দুইটিকে কেন তাড়াইলে?” “আরে তুমি থাম হে? ভাল ধর্ম্ম শাস্ত্রের বক্তৃত্তা জুড়িয়া দিলে। কথাটাই অগে শুন।” “কি করিয়া তাড়াইলে?” “কর্ত্তার আমলের সোনা রূপায় বাসন যাহা ছিল তাহা ক্রমশঃ ঈশ্বরগঞ্জে সরাইতে ছিলাম, একটা পাঁচশত ভরির সোনার বাটা কর্ত্তা ব্যবহার করিতেন, আজ প্রাতঃকালে ভাণ্ডারীকে সেটা ঈশ্বরগঞ্জে পাঠাইয়া দিতে বলিয়া গিয়াছিলাম। যখন যাহা ঈশ্বরগঞ্জে যায় ভাণ্ডারী আমার হুকুম মত সে সংবাদটা অতি গোপনে অসীমকে দিয়া থাকে। বাকীটা গৃহিণীর কল্যানে অনুসন্ধান হইয়াছে; অসীম ভূপেনকে লইয়া বাড়ী

ছাড়িয়া চলিয়া গিয়াছে।” “আহা ভূপ একে অন্ধ তাহাতে আবার কখনও বিদেশে যায় নাই। পৈত্রিক তালুকের অংশটা দিবে ত?” “ভাল জালা, তাহাই যদি দিব তবে তোমার সহিত পরামর্শ করিতেছি কেন? দেখ আলমগীর বাদশাহ ফৌজ করিবার পরে তালুক মূলুক রক্ষা করা বড়ই কঠিন হইয়া পড়িয়াছে। অনেক ভাবিয়া চিন্তিয়া বিষয়ের অংশটা আমার নামেই লিখাইয়া লইয়াছি।” “একাজ্জ কবে করিলে?” “প্রায় এক বৎসর পূর্বে।” “অসীম যে লিখিয়া দিল?” “তাহাকে বুঝাইয়া দিলাম যে রকম দিন কাল পড়িয়াছে তাহাতে নাবালকের বিষয় রক্ষা করা একরকম অসম্ভব, বরঞ্চ সমস্ত তালুকটা যদি আমার নামে থাকে তাহা হইলে বাদশাহের কাছনগোই এর খাতিরে কেহ কিছু অনিষ্ট না করিতেও পারে। বাদশাহের বয়স সত্তর বৎসরের অধিক, তথু লইয়া শীঘ্রই আবার একটা গজকচ্ছপের লড়াই বাধিবে। দেশে শান্তি ফিরিয়া আসিলে তোমাদের অংশ আবার তোমাদের ফিরাইয়া দিব। এই কথা বলায় অসীম ও ভূপেন দুইজনেই পরগণে রোকনপুরের পাঁচ আনা ছয়গুণ এক কড়া এক ক্রান্তি অংশ আম ব মানে লিখিয়া দিয়াছে।”

“হর! তুমি আমার বাল্য বন্ধু। একটা কথা তোমাকে অনেক দিন ধরিয়া বলিয়া আসিতেছি কিন্তু তাহাত কখনো কানে তুলিলে না? দেখ, তোমার পিতার অল্পে একদিন জাহাজ নগরের অর্ধেক লোক প্রতিপালিত হইত। তাঁহার তালু

পরগণে রোকণপুর একটা রাজার রাজ্য বলিলেও চলে, তাঁহার মত সোনা রূপার আসবাব অনেক আমীরের ঘরেও নাই। তুমি তাঁহার জ্যেষ্ঠ পুত্র, তাঁহার পদ পাইয়াছ, তুমি হিন্দুস্থানের একজন আমীর, বাদশাহের মনসব্দার, তোমার দর্শন লাভের জন্য বাদশা বিহার উড়িষ্যার জমিদার মাঝেই লালায়িত। তোমার অভাব কি? তুমি কিসের জন্য, কি অভাবের জন্য অসৎপথ অবলম্বন কর? অসীম ও ভূপেন তোমার অবর্ত্তমানে এই বিশাল ধন সম্পদের অধিকারী হইবে, দেশে ধর্ম থাকিতে বা শাস্ত্র থাকিতে কেহ তাহাদিগকে অধিকারে বঞ্চিত করিতে পারিবে না। তুমি আর কয় দিন? এই দুইদিনের জন্য মিথ্যা শঠতা ও প্রবঞ্চনার আশ্রয় লইয়া ভাই দুইটাকে কেন পৈত্রিক বিষয়ে বঞ্চিত করিলে? বিষয় তোমার কি হইবে?”

“আরে খাম ঠাকুর, ধর্ম শাস্ত্র একটু রাখ। বিষয় বুদ্ধি ব্রাহ্মণের কখনো হয় না, হইবেও না। দেখ বিদ্যালঙ্কার, বিদ্যা তোমার অলঙ্কার হইতে পারে কিন্তু বুদ্ধিটা তোমার নিতান্তই স্বল্প, একেবারে লোপ পাইয়াছে বলিলেই চলে। এই সংসারে কে কাহার, এইমাত্র সার আমি আমার। মাতাপিতা দারাসুত সমস্তই মিথ্যা, নিত্য কেবল আমি। আমার স্বথ, ঐহিক পারত্রিক কায়িক মানসিক, ইহাই জগতের সার, এই সংসারে এক মাত্র কাম্য বস্তু। দেখ ভট্টাচার্য্য! পরগণে রোকণপুরের পাঁচ ছয়গুণ এককড়া একক্রান্তির মালিক হইয়া স্বথ নাই, ঘোল-আনার মালিক হওয়া চাই। একখানা কঘলে দশজন ফকিরের

স্থান অতি সহজেই হয়, কিন্তু অতি ক্ষুদ্রতম রাজ্যেও একাধিক রাজার স্থান হয় না। পাঁচশত তোলা সোনার পানদানে আমার একশত ছয়টি তোলা আছে বটে কিন্তু তাহা লইয়া ত মন খুলিয়া পানদানটা ব্যবহার করা যায় না? এই জন্ত ছলে কৌশলে জ্ঞাতি শত্রুর অধিকার নষ্ট করিয়াছি।”

“তবে আর আমাকে জিজ্ঞাসা করিতেছ কেন?”

“একটু কারণ আছে, বড়ই দুঃসময় পড়িয়াছে। বাদশাহের মৃত্যুর অধিক বিলম্ব নাই, যে রকম অবস্থা বুঝিতেছি তাহাতে শাহজাদা আজীম-উশ্-শানের বাদশাহ হইবার সম্ভাবনাই অধিক। দলিল খানা নবাবের সহি মোহর করাইয়া লইয়াছি বটে কিন্তু মুর্শিদকুলির সহিত আজীম-উশ্-শানের যে প্রেম তাহাত তোমার অবিদিত নাই? আজীম-উশ্-শান বাদশাহ হইলে মুর্শিদ কুলির নবাবী যাইবে, বৃদ্ধ উজীর আসদ্ খাঁ এখনো জীবিত। তখন কি করিব?”

“লোভে পাপ, পাপে মৃত্যু, তখন মরিবে।”

“তাহার জন্যত ভট্টাচার্য্যের পরামর্শের প্রয়োজন নাই, এখন কি করি বল দেখি?”

“আর একটা কথা ভাব নাই, ভাগিরথীর পর পারে লাল বাগে আজীম-উশ্-শানের পুত্র বসিয়া আছে। আজ যদি বাদশাহের মৃত্যু হয় কাল আজীম-উশ্-শান বাদশাহ হইলে, আসদ্ খাঁ রাজপ্রতিনিধি হইবে, মহম্মদ করিম ময়ূর সিংহাসনে পার্শ্বে বসিবে আর ফররুখসিয়ার তোমার দণ্ড মুণ্ডের দ্বিগুণ

হইবে। আজ যদি অসীম ফরুক্‌খানিরের দরবারে উপস্থিত হইয়া থাকে তাহা হইলে কাল তোমাকে পথের ভিখারী হইতে হইবে।”

“ভট্টচাঁদ ! একথা ত একবার মনে হয় নাই।”

• “এখনই যাও, যেমন করিয়া পার তাহাদের ফিরাইয়া আন।” হরনারায়ণ ডাকিলেন “চোপদার।” চোপদার আসিল, তিনি আদেশ করিলেন “বড় ছিপ এক দণ্ডের মধ্যে তৈয়ার করিতে বল।”

রজনীর তৃতীয় প্রহরে হরনারায়ণ রায় স্বকৃত কর্মের প্রায়শ্চিত্ত করিতে লালবাগ যাত্রা করিলেন।

ষষ্ঠ পরিচ্ছেদ

রাজদর্শন

তৃতীয় প্রহর রাত্রিতে একজন ক্ষুদ্রকায় হিন্দু লালবাগের চারিদিকের আশ্রয়স্থানমধ্যে সেনানিবাসে ঘুরিয়া বেড়াইতেছিল। তখন অধিকাংশ লোক ঘুমাইয়া পড়িয়াছে। যে দুই-একজন জাগিয়া ছিল, হিন্দু তাহাদিগকে বলিতেছিল, “আমাকে শাহজাদার সহিত সাক্ষাৎ করাইয়া দিতে পার ?” কেহই তাহার কথায় কর্ণপাত করিল না। অবশেষে একজন দয়াপরবশ হইয়া কহিল, “দেখ বাপু। তৃতীয় প্রহর রাত্রিতে শাহজাদার সহিত

সাক্ষাৎ করিতে হইলে এক থলিয়া আশরফি খরচ করিতে হইবে, পারিবে ?” হিন্দু বিস্মিত না হইয়া কহিল, “পারি না পারি চেষ্টা করিয়া দেখিব।”

“নগদ একখানি আশরফি যদি খরচ করিতে পার, তাহা হইলে তোমাকে লুৎফুল্লাখীর তাম্বুতে লইয়া যাইব। সেখানে পরামর্শ পাইতে পার, কিন্তু তাহার মূল্য অন্ততঃ পাঁচ আশরফি।”

“পাঁচ আশরফি দিয়া ত পরামর্শ লইব, লইয়া কি করিব ?”

“দোস্ত ! তোমার অদৃষ্টে আজ শাহজাদার সহিত সাক্ষাৎ নাই দেখিতেছি। তুমি একটা কাজ কর—নগদ একটা আশরফি খরচ করিয়া ফেল,—তাহা হইলে হয় ত হাত খুলিয়া যাইতে পারে।”

আগন্তুক বাক্যব্যয় না করিয়া একটা আশরফি সৈনিককে দিল। সৈনিক সেটিকে দীপালোকে উত্তমরূপে পরীক্ষা করিয়া জিজ্ঞাসা করিল, “দোস্ত ! তোমার আশরফিটা জাল নহে ত ?” হিন্দু হাসিয়া কহিল, “পরীক্ষা করিয়া ত দেখিলে, কি রকম বুঝিলে ?”

“বিশেষ কিছু বুঝিলাম না ; কারণ, শাহজাদা ফরুখ-সিয়র বলিয়া বলিলেও হয়। আমাদের লঙ্করে বক্সীরাই খাইতে পায় না, তা, আমরা ত আহদী !” শাহজাদা আজীম-উশ-শান্ সত্য-সত্যই শাহজাদা ছিল, তাঁহার আমলে দুই-চারিটা আশরফি দেখিতে পাওয়া যাইত।

“ভাল, এখন কি করিব বল ?”

“দেখ, ঐ সম্মুখের আম গাছের নীচে লুৎফুল্লাখাঁর তাম্বু,—
সটান সেখানে চলিয়া যাও,—লম্বা একটা কুণীস করিয়া পাঁচখানা
মোহর নজর পেশ কর, আর বল যে যেমন করিয়া হউক শাহ-
জাদার সাক্ষাৎ মিলা চাই।”

•“তাহার পর?”

“তাহার পর আর কি? যাইবার সময় আমাকে ভুলিও না।”

আগন্তুক সৈনিক-নির্দিষ্ট শিবিরের দিকে অগ্রসর হইল,—
দূর হইতে এস্রাজের আওয়াজ তাহার কাণে পৌছিল। সে
নিকটে গিয়া দেখিল যে, তাম্বুর ভিতরে একজন দীর্ঘাকার মানুষ
এস্রাজ বাজাইবার চেষ্টা করিতেছে। আগন্তুক বাহিরে দাঁড়াইয়া
অভিবাদন করিল এবং পাঁচখানা মোহর এস্রাজের সম্মুখে রাখিল।
স্বর্ণের গধুর নিকন শুনিয়া লুৎফুল্লাখাঁর চক্ষু জলিয়া উঠিল,—খাঁ-
সাহেব এস্রাজ নামাইয়া আগন্তুককে অভ্যর্থনা করিল। সে কহিল,
“আসুন, বসুন।” হিন্দু অত্যন্ত কুণ্ঠিত হইয়া কহিল, “সে কি কথা,
এমন গোস্তাকী কি আমি করিতে পারি? আপনার সম্মুখে
বসিব? তাহার পূর্বে নিজের মাথাটাই নিজে কাটিয়া ফেলিব।
আমি নিতান্ত নাচার হইয়া আপনার আশ্রয়ে আসিয়াছি।”

“কি করিতে হইবে বলুন?”

“যেমন করিয়া হউক একবার শাহজাদার সহিত সাক্ষাৎ
করাইয়া দিতে হইবে।”

“কাজটা অত্যন্ত কঠিন,—আহমদবেগকে অন্ততঃ দশ
আশরফি দিতে হইবে।”

আগন্তুক দশখানা মোহর বাহির করিয়া এস্তাজের পাশে রাখিল। লুৎফুল্লা আশরফি কয়খানা বস্ত্রের মধ্যে লুকাইয়া কহিল, “আফ্রাসিয়াব খাঁও কি দশ আশরফির কমে ছাড়িবে?” আগন্তুক এইবার একটু হাসিল এবং জিজ্ঞাসা করিল, “মোট কত খরচ হইবে খাঁ-সাহেব?” লুৎফুল্লা বহুক্ষণ ধরিয়া মন্তক কণ্ঠয়ন করিয়া স্থির করিল যে, পঞ্চাশখানা মোহরের অধিক দাবী করিলে শিকার হাত-ছাড়া হইতে পারে; অতএব দশখান পাওয়া গিয়াছে, আরো চল্লিশখান দাবী করা যাইতে পারে। সে প্রকাশে বলিল, “আমাকে বাহা দিয়াছেন, তাহা ছাড়া আরো চল্লিশখান মোহর লাগিবে।” আগন্তুক কহিল, “দিতে স্বীকার আছি; কিন্তু অর্দ্ধেকের অধিক অগ্রিম দিতে পারিব না।”

“উত্তম কথা। আপনি এখানে অপেক্ষা করুন,—আমি শাহজাদার সহিত নাস্কাতের ব্যবস্থা করিতে চলিলাম।”

“আগন্তুকের নিকট হইতে আরো দশখান মোহর লইয়া লুৎফুল্লা খাঁ হুটুচিতে লালবাগে প্রবেশ করিল। আগন্তুক তাহুর মধ্যে প্রবেশ করিয়া এক গালিচায় উপবেশন করিল।

তখন রজনীর তৃতীয় প্রহর প্রায় শেষ হইয়া আসিয়াছে,— লালবাগের ভিতর মহলের আলো নিবিয়া গিয়াছে। কেবল ভাগীরথী-তীরে বিলাস-গৃহ আলোকোজ্জ্বল,—সুকণ্ঠা গায়িকার কলকণ্ঠাখিত মধুর সঙ্গীত-ধ্বনি যেন দিগন্ত মুগ্ধ করিয়া রাখিয়া লুৎফুল্লা খাঁ কক্ষে প্রবেশ করিয়া শাহজাদাকে অভিবাদন করি

এবং আফ্রাসিয়াব খাঁর নিকটে গিয়া বসিল। আফ্রাসিয়াব খাঁ অত্যন্ত বিরক্ত হইল এবং সেই বিরক্তি জ্ঞাপন করিবার জন্য লুৎফুল্লা খাঁর দিকে পিছন ফিরিয়া বসিল। লুৎফুল্লা তখন একখানি আশরফি বাহির করিয়া তাহা আফ্রাসিয়াব খাঁর ক্রোড়ে ফেলিয়া দিল। মজলিসের মধ্যে আহমদবেগ ও আফ্রাসিয়াব ব্যতীত আর কেহ আশরফি দেখিতে পাইল না। আফ্রাসিয়াব আশরফি পাইয়া একটু নরম হইল। তখন সুযোগ বুঝিয়া লুৎফুল্লা অতি ধীরে তাহার কর্ণমূলে কহিল, “জনাব! একবার বাহিরে আসিবেন কি?” আফ্রাসিয়াব খাঁ উঠিল, লুৎফুল্লাও তাঁহার পশ্চাৎ-পশ্চাৎ আসিল, এবং একটী-একটী করিয়া আর নয়টী আশরফি আফ্রাসিয়াবের হাতে গণিয়া দিয়া কহিল, “জনাব আলি! গোলামের গোস্তাকী মাক হয়, বিশেষ গরজ না থাকিলে আপনাকে এত তকলিফ দিতাম না। একজন হিন্দু শাহজাদার সহিত সাক্ষাৎ করিতে চাহে।”

“কত দিবে বলিয়াছে?”

“দশ আশরফি।”

“তাহাতে হইবে না,—আহমদ আশরফি দেখিয়াছে।”

“তাহাকেও দশ আশরফি দেওয়াইব।”

তুমি বাহিরে অপেক্ষা কর, আমি চেষ্টা করিয়া দেখি।

আফ্রাসিয়াব খাঁ কক্ষে ফিরিয়া গেল এবং আহমদ বেগকে লইয়া ফিরিয়া আসিল। সেই সঙ্গে আর এক ব্যক্তি মজলিস হইতে উঠিয়া আসিল; কিন্তু তাহারা কেহ তাহাকে দেখিতে পাইল না।

রজনীর তৃতীয় প্রহর শেষ হইল,—আম্রকাননে অনেকগুলো পেঁচক ডাকিয়া উঠিল,—আহমদবেগ শিহরিয়া উঠিল। তাহা আফ্রাসিয়াব খাঁ হাসিয়া কহিল, “কি খাঁ সাহেব! ভয় পাইলে না কি?” খাঁ সাহেব ভূমিতে নিষ্টিবন ত্যাগ করিয়া কহিল, “এই চিড়িয়াগুলি আমার দুঃস্বপ্ন। সে কথা যাক, কি বলিতে-ছিলে বল?”

“একজন কাকের শাহজাদার সঙ্গে দেখা করিতে চাহে,—
নগদ দশ আশরফি পেশ কশ্।”

আহমদ অভ্যাসবশতঃ হাত পাতিয়া জিজ্ঞাসা করিল, “কই?” তখন আফ্রাসিয়াব খাঁ লুৎফুল্লাখাঁকে ডাকিয়া তাহার নিকট হইতে আরো দশ আশরফি লইল এবং তাহা আহমদবেগকে দিল। আহমদবেগ প্রসন্ন হইয়া কহিল, “তোমার কাকেরকে ডাকিয়া আন, আমি জনাব আলিকে রাজী করিতেছি।” লুৎফুল্লাখাঁ উজানের বাহিরে চলিয়া গেল এবং অপর দুইজন বিলাস-গৃহে পুনঃ প্রবেশ করিল। যে অন্ধকারে লুক্কায়িত থাকিয়া ইহাদিগের কথোপকথন শুনিতেছিল, সে বাহিরে আসিয়া একটা মশাল জালিল; এবং তাহা একজন হরকরার হাতে দিয়া তাহাকে ঘাটের উপর দাঁড়াইতে আদেশ করিল; এবং বলিয়া দিল যে, কেহ কারণ জিজ্ঞাসা করিলে সে যেন বলে, সে শাহজাদার আদেশে দাঁড়াইয়া আছে।

সে ব্যক্তি যখন বিশ্রামগৃহে প্রবেশ করিল, তখন আ.
বেগের অনুরোধে কবুখুসিয়র হিন্দুকে দর্শন দিতে স্বীক

হইয়াছেন। এই সময়ে সেই ব্যক্তি শাহজাদার কর্ণমূলে অঙ্গুষ্ঠ
স্বরে কি কহিল। তাহা শুনিয়া শাহজাদা আহমদ বেগকে
কহিলেন, “বেশ। ঘাটের উপরে চৌকি দিতে বল,—সেইস্থানে
‘হিন্দুর সহিত সাক্ষাৎ করিব।’”

সপ্তম পরিচ্ছেদ

দিল্লী যাত্রা

রাত্রি শেষ হইয়া আসিয়াছে। লালবাগে ঘাটের উপরে
হরকরা তখনও মশাল ধরিয়া দাঁড়াইয়া আছে। ঘাটের নীচে
খাওয়ার ছিঁপে পূর্বদেশের নাবিকেরা অল্পস্বরে কথা
কহিতেছে। শাহজাদা ফরুখসিয়র চন্দন-কাঠ-নির্মিত বিভূত
আসনে বসিয়া আছেন। তাঁহার সম্মুখে দাঁড়াইয়া একজন থকা-
কৃতি হিন্দু তাঁহার প্রশ্নের উত্তর দিতেছে। সহসা একজন নাবিক
কিঞ্চিৎ উচ্চ স্বরে কথা কহিয়া উঠিল। তৎক্ষণাৎ হরকরা
হাঁকিল, ‘সুম্‌সাম্‌। একজন খাওয়াম্‌ দ্রুতপদে নীচে নামিয়া
গেল।

শাহজাদা জিজ্ঞাসা করিতেছিলেন, “তোমার নাম কি?”

হিন্দু কহিল, “আমার নাম হরনারায়ণ রায়।”

“তোমার কি পেশা?”

“আমরা পুরুষাত্মকমে বাদশাহের গোলাম। স্বর্গগত শাহ-

জহান্ন বাদশাহের আমল হইতে আমরা রাজস্ব বিভাগে বন্দী
করিয়া আসিতেছি।”

“তুমি কি কাজ কর?”

“আমি হুবা বাজলার কানুনগোই।”

এই সময়ে পাঁচখানি ছিপ আসিয়া ঘাটের নীচে লাগিল। যে
খাওয়াস্ নীচে নামিয়া গিয়াছিল, সে তাহার একখানিতে উঠিয়া
অতুল স্বরে জিজ্ঞাসা করিল, “শেঠ মাণিকচাঁদ কোথায়?” শেঠ
অত্র একখানি ছিপে ছিলেন; তিনি কহিলেন, “আমি এখানে,
—কাঁটা কি নোকাতেই লাগাইব না কি?” খাওয়াস্ তাহার
নিকটে গিয়া কহিল, “চূপ শেঠজি! ঐ লোকটা কে বলিতে
পার?” যে ক্ষুদ্রকায় হিন্দু শাহজাদার সহিত বাক্যালাপ করিতে-
ছিল, দূর হইতে তাহাকে দেখিয়া মাণিকচাঁদের মুখ শুকাইল,
“সর্বনাশ! খাঁসাহেব, উহাকে চিন না?” খাওয়াস্ বিস্মিত
হইয়া কহিল, “না।”

“মুর্শিদকুলির বিশ্বস্ত অমুচর, দেওয়ানী শেরেস্তার প্রধান
কর্মচারী এবং আমার প্রধান শত্রু কানুনগোই হরনারায়ণ রায়।”

“দেখ শেঠজি, রাত্রি বলিয়া প্রথমে লোকটাকে চিনিতে
পারি নাই। লোকটা একদিন শাহজাদার দরবারে আসিয়াছিল
বটে। কি মূল্যবে আসিয়াছে বলিতে পার?”

“নিশ্চয় টাকার সন্ধান পাইয়াছে।”

“তোমরা টাকার কথাটাই পূর্বে ভাব, কিন্তু সামান্য টাকার
জন্ত কানুনগোইএর মত পদস্থ ব্যক্তি এত রাত্রিতে শাহজাদার

সহিত সাক্ষাৎ করিতে চাহিবে কেন? দেওয়ানের পেশ্কার তোমাকে ডাকিয়া আনিলেই পারিত; এবং তোমাকে নিষেধ করিয়া দিলেই তোমার হাত বন্ধ হইয়া যাইত। এ ব্যক্তি নিশ্চয় অন্য কোন মতলবে আসিয়াছে।”

এই সময়ে গঙ্গাবক্ষে আর একখানি ছিপ্ হইতে একজন পূর্বদেশীয় মাল্লা হাঁকিল, “ইলাকা শাহান্শাহী নাওয়ারা,—ছিপ্ তকাং।” অন্ধকারে আর একখানি ছিপ্ অতি দ্রুতবেগে আসিতেছিল,—তাহা হইতে একজন উত্তর দিল, “আমল্ শাহান্শাহী-পথ ছাড়।” তৎক্ষণাৎ বহু নাবিক একত্র হইয়া ছিপের জন্ত পথ করিয়া দিল। দেখিতে দেখিতে ছিপখানি ষাটে আসিয়া লাগিল। খাওয়াম্ মানিকচাঁদকে কহিল, “তুমি অন্ধকারে লুকাইয়া থাক,—বাপারটা কি জানিয়া আসি।” ছিপ্ ষাটে লাগিলে সে কর্ণধারকে জিজ্ঞাসা করিল, “ছিপ্ কোথাকার?” কর্ণধার কহিল, “বিহারের স্বেদারের; খাম্ দরবার হইতে রোকা আসিয়াছে।” একজন দীর্ঘাকার তুরানী ছিপ্ হইতে উঠিয়া কহিল, “দিন দুনিয়ার মালেক হিন্দুস্থানের বাদশাহ শাহআলম বহাদর শাহের জয় হউক।” খাওয়াম্ কহিল, “কে, রৌশন্ খাঁ?”

“হা জনাব, মেহেরবান সাহেবজাদাকে এখনই এস্তালা দিতে হইবে।”

“এস্তালা দিতেছি, শাহাজাদা এখনো শয়ন করেন নাই।”

“বাচিলাম! এক মাসে লাহোর হইতে আসিয়াছি।

অসীম

শাহজাদার হুকুম, সাহেবজাদা যেখানেই থাকেন, সেইখানেই তাঁহাকে রোকা পৌছাইয়া দিতে হইবে।”

“রোকা বড়ই জরুরি দেখিতেছি?”

“অনেক কথা আছে, পরে জানাইব।”

খাওয়াস্ ঘাটের উপরে উঠিয়া একজন চোপদারকে ডাকিল। চোপদার দশ-বারজন হরকরা লইয়া ঘাটের দুই পাশে দাঁড়াইল। তখন খাওয়াস্ করুখসিয়রকে অভিবাদন করিয়া কহিল, “জনাব! জঁহাপনা শাহানশাহের হুকুম লাহোর হইতে শাহানশাহী আহদী রোশনে দুনিয়ার হুকুমনামা লইয়া আসিয়াছে।

করুখসিয়র তাহা শুনিয়া কহিলেন, “হরনারায়ণ। তোমার সহিত কথা কহিয়া অভ্যস্ত প্রীত হইলাম। তোমার যদি কিছু আরজী থাকে তাহা অত্র সময় শুনিব। রাত্রি অধিক হইয়াছে পিতার নিকট হইতে জরুরী সংবাদ আসিয়াছে। এখন হইতে তুমি যখনই আসিবে, তখনই আমার সাক্ষাৎ পাইবে।”

হরনারায়ণ এতক্ষণ মিষ্ট কথায় শাহজাদাকে তুষ্ট করিতে-ছিলেন, ভাই দুইটীর কথা তুলিবার সময় পান নাই। শাহজাদার কথা শুনিয়া দুঃখিত মনে বিদায় গ্রহণ করিলেন। লাহোর হইতে যে আহদী পত্র লইয়া আসিয়াছিল, সে দূরে অপেক্ষা করিতেছিল। হরনারায়ণ দূরে চলিয়া গেলে, সে নিকটে আসিল, এবং অভিবাদন করিয়া দাঁড়াইল। খাওয়াস্ রূপ

খালায় করিয়া পত্র লইয়া ফরুকখসিয়রের সম্মুখে ধরিল। তখন তিনি তাহা গ্রহণ করিলেন।

পত্রপাঠ করিয়া ফরুকখসিয়রের মুখ শুকাইল। তিনি বিকৃত কণ্ঠে খাওয়াস্কে কহিলেন, “আহমদ বেগকে ডাকিয়া আন।” আহমদ বেগ আসিলে ফরুকখসিয়র তাঁহাকে কহিলেন, “সংবাদ অশুভ, বাদশাহের শরীরের অবস্থা দিন দিন মন্দ হইতেছে। পিতা আগাকে এখনই দিল্লী যাইতে আদেশ করিয়াছেন।”

আহমদবেগ বিস্মিত হইয়া জিজ্ঞাসা করিলেন, “দিল্লী যাইতে হইবে, এখনই?” পাত্রবাহক আহদী কহিল, “জনাব! শাহজাদার হুকুম, আপনি বিলম্ব না করিয়া সমস্ত ফৌজ লইয়া দিল্লী যাইবেন।”

• আহমদ। সমস্ত ফৌজ লইয়া যাইতে হইলে অনেক টাকার প্রয়োজন।

ফরুকখসিয়র। কত টাকা প্রয়োজন?

আহমদ। হিসাব করা আমার পক্ষে একেবারে অসম্ভব। বখ্শীকে ডাকিব কি?

ফরুকখসিয়র। বখ্শীকে ডাকিলে কি হইবে, আন্দাজ করিয়া বলিতে পার না?

আহমদ। শাহজাদা! এত বিদ্যা থাকিলে এতদিন সুবাদার হইতাম। আসদ খাঁ অশুগ্রহ করিয়া বখ্শী করিবেন বলিয়া-
ন, কিন্তু বিদ্যার দোড় দেখিয়া জুল্ফিকার খাঁ তাড়াইয়া
ল।

খাওয়াস্। জনাব! গোলামের গোস্তাকী মাফ হয়, সমস্ত সুবাদারী ফৌজ দিল্লী লইয়া যাইতে হইলে সর্বসম্মত অন্ততঃ পঞ্চাশ লক্ষ টাকার প্রয়োজন।

ফরুকখসিয়র। সমস্ত ফৌজ লইয়া গেলে চলিবে কেন?

আহমদ। তবে কত ফৌজ লইয়া যাইবেন?

ফরুকখসিয়র। অর্ধেক।

আহমদ। তাহা হইলে পঁচিশ লাখ টাকা।

ফরুকখসিয়র। তহবিলে কত টাকা আছে?

খাওয়াস্। দুই তিন হাজারের অধিক নহে। তবে শেঠাণিকচাঁদ বোধ হয় সমস্ত টাকাই আনিয়াছে।

ফরুকখসিয়র। দশ লক্ষ।

খাওয়াস্। জনাব!

ফরুকখসিয়র। আহমদ বেগ! এখন উপায়?

আহমদ। চিন্তা কি জনাব? যে টাকা আসিয়াছে তাহা লইয়া এলাহাবাদ পৌছিতে পারিব, সেখানে সৈয়দ আব্দুল্লা খাঁ আছেন, ছবেলারাম নাগর আছে, ইটাবাতে আলি আশগর খাঁ আছে। পথে টাকার প্রয়োজন হয় পাটনায় হোসেন আলি খাঁ আছেন।

ফরুকখসিয়র। আহমদবেগ! তোমার বুদ্ধি-সুদ্ধি একেবারে লোপ পায় নাই দেখিতেছি। আমি এখনই যাত্রা করিয়া কুচের জুম জারি কর।

দাঁটে

রাত্রিশেষে লালবাগের চারিদিকে আশ্রয়কাননে

বাজিয়া উঠিল। তাহা শুনিয়া চারিদিকের গ্রামবাসী গ্রাম ছাড়িয়া পলাইতে আরম্ভ করিল, কারণ বাদশাহী আমলের মোগল সেনা যে পথে চলিত, সে পথে চারিদিকে এক ক্রোশের মধ্যে লোকের মানসম্মত রক্ষা করা অসম্ভব হইত। চারিদিকে হাজার-হাজার মশাল জালিয়া, সেনাগণ তাম্বু নামাইয়া বাঁধিতে আরম্ভ করিল, আহাদীগণ গরুর গাড়ীর সন্ধানে বাহির হইল, শকটচালক প্রহার হজম করিয়া বলদ খুঁজিতে গেল, তখন শাহজাদা ফরুখসিয়র বিলাসকক্ষে প্রবেশ করিয়া নর্ত্তকীগণকে বিদায় দিলেন, এবং অসীম ও তাহার ভ্রাতাকে জিজ্ঞাসা করিলেন, “আমি এখনই মুশিদাবাদ পরিত্যাগ করিব, তোমরা কোথায় যাইবে?” উভয়ে কহিল, “শাহজাদার অনুমতি হইলে আমরা দিল্লী যাইব।”

“তবে আমার সহিত চল, আমিও দিল্লী যাইব। অনেক দূর একসঙ্গে যাইব, তোমাদের মত গুণবান সঙ্গী পাইলে গীতবাঞ্চে আনন্দে দিন কাটিয়া যাইবে।”

পরদিন প্রত্যুষে সুবা বাঙ্গালার রাজস্ব বিভাগের দেওয়ান মুশিদকুলি খাঁ নূতন নগরে প্রাসাদের বাতায়ন পথে দেখিলেন যে সুবাদারী ফৌজ বাদশাহী নাকরা বাজাইয়া উত্তর দিকে চলিয়াছে।

অষ্টম পরিচ্ছেদ

গঙ্গাতীর

শীতের প্রারম্ভ ; শিবিরের ঘন আবরণে শ্রামল দূর্বাদল শুভ্র হইয়া উঠিয়াছে। তখনও সূর্য্যোদয় হয় নাই ; প্রথম উষার ক্ষীণ শুভ্রালোকে মুর্শিদাবাদের পরপারে ভাগীরথীতীরে এক শুভ্রবসনা শ্রামাদ্বী রমণী দেব-পূজার জন্ত পুষ্পচয়ন করিতে ছিলেন। উগানের নিম্নে ক্ষীণকায়া ভাগীরথী প্রবাহিতা। একটী-দুইটী করিয়া স্নানার্থিনী কুলললনাগণ গঙ্গাতীরে আসিতে ছিলেন। রমণীর মন সেদিকে ছিল না ; তিনি একাগ্রচিত্তে কুসুমচয়নে নিযুক্ত ছিলেন। এক দীর্ঘকায়া রমণী বহুমূল্যের শালে আত্মগোপন করিয়া গঙ্গাতীরে যাইতেছিল। তিনি পূর্বোক্ত রমণীকে দেখিয়া জিজ্ঞাসা করিলেন, “কে গা ?” প্রথমা প্রশ্নকর্ত্রীর দিকে ফিরিয়া চাহিলেন। প্রশ্নকর্ত্রী পুনরায় বলিয়া উঠিলেন, “ওমা, বিচালঙ্কার ঠাকুরের মেয়ে দুর্গা ! তুমি এই শেষ রাত্রিতে কি করিতেছ বাছা ?” প্রথমা ঈষৎ হাসিয়া কহিলেন, “শেষ রাত্রি কি জেঠাই-মা ? সূর্য্য উঠিতে কি আর বিলম্ব আছে ? ঐ দেখ, ইহারই মধ্যে আম-গাছের উপরের ডালে রৌদ্রের আভা পড়িয়াছে।”

“ওমা, তাই বুঝি ! আমি ভাবিতেছি, সবে চারি প্রহর শেষ হইয়াছে। আহা ! কাল রা’তে ঘুমাইতে পারিস না বুঝি ?

“কেন ঘুমাইতে পারিব না জেঠাই-মা ?”

“এই নানান রকম দুর্ভাবনায়-দুশ্চিন্তায়-আর কি !”

“কিসের দুর্ভাবনা,—দুর্ভাবনা শত্রুর হউক ।”

“তোমার এই বয়স—এখন সাধ-আহ্লাদ করিবার সময় তাহার বদলে ভগবান তোকে কি করিয়া রাখিয়াছে বল দেখি ।”

“সকলের অদৃষ্ট কি এক রকম জেঠাই-মা ? আর-জন্মে যাহা করিয়াছি, এই জন্মে তাহার ফল পাইতেছি,—তাহার জন্য দুঃখ কি ? ভগবান দাদার সংসার বজায় রাখুন, তাহা হইলেই আমার সব দিক বজায় থাকিবে ।”

“তা ত বটেই, তা ত বটেই ! তবুও আমাদের মন কি মুখে মা ?” এই বলিয়া রমণী বহুমূল্য শালের কোণ নয়ন-কোণে দিয়া গুঞ্জেত্র মার্জনা করিলেন । পরক্ষণেই তিনি জিজ্ঞাসা করিলেন, “বলি, ইয়া দুর্গা ?”

“কি বল না, জেঠাই-মা ?”

“রায়-গৃহিণী ছোট রায়কে না কি বাড়ী হইতে তাড়াইয়া দিয়াছে ।”

“তাড়াইয়া দেয় নাই । তবে দাদা বড় বদরাগ্নি মানুষ—তিনি কোন কথা সহ্য করিতে পারেন না, রাগ করিয়া চলিয়া গিয়াছেন ।”

“তোদের সহিত দেখা-সাক্ষাৎ করিয়া গিয়াছে ত ?”

জেঠাই “কেন করিয়া যাইবে না ? সন্ধ্যাবেলা দাদার সঙ্গে দেখা

করিতে আসিয়া সকলকে বলিয়া গিয়াছেন। দাদার সঙ্গে ভূপও গিয়াছে।”

“আহা তোর প্রাণে বড় লাগিয়াছে না?”

“লাগিবে না জেঠাই মা? তোমার পোষা বিড়ালটা হারাইয়া গিয়াছিল বলিয়া, তুমি তিন মাস গ্রামের পথে-পথে কাঁদিয়া বেড়াইয়াছিলে, সে কথা মনে আছে? আর ভূপ আমার কে? বিধবা হইয়া যে দিন পিত্রালয়ে ফিরিয়া আসি, সেইদিন এক বৎসরের শিশু আমার কোলে তুলিয়া দিয়া, বড় জেঠাই-মা স্বর্গে গিয়াছেন, আমি যে তাহাকে সতের বৎসর বুকে করিয়া মানুষ করিয়াছি জেঠাই-মা?” দুর্গা-ঠাকুরাণীর কণ্ঠ রুদ্ধ হইয়া আসিল। তাহা দেখিয়া জেঠাই-মা বলিয়া উঠিলেন, “তা বটেই ত, তা বটেই ত। আহা ছেলেমানুষ। অসীম নিজেকে গেল,—ভূপেনকে লইয়া গেল কেন?”

“কি জানি জেঠাই-মা,—পরের কথা কেমন করিয়া বলিব।”

“অসীমও তোর বয়সী।”

“ছেলেবেলার খেলার সাথী।”

“তাহার জন্ম মন কেমন করিতেছে না দুর্গা?”

“বড়-দাদা পুরুষ মানুষ,—এখন বয়স হইয়াছে,—তাহার জন্ম মন-কেমন করিতে যাইবে কেন? এত দিন বড়-দাদা ত বিদেশে যাইতেন, কেবল ভূপের মুখ চাহিয়া সকল যত্না, অত্যাচার, লাজনা সহ করিয়াছিলেন। জেঠাই-মা, ভূপ যে আমার অন্ধ রমণীর গলা ধরিয়া আসিল। তাহা দেখিয়া জেঠাই-

দ্বিতীয়বার বহুমূল্য শালের কোণ নয়নে উঠাইলেন ; এবং কথাটা উন্টাইয়া লইবার জন্ত জিজ্ঞাসা করিলেন, “হাঁ বাছা, কাল রাত্রিতে কি তোর সহিত নবীনের দেখা হইয়াছিল ?”

দুর্গাঠাকুরণী জিজ্ঞাসা করিলেন, “কোন নবীন, জেঠাই-মা ?”

“নবীন নাপিত ।”

“হইয়াছিল ।”

“কোথায় ?”

“ঘণ্টীতলার মাঠে ।”

“কত রাত্রিতে ?”

“এই প্রথম প্রহরের শেষে ।”

• “এত রাত্রিতে একা ঘণ্টীতলার মাঠে কেন গিয়াছিল বাছা ?”

দুর্গা প্রশ্ন শুনিয়া চমকিয়া উঠিলেন । তিনি যখন মোহরের খলিয়া লইয়া একাকিনী রাত্রিতে নির্জন প্রান্তরে অসীমের সহিত সাক্ষাৎ করিতে গিয়াছিলেন, তখন সমাজের কথা, লোক-নিন্দার কথা তাঁহার মনে স্থান পায় নাই । ভূপেনকে তিনি পুত্রাধিক স্নেহে পালন করিয়াছেন । সে যে অর্থাভাবে, এমন কি অম্মাভাবে কষ্ট পাইবে, এই দুশ্চিন্তা অপর চিন্তাকে সহদয়া ব্রাহ্মণ-কণ্ঠার মন হইতে দূর করিয়া দিয়াছিল । তাঁহাকে বিব্রত দেখিয়া প্রীতার নয়নদ্বয় উল্লাসে উজ্জ্বল হইয়া উঠিল । দুর্গা তাহা দেখিয়া জেঠাই-মার আকস্মিক স্নেহের কারণ বুঝিতে পারিলেন ; এবং

ব্যস্ত হইয়া বলিয়া উঠিলেন, “সে কথা পরে বলিব জেঠাই-মা,— সে বড় গোপন কথা,—সময় হইলে আপনা হইতেই জানিতে পারিবে।” প্রোচা আর কথা না কহিয়া ঘাটে নামিলেন। দুর্গ পুষ্প-চয়ন শেষ করিয়া গৃহে ফিরিলেন।

বিছালন্ধার মহাশয় পূজায় বসিবার উপক্রম করিতেছিলেন : এবং পুষ্পের অভাব দেখিয়া পুত্রবধূকে কন্টার বিলম্বের কারণ জিজ্ঞাসা করিতেছিলেন। এমন সময় দুর্গা আসিয়া ঠাকুর ঘরের সম্মুখে দাঁড়াইলেন। কন্টার মুখ দেখিয়া পিতা বিস্মিত হইয়া জিজ্ঞাসা করিলেন, “কি হইয়াছে মা, মুখখানা মেঘের মত গম্ভীর কেন?” দুর্গা নিঃপ্রহস্তে পূজার সজ্জা করিতে করিতে কহিলেন, “কিছু না, বাবা।” হরিনারায়ণ হাসিয়া কহিলেন, “মা, আমি বুড়া হইয়াছি বটে, কিন্তু তথাপি আমি তোমার পিতা। তুমি বুদ্ধিমতী, তোমার সহশক্তি অসাধারণ। আমি স্বয়ং তোমাকে শাস্ত্র শিক্ষা দিয়াছি! কিন্তু তোমার মুখ দেখিয়া তোমার হৃদয়ের ভাব আমি যে পুঁথির মত পড়িতে পারি মা! কি হইয়াছে বল।”

“পূজার পরে বলিব।”

“না, তুমি এখনই বল। বিশেষ কারণ না হইলে, তোমার জগজ্জননীর মত সুন্দর শাস্ত্র মুখখানি সহসা গম্ভীর হইয়া উঠে না। ফুল আনিতে বিলম্ব হইল কেন?”

“গঙ্গার ঘাটে ঘোষেদের বাড়ীর বড় জেঠাই-মার সঙ্গে দেখা হইয়াছিল।”

“ভাল। বিলম্ব করিলে কেন?”

“তিনি কতকগুলো কথা জিজ্ঞাসা করিতেছিলেন।”

“সেটা ত একটা মহাপাতক। তাহার সঙ্গে এত কি কথা মা? বড়-বৌ উত্তরবাটী কুলের কলঙ্ক।”

“বাবা, আমি জীবনে আপনার কাছে কোন কথা লুকাই নাই, আজিও লুকাইব না। আমি বোধ হয় মনের আবেগে একটা অন্তায় কাজ করিয়া ফেলিয়াছি।”

“সেই জন্তই ত বলিতেছি, কি হইয়াছে আমাকে বল।”

“বাবা, কাল রাত্রিতে বড়-দাদা ও ভূপু জন্মের মত রায়-বাড়ী ত্যাগ করিয়া গিয়াছেন।”

“তাহা শুনিয়াছি।”

“গ্রাম ছাড়িয়া যাইবার পূর্বে তাঁহারা দাদার সহিত দেখা করিতে আসিয়াছিলেন। বড়-দাদা দাদাকে বলিলেন যে, তিনি বিশেষ কাজের জন্ত দিল্লী যাইতেছেন, এবং শীঘ্রই ফিরিবেন। দাদাও তাহাই বুঝিলেন; কিন্তু বাবা, মাহুষের মুখ দেখিলে মনের ভাব বুঝিতে পারা যায়,—সে কথা পুরুষ মাহুষে ভুলিয়া যায়; আর সে ভাব আমরা যত সহজে বুঝিতে পারি, তত সহজে পুরুষে পারে না। বড়-দাদা ও ভূপেনের মুখ দেখিয়া বুঝিলাম যে, তাহারা জন্মের মত রায়-বাড়ী ও গ্রাম পরিত্যাগ করিয়াছে এবং সহজে ফিরিবে না।”

“সে কথা সত্য।”

“যে-দিন স্বামীর ভিটা ছাড়িয়া আপনার সঙ্গে চলিয়া আসি,

তাহার পর-দিন বড় জেঠাই-মা ভূপুকে আমার কোলে দিয়া স্বর্গে গিয়াছেন। ভগবান আমাকে সন্তান দেন নাই; কিন্তু ভূপুকে পাইয়া আমি সে অভাব অনুভব করি নাই। সতর বৎসর তাহাকে কোলে করিয়া মামুষ করিয়াছি। বাবা! কাল সন্ধ্যাবেলায় যখন তাহার দৃষ্টিহীন চোখ দুইটিতে বিদায়ের আভাস দেখিতে পাইয়াছিলাম, তখন আমার আর জ্ঞান ছিল না। দুই ভাইয়ের পথের সম্মল যে কি আছে, তাহা আমি জানি। আমার মনে হইল যে, হয় ত কালই ভূপু অনাভাবে কষ্ট পাইবে। যে মাতৃহীন শিশুকে এতদিন পুত্রাধিক যত্নে ও স্নেহে পালন করিয়াছি, সে যে ক্ষুধার যন্ত্রণা ভোগ করিবে, এই চিন্তা আমাকে মুহূর্তের জন্য পাগল করিয়া তুলিয়াছিল। সেই সময় স্বামীর ঘর হইতে যাহা কিছু আনিয়াছিলাম,—সমাজ-শাসন ও লোক-লজ্জা তুলিয়া গিয়া—ত্রিপুরার মহারাজা তাঁহাকে যে মোহরগুলি দিয়াছিলেন, সেইগুলি লইয়া বাহির হইয়া পড়িয়াছিলাম। আমি জানিতাম, তাহাদিগকে ঘুরিয়া আসিয়া যষ্ঠিতলার মাঠ পার হইতে হইবে, অথচ আমাদের খিড়কীর দুয়ারের পরেই যষ্ঠিতলা; সেই জন্য খিড়কীর দুয়ার দিয়া বাহির হইয়া তাহারে ধরিতাম। মোহরগুলি দিয়া যখন ফিরিয়া আসিতেছি, তখন কে একজন জিজ্ঞাসা করিল, ‘তোমারা কি চাও?’ বড়-দাদা বলিলেন, ‘কেন?’ সে আমার ও বড়-দাদার মুখের দিকে চাহিয়া বলিল, ‘কে, ছোট হজুর? অন্ধকারে চিনিতে পারি নাই। আমি নবীন।’

“নবীন নাপিত! মা, তাহার সহিত ঘোষ-গৃহিণীর কি সম্পর্ক জান?”

“জানি!”

“মা দুর্গা! যাহা করিয়াছ, ভালই করিয়াছ;—নিজের সম্পত্তি পালিত পুত্রের ভবিষ্যৎ মঙ্গল-কামনায় দান করিয়াছ, উত্তম করিয়াছ। তবে আমাকে জিজ্ঞাসা করিলে ভাল হইত।”

“বাবা! তুমি যে তখন রায়-বাড়ী।”

নবম পরিচ্ছেদ

বিদ্যালঙ্কারের বিচার

সেইদিন দুইদণ্ড বেলায় অক্ষয় গাঙ্গুলীর চণ্ডীমণ্ডপে এক মহতী সভার অধিবেশন হইয়াছিল। গৃহস্থামী মহাকুলীন, এবং তিনি বহু কুলীন-কন্টার পাণিপীড়ন করিয়া খৃষ্টীয় অষ্টাদশ শতাব্দীর ব্রাহ্মণ-সমাজে স্বীয় প্রতিষ্ঠা দৃঢ় করিয়াছিলেন। গ্রামের মধ্যে বিদ্যালঙ্কারের পরেই তিনি সম্পন্ন গৃহস্থ; কিন্তু তাঁহাতে ও হরিনারায়ণ বিদ্যালঙ্কারে একটা বিষম প্রভেদ ছিল। কিশোর বয়স হইতে অসংখ্য কুলীনের কুলরক্ষায় প্রবৃত্ত হওয়ায় গাঙ্গুলী মহাশয় সরস্বতীর প্রতি কৃপাকটাক্ষপাত করিবার অবসর পান নাই। অতঃপর তাঁহার আশ্রানে তাঁহার চণ্ডীমণ্ডপে চতুষ্পার্শ্বের গ্রাম-সমূহের ব্রাহ্মণগণ সমবেত হইয়াছেন। অক্ষয় স্বয়ং সে

সভার সভাপতি । তিনি বলিতেছেন, “ওহে রামচন্দ্র ! কেবল বিজ্ঞা থাকিলেই হয় না, কুলমর্যাদার বিশেষ প্রয়োজন ?” তাহা শুনিয়া বৃদ্ধ হরিকেশব চট্টোপাধ্যায় কহিলেন, “তা ত বটেই,—কুলমর্যাদা থাকিলেই যথেষ্ট,—বিজ্ঞা থাকে কি না থাকে, তাহাতে কি আসে-যায় । দেখ, হরিনাবায়ণের যদি বিজ্ঞা না থাকিয়া কুলমর্যাদা থাকিত, তাহা হইলে তাঁহার ঘরে এমন ঘটনা কখনই ঘটত না ।”

চণ্ডীমণ্ডপের একপ্রান্তে একখানি কুশাসনের উপরে এক বৃদ্ধ বসিয়া ছিলেন ; তিনি বলিয়া উঠিলেন, “হরিকেশব ! নিজের ঘরের কথাটা ভুলিও না ।” তাঁহার কথা শেষ হইবার পূর্বেই, চট্টোপাধ্যায়-কুল-পুঙ্গব গর্জন করিয়া উঠিলেন ; কহিলেন, “আমার ঘরের কথা ? এত বড় স্পর্ধা ! তোর যত বড় মুখ নয়, তত বড় কথা ?”

উভয় বৃদ্ধকে মল্লযুদ্ধে উত্তত দেখিয়া, গৃহস্থামী তাঁহাদিগের মধ্যে দাঁড়াইয়া কহিলেন, “সকল সামাজিক কাজেই তোমরা দুইজন বিবাদ বাধাইয়া কৰ্ম পণ্ড করিয়া থাক । আজি কিন্তু তাহা হইবে না । থাম, স্থির হও ।” উভয় আসন গ্রহণ করিলে গাঙ্গুলী মহাশয় কহিলেন, “দেখ, এত বড় একটা পাপ ব্রাহ্মণ-সমাজের মধ্যে গোপন রাখিলে দেশের সর্বনাশ, সমাজের সর্বনাশ এবং সকলেরই সর্বনাশ হইবে । সুতরাং এখনই ইহার একটা প্রতিকার করা আবশ্যক ।” হরিকেশব কহিলেন, “ব্যাটা উচিত কথা অক্ষয় ; কিন্তু পারিয়া উঠিবে কি ? হিন্দু রাজার

রাজ্য ত নয়, দেশ এখন মুসলমানের। নবাবের প্রিয়পাত্র হরনারায়ণ স্বয়ং বিভালঙ্কারের সহায়। হরিনারায়ণের কি কিছু করিয়া উঠিতে পারিবে ?”

“ধর্ম্ম আছেন, চট্টোপাধ্যায় মহাশয়, এখনও ধর্ম্ম আছেন ; এখনও দিন রাত্রি হইতেছে, চন্দ্র-সূর্য্যের উদয় হইতেছে। সুতরাং পাপ কখনও গোপন থাকে না। এ কথা বায়-গৃহিণীর কর্ণে উঠিয়াছে। তিনি পুণ্যশীলা, দেবদ্বিজে ভক্তিমতী। তিনি কখনও পাপকে আশ্রয় দিতে পারেন ? তিনি বলিয়া পাঠাইয়াছেন যে, যেমন করিয়া হউক, এই দুইজন মহাপাতকীর শাস্তি দিতে হইবে।”

“হরনারায়ণ বায়-গৃহিণীর তুলনায় অতি ক্ষুদ্র হইলেও, একেবারে যে তাঁহার করতলগত, তাহা নহে ; সুতরাং কানুনগোই নিজে না বলিলে বিভালঙ্কারের কথায় আমি নাই।”

“দেখ হরিকেশব খুড়া, তোমার যখন জাতি যাইবার উপক্রম হইয়াছিল, তখন এই অক্ষয় গাঙ্গুলী বুক দিয়া পড়িয়া তোমার মুখ রক্ষা করিয়াছিল,—আজি তাহার প্রতিদান কর। হরিনারায়ণ বিভালঙ্কার আমার চিরশত্রু,—আজীবন আমায় অপমান করিয়াছে। বিভার অহঙ্কারে সে বলিয়া বেড়ায় যে, কুলীনের পুত্র হইলেই কুলীন হয় না ; নবধা কুললক্ষণ ব্যতীত কুলীনপুত্র ব্রাহ্মণই নয়। সে আমাকে অব্রাহ্মণ বলিয়াছে,—সুতরাং প্রকারান্তরে জারজ বলিয়াছে। কানুনগোই হরনারায়ণের

আপনারা ইচ্ছা করিলে দিনকে রাত্রি করিতে পারেন, রাত্রিকে দিন করিতে পারেন—

রাম। বাজে বক্তৃতা রাখ। লোকটা ছোট রায় কি না, তাহা ঠাহর করিয়া দেখিয়াছিলে ?

নবীন। দেখিব কি দেবতা, কথা কহিয়াছিলাম, প্রণাম করিয়াছিলাম।

রাম। ভাল কথা। স্ত্রীলোকটা যে দুর্গাঠাকুরাণী তাহা কি করিয়া চিনিলে ?

নবীন। দাদঠাকুর ! গ্রামের স্ত্রীলোক, ছুইতুড়ি বৎসর এই গ্রামে কাটিয়া গেল, চলন দেখিলে বলিতে পারি কোন বাড়ীর মেয়ে।

রাম। দেখ নবীন ! কথাটা সামান্য নহে,—গ্রামের একজন প্রধান ব্রাহ্মণের জাতিপাতের কথা। অন্ধকার রাত্রি ; তাহার উপর যদীতলার মাঠ, তুমি কি সে স্ত্রীলোকের কথা শুনিয়াছিলে ?

নবীন। আজ্ঞে না। দেবতার অবিদিত কিছুই নাই। আমি আর কি বলিব, ও-সকল স্ত্রীলোক কি কথা কহিয়া থাকে।

রাম। সে যে হরিনারায়ণ বিদ্যালঙ্কারের কন্যা দুর্গাঠাকুরাণী, তাহা নিশ্চয় চিনিয়াছিলে ?

নবীন। আজ্ঞে হাঁ দাদাঠাকুর, কীরীটেশ্বরীর মার দিয়া।

এই সময়ে চণ্ডীমণ্ডপের প্রাস্ত হইতে সেই বৃদ্ধ বলিয়া উঠিলেন, “দেখ রাম ! নবীনের কথায় বিশ্বাস করিয়া একজন ধর্মনিষ্ঠ ব্রাহ্মণকে জাতিচ্যুত করা উচিত নহে।”

নবীন। কেন বল ত ঠাকুর ? আমি কি তোমার পাঁকা ধানে মই দিয়াছি না কি ? নবীন জাতিতে নরসুন্দর বটে কিন্তু তাহার কথার মূল্য আছে,—নরসুন্দর সমাজে তাহার খাতির আছে। গাঙ্গুলী ঠাকুর ডাকিয়াছিলেন সেই জন্ত আসিয়াছি ; নতুবা নবীন সাধিয়া কাহারও ঘরে যায় না।

অক্ষয়। নবীন, চটিও না। দেখ হরিকেশব খুড়া, নবীনকে আমরা সকলেই চিনি, সে সহজে মিথ্যা কথা কহে না। হরিনারায়ণ বিভালঙ্কারের বিধবা কন্যা দুর্গা একপ্রহর রাত্রিতে একাকিনী অসীম রায়ের সহিত বগীতলার মাঠে কিছু হরিসংকীর্তন করিতে যায়নাই। এখন সমাজরক্ষার জন্ত আপনারা কি ব্যবস্থা করিবেন করুন।

হরি। ব্যবস্থা কি তাহা তুমিই কর অক্ষয়।

অক্ষয়। নিমন্ত্রণ বন্ধ, রজক নাগিত্ত বন্ধ, অগ্র সমাজে হরিনারায়ণের নিমন্ত্রণ হইলে আমাদের গ্রামের কেহ যাইবে না।

হরি। অতি উত্তম কথা।

রাম। একটা কিন্তু গোল রহিয়া গেল খুড়া, জ্রীলোকটা দুর্গা কি অপর কেহ তাহা প্রমাণ হইল না।

এই সময়ে চণ্ডীমণ্ডপের প্রান্ত হইতে সেই বৃদ্ধ বলিয়া উঠিলেন, “দেখ রাম। এই কি রাঢ়ীয় কুলীন সমাজ ? হরিকেশবের সধবা কন্যা স্বামীগৃহ হইতে মুসলমানের সহিত কুলত্যাগ করিল, তাহার প্রতিকার হইল না ; অথচ প্রমাণের অভাব সত্ত্বেও হরিনারায়ণের জাতিনাশের ব্যবস্থা হইল ?” বৃদ্ধ

হরিকেশব কম্পিত-কলেবরে উঠিতে উঠিতে চীৎকার করিয়া উঠিলেন, “আমার কন্যা কুলত্যাগ করিয়াছিল, তাহাতে তোর কি?” উভয়ে বচসা আরম্ভ হইল। ক্রমে মল্ল যুদ্ধের উপক্রম দেখিয়া, অন্য সকলে তাহাদিগকে ধরিয়া স্থানান্তরে লইয়া গেল। বিষম গোলযোগ আরম্ভ হইল। সভা ভঙ্গ হইল।

সকলে ক্রমে-ক্রমে গৃহে ফিরিতেছে দেখিয়া, রামচন্দ্র অক্ষয়কে জিজ্ঞাসা করিলেন, “অক্ষয় দাদা, স্থির হইল কি?” অক্ষয় হাসিয়া কহিলেন, “আবার কি, আমি যাহা বলিলাম তাহাই।”

“ভাল করিলে না অক্ষয় দাদা। বড় ঘরের কথা, প্রমাণটা নিতান্ত অল্প। কি জ্ঞান বড় পিরীতি বালির বাধ।”

“ধর্ম আছেন রামচন্দ্র, ধর্ম আছেন।”

“সে কথাটা তুমিও ভুলিও না। বিছালঙ্কার দুমুখ বটে, কিন্তু সে প্রকৃত ব্রাহ্মণ। দুর্গাকে আমি চিনি, সে কুলটা নহে।”

একাদশ পরিচ্ছেদ

বড়র পিরীতি

অপরাহ্নে চিত্তাক্লিষ্ট বদনে বৃদ্ধ হরিনারায়ণ বিছালঙ্কার দ্বীর পাদক্ষেপে সুবা বাঙ্গলার প্রধান কাছনগোই হরনারায়ণ রায়ের প্রাসাদসম অট্টালিকায় প্রবেশ করিলেন। হরনারায়ণ

তখন আহাৰান্তে বৈঠকখানায় বিশ্রাম করিতেছিলেন। স্বকোমল দুগ্ধফেননিভ শয্যায় শয়ন করিয়া। সুদীৰ্ঘ কাকৰ্কাৰ্য্যচিত আলবোলায় সটকায় মুখ লাগাইয়া হরনারায়ণ তন্দ্রামগ্ন হইয়াছিলেন; শয্যার এক প্রান্তে বসিয়া একজন ভৃত্য তাঁহার পদসেবা করিতেছিল। বিছালঙ্কারের পদশব্দে তাঁহার নিদ্রাভঙ্গ হইল। তিনি ঈষৎ হাসিয়া জিজ্ঞাসা করিলেন “কি ভট্টাচার্য্য, অসময়ে কি মনে করিয়া?” হরিনারায়ণ বিষম বদনে কহিলেন, “বড় বিপদে পড়িয়া আসিয়াছি ভাই, এখন তুমি উদ্ধার না করিলে আর মান থাকে না।”

“তোমার আবার বিপদ কি হে? পরের চাকুরী কর না, কোন ঝগড়া নাই, উদরান্নের জন্য পরিশ্রম করিতে হয় না, আমি ত দেখি যে শাহ আলম আর তোমাতে কোন প্রভেদ নাই।”

“রহস্যের সময় নয় হর, বিষম বিপদে পড়িয়াছি; এখন তুমি রক্ষা না করিলে আমার আর উপায় নাই।”

হরিনারায়ণ শয্যার এক প্রান্তে উপবেশন করিলেন। হরিনারায়ণ জিজ্ঞাসা করিলেন, “এমন কি গুরুতর কথা হে।”

“অক্ষয় গাঙ্গুলি আর হরিকেশব চট্টোপাধ্যায় ষড়যন্ত্র করিয়া আমাকে সমাজচ্যুত করিয়াছে।”

“তোমাকে সমাজচ্যুত? বল কি? তুমি হরিনারায়ণ বিছালঙ্কার একটা দেশবিখ্যাত পণ্ডিত; তোমার ভয়ে বাঙ্গলা-দেশের সকল কুলীন একঘাটে জল খায়; আর ক্ষুদ্রাদপি ক্ষুদ্র

অক্ষয় গাঙ্গুলি আর হরিকেশব চট্টোপাধ্যায় তোমাকে সমাজচ্যুত করিল ? তুমি কি স্বপ্ন দেখিয়াছ না কি ?”

“স্বপ্ন নহে ভাই, বিষম সত্য। হরিকেশব লোক দিয়া বলিয়া পাঠাইয়াছে যে, আজি হইতে আমার রজক নাপিত বন্ধ। দুর্গাকে যদি দূর করিয়া দিই এবং যথারীতি প্রায়শ্চিত্ত করি, তাহা হইলে ব্রাহ্মণ সমাজ আমাকে পুনরায় গ্রহণ করিবে।”

“দুর্গার অপরাধ ?”

“সে ব্যক্তিচারিণী।”

“এ কথা কে বলে ?”

“তোমার স্ত্রী।”

“তোমার স্ত্রী ?”

“হাঁ তোমার স্ত্রী !”

“প্রমাণ ?”

“নবীন নরসুন্দর।”

“তুমি কি পাগল হইয়াছ ? এখন দাবায় বসিবে বলিতে পার ?

“ওন হর ! কল্য রাত্রিতে অসীম ও ভূপেন্দ্র যখন গৃহত্যাগ করিয়া যায়, তখন দুর্গা ভূপেনের জন্য অত্যন্ত কাণ্ডারা হইয়া অন্ধকারে একাকিনী মণ্ডিতলায় গিয়া তাহাকে কিছু অর্থ দিয়া আসিয়াছিল। সেই সময়ে নবীন নাপিত তাহাদিগকে দেখিতে পাইয়াছিল। দুর্গা যদি আর কাহাকেও সঙ্গে লইয়া বাইত, তাহা হইলে কোন কথা হয় ত উঠিত না ; কিন্তু সে শৈশব

হইতে ভূপেনকে লালন পালন করিয়াছে এবং তাহাকে পুত্রাধিক স্নেহ করে ; সে দেশত্যাগ করিয়া যাইতেছে শুনিয়া দুর্গা দিগ্বিদিক জ্ঞানশূন্য হইয়াছিল। আমি এখানে ছিলাম বটে, কিন্তু স্মদর্শন ত গৃহে ছিল ; দুর্গা সচ্ছন্দে তাহাকে সঙ্গে লইয়া যাইতে পারিত। নবীন তখনই আসিয়া গৃহিণীকে জানায় যে, সে একপ্রহর রাত্রিতে অন্ধকারে মাঠে অসীম ও দুর্গাকে দেখিয়া আসিয়াছে। অল্প প্রভাতে তোমার পত্নীর আদেশমত নবীন এ কথা গ্রামময় প্রচার করিয়াছে এবং তাহারই আদেশমত গ্রামের সমস্ত কুলীন অক্ষয় গাঙ্গুলির গৃহে সমবেত হইয়া আমাকে সমাজচ্যুত করিয়াছে। দেখ ভাই, আমি বৃদ্ধ ব্রাহ্মণ, তোমার আশ্রিত ; যদি কোন কারণে অসীম তোমার বা গৃহিণীর অপ্ৰিয় হইয়া থাকে, সে জন্য •আমি শাস্তি পাই কেন ?

“কি বল ভট্টচাজ, গৃহিণী কায়স্থের মেয়ে, আর তোমরা ব্রাহ্মণ, নরদেবতা ; কায়স্থ-কন্ঠার কথায় ব্রাহ্মণ সমাজ সমাজচ্যুত হয়, একথা বলিলে লোকে যে হাসিবে ? তুমি শাস্ত হও, দাবা পাড়িতে বলিব ?”

“কলির ব্রাহ্মণ সব করে ভাই। দাবা ত খেলিবই, কিন্তু মন স্থির করিতে পারিতেছি কৈ ? হরিকেশবের সধবা কন্ঠা যখন রূপবান্ গুণবান্ স্বামী পরিত্যাগ করিয়া যবনের সহিত গৃহত্যাগ করিয়াছিল, তখন তোমার সাহায্যে আমি তাহার জাতিরক্ষা করিয়াছিলাম। কৃতজ্ঞ হরিকেশব আজি তাহার প্রতিদান দিয়াছে। অক্ষয় ঘোর মূৰ্খ, ব্রাহ্মণ-সমাজে সে সৰ্বদা

কৌলীন্তের দোহাই দিয়া মালাচন্দনের দাবী করে; আমিও প্রতিবার তাহার প্রতিবাদ করি। এতদিন এই বিজাহীন, আচারবিহীন কুলীনের সম্মানগুলি কুকুরের জায় আমার পশ্চাৎ-পশ্চাৎ ফিরিয়াছে। আজি তোমার পত্নীর আশ্বাস পাইয়া তাহারা আমাকে এই অপমান করিতে সাহসী হইয়াছে। হর! তোমার ভরসায় এই গ্রামে বাস করি, আমার উচ্চ মন্থক কখনও নত হয় নাই। বন্ধু! আজি প্রকৃত বন্ধুর কার্য্য কর; তোমার কটাক্ষপাতে কুলীন-সমাজ শাসিত হইবে। আমার কথা অসতী নহে।”

“তাই ত ভট্টচাজ্জ, বড় বিপদে ফেলিলে!”

“তোমার আবার বিপদ কি?”

“লোকের মুখ কি করিয়া বন্ধ করিব?”

“সেখানে ত ভূপেন ছিল।”

“কথাটা ব্রাহ্মণ-পণ্ডিতের মত হইল, আরে পাগল সে যে অন্ধ।”

“তবে তুমিও বিশ্বাস কর?”

“বিশ্বাসের কথা নয় ভট্টচাজ্জ, এ প্রমাণের কথা সাক্ষী-সাবুদের কথা।”

“তুমি অক্ষয় ও হরিকেশবকে ডাকাইয়া বলিয়া দিলেই সকল কথা মিটিয়া যাইবে।”

“দেখ ভট্টচাজ্জ, আমি কায়স্থ, ব্রাহ্মণ-সমাজের কথায় হস্তক্ষেপ করা কি আমার উচিত হইবে?”

“সে কি কথা হর ? হরিকেশবের কন্টার বেলায় হস্তক্ষেপ
করিয়াছিলে কি বলিয়া ?”

“তখন তোমরা আমার কথা রাখিয়াছিলে ; আর এখন যদি
না রাখ ? সেটা কিন্তু হরনারায়ণ রায়েব পক্ষে বড়ই অপমানের
কথা।”

“হর, তুমি আমার বালাবন্ধু ; তুমি দুর্গাকে বালাবধি জান।
সে অসতী নহে। ভালমন্দ বিবেচনা না করিয়া স্নেহের বশে
একটা কাজ করিয়া ফেলিয়াছে। স্বেযোগ পাইয়া আমার শত্রুরা
আমাকে নির্গাতন করিতেছে। এ সময়ে তুমি রক্ষা না করিলে
আমাকে লাহিত হইয়া দেশত্যাগ করিতে হইবে।”

“বড়ই দুঃখের কথা ভাই।”

• “তবে তোমার ইচ্ছা কি ?”

“আমার ইচ্ছা কি, তাহা কি তোমার অবদিত ?”

“বন্ধু ! বড়ই বিপদে পড়িয়াছি, তুমি ভিন্ন আমার আর
গতি নাই। আমাকে রক্ষা কর, বৃদ্ধ বয়সে নির্বাসনে পাঠাইও
না।”

“আমার কি সাধ যে, তুমি গ্রাম ত্যাগ কর ; কিন্তু কি করিব
ভাই, আমি কায়স্থ, ব্রাহ্মণ সমাজের কোন কথায় আমার হস্ত-
ক্ষেপ করা উচিত নহে।”

“তবে আমার কি উপায় ?”

“দুই-চারি দিন বাড়ী-বাড়ী ঘুরিয়া দেখ, অবশুই ইহাদের
মনে দয়া হইবে।”

“সে কার্য হরিনারায়ণের দ্বারা হইবে না।”

“আমি ত অগ্র উপায় দেখি না।”

বৃদ্ধ ব্রাহ্মণ ক্রিয়ৎক্ষণ ভূমিতে দৃষ্টিপাত করিয়া বসিয়া রহিলেন
পরে সহসা গাত্ৰোত্থান করিয়া তীরবেগে প্রস্থান করিলেন।
হরিনারায়ণ ইষৎ হাসিলেন। ৭

দ্বাদশ পরিচ্ছেদ

স্মৃতির মোহানা

সন্ধ্যার প্রাকালে একখানি ক্ষুদ্র নৌকা পাল ভরে ভাগীরথী-
বক্ষে উজ্জান বহিতেছিল। অদূরে পদ্মা ও ভাগীরথীর সঙ্গম।
তখন ভাগীরথীর এত দূরবস্থা ছিল না;—গঙ্গার অধিকাংশ জল
ভাগীরথী বহিয়া সাগরে মিশিত, সুতরাং তখনও পদ্মা প্রচণ্ড মূর্তি
ধারণ করে নাই। প্রায় দুইশত বৎসর পূর্বে স্মৃতি গ্রামের নিম্নে
ভাগীরথীর একটা প্রকাণ্ড দহ ছিল, তাহার ক্রিয়দংশ এখন বিলে
পরিণত হইয়া আছে। দিবাবসান দেখিয়া ক্ষুদ্র নৌকার মাঝি
পাল নামাইয়া নৌকা বাধিবার উদ্যোগ করিতেছে। এমন সময়ে
আর একখানি ক্ষুদ্র পাল্লী আসিয়া তাহার পার্শ্বে লাগিল।
পাল্লীর সম্মুখে বসিয়া এক বৃদ্ধ ব্রাহ্মণ একটি ক্ষুদ্র ছাঁকায় তামাক
সেবন করিতেছিল; এবং তাহার সম্মুখে বসিয়া এক মসীবর্ণ
প্রোট লোলুপ দৃষ্টিতে ব্রাহ্মণের বদন বিনির্গত ধূমপুঞ্জের দিকে
চাহিয়াছিল, অনেকক্ষণ চাহিয়া থাকিয়া প্রোট কহিল, “দেখ

দাদাঠাকুর আমার কৰ্ত্তা বাবা নবদ্বীপ চন্দ্র অতি বিচক্ষণ ব্যক্তি ছিলেন।” ব্রাহ্মণ কুণ্ডলীকৃত ধূম পরিত্যাগ করিয়া কহিল “হঁ।” ব্রাহ্মণকে আবার হুঁকায় মনঃ সংযোগ করিতে দেখিয়া তাহার সঙ্গী আবার কহিল “কৰ্ত্তা বাবা নবদ্বীপচন্দ্র বলিতেন বামুনের হাতে হুঁকা পড়িলে—” ব্রাহ্মণ চটিল এবং কহিল “দেখ দীননাথ, তোমার কৰ্ত্তা বাবার জালায় স্থির হইয়া এক ছিলিম তামাকও খাইবার উপায় নাই।” দীননাথ অধিকতর ক্রুদ্ধ হইয়া বলিল “দেখ ঠাকুর এই যে শেষ তিন ছিলিম তামাক সাজিয়াছি তাহা একাই পোড়াইয়াছ, এ কলিকাটাও পুড়িয়া আসিয়াছে। কৰ্ত্তা বাবা নবদ্বীপচন্দ্র বলিতেন যে বামুনের হাতে—” “আরে রাখ্ তোমার কৰ্ত্তা বাবা।” ব্রাহ্মণ এই বলিয়া হুঁকা হইতে কলিকাটি নামাইয়া দিল। দীননাথ কলিকাটি লইয়া নিজের হুঁকায় বসাইয়াছে এমন সময় নৌকা দুইখানি কুলে লাগিল ; একজন দীর্ঘাকার কৃষ্ণবর্ণ ব্রাহ্মণ আসিয়া দীননাথকে জিজ্ঞাসা করিল “কৰ্ত্তা, কলিকাটায় কিছু আছে কি ?” দীননাথ অত্যন্ত বিরক্ত হইয়া হুঁকাটি নামাইয়া রাখিল এবং জিজ্ঞাসা করিল “তুমি বামুন বুঝি ?” আগন্তুক একটু হাসিয়া বলিল “হঁ।” দীননাথ তখন পাল্লী হইতে নামিয়া যতদূর সম্ভব সংক্ষেপ করিয়া একটা অতি ক্ষুদ্র প্রণাম করিল। আগন্তুক তাহাকে জিজ্ঞাসা করিল “তোমরা ?” “আজ্ঞে আমরা গন্ধবণিক ; এই যে ঠাকুরটিকে দেখিতেছেন ইনি দেড় প্রহর ধরিয়া এই কলিকাটি পোড়াইয়াছেন হুতরাং ইহাতে বড় কিছু আর নাই। অল্পমতি করেন ত

ঢালিয়া সাজিয়া আনি।" দীননাথ এই বলিয়া হুকুটি আবার মুখে তুলিল এবং কাশিতে কাশিতে তাহা আবার নামাইয়া রাখিল। আগন্তুক ছিন্ন মলিন বসন খণ্ডে আবদ্ধ একটু পুটুলি বালির উপর রাখিয়া তাহার উপর উপবেশন করিল। দীননাথ পার্শ্বী হইতে তামাকু আনিয়া আগন্তুকের নিকট সাজিতে বসিল। তখন আগন্তুক তাহাকে জিজ্ঞাসা করিল "সাহাজী কত দূর যাইবে?" দীননাথ চারিদিকে চাহিয়া বলিল, "ঠিক নাই, তুমি কোথায় যাইতেছ ঠাকুর?" "শুভর বাড়ী।" "সে কোনখানে?" "উপস্থিত নিকটে কোথাও নয়।" "তবে যাইবে কোথায়?" "বলিলাম ত, শুভর বাড়ী।" "ঠাকুর কুলীন ব্রাহ্মণ বুঝি?" "কুলের মুখটি, বিষ্ণু ঠাকুরের সন্তান।" "ভাল, ভাল, দাদাঠাকুর বস।"

তামাকু সাজিয়া কলিকাটি আগন্তুকের হস্তে দিয়া দীননাথ বলিল, "দাদা ঠাকুর ইচ্ছা কর; কিন্তু দেখিও, খবরদার, প্রসাদ করিয়া যেন চক্ৰতি মহাশয়ের হাতে দিও না। উনি দেড় পহরে দর্শনদলিম তামাক পোড়াইয়াছেন, অথচ পেসাদটা আমা অবধি পৌছায় নাই।" আগন্তুক হাসিয়া কলিকাটি লইল এবং জিজ্ঞাসা করিল, "সাহাজী, ঠিক কোথায় যাইবে বল দেখি।" দীননাথ কহিল, "বলিলাম ত ঠাকুর ঠিক নাই।" "তবে তুমিও কি শুভর বাড়ী যাইবে না কি?" "আমাদের জ্ঞাত কি তোমাদের মত ঠাকুর? তোমরা বিবাহ করিয়া পয়সা পাও আর আমাদের পয়সা দিয়া বিবাহ করিতে হয়। একটা খবর বলিতে পার দাদাঠাকুর?" "কি খবর বল?" "তুমি এখন কোথা হইতে

আসিতেছে ?” “উপস্থিত কাটোয়া হইতে ।” বাদশাহের ফৌজ লালবাগ হইতে কুচ্ করিয়াছে তাহার কিছু লক্ষণ দেখিলে ?” “বিলক্ষণ দেখিলাম, বহরমগঞ্জ হইতে ভগবান গোলা পর্য্যন্ত দুই ধারের গ্রামের লোক গ্রাম ছাড়িয়া পলাইয়াছে, ক্ষেতের ফসল ও গাছের ফল উধাও হইয়া উড়িয়া গিয়াছে। ঘরে চাল, ধানের গোলা থাক হইয়া আছে। এক মঠের মহাস্ত কাল সন্ধ্যাবেলা দেখা করিতে গিয়াছিল, কোড়া খাইয়া আধমরা হইয়া ফিরিয়া আসিয়াছে।” আচ্ছা দাদাঠাকুর ফৌজ এখন কতদূর ?” “ফৌজের খবরে তোমার কি দরকার সাহাজী ?” “বেনের ছেলের আর ফৌজের খবরে দরকার কি বল ? ফৌজের লোক উঠনা খাইয়া পলাইয়াছে তাই তাগাদায় বাহির হইয়াছি। আজ ছাউনী কতদূর বল দেখি ?” “আজ স্মৃতির মোহানার এক ক্রৌশ দূরে লক্ষরের ছাউনি পড়িবে। গোয়ালারা গ্রাম ছাড়িয়া পলাইতেছিল তাহারা বলিয়া গেল।”

আগন্তুক দীননাথের হস্তে কলিকাট দিয়া উঠিল। তাহা দেখিয়া দীননাথ জিজ্ঞাসা করিল, “কি দাদাঠাকুর উঠিলে যে ? আজ রাত্রিতে বাসা লইবে কোথায় ?” “আগন্তুক হাসিয়া উত্তর করিল, “বাসা ? ভাল কথা জিজ্ঞাসা করিয়াছ সাহাজী। শশানের ধারে একটা বড় বটগাছ আমি দেখিয়া আসিয়াছি, মনে করিয়াছি আজ সেখানেই বাসা লইব।” “রাম রাম, বল কি দাদাঠাকুর ? এই ঘোর সন্ধ্যাকাল শশানে থাকিবে কি ? চল একখানা গ্রামে গিয়া বাসা খুঁজিয়া লই।” “তাহা হইলে আর দিনকতক বাদে

আসিও ; সাহাজী, পদ্মাপারে না গেলে আর কোন ঘরে চাল দেখিতে পাইবেনা।”

দীননাথ যতক্ষণ আগন্তুক ব্রাহ্মণের সহিত কথা কহিতেছিল, ততক্ষণ তাহার সহযাত্রী চক্রবর্তী একমনে অপর নৌকার আরোহী দিগের গতিবিধি লক্ষ্য করিতেছিল। সেই নৌকার সম্মুখে বসিয়া এক কৃশকায় গৌরবর্ণ যুবা দীননাথের কথা শুনিতেছিল। সে এই সময়ে দীননাথের নিকটে আসিয়া জিজ্ঞাসা করিল, “মহাশয় কোজের কথা বলিতেছিলেন, নিকটে কি ফৌজ আসিতেছে নাকি?” আগন্তুক কহিল, “বাদশাহী ফৌজ এখান হইতে প্রায় এককোশ দূরে ছাউনী করিবে। আপনার নৌকায় কি স্ত্রীলোক আছে?” “হা, আমরা সপরিবারে কাশা যাইতেছি।” “তাহা হইলে নৌকা লইয়া শীঘ্র পারে যান।” “সেই কথাই ভাল।” যুবা ফিরিবার উপক্রম করিতেছে দেখিয়া আগন্তুক তাহাকে জিজ্ঞাসা করিল, “মহাশয়, আপনারা কোন শ্রেণী?” যুবা বিস্মিত হইয়া কহিল, “রাঢ়ীয়শ্রেণী। কেন?” “কোন মেল?” “ফুলিয়া। একথা জিজ্ঞাসা করিতে ছন কেন?” “আমি ফুলের মুখুটি বিষ্ণু ঠাকুরের সন্তান, যদি কন্যা পাত্রিস্থ করিতে ইচ্ছা করেন, তাহা হইলে আমি প্রস্তুত আছি।” আগন্তুকের কথা শুনিয়া যুবা হাসিয়া উঠিল এবং কহিল, “না, মহাশয়, আমাদের পরিবারে বিবাহ যোগ্য কন্যা নাই।” যুবা নৌকায় ফিরিয়া গেল এবং অতি অল্পক্ষণ পরেই বড় নৌকার মাঝি মাল্লারা নৌকা পরপারে লইয়া গেল।

ত্রয়োদশ পরিচ্ছেদ

শ্মশান বাসী

দুইশত বৎসর পূর্বে স্মৃতিগ্রামের অনতিদূরে, ভাগীরথীতীরে এক বিস্তৃত শ্মশান ছিল। গ্রামের উত্তরে নাতিপ্রশস্তা পদ্মা, পশ্চিমে ও দক্ষিণে দিগন্তাবিস্তৃত গঙ্গাপ্রবাহ এবং পূর্বদিকে বহুদূর-বিস্তৃত বেণুবন। গ্রামের দক্ষিণপূর্ব কোণে, বেণুবনের দক্ষিণ সামান্য একটা অতি বৃহৎ বটবৃক্ষ ছিল; তাহার শাখাপ্রশাখা বহুদূর বিস্তৃত হইয়াছিল। সেইস্থান হইতে স্মৃতিগ্রামের শ্মশান আরম্ভ। বহুদূর হইতে লোকে স্মৃতির শ্মশানে শব লইয়া আসিত। পদ্মার পশ্চিম তীরের লোক ত আসিতই, এমন কি পদ্মা ও ঈশানন্দার উত্তর তীরের লোকও নৌকায় ধনীব্যক্তির মৃতদেহ লইয়া এই শ্মশানে আসিত। শ্মশান বিখ্যাত বলিয়া গ্রামের লোক দিবাভাগেও এ পথে চলিত না। স্ত্রীসমাজে ও বালকমণ্ডলীর মধ্যে শ্মশান অপেক্ষা তাহার সীমান্তস্থিত বটবৃক্ষের খ্যাতি অধিক ছিল। বহুদূর হইতে মৃতদেহ লইয়া আসিয়া লোকে এই বটবৃক্ষের তলে আশ্রয় গ্রহণ করিত। এবং সময়ে-সময়ে শুনা যাইত যে, বাহকগণ বটবৃক্ষতলে আসিয়া শব রাখিয়া গ্রামে কাষ্ঠ সংগ্রহ করিতে গিয়াছিল,—কিন্তু ফিরিয়া আসিয়া মৃতদেহের সন্ধান পায় নাই। স্মৃতিগ্রামে এই বটবৃক্ষ বহুবিধ ভূত, প্রেত ও ব্রহ্মদৈত্যের লীলাক্ষেত্র বলিয়া পরিচিত হইয়াছিল। নিতান্ত আবশ্যক হইলে লোকে শ্মশানের

“রামচন্দ্র! তোমরা তাহা হইলে এতক্ষণ মঙ্গরা করিতেছিলে?”

“মঙ্গরা করিব কেন, তুমি জিজ্ঞাসা করিলে, ‘আমাদের ঘরে পাত্রী আছে কি না’, ‘বলিলাম, আছে’; কারণ, আমাদের দিল্লীর বাড়ীতে এখনও শতখানেক অবিবাহিতা কন্যা আছে। আমাদের ঘরে আবার অনেকের বিবাহ হয়ই না।” “মুসলমানের মধ্যেও কি কুলীন আছে না কি?” “সে কথা বলিতে পারি না; তবে পাত্রী অনেক আছে। যদি বিবাহ করিতে চাহ, ব্যবস্থা করিতে পারি।” “অর্থের বড়ই অনাটন; সুতরাং একটি কুলরক্ষা করা নিতান্ত আবশ্যক।” “ভাল, সহর তোমার একটি ভাল বিবাহ দেওয়াইব। তোমাকে যাহা জিজ্ঞাসা করিতেছি, তাহার যথার্থ উত্তর দাও।” “জিজ্ঞাসা করিয়া যাও। কিন্তু বিবাহটা কবে দিবে আগে বলিয়া রাখিলে, উত্তর দেওয়া একটু সহজ হইবে।” “কালই দিব।” “কাল বিবাহের লগ্ন নাই।” “তুমি কি জ্যোতিষ জান?” কিছু কিছু জানি।” “বল দেখি আমি কে?” তুমি যবন রাজার পোত্র।” “আমি কোথায় যাইতেছি?” “ওসকল কথা জিজ্ঞাসা করিও না।” “তবে তুমি জ্যোতিষ জান না।” “সেই কথাই ভাল। বিবাহ দিতে পারিবে না বৃদ্ধি?” “কেন পারিব না,—তুমি যেদিন বিবাহ করিতে চাহিবে সেইদিনই দিব। আমি কোথায় যাইতেছি সে কথা বলিতেছ না কেন?” “যদি নিতান্ত শুনিতে চাহ, তাহা হইলে প্রভাতে আসিও।” “এখন বলিতেছ না কেন?” “নিশীথ রাত্রি গণনার পক্ষে প্রশস্ত সময় নহে।” “ভাল

কথা, প্রভাতে আসিব; কিন্তু তুমি গ্রাম ছাড়িয়া শ্মশানে বাস কর কেন?" "গ্রামে অনেক মানুষের বাস,—মানুষ মাত্রেই বিশ্বাসঘাতক,—সেইজন্য গ্রামে না গিয়া শ্মশানে বাস করিতেছি।" "ভাল কথা। কিন্তু যে অগ্নিতে মৃতদেহ দগ্ধ হইল, তাহাতে খাড়া পাক করিতে ঘৃণা বোধ হয় না?" "ঘৃণা বোধ হইবে কিসের জন্য? অগ্নি কখনও অশুদ্ধ হয় না,—তাহার উপর যে দেহের জন্য অন্নপাক করিব, সেই দেহই যখন অগ্নিতে দগ্ধ হইতেছে, তখন সে অগ্নিতে রন্ধন করিতে আপত্তি কি?" "তুমি যে দেওয়ান ফকীরের মত কথা কহিতে আরম্ভ করিলে?" "আমি ফকীর হইতে যাইব কেন, বাঙ্গালা দেশে দশ-বারখানা গ্রামে আমার দশ-বারটি পূর্ণ সন্সার। আমি ফকীর হইতে যাইব কেন, বালাই যাট।" শ্মশানবাসী এই বলিয়া ভীষণ গর্জন করিয়া উঠিল; এবং তিন লক্ষ শুভ্র-বালুকাক্ষেত্র পার হইয়া বটবৃক্ষতলের ঘন অন্ধকারে প্রবেশ করিল। পরক্ষণেই বটবৃক্ষতল হইতে মনুষ্য-কণ্ঠোথিত আন্তর্নাদ শ্রুত হইল, "ও বাবা ব্রহ্মদৈত্য! আমি দীননাথ বাবা! আমি কিছু জানি না বাবা! আমাকে ছাড়িয়া দেও বাবা! কাল সকালে সওয়া পয়সার হরির লুট দিব বাবা! ওগো গেছি গো,—ওগো কর্তা বাবা নবদ্বীপচন্দ্র গো, পয়সার লোভে পরাণটা গেল গো,—ওগো, বেটা নেড়ের কথা শুনে অসীম রায়কে ধরিতে আসিয়া আমার পরাণটা গেল গো, ওগো বাবা ব্রহ্মদৈত্য গো, এমন কাজ আর কখন করিব না গো——"

আগন্তুকদ্বয় দ্রুতপদে বটবৃক্ষের দিকে অগ্রসর হইয়া দেখিলেন যে, শ্মশানবাসী প্রজ্বলিত চিতার পার্শ্বে ভীষণবেগে এক পিণ্ডাকার মনুষ্যকে আক্রমণ করিয়াছে। তাঁহারা বৃক্ষতলে উপস্থিত হইবার পূর্বেই, স্থলকায় মনুষ্য বহুকষ্টে শ্মশানবাসীর কবল-মুক্ত হইয়া উদ্ধ্বাসে পলায়ন করিল; কিন্তু তাহার পরিদেয় বস্ত্র শ্মশানবাসীর হস্তে রহিয়া গেল। আগন্তুকদ্বয় শ্মশানবাসীকে ভিজ্ঞাসা করিলেন, “ব্যাপার কি?” সে কহিল, “চোরে আমার দখাসর্বস্ব লইয়া বাইতেছিল, বহুকষ্টে রক্ষা করিয়াছি।” “তোমার দখা-সর্বস্বটা কি?”

শ্মশানবাসী জীর্ণ, শীর্ণ, মলিন বস্ত্রখণ্ডে আবদ্ধ একখানি বস্ত্র, একখানি ছিন্ন কন্যা ও একখানি কীটদষ্ট পুঁথি দেখাইয়া কহিল, “ইহাই আমার স্বধা, এবং ইহাই আমার সর্বস্ব।”

চতুর্দশ পরিচ্ছেদ

ব্রহ্মদৈত্য

প্রভাতে ভাগীরথীর প্রশস্ত, শুষ্ক বক্ষে এক দীর্ঘাকার ব্রাহ্মণ সজ্জাবন্দনা করিতেছিলেন। মধ্য-মধ্যে অক্ষুট বস্ত্রাব্যাহক আর্ন্তনাদ আসিয়া তাঁহার চিত্ত বিচলিত করিতেছিল। প্রাতঃ-সন্ধ্যা শেষ হইলে ব্রাহ্মণ সিক্ত বেলাভূমি পরিত্যাগ করিয়া আর্ন্তনাদের কারণ অনুসন্ধান করিতে তীরের দিকে চলিলেন।

গঙ্গাপ্রবাহের অনতিদূরে, গুহ্র বালুকা-স্তূপের উপরে জনৈক স্থলকায় মল্লশ্য পতিত ছিল; মধ্যে-মধ্যে তাঁহার কণ্ঠোখিত আৰ্ত্তনাদই ব্রাহ্মণের কর্ণে প্রবেশ করিয়া, তাঁহার সন্ধ্যাবন্দনার ব্যাঘাত জন্মাইতেছিল। তাহার পরিধেয় বস্ত্র রক্তাক্ত এবং সে অচেতন। ব্রাহ্মণ জলের নিকট ফিরিয়া আসিয়া উত্তরীয়াও ভিজাইয়া লইলেন; এবং সেই জল লইয়া গিয়া চেতনাহীন ব্যক্তির মুখে সেচন করিতে লাগিলেন। অনেকক্ষণ শুশ্রূষার পরে তাহার চেতনা ফিরিল। তখন রোদ্র উঠিয়াছে, গঙ্গাবক্ষে দুই-একখানি নোকা চলিতে আরম্ভ করিয়াছে; কিন্তু ভাগীরথীর কোন তীরেই অপর মানবের চিহ্ন নাই।

জ্ঞান হইবার পরে সে কিয়ৎক্ষণ চক্ষু মুদ্রিত করিয়া পড়িয়া রহিল; এবং তাহার পর অতি সাবধানে দ্রষ্টব্য চক্ষু খোলিয়া ব্রাহ্মণকে দেখিয়া লইল। ইহারও কিছুক্ষণ পরে সে ধীরে-ধীরে ব্রাহ্মণকে জিজ্ঞাসা করিল, “ঠাকুর, তুমি কি ব্রহ্মদৈত্য?” তাহার প্রশ্ন শুনিয়া ব্রাহ্মণ হাসিয়া উঠিল; এবং তাঁহার হাসি শুনিয়া সে পুনরায় চক্ষু মুদ্রিত করিল। তখন তাহার মনের অবস্থা বুঝিয়া ব্রাহ্মণ কহিলেন, “ভয় নাই, আমি ব্রহ্মদৈত্য নহি।” আশ্বস্ত হইয়া সে ধীরে-ধীরে চক্ষুরুন্মীলন করিল; এবং আরও ধীরে-ধীরে জিজ্ঞাসা করিল, “ঠিক বলিতেছ?” ব্রাহ্মণ জিজ্ঞাসা করিলেন, “কি ঠিক বলিতেছি?” “তুমি ব্রহ্মদৈত্য নহ?” “না—না, তোমার ভয় নাই, আমি ব্রহ্মদৈত্য নহি।” “কেমন করিয়া বুঝিব, তুমি ব্রহ্মদৈত্য নহ?” “কেন, কথায় বিশ্বাস হইল না?”

- “স্বতীগাঁয়ের লোকের কথায় যে বিশ্বাস করে, তাহার মত আহাম্মুক সারা হিন্দুস্থানে নাই।” এই বলিয়া সেই ব্যক্তি বালুঝাড়িয়া উঠিয়া দাঁড়াইল; এবং ব্রাহ্মণকে কহিল, “ঠাকুর, আমার এই ভাহিন গালে একটা ছোরে চড় মার দেখি!” ব্রাহ্মণ হাসিয়া কহিলেন, “চড় মারিতে যাবই কেন?” “চড় খাইলে বৃদ্ধিতে পারি, তুমি ব্রহ্মদৈত্য কি না! বা-দিকে মারিও না, কারণ, রাত্রে চড়ে দুইটা দাঁত পড়িয়া গিয়াছে।” “তবুও চড় খাইবার সাধ মেটে নাই?” “চড় কি সাধ করিয়া খাইতে চাই ঠাকুর! যদি একটার উপর দিয়া যায়, তাহা হইলে দুই চারিটা দাঁত বাঁচিয়া যাইতে পারে।” “তোমার নিবান কোথায়?” “কাটোঞা।” “যাইবে কোথায়?” “যে দিকে হ’ তোথ যায়।” “তুমি কি সন্ন্যাসী না কি?” “উপস্থিত টাকার শোকে একপ্রকার বটে।” “টাকার শোক কি রকম?” “সে অনেক কথা দাদাঠাকুর।” “ব্রহ্মদৈত্যের হাতে পড়িলে কি বলিয়া?”
- “সেও ঐ টাকার শোকে!” “সে কি রকম কথা?” “ঠাকুর ব্রহ্মদৈত্যের ভয়ে সারারাত্রি দাঁতি লাগিয়া পড়িয়া হলাম,— আগে এক ছিলাম তামুক খাওয়াইয়া প্রাণটা বাঁচাও, পরে সকল কথা বলিব।”

সে ব্যক্তি ধীরে ধীরে ব্রাহ্মণের সহিত চলিল। দূরে একটা বড় ভাঙ্গনের নিম্নে একখানা বড় নৌকা বাঁধা ছিল। ব্রাহ্মণ সেই নৌকায় উঠিয়া তামাকু, কলিকা, কয়লা, শোলা ও চকুমকি লইয়া ফিরিয়া আসিল; এবং কলিকায় তামাকু সাজিয়া,

চকমকিতে লোহা ঠুকিয়া শোলা ধরাইল। এই অবসরে দ্বিতীয় ব্যক্তি জলে নামিয়া হস্ত-মুখ প্রক্ষালন করিল; এবং ব্রাহ্মণের হস্ত হইতে কলিকাটি লইয়া কয়লা ধরাইতে আরম্ভ করিল। ব্রাহ্মণ সিক্ত বেলাভূমিতে বসিয়া জিজ্ঞাসা করিল, “তোমার নাম কি?” তাহার সঙ্গী তখন কলিকায় প্রথম টান দিতেছিল,— সে নাসিকা ও মুখ হইতে প্রচুর ধূম উদ্গীরণ করিতে-করিতে বলিল, “আমার নাম? শ্রীদীননাথ সাহা, আমার কত্তাবাবার নাম নবদ্বীপচন্দ্র সাহা। তা’ তিনি অতি বিচক্ষণ ব্যক্তি ছিলেন। বুঝলেন দাদাঠাকুর?” “ভাল কথা, তবে ব্রহ্মদৈত্যের হাতে পড়িলে কি করিয়া?” “লালবাগে বাদশাহের নাতি আসিলে, লোভে পড়িয়া একখানা দোকান খুলিয়াছিলাম। কৌজের লোকের রসদ সর্ববরাহ করিয়া দিনকতক বেশ দু’পরসী রোজগার করিলাম। হঠাৎ একদিন ছাউনি গুটাইয়া ফোঁস কুচ্ করিল; কিন্তু আমার পাওনা টাকাটা দিতে ভুলিয়া গেল। কি করি প্রাণের দায়ে কৌজের পিছন-পিছন স্ত্রী অবধি আসিয়াছি। এখানে এক ব্যাটা নেড়ে বলিল, যে অসীম রায় না কি বাদশাহের নাতির বড় পেয়ারের লোক, তাহাকে ধরিতে পারিলে সমস্ত টাকার কিনারা হইবে। কি করি, মাঝরাাত্রিতে অসীম রায়ের সন্ধানে বাহির হইলাম। ছাউনিতে শুনিলাম, সে না কি বাদশাহের নাতির সঙ্গে স্নানানে গিয়াছে। কি করি, দাদাঠাকুর, টাকার শোক পুত্র-শোকেরও অধিক,—স্নানানেই চলিলাম। সঙ্গে এক ঠ্যাটা বামুন ছিল, সেও বংশীর কাছে পাওনা টাকার

কিনারা করিতে আসিয়াছে ; কিন্তু সে শ্মশানের নাম শুনিয়াই চম্পট দিল । স্ত্রীগণের শ্মশান বড় ভারি শ্মশান । সেখানে একটা বটগাছ আছে, সেই বটগাছে ব্রহ্মদৈত্যের বাসা । মাকরান্ত্রিতে কালাচাঁদের নাম করিতে-করিতে যেনন বটগাছতলায় আঁধারে পা দিয়াছি, অমনি ব্রহ্মদৈত্য এক লাফে আমার ঘাড়ের উপরে । বাপ !—” “কি বলিলে, অসীম রায় ?” “হাঁ, দাদাঠাকুর, তাহার না কি এখন পোহাবার,—বাদশাহের নাতি তাহার কথায় উঠে বসে ।” “এই অনীম রায়টা কে শুনিয়াছ ?” “বান্ধালী ।” “নিবাস কোথায় জান ?” “সে কথা বলিতে পারিব না দাদাঠাকুর ।” “চল দেখি, দেখিয়া আসি ।” “আবার সেই বটতলায়,—এ কাঠামে পোষাইবে না দাদাঠাকুর ।” “ভয় কি, আমি তোমার সঙ্গে যাইব ।” “তুমিই যাও আর যে-ই যান, দীননাথ আর বটতলায় যাইতেছেন না ।” “ব্রহ্মদৈত্য কি রকম বল দেখি ?” “এই, হাঁড়ির কালির মত রং, তালগাছের মত লম্বা, হাতের কিলঙুলি ঢেঁকির পাড়ের মত ঘিষ্ট ।” “চল দেখি, দূর হইতে ব্রহ্মদৈত্যটা আমাকে দেখাইয়া দিবে ।” “যাইতে হ’ল তুমিই যাও দাদাঠাকুর, আমার সখ্ মিটিয়া গিয়াছে ।” “চলই না, হয় ত অসীম রায়ের সহিত দেখা হইয়া যাইবে ।” “সেটা, ওর নাম কি, তাঁ—তকাৎ হইতে । বটতলায় দীননাথ আর যাইতেছেন না ।” “তবে চল । তোমার বাসা কোথায় ?” “বুন্দাবনদাস বাবাজীর বৈষ্ণবীর আখ্ ডায় ।” “বৈষ্ণবী কেন,

বৈষ্ণব কোথায় গেল ?” “বৈষ্ণবীকে ওয়ারিশান রাখিয়া ফেঁৎ করিয়াছে এবং সে যৌবন গত হয় নাই মনে করিয়া মালা-চন্দন করিয়াছে।” “অতি উত্তম কথা ; গা তুল।”

উভয়ে জাহ্নবীপ্রবাহ পরিত্যাগ করিয়া আত্মপনসকৃৎ-বপ্তি হুতীগ্রামের দিকে যাত্রা করিলেন।

পঞ্চদশ পরিচ্ছেদ

ভবিষ্যদ্বাণী

হুতীগ্রামের উত্তর সীমায় বহুকাল পূর্বে এক পাঠান বাস করিত। যে সময়ের কথা বলিতেছি, তাহারও প্রায় দুই শত বৎসর পূর্বে, পাঠান, পদ্মাতীরে রমণীয় পুষ্পকানন রচনা করিয়া, তাহার মধ্যে এক মনোহর অট্টালিকা নিৰ্ম্মাণ করাইয়াছিল। গোড়দেশে পাঠানরাজ্যের শেষ চিহ্নের সহিত পদ্মা বহুদিন পূর্বে পাঠানের অট্টালিকা আত্মসাৎ করিয়াছে ; কিন্তু তাহার প্রাচীর-বেষ্টিত নন্দন-কাননের কিয়দংশ তখনও বিগ্ৰহমান ছিল। সেই অরক্ষিত উদ্যানে, এক প্রাচীন তুড়িঙ্গীর্ণ সহকার, বৃক্ষের তরুণী ভাৰ্য্যার হ্রায়, নবীনা সুন্দরী মালতীর বাহবেষ্টনের লোভ সম্বরণ করিতে পারে নাই। সেই মালতী-বিতানের চতুর্দিকে পরিহাস-রসিকা সখিবৃন্দের হ্রায় খেত, রক্ত ও পদ্মকরবীর অসংখ্য গুল্ম বেষ্টন করিয়া থাকিত। স্থানে-স্থানে তখনও মৰ্ম্মর-নিৰ্ম্মিত সরোবর ও প্রস্রবণের চিহ্ন দেখা যাইত।

সেইদিন প্রভাতে, জাহুবী-তীরে দীননাথ যখন ব্রাহ্মণের গুরুদ্বায় চেষ্টন হইয়াছে, তখন সেই গুরু সহকার-মূলে চপলা মালতী-বিতানের স্বল্প ছায়ায় জনৈক সম্ভ্রান্ত মুসলমান যুবা এক শীর্ণদেহ কৃষ্ণকায়, ব্রাহ্মণের সহিত বাক্যালাপ করিতেছিলেন। সে ব্যক্তি কহিল, “পারসী পড়িছিলাম; কিন্তু চর্চার অভাবে প্রায় ভুলিয়া গিয়াছি।” মুসলমান কহিল, “আপনার কথা বুঝিলাম না।” তখন সহসা সেই শীর্ণদেহ ব্রাহ্মণ মালিকার পারসীক ভাষায় আলাপ আরম্ভ করিল। মুসলমান যুবা তাহা শুনিয়া আশ্চর্যান্বিত হইলেন। ব্রাহ্মণ কহিল, “জগৎপনা, মানুষ প্রয়োজন ব্যতীত কোনও কাজ করে না। যতদিন উৎসাহ ছিল, উচ্চাকাঙ্ক্ষা ছিল, ততদিন পারসীর চর্চা করিয়া-ছিলাম; কিন্তু এখন আমার আর অর্থ বা যশের আকাঙ্ক্ষা নাই; সুতরাং পারসীর চর্চাও করি না।” “কিন্তু কাল রাত্রিতে তুমি ত একটীও পারসী কথা ব্যবহার কর নাই।” “কি জানেন শাহজাদা, আমার মাথার ভিতরে অনেকগুলো রুদ্ধ কবটি আছে। কখনও যদি কোনটার জীর্ণ-রুদ্ধ কবটি ভাঙ্গিয়া বা খুলিয়া যায়, তাহা হইলে সুদূর অতীতের অনেক বিস্মৃত কথা বস্তার প্রোতের মত আসিয়া আমাকে অভিভূত করে।” “তুমি কি এরবারে কোন চাকরী করিতে?” “সে অনেক দিনের কথা,—খালসার দেওয়ানীতে হুমারনবীশ ছিলাম; সেও আলমগীর বাদশাহের আমলে।” “ছাড়িলে কেন?” “লোকে চাকরী করে অর্থোপার্জন ও ক্ষমতা লাভের জন্ত। আমি হঠাৎ একদিন

বুঝিয়া দেখিলাম, আমার কোনটারই প্রয়োজন নাই।” “সে কি!” “সে কথা তুমি কি বুঝিবে শাহজাদা! তুমি এখন ময়ূর-সিংহাসনের পথে চলিয়াছ;—তোমার এই প্রথম যৌবন;—উচ্চাকাঙ্ক্ষায় তোমার হৃদয় পরিপূর্ণ,—তুমি সে কথা বুঝিবে কি করিয়া? যেদিন রমণীকে বিশ্বাস করিয়া প্রতারিত হইবে, যেদিন বুঝিবে যে এ সংসারে তুমি তোমার, আর কেহ আপনার নয়,—প্রেম, ভক্তি বা স্নেহ কোন বন্ধনই লালমাকে বাঁধিয়া রাখিতে পারে না,—সেই দিন তোমার আমার মত অবস্থা হইবে। রাজপুত্র, সিংহাসনের পথ কুসুমাস্তীর্ণ নহে। ময়ূর-সিংহাসনের পথ অতি বন্ধুর! আলম্‌গীর ও শাহ আলম্ বাদশাহ তাহা বুঝিয়াছিল। কিন্তু অবরোধের পথ আরও কঠিন। সে পথ বড় পিচ্ছিল, রাজপুত্র! হুমায়ূনের পরে তোমার বংশের আর কেহ সে পথে চলে নাই।” “কাকের, তুমি কি বলিতেছ? তুমি জান শাহ-আলম্ বাদশাহ সিংহাসনে আসীন, তুমি জান আমার পিতা জীবিত এবং জ্যেষ্ঠভ্রাতা বিগ্ৰহমান? ময়ূর-ভক্তের কথা কি বলিতেছ! তুমি নিশ্চয় দেওয়ানা!” “ঐ তো গোল শাহজাদা; যে সাক্ষ্য দেখে, সে হয় পাগল,—আর যাহারা দৃষ্টিশক্তি থাকিতে চক্ষু রুদ্ধ করিয়া বসিয়া থাকে, তাহারা এ দুনিয়ার দুনিয়াদার। রাজপুত্র! বৃদ্ধের প্রাণ পদ্মপত্রের জল! সিংহাসনের পথে জীবনের মূল্য অতি সামান্য। ঐরাবৎ সামান্য কারণে ঐরাবতী গর্ভে বিলীন হয়। কোথা হইতে কি হয়, তাহা কয়জনে বুঝিতে পারে? এই দেখ তুমি

আমাকে পাগল মনে করিতেছ ; অথচ আমি দিব্য চক্ষে দেখিতে পাইতেছি, তুমি কোন্ পথে কোথা দিয়া কোথায় যাইতেছ ! আমি যদি সে কথা তোমায় প্রকাশ করিয়া বলি, তুমি আমাকে বিশ্বাস করিবে না । তোমাকে যদি কোন কাজ করিতে নিষেধ করি, তুমি সে কথা বুঝিতে পারিবে না ।” “কেন পারিব না কাকের, নিশ্চয় পারিব ! জহাঙ্গীর নগরে এক ককীর একবার আমাকে এই রকম কথা বলিয়াছিল । সেও বলিয়াছিল যে, একদিন আমাকে হিন্দুস্থানের মালিক হইতে হইবে ! তুমিও ত সেই কথা বলিলে । দেখ, আমি সমস্ত কথা বিশ্বাস করিতেছি । তুমি বল, আমি নিশ্চয় বুঝিতে পারিব ।” “সাধা কি শাহজাদা ? যে আমাকে দিয়া এই সকল কথা বলায়, সে লক্ষ-লক্ষ হিন্দুস্থানের বাদশাহের বাদশাহ । তাহার কণ্ঠস্বর বা তাহার হস্ত কখনও কম্পিত হয় না । তাহার আদেশ কখনও ব্যর্থ হয় না । সে বলিতেছে, তুমি পারিবে না । শত-শত, লক্ষ-লক্ষ চিন্তাশূন্য যৌবনোন্মত্ত যুবা যে পথে গিয়াছে, তুমিও সেই পথে যাইবে ; কেহ তোমাকে রক্ষা করিতে পারিবে না ।” “কাকের, তুমি কি আমাকে ভয় দেখাইতে আসিয়াছ ? তুমি জান, আমি কে ?” “খুব জানি ! তুমি, তোমার পিতা, পিতামহ, প্রপিতামহ সকলকেই জানি । চোগ্তাই ! জানি যে, তোমার ক্রোধ-ক্রুর দৃষ্টির আঘাতে হফ্ত-হাজারি মনসব্দারের স্বপ্নেও মস্তকের বন্ধনটা শ্লথ হইয়া যায় । সে কথা বলিয়া তকলিফ করিতে হইবে না শাহজাদা ! আমি আলমগীরী-

আমল্।” “কাকের, তুমি যে আমীর ছিলে, সে বিষয়ে কোন মন্দেহ নাই। আশ্চর্য্য! তোমার মত মানুষ আমি এ পর্য্যন্ত দেখি নাই! তোমার কি জীবনের ভয় নাই?” “রাজপুত্র, তুমি নির্দোষ নহ; কিন্তু কথাটা নিতান্ত নির্দোষের মতই कहিলে। যাহার জীবনে মার্য্য থাকে, তাহারই মরিতে ভয় হয়। ভাবিয়া দেখিলে না, যে মোগল বাদশাহের মনসবদারী ছাড়িয়া শ্মশানে আশ্রয় গ্রহণ করে, মোগ্লাই থানা ছাড়িয়া চিতাগিতে অন্নপাক করে, সুকোমল দুধকেননিভ শয্যায় অসংখ্য গোলাম ও বাদীর পরিচর্যা পরিতাগ করিয়া এই নর-কঙ্কাল-দঙ্কল শ্মশানে অন্ধকারে বিচরণ করে, তাহার জীবনের মমতা কতটুকু? শাহজাদা, তুমি মেহেরবান্ ও কদরদান্! আমার উপর মেহেরবানী কর, একটা অনুৰোধ রাখ। এই পুরাতন মাঝাটা অনেক দিন বহিয়া আসিতেছি, একবার বদলাইবার মত হইয়াছে। হুকুম কর, একজন আহদী ডাক, আমার এই পুরাতন বোঝাটা নামাইয়া দিয়া যাক।” “আশ্চর্য্য কাকের, আশ্চর্য্য! তোমার মনের বল অদ্ভুত। ইচ্ছা করিয়া কোন মানুষকে তীক্ষ্ণধার তরবারির নিম্নে মাথা পাতিয়া দিতে শুনি নাই।” “শোন নাই! এই ত হবে শুনিতে আরম্ভ করিয়াছ! এখন কত শুনবে! ফররুখসিয়র, যেদিন দিবাকর-কিরণ-দীপ্ত জগৎ অন্ধকার দেখিবে, সেদিন তুমিও উচ্চকণ্ঠে প্রার্থনা করিবে,—যদি কেহ বন্ধ থাক, তীক্ষ্ণধার তরবারি দিয়া আমার স্বন্ধের এই পুরাতন বোঝাটা নামাইয়া দিয়া যাও।” “কাকের,

আবার কি বলিতেছ, বুঝিতে পারিতেছি না! আমি কং-
কথ্‌সিয়র, আজীম-উশ-শানের পুত্র, শাহ্‌আলম্‌ বাদশাহের
পোত্র,—এমন দশা আমার হইবে? কবে হইবে, কেন হইবে?”
“সে তোমার উপর নির্ভর করে শাহজাদা? রমণী-রূপের
মাদকতা তীব্রতম মনিরা অপেক্ষাও তীব্র; সে সুরা, যেদিন
তোমাকে উদ্ধৃত করিবে, সেদিন হইতে অবনতির পিচ্ছিল
শৈবাল-পথ অবলম্বন করিবে। সেপথ অতি দূর; কিন্তু সে
পথে তোমার গতি অতি দ্রুত।”

শাহজাদা মালতী-বিতানের প্রাচীন প্রস্রবণের ধঃসাবশেষে।
উপর উপবেশন করিলেন; এবং উভয় হস্তে ব্রাহ্মণের হস্তদ্বয়
আকর্ষণ করিয়া, তাঁহাকে ও পার্শ্বে উপবেশন করাইলেন। ব্রাহ্মণ
হাসিয়া কহিল, “আজি পাঠানের উদ্ভান ময়ূর-তন্তুর সমান।”
শাহজাদা চমকিত হইয়া জিজ্ঞাসা করিলেম, “এ কথা বলিতেছ
কেন?” ব্রাহ্মণ ঈষৎ হাসিয়া কহিল, “যেখানে দীন ও দুনিয়ার
মালিক উপবেশন করেন, সেই তত্ত্ব—পাঠানের ভগ্ন প্রস্রবণ
আজি পবিত্র হইল।” “আবার হেঁয়ালি বরিলে?” “শাহজাদা,
এ নারাজীবনটাই হেঁয়ালী।” “ও-সকল কথা যাক,—তুমি কি
নিবেদ্য করিবে বলিতেছিলে?” “শুনিয়া কি হইবে, তুমি ত
বুঝিতে পারিবে না?” “পারিব, তুমি বল।” “দুইটা কথা
তোমায় বলিয়া রাখি,—অধিক কথা তোমার মনে থাকিবে না।
রমণীকে কখনও বিশ্বাস করিও না;—আর জানিও যে, অন্ধ
কখনও বিশ্বাসঘাতক হইবে না।”

এই সময়ে দূরে অশ্বপদ-শব্দ শ্রুত হইল। শাহজাদা সেইদিকে মুখ ফিরাইয়া দেখিলেন যে, একজন আহদী অশ্বারোহণে আসিতেছে; এবং তাহার পশ্চাৎ আরও তিনজন মনুষ্য পদব্রজে আসিতেছে।

ষোড়শ পরিচ্ছেদ

মালতী-বিতানে

আহদী দূর হইতে অভিবাদন করিল। শাহজাদা অত্যন্ত বিরক্ত হইয়া কহিলেন, “এখন আমার অবসর নাই।” আহদীর পশ্চাৎ হইতে এক ব্যক্তি বলিয়া উঠিল, “জনাব, অবসর নাই বলিলে চলিবে না। একখানা নোকাও পাওয়া গেল না।” শাহজাদা অত্যন্ত বিরক্ত হইয়া জিজ্ঞাসা করিলেন, “ফৌজদার কোথায় গেল?” বক্তা আহদীর সম্মুখে আসিয়া কহিল, “নিরুদ্ধে,—সম্ভবতঃ মুশিদাবাদ।” “এ সমস্তই দেওয়ানের চক্রান্ত।” “সে কথা কি আপনি এতক্ষণে বুঝিলেন?” যে কৃশকায় ব্রাহ্মণের সহিত শাহজাদা এতক্ষণ বাক্যালাপ করিতে-ছিলেন সে ইঠাৎ বলিয়া উঠিল, “কি বলিলে? নোকা নাই? হাবেলী পরগণায় একখানা নোকা খুঁজিয়া পাইলে না? এই-বুদ্ধিতে তোমরা আলমগীর বাদশাহের সাম্রাজ্য শাসন করিবে?”

পাগলের কথা শোন। স্বতীর পরপারে পদ্মার দহ পড়িয়াছে ;
 দহের জলে পঞ্চাশখানা নৌকা ফোঁজদারের লোকে ডুবাইয়া
 রাখিয়াছে।” শাহজাদা বলিয়া উঠিলেন, “সাবাস্ ফকীর !
 তোমার অজ্ঞাত কি কিছুই নাই ?” “অনেক আছে ! রাজপুত্র,
 যত শীঘ্র পার, এ দেশ পরিত্যাগ কর।” “কেন ?” “যতদিন
 এ দেশে থাকিবে, ততদিন তোমার দুই গ্রহ প্রসন্ন হইবে না।”
 “কোন দিকে যাইব ?” “বলিয়াছি ত, ময়ূর-সিংহাসনের
 পথে।” “যাহা বলিতেছ, তাহা যদি স্পষ্ট করিয়া বল,
 তাহা হইলে বুঝিতে পারি।” “ইহা অপেক্ষা স্পষ্ট করিয়া
 বলিবার অধিকার আমার নাই রাজপুত্র।” আহাদীর সঙ্গী এই
 সময়ে জিজ্ঞাসা করিল, “এ ব্যক্তি আপনাকে কি বলিতেছে
 শাহজাদা ?” শাহজাদা উত্তর দিবার পূর্বেই ব্রাহ্মণ বলিয়া
 উঠিল, “কি বলিতেছি, জান অসীম রায় ? এতক্ষণ মুশিদাবাদে
 দেওয়ানখানায় বসিয়া কৃশকায়, ক্ষুদ্রচেতা হরনারায়ণ রায়
 বলিতেছে যে, সে ভাগীরথী ও পদ্মার অর্ধেক নৌকা লুকাইয়া
 রাখিয়াছে ; এবং ইচ্ছা করিলে শাহজাদাকে পিপীলিকার মত
 টিপিয়া মারিতে পারে ! আরও কি বলিতেছি শুনিবে ?
 বলিতেছি যে, ময়ূর-সিংহাসনে আরোহণের পথ বন্ধুর বটে, কিন্তু
 তাহা হইতে অবরোহণের পথ আরও কঠিন। সে পথ বড়
 পিচ্ছিল। সে পথে যাহাদের পদস্থলন হয়, যাহারা জনশূণ্য
 দেওয়ান-ই-আম্ নিজ পদশব্দে মুখরিত করিয়া শূন্য নকরাখানায়
 অন্তর্মিত নিজ গৌরব রবির স্ফীণ ছায়া স্মরণ করিয়া দীর্ঘ নিঃশ্বাস-

পরিত্যাগ করে, তাহাদের মত হতভাগ্য বাদশাহ কখনও দিল্লীর সিংহাসনে উপবেশন করে নাই।” “অমঙ্গলের কথা কেন কহিতেছ ঠাকুর?” “শুনিতে ইচ্ছা না হয়, চলিয়া যাও। যুবা তুমি বাদশাহ্ অপেক্ষা হতভাগ্য। বাদশাহের অমঙ্গলের কথা শুনিয়া বিরক্ত হইতেছ; ভবিষ্যৎ তোমার জ্ঞাত কি সক্ষয় করিয়া রাখিয়াছে, তাহা শুনিয়াছ কি?”

এই সময়ে মালতী-বিতানের অপর পাশ্বে একজন বলিয়া উঠিল, “দাদাঠাকুর, ওই গো বটে!” শাহজাদা অধিকতর বিরক্ত হইয়া জিজ্ঞাসা করিলেন, “আবার কে আসিল?” কুঞ্জের অপর পাশ্বে হইতে দ্বিতীয় ব্যক্তি কহিল, “বাবা, আমি দীননাথ গো! আমার কর্তাবাবার নাম নবদ্বীপচন্দ্র।” তাহার পরই আর একজন বলিয়া উঠিল, “অসীম!” দ্বিতীয় ব্যক্তির কণ্ঠস্বর শুনিয়া অসীম দ্রুতপদে মালতী-বিতানের বাহিরে আসিয়া তাহাকে বাহুপাশে আবদ্ধ করিলেন। শাহজাদা বিস্মিত হইয়া প্রশ্নবাসী ব্রাহ্মণকে জিজ্ঞাসা করিলেন, “বায় সাহেব এমন করিয়া কোথায় গেল?” উত্তর হইল, “অদৃষ্ট-নির্দিষ্ট পথে।” “সে পথে ত সকলেই চলে, কিন্তু এত উতলা হইয়া কোথায় গেল?” “তাহার শুভগ্রহ তাহাকে যে পথে লইয়া যাইতেছিল, সে পথ হইতে তাহাকে নিরত করিবার জ্ঞাত দুই গ্রহ এমন একটা শক্তি আহ্বান করিয়া আনিয়াছে, যে শক্তির আকর্ষণ বোধ করা অসীম রায়ের পক্ষে একান্ত অসম্ভব। আমি চলিলাম।” ব্রাহ্মণ এই বলিয়া ক্ষিপ্ৰপদে পদ্মাতীরস্থিত বেণুকুঞ্জমধ্যে অদৃশ্য হইয়া

গেল। শাহজাদা ফরুখ্‌সিয়র অবসর দেহে মালতী-কুঞ্জতলে বসিয়া পড়িলেন।

তখন সেই প্রাচীন মালতী-বিতানের বহির্দেশে দুই বাল্যসখা আপন মনে বাক্যালাপ করিতেছিল; এবং বণিক দীননাথ তাহাদিগের প্রতি ক্রুর কটাক্ষপাত করিতেছিল। অসীম জিজ্ঞাসা করিলেন, “এই অপমানের ভার মস্তকে বহিয়া, একমাত্র কণ্ঠার অপকলঙ্করাশি-লিপ্ত হইয়া তোমার বৃদ্ধ পিতা দেশত্যাগ করিলেন। ক্ষোভে অপमानে তিনি ক্ষিপ্ত হইয়াছিলেন; কিন্তু তুমি তাঁহাকে আসিতে দিলে কেন?” আগন্তুক কহিলেন, “তুমি কি বক্তাকে ভুলিয়া গিয়াছ ভাই! জগতে এমন কেহ নাই যে, তাঁহাকে সম্বল হইতে বিচলিত করিতে পারে।” “সে কথা ভুলি নাই; কিন্তু ইহার ফল কি হইবে, বিবেচনা করিয়াছিলে কি? আমাদের কুলীন-সমাজে লোকে দিনে তিনবার জাতিচ্যুত হয় এবং তিনবারই সামাজিক পদ ফিরিয়া পায়; কিন্তু হিন্দুরমণীর কলঙ্ক কখনই মোচন হয় না। আমার কি! বড় গৃহিণীর নিকট বহু ঋণ আছে, সে ঋণ কখনও পরিশোধ করিতে পারিব কি না সন্দেহ! সে ঋণভার নষ্ট হয় আর একটু বাড়িল। কিন্তু দুর্গার কি হইবে?” “আমি ত কিছুই খুঁজিয়া পাই না ভাই! সৌভাগ্যক্রমে তোমার সহিত দেখা হইয়াছে। আমাদের এখন বড় অসময় অসীম! প্রকৃত বন্ধুর কাজ কর, বিপদ হইতে উদ্ধার কর।” “আমার এক একবার মনে হইতেছে যে, ঠাকুরের সহিত সাক্ষাৎ করি;

কিন্তু কি করিয়া তাঁহার নিকট মুখ দেখাইব ?” “অসীম, তুই কি পাগল হইয়াছিস্,—এখনও বাবাকে চিনিতে পারিস্ নাই ?” “চিনিতে ভুল করি নাই স্তদর্শন ! তোমাদের গৃহে পুত্রবৎ স্নেহ লাভ করিয়াছি ; কিন্তু—” “কিন্তু কি ? তুমি কি মনে কর যে, দুর্গার চরিত্রে বিন্দুমাত্র সন্দেহ থাকিলে, ঠাকুর তাহাকে সঙ্গে লইয়া আসিতেন ?” “সে কথা সত্য ; কিন্তু মুখ দেখাইব কি করিয়া ?” “চঞ্চল হইও না ভাই, বিষম সঙ্কট উপস্থিত ! তুমি ধীর, শান্ত, বিদ্বান, বুদ্ধিমান ; এ বিপদে তুমি ভিন্ন আমাদের অন্য গতি নাই ।” “স্তদর্শন তোমার জন্ম বা ঠাকুরের জন্ম স্বচ্ছন্দে প্রাণ বিসর্জন দিতে পারি ; কিন্তু কথাটা যে অতি জঘন্য ?” “দূর কর পাপ কথা ; শুন অসীম, আমি সাংসারিক বিষয়ে অনভিজ্ঞ ; চিরদিন সঙ্গীত-চর্চাই করিয়া আসিয়াছি—অপর চিন্তা কখনও মনে স্থান পায় নাই । আমার কাণে-কাণে কে বলিয়া গেল যে, কর্তার সহিত তোমার সাক্ষাৎ হইলেই আমাদের সমস্ত বিপদ কাটিয়া যাইবে । আমার মন এখন এত প্রসন্ন যে, আমার গান ধরিতে ইচ্ছা করিতেছে । লাক্ষিত, অপমানিত, গৃহতাড়িত ব্যক্তির পক্ষে আশ্চর্য্য কথা নহে ! ভৈরবীর সময় কাটিয়া গেল, তুই শীঘ্র চল ।” “চল যাই ; কিন্তু তোমার সঙ্গে এ কে ?”

স্তদর্শন সংক্ষেপে দীননাথের ইতিহাস বিবৃত করিলেন । তখন তাহাকে আশ্বাস দিয়া অসীম পুনরায় মালতী-বিতানে প্রবেশ করিলেন ; এবং বিস্মিত হইয়া দেখিলেন যে মালতী-মূলে

ধূলি-শয্যায় উপবিষ্ট শাহজাদা গভীর চিন্তায় তাঁহার পদশব্দেও চিন্তাশ্রোত বাধা পাইল না দেখিয়া অসীম ডাকিলেন, “শাহজাদা!” ফব্বুখ্‌সিয়র মুখ তুলিয়া কহিলেন, “রায় সাহেব, ফকির কি বলিয়া গেল বুঝিলাম না। তাহার কথার অর্থ বলিতে পারে এমন লোক সন্ধান করিতে পার?” “এখনই পারি।” “চল, তাহার নিকটে যাইব।” শাহজাদা ধরাসন ত্যাগ করিয়া উঠিলেন।

অর্দ্ধদণ্ড পরে রসীদ ও পত্র লইয়া দীননাথ স্মৃতিগ্রাম পরিত্যাগ করিল।

সপ্তদশ পরিচ্ছেদ

নিয়তি

স্মৃতিগ্রামের পরপারে ভাগীরথীর অনতিদূরে একটি বৃহৎ দীর্ঘিকা ছিল। ভাগীরথী-প্রবাহ যখন গ্রাম হইতে বহুদূরে, তখন এই দীর্ঘিকা খনন করা হইয়াছিল; কিন্তু ক্রমে এখন ভাগীরথী দীর্ঘিকার অতি নিকটে আসিয়া পড়িয়াছেন; স্মরণীয় ইহার প্রয়োজনাবাব। দীর্ঘিকার চারিদিকে চারিটি প্রশস্ত ঘাট। তাহা সংস্কারাভাবে স্থানে স্থানে ভাঙ্গিয়া গিয়াছে। দীর্ঘিকা পন্থবনে পরিপূর্ণ; স্মরণীয় যত্নের অভাব হইলেও, উহার জল কাকচক্ষুর ন্যায় নির্মল। গ্রামের লোকে গন্ধোদক

নিকটে পাইয়া দীর্ঘিকার জল পরিত্যাগ করিয়াছিল ; কিন্তু বালক-বালিকাগণ তাহাতে সম্ভরণের লোভ সম্বরণ করিতে পারে নাই ।

মধ্যাহ্ন অতীত-প্রায় । ভাগীরথী-তীরে বেণু-কুঞ্জের ছায়ায় একখানা ক্ষুদ্র নৌকা লাগিয়া রহিয়াছে ; কিন্তু নৌকার আরোহী বা নাবিক সকলেই নিদ্রিত । সেই বেণুকুঞ্জ হইতে পঞ্চাশ হস্ত দূরে দীর্ঘিকার একটি ঘাট আছে । এককালে ঘাটের উপরে একটি মন্দির ছিল ; কিন্তু অশ্বখ ও বটের রূপায় মন্দিরের অস্তিত্ব পর্য্যন্ত লুপ্ত হইয়াছে,—অশ্বখ ও বট রহিয়াছে । অশ্বখ ও বট পরস্পরকে বেষ্টিত করিয়া বর্দ্ধিত হইয়াছিল । তাহা দেখিয়া একজন ভগবৎ-প্রেমিক ইহার নাম দিয়াছিলেন যমলার্জুন । মন্দিরের অস্তিত্ব-লোপ হইলে মন্দিরবাসী দেবতা যমলার্জুন-হলে আশ্রয় লাভ করিয়াছিলেন । সেই নিদাঘ-মধ্যাহ্নে এক তরুণী শ্রামা শুভ্রবসনা বিধবা দেবতার অর্চনা করিতেছিল ।

শিবপূজা সাঙ্গ হইলে, রমণী যথাবিধি গলদেশে অঙ্কল প্রদান করিয়া, সাষ্টাঙ্গ প্রণিপাতপূর্ব্বক উঠিয়া দাঁড়াইল । দাঁড়াইয়াই রমণী চমকিতা হইল ; কারণ অদূরে ভগ্নঘাটের ইষ্টকস্তূপের উপরে বসিয়া এক অনিন্দ্যসুন্দরী বালিকা একমনে তাঁহার দিকে চাহিয়া আছে । বালিকা কখন আসিয়াছে, একাগ্রমনে পূজা-নিরতা রমণী তাহা জানিতে পারে নাই । বালিকা সুন্দরী,—তেমন সৌন্দর্য্য বোধ হয় দেবলোকেও দুর্লভ । রমণী শ্রামবর্ণা, কিন্তু উজ্জল-কান্তি । তাহার

অবয়বের গঠন-সৌষ্ঠব প্রথম-যৌবনের হিজলালে পরিপূর্ণ হইয়াছিল; এবং তাহার মাধুরী নয়নোন্মাদকারী;—তথাপি তাহার সৌন্দর্য্য সেই বালিকার অতুল রূপরাশির নিকট নিপ্রভ হইয়া গিয়াছিল। যৌবনোন্মেষের পূর্বে যে রূপ তত্ত্বজীর পূর্ণ-যৌবনের চিত্তোন্মাদক আকর্ষণ-শক্তিকে পরাজিত করিতে পারিবে, সে রূপ দেবলোকেও দুর্লভ, কবি-কল্পনারও অতীত, অতএব অবর্ণনীয়।

রমণী একাগ্রচিত্তে নয়ন ভরিয়া বালিকার রূপরাশি পান করিতেছিল। তাহার কাস্তি স্তম্ভ-ধবল; কুসুম-পেলব পদতল যেন কঠোর সোপানের কর্ণশ স্পর্শে ঈষৎ রক্তরাগে রঞ্জিত হইয়াছিল। জীর্ণ, মলিন বসনখানি বৃথা তাহার রূপ-সাগরের উদ্বেলিত তরঙ্গরাশিকে সীমাবদ্ধ করিবার চেষ্টা পাইয়াছিল। সে বসনের আবরণে তাহাকে ভ্রাম্যচ্ছাদিত অঙ্গার বলিয়া বোধ হইতেছিল। রমণী যখন একাগ্রচিত্তে তাহাকে নিরীক্ষণ করিতেছিল, তখন বালিকার চঞ্চল নয়নদ্বয় দ্রুত গতিতে ইতস্ততঃ ভ্রমণ করিতেছিল। রমণীকে বৃত্ত দেখিয়া সে জিজ্ঞাসা করিল, “তুমি কে গা। কোথায় যাইবে?” রমণীর চেতনা ফিরিল; তিনি বলিলেন, “আমরা কাশী যাইব, এক রাত্রির জগু তোমাদের গ্রামে অতিথি হইয়াছি।” বালিকা বিন্দু-মাত্র লজ্জিতা না হইয়া জিজ্ঞাসা করিল, “অতিথি হইয়াছ। কাহাদের বাড়ী?” রমণী কহিলেন, “কাহারও বাড়ী নয়, তোমাদের গ্রামের ঘাটে আমাদের নৌকা বাধা আছে

সুতরাং আমরা তোমাদের গ্রামের অতিথি।” এই অবসরে রমণী লক্ষ্য করিলেন যে বালিকার কণ্ঠস্বর কৰ্কশ। বালিকা ঈষৎ মুখবিকৃত করিয়া কহিল, “সে আবার কেমন অতিথি?” কিন্তু রমণী উত্তর দিলেন না। অলক্ষণ নীরব থাকিয়া বালিকা পুনরায় জিজ্ঞাসা করিল, “তোমার নাম কি গা?” রমণী হাসিয়া কহিলেন, “আমার নাম দুর্গা।” “তোমরা কি কায়াস্থ?” “না, আমরা ব্রাহ্মণ।” “ঠিক বটে! ব্রাহ্মণ হইলেই অতিথি হয়। আমাদের বাড়ীতে অনেক অতিথি আসে, সকলেই ব্রাহ্মণ; তাহারা কিন্তু পুরুষ মানুষ।” “তবে আমিই প্রথম মেয়ে অতিথি আসিলাম।” “তুমি কি আমাদের বাড়ী যাইবে নাকি?” “বাইব। তোমাদের বাড়ী কোন্ দিকে?” বালিকা দীর্ঘিকার এক কোণে আশ্র-পনসের ঘনসন্নিবেশের মধ্যে এক জীর্ণ অট্টালিকার কক্ষাল দেখাইয়া দিল। এইবার রমণী প্রশ্ন করিতে আরম্ভ করিয়া দিল। “তোমরা কি জাতি?” উত্তর হইল, “কায়াস্থ।” “তোমাদের বাড়ীতে আর কে-কে আছেন?” “কেন, সকলেই!” “সকলেই কে-কে?” “বাবা মা, দাদা, ঈশানঠাকুর, জগৎজ্যোষ্ঠা আর রামদাদা। ইহাদের মধ্যে জগৎজ্যোষ্ঠা আর রামদাদা ছোটলোক; তাহারা সদরের দেউড়ীতে থাকে। আমরা যখন খুব বড়লোক ছিলাম, তখন রামদাদার মত অনেক লোক দেউড়ীতে থাকিত। ঈশানঠাকুরও আমাদের চাকর, তবে সে ব্রাহ্মণ বলিয়া আমাদের বাড়ীতে থাকিতে পায়।” “তুমি এখন কোথা যাইবে?” “গা ধুইতে আসিয়াছিলাম, জলে নামিব।” “এতক্ষণ জলে নাম নাই

কেন? “তুমি নূতন লোক কি না, তোমাকে ঠাহর করিয়া দেখিতেছিলাম! তুমি কি এখন আমাদের বাড়ীতে বাইবে?” “চল, বাইব।” “তবে দাঁড়াও, আমি গা ধুইয়া আসি।” বালিকা এই বলিয়া জলে নামিয়া গেল এবং আকণ্ঠ জল-মগ্ন হইয়া অঙ্গ-মার্জনা করিতে আরম্ভ করিল। রমণী নির্নিমেষ নয়নে দীর্ঘিকার স্বচ্ছজলে বালিকার কমনীয় কান্তির অভিনব সন্নিবেশ দেখিতে লাগিল। কিয়ৎক্ষণ পরে রমণী জিজ্ঞাসা করিলেন, “তুমি সাতার দিতে জান?” বালিকা কহিল, “না।” “বদি ডুবিয়া যাও?” “আমি ডুবিব না, আমি সমস্ত ঘাটের পথ জানি। যেখানে দাঁড়াইয়া আছি, এইখানে একথানা বড় পাথর আছে, তাহার পরে একেবারে অতল জল।” “সাতার শেখ নাই কেন?” “কেহ শেখায় নাই বলিয়া, তুমি কি সাতার জান?” “জানি।” “আনাকে শিখাইবে?” “শিখাইব।” “কবে?” “আজ সন্ধ্যাবেলায়।” “সন্ধ্যাবেলায় জলে নামিলে মা নাড়িবে। বৈকাল বেলায় আসিব কি? ঐ দেখ কাহারো আসিল।”

রমণী ফিরিয়া চাহিয়া অক্ষুট আশ্চর্যনাদ করিয়া উঠিলেন, দীর্ঘিকার পাড়ের উপর দুইজন পুরুষ দাঁড়াইয়া ছিল, তাহাদের মধ্যে একজন কহিল, “দুর্গা, এই দিকে আয়। ঠাকুর কোথায়?” রমণী অতি দীর্ঘে ঘাটের উপরে উঠিল এবং কিয়ৎক্ষণ নীরবে দাঁড়াইয়া রহিল। প্রথম বক্তা পুনরায় জিজ্ঞাসা করিল, “ঠাকুর কোথায়?” রমণী অক্ষুট স্বরে কহিল, “গ্রামে গিয়াছেন।” এই বলিয়া রমণী পুনরায় অবনত মস্তকে পদাঙ্গুলি দ্বারা মৃত্তিকা খনন

করিতে আরম্ভ করিল। কিয়ৎক্ষণ পরে ধীরে-ধীরে মস্তক উত্তোলন না করিয়া দ্বিতীয় আগন্তুককে জিজ্ঞাসা করিল, “দাদা, ভূপ কোথায়? সে ভাল আছে ত?” অসীম কহিলেন, “ভাল আছে দিদি। তোমরা যে এ অঞ্চলে আছ, তাহা আমি জানিতাম না, জানিলে অবশ্যই তাহাকে সঙ্গে লইয়া আসিতাম। আমি ফিরিয়া গিয়াই তাহাকে পাঠাইয়া দিব। আমরা এখন বাদশাহের পৌত্রের আশ্রয়ে আছি দুর্গা। সময় বড় মন্দ কাটিতেছে না। দেখ দিদি! বাহা হইয়াছে সমস্তই শুনিয়াছি। কি করিব, অদৃষ্টের ফল! সমস্ত অনর্থের মূল তোমার স্বামি-দত্ত সেই মোহরগুলি। যদি মনে দুঃখ না পাও, তাহা হইলে বল, ভূপেনের হস্তে ফিরাইয়া দিব।” “না দাদা, বাহা দিয়াছি তাহা আর ফিরাইয়া লইতে চাহি না। তাহা ভূপেনের ইচ্ছামত ব্যয় করিও।”

সহসা দীর্ঘিকার জলের দিকে চাহিয়া দুর্গমঠাকুরাণী চীৎকার করিয়া উঠিলেন। তাঁহার কণ্ঠ হইতে অক্ষুট আর্দ্রনাদব সহিত উচ্চারিত হইল “ছোট মেয়ে—সাঁতার জানে না—” অসীম তিন লক্ষ ঘাটের শেষ সোপানে গিয়া উপস্থিত হইলেন এবং মোগ্লাই পোষাকের কতকগুলো বস্ত্র পরিত্যাগ করিয়া জলে পড়িলেন। ঘাটের অদূরে পদ্মবনের নিকটে তখনও জলে বৃহদ উঠিতেছিল। অসীম সেই স্থানে ডুবিলেন। স্বদর্শন ও স্তাহার ভগিনী স্তব্ধ হইয়া দাঁড়াইয়া রহিলেন।

একবার দুইবার তৃতীয় বার বিকল হইয়া চতুর্থবারে গত-

চেতন বালিকার দেহ স্বন্ধে লইয়া অসীম রায় যখন ঘাটের নিকট আসিলেন, তখন দুর্গা ও হৃদর্শন ছুটিয়া আসিয়া তাহাকে নাগাইয়া লইলেন। বহু চেষ্টা ও যত্নে বালিকার হৃদপিণ্ডে পুনরায় স্পন্দন আরম্ভ হইল। তখন তাহাকে হৃদর্শনের নিকট রাখিয়া অসীম তাহার পিতাকে সংবাদ দিতে চলিলেন।

দীর্ঘিকার পরপারে এক বজ্রাঘাত-শুষ্ক তিস্তিডীমূলে সেই কৃশকায় কৃষ্ণবর্ণ ব্রাহ্মণ বসিয়া ছিল। সে তাঁহাকে আসিতে দেখিয়া উঠিয়া দাঁড়াইল এবং ঈষৎ হাসিয়া কহিল, “কি রায়জী, দড়িটা নিজে হাতে লইয়া গলায় পরিলে?” অসীম অত্যন্ত বিস্মিত হইয়া জিজ্ঞাসা করিলেন, “সে কি বকম ঠাকুর!” “যাহা করিয়াছ, তাহার ফল যদি জানিতে, তাহা হইলে উহাকে দীর্ঘিকার গর্ভেই রাখিয়া আসিতে।” “আমাকেও কি ভয় দেখাইতে আসিয়াছ?” “তোমাকে ভয় দেখায় এমন লোক এখনও জন্মায় নাই। তবে জানিয়া রাখিও অসীম রায়, এই বালিকা তোমার উদ্বন্ধন-রজ্জু। পরে আমাকে নোষ দিও না। যখন কণ্ঠে রজ্জুর আকর্ষণ বোধ করিবে, তখন স্মরণ করিও যে, এক ব্রাহ্মণ বহুপূর্বে তোমাকে সাবধান করিয়া দিয়াছিল। সে কথা যত্নে, গ্রামে বিবাহ-যোগ্য কুলীন-কন্যা আছে কি না বলিতে পার?” “ঠাকুর, তুমি পাগল অথচ পাগল নহ। তোমার মনের আসল কথা বুঝিয়া উঠা দায়। তুমি কি সত্যসত্যই আবার এ বয়সে বিবাহ করিতে চাহ?” “অর্থের বড়ই অনাটন। কি জান রায়জী! উপস্থিত দুই-একটা বিবাহ না করিলে সংসারযাত্রা নির্বাহ করা,

বড়ই কঠিন হইয়া উঠিবে।” “তবে আমার সহিত আইস!”

ব্রাহ্মণ অসীমের সহিত গ্রামসীমায় প্রবেশ করিল।

—

১৫০০

অষ্টাদশ পরিচ্ছেদ

বিবাহের সম্বন্ধ

সংবাদ পাইয়া বালিকার আত্মীয়-স্বজন দীর্ঘিকাভীতে ছুটিয়া আসিল এবং বহুক্ষণ শুষ্কবার পর বালিকার চেতনা ফিরিল। যতক্ষণ অপরে বালিকার চেতনা ফিরাইবার চেষ্টা করিতেছিল, ততক্ষণ অসীম, ঘাট হইতে কিঞ্চিৎ দূরে, দীর্ঘিকা-ভীতে বসিয়া ব্রাহ্মণের সহিত আলাপ করিতেছিলেন। তিনি জিজ্ঞাসা করিলেন, “ঠাকুর, সত্য-সত্যই কি বিবাহ করিতে চাও?” ব্রাহ্মণ বিরক্ত হইয়া কহিল, “ইচ্ছা করিয়া কি লোকে এতবার মিথ্যা-কথা বলিতে পারে?” “কতগুলি বিবাহ করিয়াছ?” “কি যত্না! এক কথার জবাব কতবার তোমাকে দিব? দশ-বার গণ্ডা হইবে।” “তোমার কি দুই-কুড়ি পত্নীই জীবিত আছেন?” “কয়জন বাঁচিয়া আছেন, তাহা বলিতে পারি না।” কারণ, বিবাহের পরে একজন ব্যতীত অপর কাহারও সহিত সাক্ষাৎ হইয়াছে কি না স্মরণ হয় না।” “তুমি আশ্চর্য্য করিলে

এই চল্লিশ জনের মধ্যে একজন ব্যতীত জীবনে আর কাহারও সহিত তোমার দ্বিতীয়বার সাক্ষাৎ হয় নাই?" "আবশ্যক বোধ করি নাই।" "তবে বিবাহ করিয়াছিলে কেন?" "অর্থো-পার্জনের জন্ত।" "শাহজাদার মুখে শুনিলাম যে, তুমি একবার ~~অর্থ-উপায়ে~~ প্রভূত অর্থ-উপার্জন করিছ। তুমি কি কারণে সে পথ পরিত্যাগ করিয়া এই উপায়ে—নিষ্ঠুর, ঘৃণিত উপায়ে অর্থ-উপার্জন করিতে চাহ?" "নিষ্ঠুর, ঘৃণিত? অসীম রায়! তুমি বালক, তুমি এই চির-প্রথিত কোলীনু-প্রথার মধ্যাদা কি বুঝিবে? বুঝিয়াছিল বলাল, সে বোধ হয় রাজা হইয়াও আজীবন নারী-চরিত্র অধ্যয়ন করিয়াছিল, নতুবা বিষহরি-দলনের এই অপূর্ণ প্রথা আবিষ্কার করিতে পারিত না।" "যে সকল বালিকা বিবাহ কর, তাহাদিগকে দেখিয়া তোমার কি দয়া হয় না?" "দয়া, বহুকাল পরে একটা নূতন কথা শুনাইলে অসীম রায়! প্রথম-যৌবনে কথাটা বোধ হয় একবার শুনিয়াছিলাম, তাহার পর বহুদিন শুনি নাই। দয়া! ভাষায় এমন একটা কথা ছিল বটে! কিন্তু সে কথাটা নারী-জাতির প্রতি প্রযুক্ত্য কি না, তাহা ত স্মরণ নাই। দীন, ধনী, অন্ধ, আতুর বা পঙ্গু দেখিলে এখনও দয়া হয় বটে, কিন্তু দংশনোত্তর বিমধর সর্প দেখিলে যতটা দয়া হয়, নারী দেখিলে ততটাও হয় না অসীম রায়?" "কি বল ঠাকুর, সংসারে দয়া ও মায়া মূর্ত্তিমতী হইয়া নারীরূপ ধারণ করিয়াছে। কঠোর সংসার-যাত্রায় নারীর স্নেহ, প্রীতি বা ভক্তি মানব-জীবনের একমাত্র

অবলম্বন—” “বাল্যকালে আমিও ঐ কথা অধ্যয়ন করিয়াছিলাম।
তুমি কি পাঠ আবৃত্তি করিতেছ? বন্ধু! একদিন বিক্রমপুরে
আমার ত্রায় পদস্থ সম্ভ্রান্ত ব্যক্তি দ্বিতীয় ছিল না। আমি
বাদশাহের মনসব্দার। দেশের প্রধান, বিদ্বৎ-সমাজে গণনীয়
ও ব্রাহ্মণ-সমাজে বরণীয় ছিলাম। সংসারের সুখ-সম্পদ বলিতে
যাহা কিছু বুঝায়, আমার কিছুই অভাব ছিল না; কিন্তু আজি
আমি কি? ~~শশানবাসী~~ চিতাশ্মি-দগ্ধ অন্নভোজী; তৃতীয়
বস্ত্রহীন। কেন বলিতে পার? অসীম দয়া, অসীম রায়!
অসীম করুণা, দয়া ও মায়ার ঐতিমুর্তি-স্বরূপিণী-মানব-সমাজের
একমাত্র অবলম্বন—নারীর অনুরোধে। “তুমি পাগল।” “সে
কথা তোমার পূর্বেই অনেকে বলিয়াছে।” “তুমি কি
বলিতেছিলে বল?” “তোমাকে অধিক কথা বলিয়া ফল নাই,
কারণ তুমি রমণীরূপ-মুগ্ধ। নারবে মোহনরূপের অন্তরালে যে
রাক্ষসী প্রতিমা লুকাইতা থাকে, তাহা তুমি দেখ নাই। বন্ধু!
দিন ছিল, যখন আমিও তোমার ত্রায় দীর্ঘ কৃষ্ণকেশ গন্ধতৈল-
সিক্ত করিয়া, গন্ধপুষ্পে সুসজ্জিত হইয়া, মোহিনীর কৃপাকটাক্ষ
ভিক্ষা করিতাম; তখন আমিও মনে করিতাম যে, জগতে
রমণীরূপের ত্রায় রমণীয় আর কিছুই নাই। রমণীর কমণীয়
মাধুরীর নিকট জগতের সমস্ত শোভা পরাজিত। বিশ্বাস
করিয়াছিলাম অসীম রায়! রমণীরূপে মুগ্ধ হইয়া যাহাকে
প্রথম বিবাহ করিয়াছিলাম, তাহার বিষে আমাঙ্ক সংসারের
ঐশ্বর্য্য সম্পদ জীর্ণ হইয়া গিয়াছে,—আমার ভোগলালসা পরিভূপ্ত

হইয়াছে। মোহ কাটিয়া গিয়াছে। বন্ধু, তোমাকে নিষেধ করিতেছি, রত্নহার মনে করিয়া কণ্ঠে বিষধর সর্প ধারণ করিও না। কিন্তু তোমাকে বলা বুঝা ; এতদিন জগতে যত লোক দেখিয়াছি, সকলকেই বলিয়াছি ; কিন্তু কেহ কর্ণপাত করে নাই।”

ব্রাহ্মণের উক্তি শেষ হইবার পরে অসীম কিয়ৎক্ষণ স্তম্ভিত হইয়া রহিলেন এবং পরে ধীরে-ধীরে জিজ্ঞাসা করিলেন, “কি বলিলে ঠাকুর, প্রথম যাহাকে বিবাহ করিয়াছিলেন?” “হাঁ, আমার অর্দ্ধাঙ্গ-ভাগিনী সহধর্মিণী! কবি-বল্লভ আর যাহা কিছু বলিয়াছে সমস্তই। বাদশাহের বৃত্তি পরিত্যাগ করিয়া জীবিকা নির্বাহের জন্ত এই উত্তবৃত্তি অবলম্বন করিয়াছি কেন জান? জিহাংসা! জিহাংসা-বৃত্তি পরিত্যক্ত করিবার জন্ত বিবাহ করিয়া আর কখনও সে স্ত্রীর মুখদর্শন করি না। ইহাতে কি হয় জান? তোমার মত এখনও যাহারা রমণীরূপ-মুগ্ধ, অথবা মূর্ত্ত দয়া ও মায়ায় মোহে প্রতারিত, তাহাদিগের সর্বনাশের পথ রুদ্ধ করি। যাহাকে বিবাহ করিয়া আসিয়াছি, সে ত আর দ্বিতীয়বার বিবাহ করিতে পারিবে না ; তোমার মত বা আমার মত কাহাকেও প্রতারণা করিতে পারিবে না। কেহ তাহাকে অর্দ্ধাঙ্গিনীরূপে গ্রহণ করিয়া প্রাণ যৌবনের অপরিসীম প্রেম অপাত্রে নষ্ট করিতে পারিবে না। ইহাই আমার আনন্দ। এই আনন্দ উপভোগ করিব বলিয়া জীবিকা-নির্বাহের জন্ত এই বৃত্তি অবলম্বন করিয়াছি। বিবাহ করি, কিঞ্চিৎ অর্থ উপার্জন করি, তাহার পর যত শীঘ্র পারি, স্থান

বিবাহের সম্বন্ধ

পরিত্যাগ করিয়া উচ্ছ্বাসে পলায়ন করি।—জীবনে আর ক
সে পথে চলি না।”

এই সময় বালিকার পিতা আসিয়া অসীমের হস্তধারণ
করিলেন। অসীম ও ব্রাহ্মণ পরস্পরের কথায় এতদূর মগ্ন
হইয়াছিলেন যে, কেহই তাঁহার পদশব্দ শুনিতে পান নাই।
বালিকার পিতাকে দেখিয়াই ব্রাহ্মণ উঠিয়া দাঁড়াইল এবং
উচ্ছ্বাসে দীর্ঘিকা-তীর প্রতিধ্বনিত করিয়া কহিল, “বন্ধু, তোমার
উদ্বন্ধন-রজ্জু প্রস্তুত, ষাতক নিমন্ত্রণ করিতে আসিয়াছে,
বিলম্বেনালম্।” বালিকার পিতা কহিলেন, “বাবা, শৈল
আমার একমাত্র সম্ভান। তুমি তাহার জীবন রক্ষা করিয়াছ,
তোমাকে অদেয় যে আমার কিছুই নাই। আমি নিতান্ত
দরিদ্র, সামর্থ্যহীন। যদি অল্পগ্রহ করিয়া আমার কুটীরে
পদার্পণ কর, তাহা হইলে চরিতার্থ হই।” ব্রাহ্মণ এই সময়
বলিয়া উঠিল, “যাইবে বৈ কি, অবশ্য যাইবে; নিয়তির আকর্ষণ
কে রোধ করিতে পারে? একবার, দুইবার, বিশবার যাইবে।
যে মুহূর্ত্তে তোমার গৃহে পদার্পণ করিবে, সে মুহূর্ত্ত উহার হৃদয়ে
চিরদিন অঙ্কিত থাকিবে।” “পাগলা ঠাকুর, অত কথা কি
বলিতেছ? দেখ বাবা, পাগলা ঠাকুর মুখ নর, মাহুষও ভাল,—
দোষের মধ্যে মাথাটা খারাপ হইয়া গিয়াছে। ঠাকুর, দুটা-
একটা ভাল কথা বল দেখি! বেশী সংস্কৃত বলিও না, তাহা
হইলে বুঝিতে পারিব না। আজ বাবার কল্যাণে শৈলরাণীর
বড় ফাঁড়া কাটিয়া গিয়াছে।” “অতি উত্তম কথা, আশীর্বাদ

হইয়া তোমার কণ্ঠা চির-জীবনী হইয়া আজীবন থাওব-দাহন
করিতে থাকুক।” “ও আবাব কি রকম কথা—দাদাঠাকুর!
দাহন মানে ত পোড়ান, সে কি ভাল কথা?” “সকল সময়
মন্দ নয়।” “বাবা, ও পাগলা ঠাকুরের সঙ্গে কথায় পারা যায়
না। ভট্টাচার্য্য মহাশয়েরা উঠিরাছেন, এখন তুমি একবার এস।
পাগল ঠাকুর কি আমার ঘরে একবার পায়ের ধূলা দিবে না
কি?” “কায়স্থের ঘরে পায়ের ধূলা দিতে আপত্তি নাই, যদি
মূল্য পাওয়া যায়।” “দিব ঠাকুর, আজ আমার বড় আনন্দের
দিন, নগদ একটাকা প্রণামী দিব।” “তোমার প্রণামী উপযুক্ত
মূল্য নহে।” “আর কোথায় কি পাইব ঠাকুর! আমাদের
কি আর সেকাল আছে?” “আর এক কাজ করিতে পার.
গ্রামে কি কুলীন-ব্রাহ্মণের কণ্ঠা নাই?” “থাকিবে না কেন,
অনেক—দাদাঠাকুর! যত চাও। তুমি কি কুলীন না কি?”
“ফুলের মুখুটী, বিষ্ণুঠাকুরের সম্ভান।” “ঠিক হইয়াছে! যজ্ঞেশ্বর
চট্টোপাধ্যায় কাল সন্ধ্যাকালে আমার চণ্ডীমণ্ডপে বসিয়া বড়ই
দুঃখ করিতেছিল। দেখ, বাবার কল্যাণে যদি তাহার কণ্ঠাদায়
উদ্ধার হইয়া যায়।”

ব্রাহ্মণ আনন্দে লক্ষ দিয়া উঠিয়া কহিল “চল, চল,
বিলম্বেনালম্।”

উনবিংশ পরিচ্ছেদ

রাজমিত্র

অতি প্রত্যুষে একজন হরকরা আসিয়া ভাগীরথী-তীরে একটা ক্ষুদ্র বস্ত্রাবাসে প্রবেশ করিল। স্বচ্ছাবার নীরব; দুই একজন ব্যতীত তখনও সকলেই নিদ্রিত। সেই বস্ত্রাবাসে তিনজন মনুষ্য আপাদমস্তক বস্ত্রাবৃত হইয়া নিদ্রা যাইতেছিল। হরকরা তাহাদিগের মধ্যে একজনকে জাগাইয়া তুলিল এবং ইঙ্গিত করিয়া বস্ত্রাবাসের বাহিরে আসিতে অনুরোধ করিল। সুপ্তোখিত অতি সন্তর্পণে বস্ত্রাবাসের বাহিরে আসিয়া হরকরাকে জিজ্ঞাসা করিল, “ব্যাপার কি?” হরকরা অভিবাদন করিয়া কহিল, “শাহজাদা তলব করিয়াছেন।” “ইহার মধ্যেই যে ভীহার নিদ্রাভঙ্গ হইল?” “আজ অতি প্রত্যুষেই তাহার নিদ্রাভঙ্গ হইয়াছে। তিনি গোয়লখানায় আপনার জন্ত অপেক্ষা করিতেছেন।” “সেখানে আর কে কে আছেন?” “আর কেহই না।” “তবে কি শাহজাদা আমাকে একা তলব করিয়াছেন?” “হাঁ জনাব, তিনি আরও বলিয়া দিয়াছেন যে, আপনি একা গোয়লখানায় যাইতেছেন, এ কথা যেন প্রকাশ না হয়।”

উভয়ে স্বচ্ছাবারের বাহির দিয়া স্ত্রীগ্রাম বেঠন করিয়া সম্রাট-পৌত্রের পট্টাবাসে প্রবেশ করিলেন। গোয়লখানার তাম্বুর বহির্দিশে ফরুকখানসিয়ার একখানি ক্ষুদ্র কাষ্ঠাসনে উপবিষ্ট

ছিলেন। তিনি আগন্তুককে দেখিয়া বস্ত্রাবাসের মধ্যে প্রবেশ করিলেন। আগন্তুক তাঁহার অমুসরণ করিলে হরকরা পট্টাবাসের দ্বার বাঁধিয়া দিল। গোবলখানার তাহুর ভিতর ক্ষুদ্র-বৃহৎ অনেকগুলি কাষ্ঠাসন ছিল। শাহজাদা তাহার একখানিতে উপবেশন করিয়া আগন্তুককে আসন গ্রহণ করিতে আদেশ করিলেন। আগন্তুক বসিলে ফরুক্‌সিদ্দর্ জিজ্ঞাসা করিলেন, “তোমাকে কেন ডাকিয়াছি জান?”

আগন্তুক কহিলেন, “না।” “সংবাদ নিতান্ত শুভ নহে, বাদশাহের আসন্নকাল উপস্থিত। পিতা আমাকে লাহোরে ঘাইতে আদেশ করিয়াছেন।” “উত্তম কথা, আপনার পিতা যে সিংহাসনের উত্তরাধিকারী, সে বিষয়ে হিন্দুস্থানে কাহারও সন্দেহ নাই। তবে সংবাদ অশুভ বলিতেছেন কেন?” “দেখ রাজজী, হিন্দুস্থানের সিংহাসনে কেবল কে বসিবে, এ কথা সমস্ত সিংহাসনের ঘিনি মালিক, তিনি ব্যতীত আর কেহই বলিতে পারেন না।” “কেন? শুনিয়াছি আপনার পিতা বাদশাহের প্রিয়পুত্র।” “দারাশেকোর নাম শুনিয়াছ? দারা অপেক্ষা শাহজাহানের আর কে প্রিয়তম ছিল; কিন্তু দেখ, ভাগ্যচক্রের বিপর্যয়ে ময়ূর-সিংহাসনের পাদপীঠে দারার ছিন্ন-শব্দই লুপ্তিত হইয়াছিল। আওরঙ্গজেব্ বাদশাহের বৃদ্ধ বয়সে উদীপুরী বেগমের পুত্রই তাঁহার সর্কাপেক্ষা প্রিয়পুত্র ছিল; কিন্তু সেই কামবর্ধকে ময়ূর-সিংহাসনের গভীর মধ্যেও আসিতে হয় নাই, অতরাং শাহজাহান্ বাদশাহের প্রিয়পুত্র যে তাঁহার মৃত্যুর

পরে পিতৃ-সিংহাসনলাভ করিবেন, এ কথা কে বলিতে পারে ?”
 “সত্য কথা শাহজাদা !” “দেখ রায়জী, বিপদে পড়িয়া পথ
 হারাইয়া তোমাদের আশ্রয় পাইয়াছিলাম ; সেইজন্য এই নূতন
 বিপদের সংবাদ পাইয়া তোমাকেই ডাকিয়াছি।” “আপনার
 কি বিপদ হইতে পারে শাহজাদা ? আপনার পিতার ত্যায়
 লোকবল, অর্থবল বা বুদ্ধিবল বাদশাহের অন্য কোন পুত্রেরই
 নাই। আমি ত আপনার কোন অমঙ্গলের আশঙ্কাই দেখিতে
 পাইতেছি না।” “রায়জী, শাহজহান্ বাদশাহের প্রিয়পুত্র
 দারাবেকোর অর্থবল, লোকবল বা বুদ্ধিবল কোন বলেরই
 অভাব ছিল না ; তবে তাহার ছিন্নমস্তক কনিষ্ঠ ভ্রাতার
 পদপ্রান্তে লুপ্তিত হইয়াছিল কেন ?” “তাহা ত বলিতে পারি
 না।” “কেন জান, এই বিশাল হিন্দুস্থানে দারাবেকোর
 একজনও প্রকৃত বন্ধু ছিল না।” “সে কি কথা ?” “দেখ
 রায়জী, রাজবংশে যাহারা জয়গ্রহণ করে, তাহাদিগের ন্যায়
 হতভাগ্য এ পৃথিবীতে আর নাই। ভ্রাতৃশ্নেহ, পুত্রশ্নেহ, পত্নীপ্রীতি,
 বন্ধুবান্ধব বা ভক্তি, তাহারা কখনও লাভ করে না। আত্মীয়-
 স্বজন, বন্ধু-বান্ধব সবলেই স্বার্থের জন্য তাহাকে বেটন করিয়া
 থাকে। যতদিন ভাগ্যলক্ষ্মী তাহার অঙ্কশায়িনী থাকেন, ততদিন
 তাহার আত্মীয়-স্বজন বা বন্ধু-বান্ধবের অভাব হয় না ; কিন্তু লক্ষ্মী
 যখন চঞ্চলা হন, তখন শুষ্ক বৃক্ষপত্রের মত সকলেই ধীরে ধীরে
 ঝরিয়া পড়ে।” “সমস্তই অদৃষ্ট শাহজাদা ! আমরা হিন্দু,
 ঘোরতর অদৃষ্টবাদী। আমাদের ধর্ম-পুস্তকে বলে যে, কোন

ঘটনাই মানুষের আয়ত্তের মধ্যে নাই। আমি যে এইখানে বসিয়া আপনার সহিত কথা কহিতেছি, ইহাও বিধিলিপি।” “রায়জী, মুসলমান হইলেও আমরা এ দেশে আসিয়া কতকটা তোমাদের মত হইয়া গিয়াছি। আমরাও এ কথা বিশ্বাস করি। সেইজন্য চোগ্তাই বংশের কেহ জ্যোতিবীর পরামর্শ ব্যতীত পথ চলে না; কিন্তু দেখ সমুদ্রে জাহাজ ডুবিয়া যে মানুষ জলে পড়ে, সে জানিতে পারে যে তাহার আর নিস্তার নাই, তথাপি সে যথাসম্ভব আত্মরক্ষার চেষ্টা করে। এবং যতক্ষণ তাহার চেতনা থাকে, ততক্ষণ সে জলের কবরের বাহিরে থাকিতে চেষ্টা করে; আমিও আত্মরক্ষার চেষ্টায় তোমাকে আহ্বান করিয়াছি।”

“আদেশ করুন।” “দেখ রায়জী, তোমাদের দুই ভ্রাতার সহিত প্রথম যেদিন সাক্ষাৎ হয়, সেদিন তোমরা জানিতে নাই যে আমি কে।—তোমরা অর্থ বা সম্মানের লোভে আমার সাহায্য কর নাই। সেইজন্য আমার ভরসা হয় যে আমার হৃদয়ে অর্থ বা সম্মানের লোভে অন্ততঃ তোমরা দুইজন বিশ্বাসের হস্তারক হইবে না। দেখ, ছানোন্মেষ অবধি চোগ্তাই বংশীয় পুরুষগণ মানুষ চিনিতে শিক্ষা করে। আমি কামাদিগকে দেখিয়াই চিনিয়াছিলাম। আমার পরিচয় পাইয়াও তোমরা আমার নিকট থাকিতে স্বীকৃত হও নাই। আজ পর্যন্ত এক হিন্দু বনিয়ার অর্থ ব্যতীত তোমরা কেহ আমার নিকট কিছুই চাহ নাই। আমি আহমদবেগের নিকট শুনিয়াছি যে,

তোমাদিগের ব্যয় তোমরাই নির্বাহ করিয়া থাক। দেখ রায়জী, এই উদ্দুতে তোমার স্থায় নিঃস্বার্থ নির্লোভ বন্ধু আমার আর কেহ নাই। তোমাকে বন্ধু বলিয়া সম্ভাষণ করিতেছি, কারণ, এখনও পর্য্যন্ত তোমরা বাদশাহের অথবা সুবাদারের ভৃত্য নহ। তুমি আমার বন্ধুত্বের উপহার গ্রহণ করিবে কি?”

“এ কি আদেশ করিতেছেন শাহজাদা? আপনি শাহজাদা আজীম উশ্-শানের পুত্র, বাদশাহের পৌত্র। বাদশাহের দেহান্তের পরে আপনার পিতাই যে ময়ূরসিংহাসনে উপবেশন করিবেন, এ কথা সর্বজনবিদিত। হিন্দুস্থানের সর্বোচ্চ আমীর—ওমরাহ আপনার কৃপা-কটাক্ষ লাভের জন্য লালায়িত, আপনার বন্ধু—”

• “রায়জী, তাহা আমি জানি; সেইজন্যই তোমাকে বলিতেছিলাম যে, সে বন্ধু আমার পদের সহিত, আমার সৌভাগ্যের সহিত, আজীম উশ্-শানের পুত্রের সহিত, বাদশাহের পৌত্রের সহিত; কিন্তু এক মন্তক, দুই হস্ত ও দুই পদবিশিষ্ট ফরুকখসিয়রের সহিত নহে। যদি এমন হয় যে, ভাগ্য বিপর্য্যয়ে আজীম উশ্-শান সিংহাসন লাভ না করেন, তখন আমার এই সহস্র সহস্র বন্ধুর মধ্যে কয়জন আমার প্রকৃত বন্ধু থাকিবে, তাহা বলিতে পারি না। দেখ রায়জী, আমার পিতা বাদশাহের জ্যেষ্ঠ পুত্র নহেন, আমিও আমার পিতার জ্যেষ্ঠ পুত্র নহি। চোগতাই বংশের কনিষ্ঠ পুত্রের অবস্থা কি, তাহা কাহারও অবিদিত নাই। সেইজন্য ভবিষ্যৎ স্মরণ করিয়া অনেক আশা

করিয়া বন্ধুত্ব যাক্রা করিতেছি। আমার প্রার্থনা পূর্ণ করিবে কি ?” “শাহজাদা, আমি দরিদ্র, অনাথ, গৃহশূন্য। জগতে আমাদের দুইজনের আপনার বলিতে বড় কেহ নাই। আপনাকে অদেয় আমার কি থাকিতে পারে ? আপনি শাহজাদা বলিয়া বলিতেছি না, সম্রাটের পৌত্র বলিয়া বলিতেছি না। যে ব্যক্তি পথের ভিখারীকে ভিখারী জানিয়াও বুকে তুলিয়া লয়, তাহাকে ভিখারীর অদেয় কি থাকিতে পারে ? সে ভিখারী যদি আশ্রয়দাতার কোন অমুরোধ প্রত্যাহার করে, তাহা হইলে কালসর্প ব্যতীত তাহার গায় অকৃতজ্ঞ জগতে আর নাই।” “রায়জী, জগতে মানুষ মাত্রেই কালসর্প, কৃতজ্ঞতা অতি বিরল। দেখ, আমি স্বার্থপর। তোমার গায় নিঃস্বার্থ বা উদারচেতা নহি। স্বার্থের জন্তই তোমার বন্ধুত্ব প্রার্থনা করিতেছি। ভরসা করি যে আমার দুর্দিনে তোমার মত বন্ধু পাইলে বিশ্বাসঘাতকদিগের হস্ত হইতে পরিত্রাণ পাইব।” “শাহজাদা, আমি দরিদ্র, সামর্থ্যহীন বটে ; কিন্তু এ কথা মুক্তকণ্ঠে বলিতে পারি যে, আমাদিগের বংশে এখনও পর্য্যাপ্ত কেহ বিশ্বাসঘাতক হয় নাই এবং আমার দেহে যতক্ষণ শক্তি থাকিবে, ততক্ষণ আপনার পদে কুশাকুরও বিঁধিতে দি না।”

বিংশ পরিচ্ছেদ

উদ্বাহ

ভাগীরথীতীরে সেই দীর্ঘিকার অতি দূরে এক সম্পন্ন গৃহস্থের গৃহে আজি মহাসমারোহ। গৃহস্থ ব্রাহ্মণ। আজি তাঁহার একমাত্র কন্যার বিবাহ। দুইশত বৎসর পূর্বে পল্লীগ্রামে সম্পন্ন-গৃহস্থ বলিলে যাহা বুঝায়, ব্রাহ্মণের সে সমস্তই ছিল। তাঁহার নাম বিশ্বনাথ চক্রবর্তী। তাঁহার পিতা রামনাথ রাজ-দরবারে বিশ্বস্ত কর্মচারী ছিলেন এবং প্রভূত অর্থ উপার্জন করিয়াছিলেন। বিশ্বনাথ কুলীন এবং কুলীনের কুল কন্যাগত; সেই জন্যই অর্থ এবং সামর্থ্যের অভাব না থাকিলেও তিনি একমাত্র কন্যার বিবাহের উদ্যোগ করিয়া উঠিতে পারেন নাই। যে বংশে তিনি কন্যা সম্প্রদান করিতে পারেন, সে বংশজাত পাত্র পশ্চিমবঙ্গে একেবারেই ছিল না এবং পূর্ববঙ্গে অতি বিরল; সেই জন্য বহু অহুসন্ধান করিয়াও বিশ্বনাথ কন্যার পাত্রের সন্ধান পান নাই।

বিধিলিপির রহস্য ভেদ মানুষের পক্ষে সম্ভব নহে। বিশ্বনাথ দশ বৎসর যাবৎ যে বংশজাত পাত্রের অহুসন্ধান করিতেছিলেন, আজি সেই বংশজাত এক কুলীন সন্তান বিবাহার্থী হইয়া বিশ্বনাথের দ্বারে উপস্থিত। বিধাতা যখন সুপ্রসন্ন হন, তখন মানুষ যাহা চাহে, তাহাই তাহার মুখাপেক্ষী হইয়া তাহার নিকটে আসিয়া উপস্থিত হয়। যেদিন পাত্রের দর্শন মিলিল, সেই দিনই শুভ দিন ছিল এবং তাহার পরের দিনও বিবাহের পক্ষে

অতীব শুভ। কালবিলম্ব না করিয়া বিশ্বনাথ কন্টার বিবাহের আয়োজন করিলেন। চঞ্চলা কমলা কিছুদিনের জন্য চক্রবর্তী-কুলের ভাণ্ডারে আসিয়া অধিষ্ঠিত হইয়াছিলেন সুতরাং বিশ্বনাথের অর্থাভাব ছিল না। পাত্র যে পরিমাণ অর্থ ব্যয় করিয়াছিল, তাহার দশ গুণ দিতে প্রতিশ্রুতি হইয়া তিনি তাঁহার পরদিনই কন্টা-সম্প্রদানের ব্যবস্থা করিয়াছিলেন। আজি বিশ্বনাথের কন্টার বিবাহ।

সমস্ত দিন উৎসব-বাঞ্চে ক্ষুদ্র গ্রাম মুখরিত হইয়াছে। সন্ধ্যাকালে আলোকমালা-মণ্ডিত সভা-মণ্ডপে গ্রামের ভদ্র অধিবাসীগণ সমবেত হইয়াছেন। ব্রাহ্মণ-ভোজনের প্রচুর আয়োজন হইয়াছে। পাত্র সভা-মণ্ডপে সুখ-শয্যা উপবিষ্ট শুভলগ্ন আগতপ্রায়, এই সময়ে বিশ্বনাথ চক্রবর্তীর অন্তঃপুর হইতে কয়েকটি মহিলা বাতায়নপথে পাত্র দেখিতেছিলেন। তাঁহারা সকলেই বর্ষীয়সী এবং বিশ্বনাথের আত্মীয়া। তাঁহাদিগের মধ্যে একজন কহিলেন, “কে বলিল বর বুড়া!” দ্বিতীয়া কহিলেন, “কোথায় বুড়া? হরেশ্বর চক্রবর্তীর পিসীর ঘাটের মড়ার সহিত বিবাহ হইয়াছিল। বরকে ধরিয়া অশ্রু-বসান হইয়াছিল এবং শুভদৃষ্টির সময় তিন জনে তাকে ধরিয়াছিল। বিবাহের পর একটি মাসও কাটে নাই।” তৃতীয়া কহিলেন, “সে ঘাই বল দিদি, বর যখন প্রথম আসিয়াছিল, তখন তাহাকে বুড়া দেখাইতেছিল, এখন সাজিয়া-গুজিয়া মানুষের মত দেখাইতেছে। আমাদের সতী রূপেও যেমন, গুণেও তেমন।

তোমরা ঘাড়াই বল, সতীর যোগ্য বর হয় নাই।” প্রথমা রাগিয়া বলিয়া উঠিলেন, “তোদের কেমন কথা লা! কুলীনের মেয়ে কবে আবার ইহা অপেক্ষা যোগ্য পাত্রে পড়িয়া থাকে? কুলীনের পাত্র কি রূপ দেখিয়া পছন্দ হয়? তোরা যে নূতন কথা বলিতে আরম্ভ করিলি! সতী আমার কুলীনের মেয়ে, কুলীন-কন্ডার অদৃষ্টে সচরাচর যেমন পাত্র জুটিয়া থাকে, তাহার তুলনায় সতীর বর অতি সুপাত্র।” দ্বিতীয়া অতি ধীরে ধীরে কহিলেন, “দেখ দিদি, যত্ন নাপিত বলিতেছিল যে ওপারে স্ত্রীগাঁয়ে তাহার বেহাইয়ের বাড়ী। সে নাকি কাল বেহাই বাড়ী গিয়াছিল এবং শুনিয়া আসিয়াছে যে, বর নাকি স্ত্রীগাঁয়ে তিন দিন ছিল। সে নাকি কাহারও বাড়ী অতিথি হয় নাই, পথ-পথে ভিক্ষা করিত এবং শ্মশানে এক গাছতলায় বাস করিত।” প্রথমা কহিলেন, “সে আবার কি কথা, বর কুলীন, বিবাহ করা কুলীনের পেশা। বিশ্বনাথ দাদার মুখে শুনিলাম যে, বর ছয়কুড়ি টাকা পণ চাহিয়াছিল, তিনি তাহার দশগুণ দিতে স্বীকৃত হইয়া পাত্র আশীর্বাদ করিয়াছেন। ফকীর সন্ন্যাসীতেই ত ভিক্ষা করিয়া থাকে!—শ্মশানে বাস করে। যে বর পণের টাকার কথা ভোলে না, সে আবার কি রকম সন্ন্যাসী। ওসকল কথার-কথা। বিবাহের সময় কত কথাই না উঠে।”

বধাসময়ে গ্রামবৃদ্ধগণের অহুমতি লইয়া বিশ্বনাথ চক্রবর্তী কন্যা সম্প্রদান করিলেন। সমবেত ব্রাহ্মণগণ ভূরি-ভোজনে

পরিভূষ্ট হইয়া গৃহে প্রস্থান করিলেন। কুলাঙ্গনাগণ বরবধু লইয়া বাসর-গৃহে উৎসবমগ্না হইলেন। রজনীর তৃতীয় প্রহর অতীত হইলে পরিহাসস্পৃহানিবৃত্তা অনেক রমণী নিদ্রালসনেত্রে গৃহে প্রস্থান করিলেন। যাঁহারা রহিলেন, তাঁহারাও একে একে বাসর-গৃহে শয্যা-গ্রহণ করিলেন। সকলকে নিদ্রিত দেখিয়া বর কন্যার অঙ্গস্পর্শ করিল। স্পর্শ মাত্রেই সতীর তন্দ্রা দূর হইল। বর তাহাকে কহিল, “আমার সহিত উঠিয়া আইস।” বধু বাক্যব্যয় না করিয়া পতির অনুরণন করিল। গৃহের অভ্যন্তরে আসিয়া বর জিজ্ঞাসা করিল, “তোমার নাম কি?” কম্পিতকণ্ঠে নববধু কহিল, “আমার নাম সতী।” তাহা শুনিয়া অত্যন্ত ক্রুদ্ধ হইয়া বর কহিল, “মিথ্যা কথা জ্বীলোক সতী, অসম্ভব। তুই নিশ্চয়ই অসতী।” ক্ষীণকণ্ঠে বধু কহিল, “না।” তাহার উত্তর শুনিয়া বর উচ্চহাস্য করিয়া উঠিল। নববধু শিহরিল। বর কহিল, “তোকে কেন বিবাহ করিয়াছি জানিস্!” বধু ক্ষীণতর কণ্ঠে কহিল, “না, কেমন করিয়া জানিব?” বর আবার হাসিয়া কহিল, “প্রতিহিংসার জন্য।” ভীতা চকিতা নববধু কাতরকণ্ঠে জিজ্ঞাসা করিল, “কিহে প্রতিহিংসা?” “প্রতিহিংসা, আমার সর্বনাশের! প্রথম যৌবনে একদিন তোর মত এক অসতীকে দেখিয়া মোহিত হইয়াছিলাম। তখন আমার সব ছিল। রূপ ছিল, গুণ ছিল, বিষয়—বৈভব ছিল, আত্মীয়-স্বজন ছিল,—দেশে আমি দেশের মধ্যে একজন ছিলাম। প্রথম যৌবনের সমস্ত আকুলতা দিয়া তাহাকে হৃদয়ে

প্রতিষ্ঠা করিয়াছিলাম। তখন তাহাকে দেবী মনে করিতাম; দেবী ভাবিয়া যথাসর্বস্ব তাহাকে উৎসর্গ করিয়াছিলাম। তাহার কুহকে মুগ্ধ হইয়া কিছুদিন বড় সুখে ছিলাম। মনে করিয়াছিলাম সারাটা জীবন বুঝি এই ভাবেই কাটিয়া যাইবে, জীবন বুঝি সুখশস্য, —কণ্টকময় বন্ধুর পথ নহে! সে যে ডাকিনী, কাল-সাপিনী, তাহা ত বুঝিতে পারি নাই, এখন বুঝিয়াছি। আমার যথাসর্বস্ব, আমার হৃদয়ের পূজা সমস্ত উপেক্ষা করিয়া সে কি করিয়াছিল জানিস্? সে তাহার যথাসর্বস্ব আর একজনকে সমর্পণ করিয়াছিল। সে যখন হাসিয়া আমার সহিত কথা কহিত, তখন মনে মনে আমার মৃত্যু কামনা করিত। আমার প্রথম যৌবনের ভরা হৃদয়ের সমস্ত প্রেম ঢালিয়া দিয়া আমি যখন তাহাকে ধ্যান করিতাম, তখন সে অশ্রু মনে তাহার চিন্তা করিত। প্রথমে অন্ধ ছিলাম। যেদিন দৃষ্টিশক্তি ফিরিল, সেই দিন বুঝিলাম রমণী মাত্রেই ঘিচারিণী। সেই দিন হইতে আমি ভিখারী; —রূপহীন, গুণহীন, বিভূহীন, বন্ধুহীন। সেইদিন হইতে আমি শ্মশানবাসী, চিতাগ্নিদগ্ধ অন্নভোজী, প্রতিহিংসাকামী। প্রতিহিংসা আমার জীবনের একমাত্র ব্রত। তাকে বিবাহ করিয়াছি, কিন্তু জীবনে আর কখনও তোর মুখ দর্শন করিব না। ভুই আজীবন তুষানলে দগ্ধ হইবি, এই আমার প্রতিহিংসা।” নববধু কদলীপত্রের স্তায় কাঁপিতেছিল, সহসা সাহসে ভর করিয়া সে কাতরকণ্ঠে জিজ্ঞাসা করিল, “আমার অপরাধ কি?” “তোর অপরাধ তুই রমণী। রমণী মাত্রেই অসতী, বিশ্বাসঘাতিকা।”

বধু ক্ষীণতর কণ্ঠে আবার জিজ্ঞাসা করিল, “সকলেই কি সমান?”
 নব বর গর্জিয়া উঠিল এবং কহিল, “কালসপ্নে কি প্রভেদ আছে?
 রমণীতেও সেইরূপ প্রভেদ নাই! তোর পূর্বে বহু বিবাহ
 করিয়াছি। কেন করিয়াছি জানিস? আর কেহ বাহ্যন্তে
 তোদের বিশ্বাস করিয়া আজীবন বিষধর-বিষে জর্জরিত হইয়া
 আমার মত শ্মশানবাসী হইয়া না বেড়ায়, সেই জন্ত। তোকে
 বিবাহ করিয়াছি, আর ত তোকে কেহ বিবাহ করিতে পারিবে
 না! সকলে জানিবে তুই অসতী।” সহসা দৃঢ়কণ্ঠে ব্যাখিতা
 নববধু বলিয়া উঠিল, “না, আমি সতী।” ক্রুদ্ধ ক্ষিপ্ত নব বর
 বধুকে পদাঘাত করিয়া শব্দর-গৃহ পরিত্যাগ করিল। বধু
 মূচ্ছিতা হইল।

“পরদিন প্রভাতে অল্পনে নববরের উত্তরীয় ও মূচ্ছিতা নববধু
 দেখিয়া সকলে বিস্মিত হইল। বহু অহুসঙ্কান করিয়াও বরের
 সন্ধান পাওয়া গেল না। নববধুকে মূচ্ছার কারণ জিজ্ঞাসা
 করিয়া কেহ কোন উত্তর পাইল না।

একবিংশ পরিচ্ছেদ

নর্তকী

পাটনা সহরের এক গ্রামে ভদ্র-পল্লীর মধ্যে এক বৃদ্ধা গণিকা
 বাস করিত। তাহার নাম মতিয়া। সে গণিকা হইলেও,

পল্লীর সকলেই তাহার উপর সম্বন্ধ ছিল। কারণ, তাহার গৃহে অসদাচরণ দেখিতে পাওয়া যাইত না। যৌবনান্ত হইবার পূর্বেই মতিয়া গণিকা-বৃত্তি পরিত্যাগ করিয়াছিল; কিন্তু তথাপি মুজরা করিত। প্রায়বিগত-যৌবনা নর্তকীর সমাদর বর্তমান সময়ে নাই—তখনও ছিল না। মুজরা যখন জুটিত না, তখন মতিয়া গণিকা-সমাজে নৃত্যগীত শিক্ষা দিত। পাটনার অধিবাসিগণ মতিয়া বাঈজীকে ভুলিয়া গিয়াছিল, কিন্তু সকলেই মতিয়া ওস্তাদনীকে জানিত। তাহার যৌবন একেবারে অন্তিমিত হইবার পূর্বে, একজন পাঠান আহদী প্রোটার প্রেমে মজিয়া, তাহারই গৃহে আশ্রয় গ্রহণ করিয়াছিল; মতিয়া ওস্তাদনী এক কণ্ঠা প্রসব করিয়াছিল। লোকের নিকট মতিয়া পরিচয় দিত যে পাঠান তাহাকে নেকা করিয়াছে; কিন্তু পাঠানকে কেহ জিজ্ঞাসা করিলে, সে অবজ্ঞার সহিত নিম্নবন পরিত্যাগ করিয়া কহিত, “কসবীকে নেকা? তোবা, তোবা!” তথাপি বৃদ্ধ পাঠান মতিয়াকে ছাড়িয়া স্থানান্তরে যাইতে পারিত না।

মতিয়ার কণ্ঠার নাম মনিয়া। মনিয়াকে দেখিলে কেহই বিশ্বাস করিতে পারিত না যে, সে গণিকার কণ্ঠা; সকলেই কহিত, “গোময়ে পঙ্কজিনীর আবির্ভাব সম্ভব নহে।” মতিয়া সঙ্গীত-শাস্ত্রে পারদর্শিনী ছিল; এবং সে অতি যত্নে কণ্ঠাকে নৃত্য-গীত শিক্ষা দিয়াছিল। প্রথম যৌবনে রূপসী কলাবতী মনিয়া পাটনা নগরের সকলেরই প্রিয়পাত্রী হইয়া উঠিয়াছিল। যে সময়ের কথা বলিতেছি, সে সময়ে মনিয়া অষ্টাদশ বর্ষে পদাপণ

অসৌম

করিয়াছে; এবং মাত্র এক বৎসর মুজরা করিতে আরম্ভ করিয়াছে।

যে দিন ফররুখ্‌সিয়র পাটনায় আসিলেন, তাহার পরদিবস অপরাহ্নে সেই বৃদ্ধ পাঠান মতিয়ার গৃহের দুয়ারে বসিয়া তামাকু সেবন করিতেছিল। মতিয়া গৃহকার্যে নিযুক্তা ছিল; এবং মনিয়া একটি সারেঙ্গী লইয়া গুণ-গুণ করিয়া গান করিতেছিল। এই সময়ে একজন সুসজ্জিত, সম্ভ্রান্ত মুসলমান একা হইতে নামিয়া পাঠানকে জিজ্ঞাসা করিল, “এই কি মনিয়া বাঈজীর গৃহ?” পাঠান বিরক্ত হইয়া কহিল, “এই গৃহ মতিয়া বাঈজীর; তবে মনিয়া এখানে থাকে বটে!” আগন্তুক কিছুমাত্র লজ্জিত না হইয়া কহিল, “আমি মনিয়া বাঈজীর সহিত সাক্ষাৎ করিতে আসিয়াছি।” পাঠান অধিকতর বিরক্ত হইয়া গম্ভীর ভাবে কহিল, “মনিয়া তওয়াইফ্ বটে, কিন্তু সে ভ্রলোকের কন্যা, কসব করে না। তোমার যদি খুব কঞ্চনীর প্রয়োজন থাকে, তাহা হইলে চোকে বহৎ মিলিবে।” আগন্তুক কিছুমাত্র অপ্রতিভ না হইয়া কহিল, “আমার অপরাধ মাফ করিবেন। শাহজাদার দরবারে মুজরা করিবার জন্ত মনিয়া বাঈজীকে বায়না দিতে আসিয়াছি।” পাঠান একটু দমিল; কিন্তু তৎক্ষণাৎ অপ্রসন্ন ভাবে কহিল, “বায়না দিতে আসিয়াছ, টাকা দিয়া চলিয়া যাও।” “বাঈজীর চেহারা না দেখিয়া বায়না দিব কেমন করিয়া?” “চেহারার সহিত মুজরার সম্পর্ক কি?” “অনেক সম্পর্ক! মুজরা ত কেবল গাহিবার নহে।”

আগন্তুক সহজে উদ্দেশ্য পরিত্যাগ করিবার পাত্র নহে দেখিয়া পাঠান মুখ কিরাইয়া ডাকিল, “আরে মতিয়া, এ মতিয়া, ইধর আ!” মতিয়া তখন সম্মার্জনী হস্তে উঠানের আবর্জনা পরিষ্কার করিতেছিল। সে পাঠানের আহ্বান শুনিয়া, সেই অবস্থাতেই গৃহের দ্বারে উপস্থিত হইল। আগন্তুক তাহাকে দেখিয়া ঈষৎ হাসিল। মতিয়া বিন্দুমাত্র কুণ্ঠিতা না হইয়া আগন্তুকের পরিচয় জিজ্ঞাসা করিল; এবং সে শাহজাদার নিকট হইতে আসিতেছে শুনিয়া, তাহাকে সাদরে অভ্যর্থনা করিয়া বসাইল। আগন্তুক তাহার অভ্যর্থনায় প্রীত হইয়া মনিয়াকে দেখিতে চাহিল। মনিয়া আসিল, এবং নমুনা স্বরূপ একটা গান গাহিল। তখন আগন্তুক অত্যন্ত সন্তুষ্ট হইয়া দুই আসুর্ফি বাধনা দিয়া চলিয়া গেল।

পাটনা সহরের প্রান্তে, এক বিস্তৃত আশ্রয়স্থানে শাহজাদা ফররুখসিয়রের উর্দ্ধ পড়িয়াছে। তাহার মধ্যস্থলে এক বিস্তৃত শামীয়ানার মধ্যে নাচের আয়োজন হইয়াছে। তখন মনিয়া বাঁজির মরমুম পড়িয়াছে। শাহজাদার সঙ্গে লোক ত আসিয়াছে,—পাটনা সহরের অর্ধেক লোকও সেই আশ্রয়স্থানে সমবেত হইয়াছে। সন্ধ্যা হইল,—শিবিরে অসংখ্য মশাল জলিয়া উঠিল। শামীয়ানার নিম্নেও অসংখ্য বহুবর্ণের কাচপাত্রে গন্ধদীপ জলিতে লাগিল। মনিয়া, তাহার মাতা মতিয়া, তবলচী ও সারেঙ্গীওয়ালা সঙ্গে লইয়া গো-শকটে আসিয়া উপস্থিত হইল। শাহজাদা ফররুখসিয়র আসরে আসিয়া উপস্থিত হইলে,

মনিয়া পেশোয়াজ পরিয়া আসরে নামিল। একপ্রহর ধরিয়া শিবিরের লোক, সহরের লোক মনিয়ার নৃত্য-গীতে চক্ষু ও কর্ণের পিপাসা পরিতৃপ্ত করিল। দ্বিতীয় প্রহর রাত্রিতে শাহজাদা ফরুক্‌সিয়র অর্থক্লান্ততা সত্ত্বেও, মুষ্টি-মুষ্টি স্বর্ণ পুরস্কার দিয়া মনিয়ার মাতাকে তুষ্ট করিয়া, আসর পরিত্যাগ করিলেন। মজলিস ভাঙ্গিয়া গেল। সহরের লোক উদ্‌ ছাড়িয়া সহরের দিকে ফিরিয়া চলিল; এবং শিবিরের লোক শিবির ছাড়িয়া নিজ নিজ তাম্বুতে ফিরিয়া গেল। মনিয়া অগ্ৰ তাম্বু হইতে বেশ পরিবর্তন করিয়া বাহিরে আসিতেছে, এমন সময়ে একজন দীর্ঘাকার মুসলমান তাহার পথরোধ করিয়া দাঁড়াইল। মনিয়ার মাতা তাহার পশ্চাতে দাঁড়াইয়া ছিল, সে আগন্তুককে দেখিয়া চীৎকার করিয়া উঠিল; কিন্তু আগন্তুকের ইচ্ছিতে পশ্চাৎ হইতে একজন খ্রিস্টানিক আসিয়া তাহাকে ধরিয়া লইয়া গেল। ভীত, চকিতা মনিয়া কিংকর্তব্যবিমূঢ়া হইয়া দাঁড়াইয়া রহিল।

আগন্তুক তাহার দিকে অগ্রসর হইয়া কহিল, “মনিয়া বাচ্চ তুমি পাটনা সহরের গুলাব। তুমি যে আমাদের উদ্‌তে আসিয়া অমনি চলিয়া যাইবে, ইহা কি আমার প্রাণে সহ্য? আমি সামান্ত ব্যক্তি,—তবে আমার ক্ষমতায় যতদূর সম্ভব, তোমার অভ্যর্থনার জন্ত আয়োজন করিয়া রাখিয়াছি। তোমার গুলাবের মত অঙ্গের জন্য গুলাবের শয্যা পাতিয়া রাখিয়াছি। তোমার নীল নয়ন দুটি তোমার গুলাব-বর্ণ দেহে মানাইতেছে না বলিয়া তাহা রক্তাভ করিবার জন্য ইরানী আরব আনিয়া রাখিয়াছি।

সুন্দরী ! তোমার জন্য যে তাহু সাজাইয়া রাখিয়াছি, তাহাতে একবার পদার্পণ করিয়া আমাকে চরিতার্থ করিবে চল ।”

মনিয়া যদি গণিকা হইত, তাহা হইলে এই চিরন্তন প্রেম-সম্ভাষণে সে হাসিয়া ফেলিত ; কিন্তু গণিকা-পুল্লী হইলেও, তাহার সুন্দর দেহ তখনও কলুষিত হয় নাই, সুতরাং সেনা হাসিয়া, ভয়ে শিহরিয়া উঠিল। তাহার চক্ষু দুইটি জলে ভরিয়া আসিল। আগন্তুক তখন তাহার রূপরাশির উত্তেজনায় উন্নত, সে তাহার অবস্থা বুঝিতে পারিল না। সে অগ্রসর হইয়া মনিয়ার হস্তধারণ করিল। মনিয়া তাহাতে অক্ষুট চীৎকার করিয়া উঠিল। আগন্তুক কহিল, “মনিয়া, তুমি স্বর্গের পরী, তুমি দুনিয়ায় কেন আসিয়াছ ? এই কঠিন দুনিয়ার স্পর্শে তোমার কোমল চরণে যে আঘাত লাগিবে ! তুমি এই কঠিন দুনিয়ায় পদক্ষেপ করিও না, আমি তোমাকে কোলে তুলিয়া লইয়া যাইতেছি।” আগন্তুক এই বলিয়া মনিয়াকে ক্রোড়ে উঠাইতে উত্তত হইল ; কিন্তু সে চীৎকার করিয়া দুই পদ পশ্চাৎ হটিয়া গেল। তাহা দেখিয়া হতাশাবিজড়িত কণ্ঠে আগন্তুক বলিয়া উঠিল, “জানি, তুমি ভয় পাইতেছ জানি ? আমি যে তোমার গোলাম জানি ! তুমি যখন তোমার স্বর্গীয় রূপরাশি লইয়া শামীয়ানার নীচে পরীরাজের অন্ত্রুত নৃত্যকোশল দেখাইতেছিলে—যখন গুলাবের পল্লবের মত কোমল তোমার পদাঙ্গুলিগুলি সতরঞ্জে উপর বিদ্যুতের মত খেলিয়া বেড়াইতেছিল,—তখন আমার মন ভ্রমর হইয়া তাহার চারিপাশে ঘুরিয়া

বেড়াইতেছিল। জানি, আমার ছাতি অনেক তলোয়ারের চোট খাইয়া পাথর হইয়া গিয়াছে; সেইজন্য বোধ হয় তুমি সে ছাতি স্পর্শ করিতে ভয় পাইতেছ। ভয় কি জানি? আমি রাশিরাশি গুলাব আনিয়া তোমার পথে ছড়াইয়া দিতেছি।”

মনিয়া এতক্ষণ দূরে দাঁড়াইয়া ছিল। সে এইবার সাহসে ভর করিয়া কহিল, “আমাকে ছাড়িয়া দাও, তুমি মেহেরবান, আল্লা তোমার মঙ্গল করিবেন। আমি কস্বী নহি, আমাকে ছাড়িয়া দাও।” সুরাবিজড়িত কণ্ঠে আগন্তুক কহিল, “তুমি কস্বী, কোন্ শয়তান এমন কথা বলে? তুমি পরী। জানি তুমি যে আমার কলিজা, জানু থাকিতে কেমন করিয়া ছাড়িয়া দিব জানি? এমন কথা বলিও না জানি! চল, আমি তোমাকে লইয়া যাই।” এই বলিয়া সে মনিয়ার দিকে অগ্রসর হইল, এবং উভয় হস্তে তাহাকে চাপিয়া ধরিল। মনিয়া চীৎকার করিয়া কাদিয়া উঠিল! এই সময়ে পশ্চাৎ হইতে একজন বজ্রবৎ দৃঢ়মুষ্টিতে আগন্তুকের কণ্ঠ চাপিয়া ধরিল। সে আত্মরক্ষা করিতে গিয়া মনিয়াকে পরিত্যাগ করিল। মনিয়া মুচ্ছিতা হইয়া পড়িয়া গেল। নবাগত আগন্তুকের গ্রীবা পরিত্যাগ করিলে, সে মুক্ত তরবারী লইয়া তাহাকে আক্রমণ করিল। নবাগত অনায়াসে তাহার তরবারী ছিনাইয়া লইয়া কহিলেন, “আফ্রাসিয়ব খাঁ, তোমার অত্যাচারে শাহজাদা অত্যন্ত ক্রুদ্ধ হইয়াছেন। তুমি এখন হইতে সপ্তাহকাল মজলিসে আসিতে পাইবে না।” শাহজাদার নাম শুনিয়া আফ্রাসিয়ব খাঁর মত্ততা

দূর হইল। সে বেজাহত কুক্করের মত সেই স্থান পরিত্যাগ করিল। আগন্তুক হৃৎচেতন মনিয়ার দেহ উঠাইয়া লইয়া শিবিরান্তরে প্রস্থান করিলেন।

দ্বাবিংশ পরিচ্ছেদ

ডাকিনী

অতি প্রত্যুষে পাটনার দুর্গের নিয়ে ভাগীরথীতীরে সিন্ধু সৈকতে বসিয়া সুদর্শন আপন মনে ভৈরবী ভাঁজিতেছিলেন; এমন সময় দূর হইতে তাঁহার নাম ধরিয়া কে ডাকিল। ব্রাহ্মণ অত্যন্ত বিরক্ত হইয়া সেদিকে ফিরিয়া চাহিলেন; কিন্তু উত্তর দিলেন না। যে তাঁহাকে আহ্বান করিয়াছিল, সে অন্ধ; কিন্তু সে সুরের শব্দ লক্ষ্য করিয়া তাঁহার দিকে আনিতেছিল। সুর থামিয়া গেলে, সে কিংকর্তব্যবিমূঢ় হইয়া দাঁড়াইল; এবং ডাকিল, “দাদা, ও বড়দাদা। এই যে ছিলে, আবার কোথায় গেলে?” ব্রাহ্মণ অত্যন্ত ক্রুদ্ধ হইয়া বলিয়া উঠিল, “যমের বাড়ী! তোদের জালায় আমার যমালয়ে গিয়াও নিষ্কৃতি নাই। শেষ রাত্রিতে পলাইয়া আসিয়া একটু আলাপ করিতেছি অমনি আসিয়া জ্বালাতন আরম্ভ করিয়াছিস্? আচ্ছা, তোকে কে বলিল যে, আমি গঙ্গার ধারে আসিয়াছি? লক্ষীছাড়া বাদর কোথাকার!” অন্ধ হাসিয়া কহিল, “আমি যে তোমার সুর ধরিয়া এতদূর

চলিয়া আসিলাম। তুমি যখন আলাপ আরম্ভ কর, তখন কি লোকের বুঝিতে বাকী থাকে যে, তুমি কোথায় আছ ?” “ওরে হুমুমান, এ পাটনা সহরে দশ হাজার লোক এ ভৈরবী আলাপ করিতে পারে ! তুই কেমন করিয়া জানিলি যে, এই কেল্লার পাশে, গঙ্গার ধারে বসিয়া, সুদর্শন ভট্টাচার্য্যই ভৈরবী” আলাপ করিতেছে ?” অন্ধ অধিকতর উচ্চ-হাস্য করিয়া কহিল, “সেটা বড় কঠিন কথা সুদর্শন দাদা ? পাটনা সহরে যত হাজার বলাবৎই থাক, আমার সুদর্শন দাদার গলার মত গলা এক-জনেরও নাই।”

ব্রাহ্মণ প্রশংসা শুনিয়া প্রসন্ন হইয়া হাসিয়া ফেলিলেন ; এবং অন্ধের দিকে অগ্রসর হইয়া, হাসিয়া কহিলেন, “বা বলিগাছিস্ ভাই ! এদেশের লোকের আওয়াজ মিঠা নহে । দেখ্ ভূপেন, অনেকদিন তুই সঙ্গ করিস্ নাই,—একটু বসিবি ?” “এখন বসিবার সময় নহে দাদা, তুমি শীঘ্র এস ।” “কেন রে ! তুই একটা আস্ত হুমুমান ।” “হুমুমানই হই আর গাই হই, তুমি এখন শীঘ্র এস । মেজদাদা কোথা হইতে একটা স্ত্রীলোক লইয়া আসিয়াছে ; এবং তাহাকে আনিয়া অবধি তোমার জন্য ছটফট করিয়া বেড়াইতেছে ।” “সে কি রে, অসীম কি বিবাহ করিয়া আসিল না কি ! মেয়েমানুষ আনিব কোথা হইতে ?” “না, তা কেন, এ যে বাঈজী ! বোধ হয় কাল যে শাহজাদার মজলিসে মুজর করিতে আসিয়াছিল সে-ই ; কিন্তু আমি ত চোখে দেখতে পাই না ; আর সে-ও আসিয়া অবধি মুখ খোলে নাই ।” “সে মার্গ

কোথায়?" "আমার তাষুতে।" "আর অসীম?" "আমার তাষুর বাহিরে।" "ভাল কথা, চল্ যাইতেছি। ই রে ভূপেন, অসীম বান্ধুজীটাকে তাষুতে আনিল কেন?" "তাহা আমি কেমন করিয়া জানিব দাদা?" "বলি, খুস-খুস, ফিস্-ফিস্ কিছু শুনিতে পাইলি?" "সে আবার কি?" "তুই একটা আস্ত বাদর। বলি, প্রেমে পড়িলে নায়ক-নায়িকা যেমন অস্পষ্টস্বরে কথা কয়, অথচ অত্যন্ত অধিক কথা কয়, সে-সব কিছু শুনিতে পাইয়াছিস?" "প্রেমে পড়িলে নায়ক-নায়িকা বুঝি অস্পষ্ট স্বরে কথা কয়? তাহা আমি কেমন করিয়া জানিব! বলি, বড়দাদা, তুমি কি তবে বৌদিদিকে ভালবাস না?" "ভাল জালা! ইহার মধ্যে বৌদিদিকে টানিয়া আনিলি কেন?" "তুমি ত বৌদিদির সঙ্গে ফিস্-ফিস্ করিয়া কথা কহ না? তোমরা যখন আলাপ কর, তখন গ্রামের লোকে বুঝিতে পারে যে সুদর্শন দাদা বৌদিদির সহিত কথা কহিতেছে।" "ওরে হুমান, মানুষ যখন প্রথম প্রেমে পড়ে, তখন ফিস্-ফিস্ করিয়া কথা কহে। তোকে সে কথা আমি কেমন করিয়া বুঝাইব?" "কই, তোমাকে ত কখনও বৌদিদির সহিত ফিস্-ফিস্ করিয়া কথা কহিতে শুনি নাই?" "ওরে বাদর, আমি এই বিশ বৎসরের মধ্যে প্রেমে পড়িয়াছি মোট একবার!" "কবে?" "যেদিন তোর বৌদিদি নিজ হাতে রাঁধিয়া খাওয়াইয়াছিলেন।" "বটে, এত বড় কথা! আমি আজই বৌদিদিকে বলিয়া দিব।"

ব্রাহ্মণ একেবারে জল হইয়া গেল; এবং অত্যন্ত বিনীত ভাবে কহিল, “লক্ষী দাদাটি আমার, এমন কাজ করিও না। এমনিতেই মাগীর গলার আওয়াজে বাড়ীতে কাক-চিল বসিতে পায় না,—তাহার উপর আবার যদি এ কথা শোনে, তাহা হইলে, চীংকার করিয়া গগন বিদীর্ণ করিবে। তুমি এমন কাজ করিও না ভাই! তুমি যাহা বলিবে, আমি তাহাই করিব।”

“ভাল কথা, এমন গোটাকী কিস্তি বারদিগর করিও না। তুমি শীঘ্র চল, দাদা তোমার জন্য অস্থির হইয়া পড়িয়াছেন।” উভয়ে ভাগীরথীতীর পরিত্যাগ করিয়া সহরের মধ্যে প্রবেশ করিলেন এবং দ্রুতপদে শাহজাদার শিবিরের দিকে চলিলেন। শিবির দুইভাগে বিভক্ত। প্রথম ভাগে শাহজাদার প্রকাণ্ড বিচিত্র বস্ত্রাবাস এবং তাহার চারিদিকে মুসলমান সেনাপতি ও সৈন্যগণের তাবু। দ্বিতীয় ভাগ আয়তনে বৃহৎ ও উহা হিন্দু সৈনিকগণের আবাসে পরিপূর্ণ। দ্বিতীয় ভাগের এক কোণে গঙ্গাতীরে দুইটি প্রকাণ্ড তাবু। তাহার একটির বহির্দিশে, ক্ষুদ্র কাষ্ঠাসনে বসিয়া, এক ব্যক্তি আল্‌বোলায় ধূমপান করিতেছিল। ভূপেন দূর হইতে তাহাকে ডাকি কহিল, “নবকৃষ্ণ, বড়দাদা আসিয়াছেন।” নবকৃষ্ণ অত্যন্ত লজ্জিত হইয়া, আল্‌বোলার নল ফেলিয়া দিয়া, উঠিয়া দাঁড়াইল; এবং স্বদর্শনকে কহিল, “এই যে ভট্টাচার্য্য মহাশয়! আসিতে আজ্ঞা হয়। এইমাত্র একজন খাওয়ান্স আসিয়া হজুরকে তলব করিয়া লইয়া গেল।” স্বদর্শন ব্যগ্র হইয়া তাহাকে

জিজ্ঞাসা করিলেন, “বলি নব, সে ছুঁড়ীটা কোথায় গেল?” নবকৃষ্ণ হান্তের প্রবল বেগ অতি কষ্টে দমন করিয়া কহিল, “কোন ছুঁড়ীটা ভট্টাচার্য্য মহাশয়?” সুদর্শন অত্যন্ত ক্রুদ্ধ হইয়া বলিয়া উঠিল, “বখরা পাইয়াছিস বুঝি?” নবকৃষ্ণ দস্তে দস্ত পেষণ করিয়া দ্বিতীয়বার হান্ত গোপন করিল; এবং অতি ধীরে বিনীত ভাবে জিজ্ঞাসা করিল, “ভট্টাচার্য্য মহাশয় কি পরগণে ঝকণপুরের বন্দোবস্তের কথা রূপকচ্ছলে ব্যক্ত করিতেছেন?” ভূপেন এতক্ষণ দাঁড়াইয়া ছিলেন,—তিনি এই সময়ে বলিয়া উঠিলেন, “অম্বরী তামাকের গন্ধ আসিতেছে কোথা হইতে?” সুদর্শন পাছে ভূপেনকে বলিয়া দেয় যে, নবকৃষ্ণ চন্দনকাষ্ঠের চৌকীর উপরে বসিয়া সোণার আলবোলায় ঢাকাই রাণার সট্‌কায় ধূমপান করিতেছিল, সেইজন্ত সে অতি কাতর ভাবে বাক্যহীন বিনয়ে সুদর্শনকে তুষ্ট করিতেছিল। সুদর্শন কিন্তু সহজে তুষ্ট হইবার পাত্র নহেন। তিনি দ্রুত ইঙ্গিতে জানাইয়া দিলেন যে, তাঁহার প্রশ্নের যথাযথ উত্তর না মিলিলে, স্বর্ণের মুখনল হইতে ধূমোদগীরণের কারণ ব্যক্ত হইয়া যাইবে। উপায়ান্তর না দেখিয়া নবকৃষ্ণ অনুচ্চারিত ভাষায় কহিল, “তাম্বুর ভিতরে।” ভূপেন উত্তর না পাইয়া, বিরক্ত হইয়া সুদর্শনকে জিজ্ঞাসা করিলেন, “বড়দাদা, দেখ না অম্বরী তামাকের গন্ধ কোথা হইতে আসিতেছে?” নবকৃষ্ণ ফাঁপরে পড়িল। সুদর্শনও উত্তর না পাইয়া দীর্ঘ কক্ষ কেশের মধ্যে অঙ্গুলি চালনা করিতে আরম্ভ করিলেন। এই সময়ে চক্রীর চক্রে নবকৃষ্ণ বাঁচিয়া গেল।

নিকটের বস্তাবাসে একটা বহুমূল্য বেশমের পর্দা সরিয়া গেল। নূপুর-বলয়-নিষ্কণে নীরব বনস্থলী নীচ হইয়া উঠিল। কোমলাঙ্গের আবরণ ইতস্ততঃ ঘর্ষণে যে শব্দ হইয়া থাকে, তাহা জানাইয়া দিল যে, একটা বহুমূল্য পেশোয়াজ দ্রুতবেগে আবর্তিত হইল। সঙ্গে সঙ্গে বীণানিমিত্ত কণ্ঠে প্রশ্ন হইল, “বাবু সাহেব!” প্রশ্নকত্রীকে দেখিয়া এবং তাহার কণ্ঠস্বর শুনিয়া, হৃদস্পন্দন ভট্টাচাৰ্য্য স্তম্ভিত হইয়া গেল। তাহার দক্ষিণ হস্তের অঙ্গুলিগুলি দীর্ঘ তৈলহীন কেশরাশির মধ্যে বহিয়া গেল। নবকৃষ্ণ আভূমি নত হইয়া একটা দীর্ঘ সেলাম করিয়া ফেলিল। ভূপেন কিছু দেখিতে না পাইয়া জিজ্ঞাসা করিল, “কে?”

রমণী কিন্তু তাহার দিকে ফিরিয়াও চাহিল না। সে উচ্চতর কণ্ঠে জিজ্ঞাসা করিল, “সাহেব কোথা গয়ে?” নবকৃষ্ণ অত্যন্ত ব্যস্ত হইয়া বলিয়া উঠিল, “জী, ছুজুর,—তোবা, তোবা, রাধে কৃষ্ণ! বিবি-সাহেব, কেয়া ছকুম ফরমাইয়ে?” ভূপেন রমণীকে লক্ষ্য করিয়া জিজ্ঞাসী করিল, “আপনার কি কিছু আবশ্যক আছে বাঈজী?” “না, সাহেব, কেবল জিজ্ঞাসা করিতেছি, সাহেব কোন্ দিকে গেলেন?” সাহেব সন্দোহনে ভূপেন শিহরিলা। নবকৃষ্ণ কি বলিতে যাইতেছি, তাহাকে বাধা দিয়া ভূপেন বলিয়া উঠিল, “দাদার দরবারে তলব হইয়াছে; বোধ হয়, আসিতে বিলম্ব হইবে। আপনার যদি কিছু আবশ্যক থাকে বলুন।” রমণীর মুখে ক্ষীণ তড়িৎলেখার স্তম্ভ ঈষৎকালের রেখা গোলাপবর্ণ ওষ্ঠে মিলাইয়া গেল; ঈষদভিমানের ওষ্ঠদ্বয়

কম্পিত হইল। রমণী কহিল, “নেহি সাহেব, আপ্লোগ্কে।
বহুত শুক্ৰী আদা কবুতা হুঁ, মেরি কুছ্‌তি জরুরং নেহি।”

বজ্রাবাসের ঘন যবনিকা পড়িয়া গেল। কোমলাঙ্গে লাগিয়া
বহুমূল্য বস্ত্রের পেশোয়াজ মৃদু শব্দ করিল। হেনার ক্রীণ গন্ধ
গন্ধাবারিকণাসিক্ত ঈষৎ পবন বহুদূর বহিয়া লইয়া গেল। স্বদর্শন
ভট্টাচার্য্য সহসা ভূ-পৃষ্ঠে বসিয়া পড়িল এবং ললাটে করাস্নাত
করিয়া কহিল, “সর্বনাশ!” ভূপেন্দ্র ক্রুদ্ধ হইল। রমণী
তাহাকে জিজ্ঞাসা করায় সে অত্যন্ত বিরক্ত হইয়াছিল। এখন
স্বদর্শনের কাতরোক্তি শুনিয়া সে বলিয়া উঠিল, “বড়দাদা, কি
কর! মেজদাদা তেমন লোক নহেন।” নবকৃষ্ণ এই অবসরে
সট্কা ও আলবোলা লইয়া দ্বিতীয় তাস্বূতে প্রস্থান করিল।

ক্রমে রোদ্র উঠিল। স্বদর্শন ভূপেনকে ডাকিয়া তাঁহার
পাশে শিশিরসিক্ত শম্পশয্যায় উপবেশন করাইলেন; এবং
তাঁহার পৃষ্ঠে হস্তার্পণ করিয়া কহিলেন, “ভূপ, ভাই, কথাটা
আমার বড় সোজা ঠেকিল না। ছোট রায় নিকোঁধ নহে বটে,
তবে কি জান—ওর নাম কি, যৌবনকাল—এই; তা না—তবে
কি না, প্রথম উন্নতির মুখ—ঐ লোকে বলে, কাঁচা পয়সা আর
কাঁচা বয়স—” ভূপেন্দ্র অধিকতর ক্রুদ্ধ হইয়া, তাঁহার মুখের
কথা কাড়িয়া লইয়া বলিয়া উঠিল, “বড়দাদা, তুমি কি পাগল
হইলে না কি! অসীম রায় বেশা-কল্লার রূপে মুগ্ধ হইবে? বে
দিন হইবে, সে দিন এই অন্ধ নয়ন দুইটা উপাড়িয়া ফেলিব।”
স্বদর্শন দুইদিনবার শুষ্ককণ্ঠে বায়ু গলাধঃকরণ করিয়া অতি ধীরে

ধীরে কাঁহলেন, “না, তা কি জান—সে কথা বলি নাই—তাকে
 ওর নাম কি জান, রমণী-রূপ, প্রথর খর যৌবন, প্রবল বঙ্গা,
প্রায় একই প্রকার। তুমি ত দেখিতে পাও না ভাই—”
 স্মদর্শনের মুখের কথা মুখেই রহিয়া গেল,—বজ্রাবাসের বহুমূল্য
 ঘন-নীল যবনিকা দ্বিতীয়বার অপসারিত হইল। দ্বিতীয়বার
 কুসুম পেলব অঙ্গ-স্পর্শে আবর্তিত পেশোয়াজ মৃদু শব্দ করিয়া
 উঠিল। পবন-হিলোল হেনার ক্ষীণ গন্ধের সহিত সুবাসিত
 কেশভৈলের গন্ধের আভাস বহন করিয়া আনিল; বলয় কঙ্কণ
 নৃপুর-শিঞ্জন নিস্তব্ধ বনস্থলী মুখরিত করিয়া তুলিল। অদূরে
 বৃক্ষশাখায় একটা কাক তাহার কর্কশ রবে স্তম্ভ জগতের স্তম্ভপ্তি
 ভঙ্গ করিতেছিল,—সে যেন ভয়ে নীরব হইল। বীণানিন্দিত
 কর্তৃ হইতে দ্বিতীয়বার উচ্চারিত হইল, “সাহেব।” ভূপেন্দ্রের
 দীপ্ত ক্রোধধ্বনলে ঘৃতাছতি পড়িল। সে কর্কশ কাণে বলিয়া
 উঠিল, “তোমার সাহেব এখনও ফিরেন নাই নর্তকী! উতলা
 হইতেছ কেন? রাজকার্য্যে নিযুক্ত থাকিলে মধ্যে মধ্যে নায়ক
 নায়িকাকে বিস্মৃত হইয়া থাকে।” ঘন নীল যবনিকা সহস্র
 পড়িয়া গেল।

ত্রয়োবিংশ পরিচ্ছেদ

আফিমের মহিমা

আজীম-উশ্-শানের সিংহাসন-লাভের সংবাদ যে দিন পাটনা নগরে বিঘোষিত হইয়াছিল, তাহার দুই দিবস পরে নগরের পূর্বপ্রান্তে রাজপথের উপরে দুই বৃদ্ধ মুসলমান অশুট স্বরে কথোপকথন করিতেছিল। তাহাদিগের মধ্যে একজন অতি বৃদ্ধ এবং দীর্ঘ যষ্টিতে ভর দিয়া দাঁড়াইয়া ছিল। দ্বিতীয় ব্যক্তি বৃদ্ধ হইলেও পঙ্গু নহে। তাহার দীর্ঘ দেহ ও অঙ্গভঙ্গি পরিচয় দিতেছিল যে, তাহার জীবনের অধিকাংশ সময় যুদ্ধ-ব্যবসায়ে ব্যয়িত হইয়াছে। প্রথম বৃদ্ধ দ্বিতীয়কে কহিতেছিল, “তোমাকে ত অনেকদিন ধরিয়া বলিতেছি দোস্ত, যে, তোমার আফিম পরিবার বয়স হইয়াছে! দেখ, আফিম অতি আমীরী নেশা, অথচ খরচ অতি সামান্য। একটা নারিকেলের ছঁকা, দুই হাত বাঁশের নল এবং কিঞ্চিৎ আফিম হইলেই চলিবে,—” দ্বিতীয় বৃদ্ধ তাহাকে বাধা দিয়া কহিল, “রুস্তম দিল্ খাঁ, তুমি যে পাঠান, তাহা কি বিস্মৃত হইয়া গিয়াছ? আফিম তোমাকে একেবারে গ্রাস করিয়াছে!” প্রথম বৃদ্ধ ক্রুদ্ধ হইয়া যষ্টির সাহায্যে সিধা হইয়া দাঁড়াইবার চেষ্টা করিল; এবং দ্বিতীয়ের নাসিকার নিকটে তর্জনী হেলন করিয়া বলিয়া উঠিল, “আরে গুলশের খাঁ, তুমিও বিস্মৃত হইয়াছে যে তুমিও পাঠান। কসবীর প্রেমে পড়িয়া তোমার মগজটা একদম বিগড়াইয়া গিয়াছে; তাহা না হইলে

পাটনা সহরে এই প্রকাশ্য রাজপথে দাঁড়াইয়া, ভূমি আমার কাছে একটা কস্মীর কণা উদ্ধারের পরামর্শ চাহিতেছ? আফিম ধর, আফিম ধর। পাকা না পার কাঁচা ধর।” “তুমি রাগ করিও না রুস্তম্ দিল্ খাঁ, আমি বড়ই বিপদে পড়িয়াছি,—বাদশাহী কাল রাত্রি হইতে কিছুই আহাৰ করে নাই।” “আরে ছিঃ, গুলশের খাঁ, হাজার বার ছিঃ। কস্মী, তাহার সহিত পয়সার সম্পর্ক;—সে আহাৰ করে নাই, তাহার জন্ত তোমার মাথায় বজ্রাঘাত হইতেছে কেন?” “গোসা কর কেন ভাই! স্বীজাতি স্বভাবতঃই দুর্বল,—অনেকদিন তাহার আশ্রয়ে বাস করিতেছি।” “তুমি একেবারে জহান্নমে গিয়াছ! কস্মীর কণা কস্মী,—আস্‌নাই করা বাহার পেশা, তাহার জন্ত চোখের জল ফেলিলে কি হইবে? তাহার হয় ত মাণ্ডক জুটিয়াছে; সে দুই দিন কৃতি করিতে সরিয়া পড়িয়াছে।” “না হে রুস্তম্ দিল্ খাঁ, মণিয়া আমার তেমন নয়।” “রাখ তোমার কথা, কস্মীর কণা সতী, তোমার পূর্বে তোমার ন্যায় অনেক আহম্মক দেখিয়াছি,—তুমি প্রথম নহ।” “এখন কি উপায় করি বল দেখি?” “আফিম ধর বাপু, আফিম ধর। আমার হুঁকা ও তলত বাঁশের নলটা এবং ভরিখানেক ছিটা তোমায় এখনই দিতে পারি। দেখ, আফিমে সকল শোক, দুঃখ ও ব্যাধি নাশ হয়—” “তুমি বুঝিতেছ না, মণিয়া আমার তেমন মেয়ে নয়। আক্‌রাশিয়বখাঁ তাহাকে জোর করিয়া ধরিয়া রাখিয়াছে।” “আরে ভাই, রুস্তম্ দিল্ খাঁ একেবারে আশী বছরের বৃদ্ধা হইয়া জন্মায় নাই, তাহাও

এককালে যৌবন ছিল ! পেশাওর হইতে পাটনা পর্য্যন্ত হাজার দুই আশীকা তাহাকে খুবস্বরং মাস্তক বলিয়া লটকাইয়া পড়িয়াছিল। আউরংকে জোর করিয়া ধরিয়া রাখে, এমন লোক এখনও জন্মায় নাই। সে কস্বীর বেটা কস্বী,—নিশ্চয় আস্নানাই করিয়া দুই পয়সা রোজগারের চেষ্টা দেখিতেছে।”

এই সময়ে এক রুক্ষকেশ, দীর্ঘকায় ব্রাহ্মণ সেইস্থানে আসিয়া উপস্থিত হইল, এবং প্রথম বৃদ্ধকে অভিবাদন করিয়া জিজ্ঞাসা করিল, “খাঁ সাহেব, বাবা, এই সহরে মণিয়া বাঈজীর বাসা কোথায় জান?” বৃদ্ধ ঈষৎ হাসিয়া কহিল, “জানি। কেন, তোমার কি হইয়াছে?” “সে আমার সর্বনাশ করিয়াছে!” দ্বিতীয় বৃদ্ধ এই সময়ে জিজ্ঞাসা করিল, “কেন, সে তোমার কি সর্বনাশ করিয়াছে?” ব্রাহ্মণ কহিল, “সে রাক্ষসী আমার দুধের • ভাইটিকে যাদু করিয়াছে।” রুস্তম্ দিল্ খাঁ, দন্তহীন বদন ব্যাদান পূর্বক বলিয়া উঠিল, “আরে গুল্শের, তোকে জন্মাইতে দেখিয়াছি,—তুই আস্নানাইয়ের কথা কি বুঝিবি বল? বলিয়া-ছিলাম কি, না, যে, তোর কস্বীর বেটা আস্নানাইয়ে পড়িয়াছে! দেখ, রুস্তম্ দিল্ খাঁর কথা ঠিক কি না? আমার ওয়ালেদ, নামটা রাখিতে ভুল করিয়াছিলেন। রুস্তম্ দিল্ না রাখিয়া আস্নানাই দিল্ রাখিলেই ঠিক হইত; কারণ, হাঁটিতে শিখিয়া অবধি ক্রমাগত প্রেমে পড়িতেছি। যেখানে খুবস্বরং আউরং, সেইখানেই আস্নানাই, সেইখানেই ফেরেববাজী, সেইখানেই খুনখারাবী।” লজ্জায় ও অপমানে গুল্শের খাঁর মস্তক অবনত

হইল। সে অতি ধীরে আগন্তুককে জিজ্ঞাসা করিল, “বাবু সাহেব, মণিয়া আমার পালিতা কত্তা। সে যদি কিছু অপরাধ করিয়া থাকে, তাহা হইলে অজ্ঞানে করিয়াছে। আপনারা তাহাকে মাফ করিবেন। সে আমাকে দেখিলে আর কোন কথা কহিতে পারিবে না।” আগন্তুক তাহার কথা শুনিয়া ভীষণ বেগে মস্তক আন্দোলিত করিল। তাহার দীর্ঘ রুক্ষ কেশগুলি প্রশস্ত কপালের চারিদিকে ছড়াইয়া পড়িল। সে বলিয়া উঠিল, “হঁ—হঁ—হঁ। খাঁ সাহেব, মণিয়া বাদ্দি তেমন চীজই নয়। তাহার পেশোয়াজের মস্মসানি যদি শুনিতে, তাহা হইলে তোমার মাথা ঘুরিয়া যাইত।”

বৃদ্ধ গুলশের খাঁ অপ্রতিভ হইয়া বলিয়া উঠিল, “সে সকল ভড়ং আমার কাছে কিছু থাকিবে না বাবু সাহেব! সে কোথায় আছে, সেই স্থানটা আমাকে দেখাইয়া দাও।” বৃদ্ধ রস্তম্ দিল্ খাঁ এতক্ষণ একহস্তে যষ্টির উপর ভর রাখিয়া, অপর হস্তে গুন্দ পাকাইতেছিল; সে হঠাৎ বলিয়া উঠিল, “আরে আহম্মক, সে কি তোমার জন্য বসিয়া আছে! সে চিড়িয়া হইয়া, ফুড়ুং করিয়া মাগুকের গলা ধরিয়া উড়িয়া পলাইয়াছে। তুই ঘরে যা, বুড়ী কস্বীকে লইয়া পাকা আফিম টানিতে ধর।” গুলশের খাঁ তাহার কথা শুনিয়াও শুনিল না এবং আগন্তুককে কহিল, “বাবু সাহেব, তুমি আমাকে পথ দেখাইয়া লইয়া চল, আমি এখনই তোমার ভাইকে মণিয়া বাদ্দিয়ের যাত্র হইতে ছাড়াইয়া লইতেছি।” তাহার সুদীর্ঘ অবয়ব দেখিয়া আগন্তুকের মনে হয়

ত দ্রুত আশার সন্ধান হইল। সে ভাবিল যে, এই বৃদ্ধ পাঠান হয় ত দীর্ঘ বাহুদয় দিয়া পাশব বলে মোহিনীর মায়াজালবদ্ধ ভ্রাতাকে মুক্ত করিয়া দিবে। সে আনন্দে তাহার সঙ্গে চলিল। প্রথম বৃদ্ধ রাজপথের মধ্যস্থলে দাঁড়াইয়া, দুই হস্তে যষ্টির উপর ভর দিয়া, ঘন-ঘন নিশ্বাস ত্যাগ করিতেছিল এবং বলিতেছিল, “জহান্নমে যাও, অধঃপাতে যাও।” দেখিতে দেখিতে বৃদ্ধ পাঠান ও আগন্তুক পাটনা সহরের পূর্বপ্রান্তে জাকরখাঁর উত্তানে উপস্থিত হইল; এবং বহুবিধ বস্ত্রাবাস অতিক্রম করিয়া অসীম ও ভূপেন্দ্রের তাবুর সম্মুখে আসিয়া দাঁড়াইল। ভূপেন্দ্র তখনও সেই স্থানে বসিয়া ছিল। সে তাহাদের পদশব্দ শুনিয়া জিজ্ঞাসা করিল, “কে?” আগন্তুক কহিলেন, “আমি স্মদর্শন।” তাহার নাম শুনিয়া ভূপেন্দ্রের কপালের কুঞ্জন অপসারিত হইল। সে সাগ্রহে জিজ্ঞাসা করিল, “কি করিয়া আসিলে দাদা!” স্মদর্শন সোৎসাহে বলিয়া উঠিলেন, “ভয় কি ভাই বেটীর বাপকে ধরিয়া আনিয়াছি। বৃদ্ধা পথে দাঁড়াইয়া কন্যা সন্ধান করিতেছিল। এইবার বেটীকে তাড়াইতে পারিলে হয়।” “মাগী আর বাহির হয় নাই; তাড়া খাইয়া অবধি চূপ করিয়াই আছে।” “ভাল কথা, ছোট রায় কি ফিরিয়াছে?” “এখনও না।” হরকরা আসিয়া বলিয়া গেল, দ্বিতীয় প্রহরের পরে ফিরিবেন। এই সময়ে বৃদ্ধ পাঠান জিজ্ঞাসা করিল, “বাবু সাহেব, মণির কোথায়?” ভূপেন্দ্র অঙ্গুলি হেলনে তাবু দেখাইয়া দিল। পাঠান দ্বিতীয় প্রশ্ন জিজ্ঞাসা না করিয়া, তাবুর নিকটে গিয়া

ডাকিল, “মণিয়া, মণিয়া ?” প্রথমে কেহ উত্তর দিল না। অলক্ষণ পরে নীল-রেশমের পর্দা সরিয়া গেল, বীণানিন্দিত কণ্ঠে প্রশ্ন হইল, “কে, বাবু সাহেব ?” পাঠান তখন তাহার ছায়ার সম্মুখে দাঁড়াইয়া কর্কশ কণ্ঠে কহিল, “মণিয়া, বাবু সাহেব তোমার কে ?” তাহাকে দেখিয়া রমণী প্রথমে শিহরিলা। তাহার মুখে ভীতির চিহ্ন স্পষ্ট দেখা দিল। কিন্তু সে মুহূর্ত্তমধ্যে আত্মসম্বরণ করিয়া, সহাস্ত বদনে পাঠানকে জিজ্ঞাসা করিল, “আব্বা, আপনি এখানে কেন ?” বৃদ্ধ সক্রোধে বলিয়া উঠিল, “আমি এখানে কেন পরে বলিতেছি ; আগে তুই বল্ যে, তুই এখানে কি করিতেছিস্ ?” বৃদ্ধের প্রশ্ন শুনিয়া রমণীর নেত্রদ্বয় সেই ক্রোধে রক্তবর্ণ হইয়া উঠিল। সে কহিল, “আব্বা, আমি কসবীর বেটী কসবী, কসব আমার পেশা। বাল্যকাল হইতে পিতা-মাতা বাহা শিখাইয়াছে, তাহাই করিতে এখানে আসিয়াছি।” তাহার উত্তর শুনিয়া পাঠান স্তম্ভিত হইয়া গেল। তাহার ক্রোধ দূর হইল এবং সে অত্যন্ত কুণ্ঠিত হইয়া পড়িল। বৃদ্ধ নিতান্ত অপরাধীর ন্যায় ধীরে-ধীরে জিজ্ঞাসা করিল, “মণিয়া, তুমি কসবী, এ কথা ত প্রথম শুনিলাম মা ! লোকে জাহুক বা মা জাহুক, আমি তোমার পিতা। আমি কি কখনও তোমাকে কসব করিতে শিখাইয়াছিলাম ? তুমি কসবীর কন্যা বটে, কিন্তু আমি আজীবন তোমাকে ভদ্র গৃহস্থকন্যার মত রাখিতে চেষ্টা করিয়াছি। তওয়াইফ্ হইলেই কি কসবী হইতে হয় মা ?” বৃদ্ধের নম্র ভাব দেখিয়া মণিয়ার মুখের দীপ্তি নিবিয়া গেল,—

নূতন পন্থা

“সেখান হইতে লক্ষের লোক আবার আমাকে ধরিয়া আনিবে।”
 “তবে তুমি কি করিবে? কোথায় বাস করিবে?” “আমি
 আপনার আশ্রয় ত্যাগ করিব না।” এই কথা শুনিয়া সুদর্শন
 বলিয়া উঠিলেন, “ভূপ, সর্বনাশ হইল।”

• তাহার কথা বোধ হয় অসীমের কর্ণে প্রবেশ করিয়াছিল;
 কারণ, তিনি ধীরে ধীরে সুদর্শনের নিকটে আসিয়া জিজ্ঞাসা
 করিলেন, “তুমি কতক্ষণ আসিলে দাদা?” সুদর্শন ঘন-ঘন
 মস্তক আন্দোলন করিয়া কহিলেন, “বিষম বিপদ ভাই! বিপদ
 বলিয়া বিপদ। এখন মাগীকে তাড়ান যায় কি করিয়া?”
 “আমি ত কাল রাত্রি হইতেই উপায় অনুসন্ধান করিতেছি।
 কোন উপায়ই খুঁজিয়া না পাইয়া অবশেষে তোমাকে ডাকিতে
 পাঠাইয়াছিলাম। সমস্ত রাত্রি অনিদ্রায় গিয়াছে। আবার
 শুনিতেছি, শীঘ্রই দিল্লী যাইতে হইবে।” “মাগী তোমার স্বামী
 আসিয়া আরোহণ করিল কেমন করিয়া?” “সে দুঃখের কথা
 বল কেন? কাল রাত্রিতে মজলিসে অনেক রাত্রি হই
 গিয়াছিল। আহমদবেগ ও আফ্রানির খাঁ উহাকে মুক্ত
 করিবার জন্ত বায়না করিয়া আসিয়াছিল। উহাদের একজনে
 বন্দ মতলব ছিল। কারণ, মজলিস্ ভাঙ্গিয়া গেলে আফ্রানি
 খাঁ উহার সমস্ত লোকজন সব তাড়াইয়া দিয়া, উহাকে আ
 করিয়াছিল। উহাদের জাতির স্ত্রীলোক আটক করিলে বি
 আপত্তি করে না। কিন্তু এই স্ত্রীলোকটি কোন অজ্ঞাত ব
 রাত্রিতে চীৎকার করিয়া উঠিয়াছিল! শাহজাদা তখন অ

তাস্থতে। তিনি চাঁৎকার গুনিয়া বাহিরে আসিলে, আহদীরা তাহাকে জানায় যে, আফ্রাশিয়ব খাঁ একজন জ্বীলোককে আটক করিয়াছে। তাঁহার আদেশ মত আমি তৃতীয় প্রহর রাত্রিতে উহাকে মুক্ত করিয়া নিজের তাস্থতে আনিয়াছি; এবং সমস্ত রাত্রি দুই ভাই সামাগ্র সিপাহীর মত তাস্থর চারিদিকে পাহারা দিয়াছি। এইমাত্র শাহজাদাকে জানাইলাম যে, সে আওরং এখনও যায় নাই। তিনি বলিলেন যে, উহার ইচ্ছামত যাইতে পারে; কিন্তু উহাকে যেন কেহ বল-পূর্বক ধরিয়া লইয়া না যায়। ও ত কোথাও যাইতে চাহে না।”

সুদর্শন ঘন-ঘন মস্তক আন্দোলন করিতে-করিতে কহিলেন, “ঐ ত গোলযোগ ভায়া, ঐ ত গোলযোগ। বেটী তোমায় ছাড়িয়া যাইতে চাহে না কেন? দেখ ভাই, ভগবান্ তোমার উন্নতি করিয়াছেন, তোমাকে উচ্চ পদ দিয়াছেন; আশীর্বাদ করি, তোমার আরও উন্নতি হউক; কিন্তু আমি তোমাকে যে ভাবে দেখিতাম, এখনও সেই ভাবে দেখি। তোমার প্রথম যৌবন, অসীম রূপ, বেটী বোধ হয় তাহা দেখিয়া যাচ্ছে।” সুদর্শনের কথা শুনিয়া অসীম উচ্চহাস্ত করিয়া বলিল; এবং কহিলেন, “দাদা, তুমি পাগল হইয়াছ? ও যে ভায়া!” সুদর্শন কহিলেন, “ভায়া, আমি পাগল হই নাই।—ঐ ত জ্বীলোক! জ্বী-জাতিকে একেবারেই বিশ্বাস নাই।” অসীম কহিলেন, “দাদা, কথাটা যদি বো-ঠাকুবাণীক বলিয়া দিবে।” সুদর্শন কহিলেন, “তাহা হইলে দাদার বিপদ বাড়িবে আর কি।

সকাল-সকাল মাছ কিনিয়া বাসায় ফিরিতে বলিয়াছিল,—
তোমার পাল্লায় পড়িয়া দ্বিতীয় গ্রেহর কাটিয়া গেল। এখন রন্ধ-
রহস্ত রাখ, মাগীকে কি করিয়া বিদায় করা যায় বল দেখি ?
শাহ্ জাদার মহলে পাঠাইয়া দিলে হয় না ?” “পাগল হইয়াছ ?
স্নেহম-সাহেব এখনই উহাকে ঝাঁটা মারিয়া বিদায় করিয়া
দিবে ; না হয় ত খোজাকে বলিয়া দিবে যে, উহার নাক-কাণ
কাটিয়া দেয়।” “তবে কি উপায় করা যায় বল দেখি ?” “আমি
মনে করিতেছিলাম যে উহাকে তোমাদের বাসায় পাঠাইয়া
দিব।” “কিন্তু কর্তা কি মনে করিবেন ?” “বিপন্ন রমণী
শুনিলে তিনি নিশ্চয়ই উহাকে আশ্রয় দিবেন ; কিন্তু বৌ-
ঠাকুরাণী কি বলিবেন বলিতে পারি না।” “ওরে তাহার আর
সে-কাল নাই।” এই সময়ে মণিয়া বাদি তাস্তুর পর্দা উঠাইয়া
ডাকিল, “বাবু সাহেব।”

পঞ্চবিংশ পরিচ্ছেদ

যবনী স্পর্শ

তাস্তুর দুয়ারে দাঁড়াইয়া অসীম জিজ্ঞাসা করিলেন, “কি
করিতে হইবে বাদীজী ?” সঙ্কোচন শুনিয়া সন্মিত বদনে যুবতী
জিজ্ঞাসা করিল, “আপনি আমাকে ও-কথা বালিয়া ডাকে

কেন?" অসীম বিস্মিত হইয়া জিজ্ঞাসা করিলেন, "তবে আপনাকে কি বলিয়া ডাকিব?" মণিয়া কহিল, "কেন আমার নাম ধরিয়া, মণিয়া বলিয়া।" তাহার উত্তর শুনিয়া হৃদর্শন ভূপেন্দ্রের হস্ত দৃঢ়ভাবে পেষণ করিলেন। সে যত্নপূর্ণ চীৎকার করিয়া উঠিল। হৃদর্শন বলিয়া উঠিলেন, "ভূপ, গেল রে,—গেল, গেল! আর থাকে না। যখন নাম ধরিয়া ডাকিতে বলিতেছে, তখন আর থাকে না।" ভূপেন্দ্র কহিল, "দাদা, এমন টিপন দিয়াছ যে সঙ্গে-সঙ্গে আমিও যাই-যাই হইয়াছি।"

মণিয়ার কথা শুনিয়া লজ্জায় অসীমের মুখ রক্তবর্ণ হইয়া উঠিয়াছিল। মণিয়াও নিজের প্রগল্ভতা বুঝিতে পারিয়া লজ্জিত হইয়াছিল। এইরূপে অল্পক্ষণ কাটিয়া গেল, কেহই কোন কথা কহিল না। রমণী প্রথমে আত্মসংবরণ করিয়া কহিল, "আপনারা দুইজনে রাত্রি হইতে বাহিরে বসিয়া আছেন, বোধ হয় আমি আসিয়াছি বলিয়া? আমি থাকিতে কি আপনারা ভিতরে আসিবেন না?" অসীম লজ্জিত হইয়া কহিলেন, "কেন আসিব না! তবে রাত্রিকালে আপনার অসুবিধা হইবে না। যাও বটে, আর কতকটা আপনাকে রক্ষা করিবার জন্তও।" "হ্যাঁ, আমরা দুই ভাই ভাস্কর বাহিরে ছিলাম। ওহে ভূপেন, বড়দা, বাহিরে বসিয়া থাকিয়া লাভ কি, ভিতরে আইস।" "আমরা শুনিয়া হৃদর্শন ভূপেন্দ্রকে কহিলেন, "ওরে, ভাস্কর তরে যাইতে বলে যে রে।" ভূপেন্দ্র হাসিয়া ফেলিল এবং হাসা করিল, "ভয় কি বড়দাদা, ও ত আর রাক্ষসী নয়।"

চল না, তাম্বুর ভিতরেই যাই।” সুদর্শন সুদীর্ঘ নিঃশ্বাস ত্যাগ করিয়া হতাশ ভাবে কহিল, “তবে চল যাই। কি জান ভায়া, যবনী-স্পর্শ, বড়বধু যদি শুনে?” ভূপেন্দ্র খিল-খিল করিয়া হাসিয়া উঠিল; এবং কহিল, “বোঁঠাকুরাণী নিশ্চয়ই এ কথা শুনিবেই,—আমিই এ কথা তাঁহাকে শুনাইব।” ব্রাহ্মণ তাহা শুনিয়া ব্যাকুল হইয়া, উভয় হস্তে তাহাকে জড়াইয়া ধরিয়া বলিয়া উঠিলেন, “এমন কাজটি করিও না ভাই, ব্রাহ্মণী তাহা হইলে তৎক্ষণাৎ প্রাণত্যাগ করিবে।” ভূপেন্দ্র আবার উচ্চহাস্য করিয়া উঠিল। তাহা শুনিয়া অসীম জিজ্ঞাসা করিলেন, “কি হইয়াছে ভূপ?” হাস্যবিহ্বল ভূপেন্দ্র কহিল, “বড়দাদা—যবনীস্পর্শ—বোঁঠাকুরাণী—উদ্ভ্রম—”হাস্তের প্রবল বেগ তাহার উক্তির অবশিষ্টাংশ রুদ্ধ করিল।

সুদর্শন যে ভাবে বস্ত্রাবাসের মধ্যে প্রবেশ করিলেন, অসীম তাহা দেখিয়া হাস্য রোধ করিতে পারিলেন না। বস্ত্রাবাসের অভ্যন্তরের কক্ষে একখানি গালিচা বিস্তৃত ছিল। মণিয়া তাহা দেখাইয়া দিয়া সকলকে উপবেশন করিতে অহুরোধ করিল। অসীম ও ভূপেন্দ্র উপবেশন করিলেন। কিন্তু সুদর্শন তখনও কাষ্ঠদণ্ডবৎ এক কোণে দণ্ডায়মান রহিলেন। তাঁহার ভাব দেখিয়া উভয় ভ্রাতা উচ্চ হাস্য করিয়া উঠিলেন। মণিয়া বিস্মিতা হইয়া জিজ্ঞাসা করিল, “আপনি আসিবেন না?” ব্রাহ্মণ প্রশ্নের ক উত্তর দিলে না। তাহা দেখিয়া অসীম কহিলেন, “কি বড়দাদা, বসেন না?” ব্রাহ্মণ অক্ষুট স্বরে কহিলেন, “একে

যবনী, তায় বেণী! তোমাদের আচার-বিচার একেবারে গিয়াছে।” মণিয়া মনে করিল যে, ব্রাহ্মণ হয়ত যথোপযুক্ত অভ্যর্থনা না পাইয়া ক্রুদ্ধ হইয়াছেন। সে উঠিয়া ব্রাহ্মণের হস্তাকর্ষণ করিয়া কহিল, “আমার যদি অপরাধ হইয়া থাকে মাক করিবেন। আপনি বহ্নন না।” মণিয়া তাহার অঙ্গস্পর্শ করিবামাত্র ব্রাহ্মণ লক্ষ্য দিয়া উঠিলেন এবং কহিলেন, “আরে, আরে, তুই করিস্ কি? যবনী, পাষণ্ডী! ছাড্ ছাড্! হায়-হায়, আজ যবনীর হাতে ধর্শ্ব নষ্ট হইল। ওরে ছোট রায়, তোরা হাসিস্ কেন, আমাকে ছাড়িয়া দিতে বল।” অসীম ও ভূপেন্দ্র হাস্তের প্রবল বেগ দমন করিতে না পারিয়া গালিচার উপর লুটাইতেছিলেন। ব্রাহ্মণ তাহা দেখিয়া কঁাদিয়া ফেলিলেন। মণিয়া কিংকর্তব্যবিমূঢ় হইয়া দাঁড়াইয়া রহিল। ব্রাহ্মণ কঁাদিতে-কঁাদিতে কহিলেন, “ওগো বাছা, তুমি আমার মা, তুমি দয়া করিয়া আমায় ছাড়িয়া দাও। আহা বড়-বধুর আমার আর কেহ নাই গো।” মণিয়া জিজ্ঞাসা করিল, “বড়-বধু আপনার কে হয়?” তাহার প্রশ্ন শুনিয়া অসীম ও ভূপেন্দ্রের হাস্তের বেগ অধিকতর বর্দ্ধিত হইল। মণিয়া তখনও স্তম্ভদর্শনের হস্ত ত্যাগ করে নাই। স্তম্ভদর্শন অতি কাতরকণ্ঠে মণিয়াকে কহিল, “বান্ধিজি, তুমি এই নচ্ছার ছোট রায়টিকে লইয়া যাহা খুসি তাহাই কর, আমি কিছুই বলিব না। তুমি দয়া করিয়া আমার হাতটা ছাড়িয়া দাও। দেখ, বড়বধু যদি কথা শোনে, তাহা হইলে গলায় দড়ি দিবার পূর্বে ঝাঁপিয়া আমাকে

বিছাইয়া দিবে।” মণিয়া স্মদর্শনের সমস্ত কথা বুঝিল না, সে দ্বিতীয়বার জিজ্ঞাসা করিল, “বড়বধু আপনার কে হয়?” হাস্তের বেগ কিঞ্চিৎ সঞ্চরণ করিয়া ভূপেন্দ্র বলিয়া উঠিল, “বড়বধু বড়দাদার গুরু, ইষ্টদেবতা,—এই তোমরা যাহাকে মুরশীদ বল।” এই বলিয়া ভূপেন্দ্র পুনরায় খিল-খিল করিয়া হাসিয়া উঠিল। মণিয়া বিস্মিত হইয়া জিজ্ঞাসা করিল, “আপনার মুরশীদ রাগ করিবেন কেন, আপনি কঁাদিতেছেন কেন? বসুন না।” মণিয়ার কথা শুনিয়া স্মদর্শনের শোকাবেগ অধিকতর বর্দ্ধিত হইল। তাহা দেখিয়া অসীম ও ভূপেন্দ্র আবার গালিচার উপর লুটাইয়া পড়িল। মণিয়া স্মদর্শনকে শান্ত করিবার জন্য তাহার রেশমের রুমাল দিয়া চোখ মুছাইয়া দিল। স্মদর্শন শিহরিয়া উঠিয়া উভয় হস্তে চক্ষু আবৃত করিল। মণিয়া তাঁহার ভাব বুঝিতে না পারিয়া, তাঁহার অঙ্গে হাত বুলাইতে গেল। স্মদর্শন লক্ষ্য দিয়া উঠিল; এবং কহিলেন, “এ রাম, আরে ছিঃ! ও বাদ্দিজি, তুমি কর কি? হরেকৃষ্ণ, গোবিন্দ! আ মরু মাগী, ভূত ঝাড়িবার মত গায়ে হাত বুলাইতেছিষ্ কেন? ওরে, পিঁয়াজের গন্ধ! ওরে অসীম, ও ভূপেন, আমাকে ছাড়াইয়া দে না ভাই।” অসীম ও ভূপেন তখন প্রবল হাস্তের বেগে প্রাঙ্গ্ন ক্রুদ্ধবাস। কেহই তাঁহাকে সাহায্য করিতে অগ্রসর হইল না দেখিয়া, স্মদর্শন অবশেষে মণিয়াকে মিনতি করিতে আরম্ভ করিলেন, “ও বাদ্দিজি, তুমি আমার ধর্ম-মা, তুমি আমাকে ছাড়িয়া দাও। আমি বুঝিতে পারিয়াছি, ছোট রায়কে

ছাড়াইতে আসিয়াছিলাম বলিয়া তুমি আমার উপর রাগ করিয়াছ। তুমি ছোট রায়কে যথা-ইচ্ছা লইয়া যাও, উহার মাথাটা চিবাইয়া খাও, আমি কখন কিছু বলিব না। মা কিরীটেখরীর দিব্য, স্তূদর্শন ভট্টাচার্য্য যদি আর কখন তোমার ছায়ায় পদার্পণ করে, তাহা হইলে সে চণ্ডাল! চণ্ডাল!! চণ্ডাল!!!” মণিয়া এতক্ষণে কিছু বুঝিতে পারিল। সে হাসিয়া কহিল, “তা বেশ ত, আমি ত আপনাকে খাইয়া ফেলিতেছি না, আপনি বসুন না।” স্তূদর্শন দীর্ঘনিঃশ্বাস ত্যাগ করিয়া কহিলেন, “খাইতে আর বড় বাকী নাই। তোমার স্পর্শেই আমার ধর্ম্মনষ্ট হইয়াছে। আহা, বড়বোঁ আমাকে সকাল-সকাল মাছ কিনিয়া বাড়ী ফিরিতে বলিয়াছিল। হায় হায়!” মণিয়া হাসিতে-হাসিতে কহিল, “আপনার ধর্ম্মনষ্ট হইবে কেন?” মণিয়া তখনও হাত ছাড়ে নাই এবং ছাড়িবার উপক্রমও করিতেছে না দেখিয়া, স্তূদর্শন পুনর্ব্বার ক্রন্দন শুরু করিয়া দিলেন। মণিয়া জিজ্ঞাসা করিল, “বাবু সাহেব, কাদেন কেন?” কাদিতে-কাদিতে স্তূদর্শন কহিলেন, “ও বাঈজি, তুমি বোঝ না। —আমার যে দশা হইয়াছে, তাহা যেন শত্রুরও না হয়। আমার জাতিকুল সব গেল।” মণিয়া জিজ্ঞাসা করিল, “আপনার জাতি গেল কেন? এই দুইজন বাবু-সাহেব বসিয়া আছেন,— ইহারাও ত হিন্দু, কৈ ইহারা ত কাদিতেছেন না?” স্তূদর্শন বলিয়া উঠিলেন, “ও গো, বাঈজি গো, তুমি জান না গো, উহাদের যে বড়বধু নাই!” স্তূদর্শনের কথা শুনিয়া অসীম ও

ভূপেন্দ্র পুনরায় গালিচার উপর লুটাইয়া পড়িলেন। তাহা দেখিয়া ব্রাহ্মণ মর্মান্তিক চটিলেন; এবং কহিলেন, “ওরে লক্ষ্মী-ছাড়ারা, ব্রাহ্মণের ধর্ম নষ্ট হইল, জাতি-কুল গেল, বড়বধু অনাথা হইল—আর তোরা কি না হাসিতেছিস্! আমার এই দশা হইল, আর তুই কি না রক্ত দেখিতেছিস্?” অসীম গালিচা হইতে মুখ তুলিয়া কহিলেন, “বড় দাদা, আমরা রক্ত দেখিতেছি যটে, কিন্তু তুমি যে রক্ত দেখাইতেছ?” “ওরে হতভাগা, আমি স্বদর্শন ভট্টাচার্য্য, আমি কি না রক্ত করিতেছি! নবাবের বেটার সাথী হইয়া তোর এতবড় স্পর্ধা হইয়াছে? আমার যলে জাতি গেল, কুল গেল, ধর্ম গেল,—এক বেটী পাষণ্ডী যবনী গলাগুর গন্ধভরা ক্রমাল দিয়া আমার মুখ মুছাইয়া দিল,—আর তোরা দুটা যগুমার্কণ্ড বসিয়া-বসিয়া তাহাই দেখিলি আর হাসিলি? আবার বলিতেছিস্, আমি ব্যঙ্গ করিতেছি? হে ভগবান মধুসূদন—” এই সময়ে ব্রাহ্মণের ক্রোধ দেখিয়া মণিয়া তাঁহার হাত ছাড়িয়া দিল। স্বদর্শন তৎক্ষণাৎ উদ্ধৃষ্টাসে পলায়ন করিলেন। কিন্তু তিনি তাস্থুর বাহিরে যাইতে না যাইতে, অসীম তাঁহার পদযুগল জড়াইয়া ধরিলেন। ব্রাহ্মণ বাধা পাইয়া পড়িয়া গেলেন; এবং মণিয়া বান্ধি বাস্ত হইয়া আসিয়া, স্বদর্শনের মস্তক ক্রোড়ে উঠাইয়া লইল। সে যেমন মস্তক স্পর্শ করিয়াছে, ব্রাহ্মণ অমনি উভয় হস্তে শিখা লুকাইয়া রাখিয়া, লম্ব দিয়া উঠিলেন। প্রবল লম্ফের বেগে ভূপেন্দ্র ধাক্কা খাইয়া পড়িয়া গেল। মণিয়া হতভম্ব হইয়া বসিয়া রহিল; এবং অসীম

তাহার ছায়ায় গালিচার উপর লুটাইয়া পড়িলেন। ব্রাহ্মণ তাহার এক কোণে দাঁড়াইয়া, উভয় হস্ত শিখার উপরেই রাখিয়া বলিয়া উঠিলেন, “মুখের ধর্ম গিয়াছে, পিঠের ধর্ম গিয়াছে,—বেটা পাষণ্ডী, এখন ব্রহ্মণ্যবেদের উপরে হাত! কি বলিব ছোট রায়, কেবল বড়বধুর মুখ চাহিয়া এ প্রাণ এখনও ধরিয়া আছি; নতুবা এ প্রাণ বিসর্জন দিতাম।” এই সময়ে ভূপেন্দ্র কাতরকণ্ঠে কহিল, “বড় দাদা, তোমার রঙ্গরস একটু রাখ। হাসিয়া-হাসিয়া আমার পেটে খিল ধরিয়া গেল।” তাহার কথা শুনিয়া ব্রাহ্মণ গর্জন করিয়া উঠিলেন। তিনি কহিলেন, “ওরে কাণা বাদর, আমি নিষ্ঠাবান ব্রাহ্মণ,—এক বড়বধূ ব্যতীত অপর কোন স্ত্রীলোকের মুখ দিবসে দ্বিতীয়বার নিরীক্ষণ করি না—আমি কি না রঙ্গরস করিতেছি?—আর তোরা দুইটা পাষণ্ড সারাটা রাত্রি ঘবনী, বেশাকন্ডা, গণিকাকে লইয়া বিহার করিলি,—আর আমি কি না রঙ্গরস করিলাম!”

এই সময়ে মণিয়া তাহার মৃত্যুবাণ নিক্ষেপ করিল। সে উভয় হস্তে ব্রাহ্মণের কণ্ঠ বেষ্টন করিয়া কহিল, “পিয়ার, মেরে মাগুক, মেরী জান! তুম্‌ নে কেঁউ গোসা হোতা ছায়?” হৃদয় আর দ্বিতীয় বাক্যব্যয় না করিয়া সটান গালিচার উপর শুইয়া পড়িলেন; এবং অশ্রুট স্বরে বলিতে লাগিলেন, “ওঁ গঙ্গা নারায়ণ ব্রহ্ম, বড়বধু রে, আর বুঝি দেখা হল না!” ব্রাহ্মণের অবস্থা দেখিয়া ভীতা হইয়া অসীম মণিয়াকে কহিলেন, “বান্ধিজি, উঁহাকে ছাড়িয়া দাও,—উঁহার যেরূপ অবস্থা হইয়াছে, আর

অধিকক্ষণ ধরিয়া রাখিলে, হয় ত নিজেই নিঃশ্বাস বন্ধ করিয়া
 আত্মহত্যা করিবেন।” মণিয়া তখন স্তদর্শনকে আলিঙ্গন-মুক্ত
 করিয়া, একপার্শ্বে সরিয়া দাঁড়াইল; এবং অসীমকে জিজ্ঞাসা
 করিল, “ইহার কি হইয়াছে, এমন করিতেছেন কেন?” অসীম
 বহুকণ্ঠে হাস্তের বেগ সম্বরণ করিয়া কহিলেন, “বান্ধিজি, কথাটা
 তুমি বুঝিবে না—বড় দাদা কখনও পরস্পর স্পর্শ করেন না।”
 মণিয়া হাসিয়া কহিল, “আমি ত কাহারও স্ত্রী নহি।” স্তদর্শন
 এতক্ষণ গালিচায় শয়ন করিয়া ছিলেন। তিনি মণিয়ার কথা
 বুঝিতে পারিলেন এবং তীরবেগে উঠিয়া বসিয়া, বলিয়া উঠিলেন,
 “তুই কাহারও স্ত্রী নহিস? বেশ! অর্থে বারবণিতা জানিস? তো
 র দ্বাদশটির অধিক স্বামী আছে।” মণিয়া বিস্মিতা হইয়া
 অসীমকে জিজ্ঞাসা করিল, “বাবু সাহেব কি বলিলেন?” অসীম
 হাসিতে-হাসিতে কহিলেন, “সে কথা আমি তোমাকে বুঝাইতে
 পারিব না বান্ধিজি!” এই সময়ে স্তদর্শন করজোড়ে মণিয়ার
 সম্মুখে দাঁড়াইয়া সাক্ষাৎকালে, কাতরকণ্ঠে বলিতে আরম্ভ করিলেন,
 “হে বান্ধিজি, তোমাকে যখন ধর্ম-মা বলিয়াছি, তখন তুমি বেশ
 হইলেও আমার পূজনীয়া; অতএব বড়বধূরও পূজনীয়া।
 তুমি তোমার ধর্ম-কন্টার মুখখানি স্মরণ করিয়া আমাকে ছাড়িয়া
 দাও। তাহার যে আমি ব্যতীত আর কেহ নাই। হে বান্ধিজি,
 তুমি মেনকা, রম্ভা, উর্বশীর গায় স্বচ্ছন্দে পুরুষানুক্রমে, অর্থাৎ
 দীর্ঘকাল এই হতভাগা অসীম রায়ের মস্তকটা গজভূক্ত কপিথবৎ
 ভোজন করিতে থাক,—আমার কোনও আপত্তি নাই। আমি

অতি দীন, তোমার দাসামুদাস,—তুমি যাহা বলিবে আমি তাহাই করিব।” অসীম এই কথা মণিয়াকে বুঝাইয়া দিলে মণিয়া কহিল, “ভাল কথা, ছাড়িয়া দিব; কিন্তু তিনটি সৰ্ত্ত আছে। প্রথম সৰ্ত্ত, আমার একটা গান শুনিতে হইবে। দ্বিতীয় সৰ্ত্ত, আমার হাতের একটা পান খাইতে হইবে; এবং তৃতীয় সৰ্ত্ত, আমাকে সঙ্গে করিয়া বড়বধূর নিকট লইয়া যাইতে হইবে।” সৰ্ত্ত শুনিয়া সুদর্শন গালিচার উপর আছড়াইয়া পড়িলেন। মণিয়া কিন্তু ছাড়িবার পাত্রী নহে। সে তাহার কুরঙ্গ-নয়ন-কোণ ঈষৎ কুঞ্চিত করিয়া, দুইটা কটাক্ষবাণ হানিয়া, সুদর্শনের অঙ্গে চলিয়া পড়িবার উপক্রম করিয়া কহিল, “সে কি হয়? মেঝে জান, আমার কলিজা, আমি কি তোমায় এমন সাদা কথায় ছাড়িয়া দিতে পারি? তুমি আমার মাণ্ডুক, আমি তোমার প্রেমে পাগলিনী,—আমার ছাতির উপরে তোমার জন্ত সিংহাসন পাতিয়া রাখিয়াছি। জানি, আমি কি তোমায় ছাড়িতে পারি? তোমাকে ছাড়িলে মণিয়ার জানে আর কি থাকিবে পিয়ার? ও-হোঃ, অমন কথা বলিও না দিলদার!” এই সময়ে নবকৃষ্ণ তাম্বুর বাহিরে দাঁড়াইয়া কহিল, “হুঃ, দরবার হইতে তলব আসিয়াছে,—কি বলিব?” অসীম ব্যস্ত হইয়া কহিলেন, “হরকরা ফিরাইও না, আমি আসিতেছি।”

ষড়বিংশ পরিচ্ছেদ

কলাবিড়া

অসীম যখন তাম্বু হইতে প্রস্থান করিলেন, তখন স্মদর্শন একবার তাঁহাকে আঁকড়াইয়া ধরিবার চেষ্টা করিলেন ; এবং চীৎকার করিয়া বলিয়া উঠিলেন, “ওরে ছোট রায়, আমার কি ব্যবস্থা করিয়া গেলি রে ?” অসীম এক লম্ফে তাম্বুর দুয়ার হইতে বাহির হইয়া তাঁহার হস্ত হইতে অব্যাহতি পাইলেন। ভূপেন্দ্র হাসিতে-হাসিতে কহিল, “বড়-দাদা, তুমি কি মেজদাদার অনাথা বিধবা যে, তিনি তোমার ব্যবস্থা করিয়া যাইবেন ?” মণিয়া এই সময়ে উঠিয়া তাম্বুর দুয়ারে গিয়া দাঁড়াইল এবং গম্ভীর হইয়া কহিল, “দেখ বাবু সাহেব, এখন হইতে আমি যাহা বলিব, যদি তাহা না কর, তাহা হইলে তোমার জাতি মারিব। আমি মুসলমানী,—তোমাকে আমার মুখের খানা খাওয়াইব,—অবশেষে নিকা করিব। তুমি এখন হইতে তোমার বড়বধু মুরশিদের আশা পরিত্যাগ কর।” স্মদর্শন কাঁপিতে-কাঁপিতে উঠিয়া দাঁড়াইয়া, করযোড়ে গলগলীকৃতবাস হইয়া কহিলেন, “বান্ধিজি, তুমি যাহা বলিবে বাবা, আমি তাহাই করিব, কেবল ঐ বড়বধুটির—ওর নাম কি,—কথা বলিও না।” ব্রাহ্মণ এই বলিয়া কাঁদিয়া ফেলিলেন। মণিয়া কৃত্রিম রোষে চক্ষু রক্তবর্ণ করিয়া কহিল, “বেয়াদব্, বদ্বখৎ, বেত্‌মিজ, সারেঙ্গীতে সুর চড়াও।” বস্ত্রাঞ্চলে চক্ষু মার্জনা করিতে-করিতে

সুদর্শন জিজ্ঞাসা করিলেন “তা—তা, চড়াইতেছি বাবা, কিন্তু
 ঐ প্রথম কথাগুলি কি বলিলে বাবা—সে কি—ওর নাম কি—
 বড়বধূর কথা?” “তেরী বড়বধূকে ন-কুছ্ করে! আরে
 কম্বথুং, হুকুম তামিল কর।” ব্রাহ্মণ দ্বিতীয় বাক্যব্যয় না
 করিয়া সারেকীতে সুর বাঁধিতে বসিলেন। ভূপেন্দ্র পাগলের মত
 গালিচার উপরে লুটাইতেছিল সে উঠিয়া বসিয়া বাঁয়া ও তবলা
 ধরিল।

মণিয়া সুর ধরিবামাত্র, সুদর্শন দুঃখ, শোক ও বড়বধূ সমস্ত
 বিস্মৃত হইয়া গেলেন। মণিয়া গান ধরিল,—গান ছাড়িয়া
 আলাপ আরম্ভ করিল,—আলাপ শেষ করিয়া আবার গান ধরিল।
 গান শেষ হইলে, ব্রাহ্মণ মন খুলিয়া মণিয়াকে আশীর্বাদ করিয়া
 কহিলেন, “আশীর্বাদ করি, তুমি চিরজীবিনী হও, পতি পুত্র লইয়া
 সুখে সংসার করিতে থাক; কিন্তু একবার তোমার তাল কাটিয়া
 গিয়াছিল।” মণিয়া অত্যন্ত উৎসুক হইয়া কহিল, “কোন্থানটা
 বাবু সাঁহেব?” এই সময়ে নবকুমার তাহার পদা তুলিয়া জিজ্ঞাসা
 করিল, “দা’-ঠাকুর, একবার তামাক ইচ্ছে করবেন না কি?”
 সুদর্শন অন্তমনস্ক হইয়া তাহাকে কহিলেন, “দাঁড়াও, গাহিয়া
 বাংলাইতেছি” এবং মণিয়াকে কহিলেন, “একটা নূতন কলিকা
 সাজিস্।” মণিয়া বুকিতে না পারিয়া জিজ্ঞাসা করিল, “কি
 বলিতেছেন?” ভূপেন্দ্র বাঁয়া তবলা ঠেলিয়া ফেলিয়া, আবার
 গালিচার উপর লুটাইয়া পড়িল। সুদর্শন আশ্চর্য্যান্বিত হইয়া
 তাহাকে জিজ্ঞাসা করিলেন, “আবার কি হইল রে?” ভূপেন্দ্র

কহিল, “তুমি যে বাদ্জীকে তামাক সাজিতে বলিয়া নবকৃষ্ণকে তাল বাতাইতেছ ?” স্বদর্শন তাহা শুনিয়া ব্যস্ত হইয়া বলিয়া উঠিলেন, “তাই না কি ? ও বাদ্জি, তুমি রাগ করিও না বাপধন ! আমার আর মাথার ঠিক নাই।” স্বদর্শন এই বলিয়া সারেকী ধরিলেন। তাঁহার তীব্র সতেজ কণ্ঠের মধুর ধ্বনি শুনিয়া মণিয়া মোহিতা হইল। গান শেষ হইলে, সে উঠিয়া দাঁড়াইয়া তিন বার কুর্গিশ করিল ; এবং কহিল, “বাবু সাহেব, আমার গোস্তাকী মাফ করিবেন। আপনি যে গুণী লোক, তাহা আমি বুঝিতে পারি নাই ;—আর আপনি যেমন-তেমন গুণী নহেন। আপনার গলার আওয়াজ অতি সুন্দর, এবং গাহিবার কায়দা নূতন ধরণের। অনেক দিন এমন গান শুনি নাই।”

প্রশংসায় দেবতাও তুষ্ট হন ; স্বদর্শন মানুষ—তিনি যে তুষ্ট হইবেন, তার আর বিচিত্র কি। ধর্ম্মনাশ, জাতিনাশ, কুলনাশ সমস্ত কথা বিস্মৃত হইয়া ব্রাহ্মণ গালিচার উপর বসিয়া গেলেন ; এবং নবকৃষ্ণ-নির্ম্মিত অপরূপ কদলীপত্রের ছাঁকায় তামাকু-সেবন করিতে-করিতে, মণিয়ার সহিত সঙ্গীতচর্চা আরম্ভ করিয়া দিলেন। দিবসের তৃতীয় প্রহর অবসান হয় দেখিয়া ভূপেন্দ্র বলিয়া উঠিল, “বড় দাদা, আজ কি তোমার ক্ষুধা-তৃষ্ণা মনে নাই ? আমার যে ক্ষুধায় পেট জলিয়া গেল।” স্বদর্শন যেন আকাশ হইতে পড়িলেন। তিনি বলিলেন, “তাই ত রে, সে কথা ত একে-বারেই মনে নাই ! ছোট রায় কখন আসিবে ? সে থাইবে না ?” “তাঁহার কথা ছাড়িয়া দাও,—শাহাজাদার মুখ দেখিলে তাঁহার

আর ক্ষুধা-তৃষ্ণা থাকে না।” নবকৃষ্ণ পশ্চাতে দাঁড়াইয়া, গওদ্বয়
 ক্ষীত করিয়া, একটা নূতন কলিকায় ফুঁ দিতেছিল;—সে এই
 সময়ে বলিয়া উঠিল, “দা’-ঠাকুর, আপনাকে সারেকী ধরিতে
 দেখিয়া, আমি আপনার সেবার ব্যবস্থা করিয়া রাখিয়াছি।—
 একটা পাকা কাঁঠাল, দুইকুড়ি আম, সের-পাঁচেক পেড়া ও
 বরফী।” সুদর্শন অত্যন্ত প্রীত হইয়া নবকৃষ্ণকে আশীর্বাদ
 করিতে-করিতে কহিলেন, “বাঁচিয়া থাক নবকৃষ্ণ, তোমার মঙ্গল
 হউক; কিন্তু বাপু, এত কি আমি একা খাইয়া উঠিতে পারিব?”
 ভক্তি-গদগদকণ্ঠে নবকৃষ্ণ কহিল, “তা, দা’-ঠাকুর, আর দুইদণ্ড
 সারেকী পিড়িং-পিড়িং করিলে একটা খাজা কাঁঠাল আর দুইকুড়ি
 আমের সহিত আপনি স্বচ্ছন্দে নবকৃষ্ণ দাসকে পর্য্যাপ্ত সেবা করিতে
 পারেন।” কৃত্রিম রোষের সহিত সুদর্শন কহিলেন, “বেটা,
 মস্করা?” নবকৃষ্ণ অমননি করযোড়ে কহিল, “ঠাকুর, আপনি
 সাক্ষাৎ দেবতা,—চেহারায় ঠিক যেন কীরীটেখরের মা কালী!”
 তাহার কথা শুনিয়া ভূপেন্দ্র হাসিয়া উঠিল এবং কহিল, “বড়দাদা,
 তুমি নবার সহিত কথায় পারিবে না,—ও দক্ষিণ দেশের লোক,
 —দশটা মিষ্ট কথার সহিত তোমাকে বিলক্ষণ কড়া ঢুক
 শুনাইয়া দিবে। এই দেখ, ইহারই মধ্যে তোমাকে শুনাইয়া দিল
 যে, তুমি একটি ক্ষুদ্র রাক্ষস এবং তোমার রংটি ভূষা কালির
 মত।” সুদর্শন কিন্তু জুঁক না হইয়া নবকৃষ্ণকে জিজ্ঞাসা
 করিলেন, “নবা, আমরা ত খাইব; কিন্তু বাঈজীর কি হইবে?”
 নবকৃষ্ণ একটা সুদীর্ঘ প্রণাম করিয়া কহিল, “আজ্ঞা দেবতা,

নবকৃষ্ণ দাস উপস্থিত থাকিতে হজুর সরকারের বদনাম হইবার উপায় নাই। যে পরিমাণ পোলাও, কালিয়া, কোপ্তা, কোন্দা মজুৎ রাখিয়াছি, তাহা খাইয়া বিবিসাহেবার বোধ হয় আর কিছু খাইবার রুচি থাকিবে না।” এই সময়ে ভূপেন্দ্র জিজ্ঞাসা করিল “বিবি সাহেবা আর কি খাইবে?” নবকৃষ্ণ দ্বিতীয়বার প্রণাম করিয়া কহিল, “আজ্ঞে হজুর বিবিসাহেবারা সচরাচর যাহা পছন্দ করিয়া থাকেন,—বড়লোকের কাঁচা মাথা!” সুদর্শন শ্রীত হইয়া কহিলেন, “বাহবা নবকৃষ্ণ, তোর দিব্য রসজ্ঞান আছে দেখিতেছি।” নবকৃষ্ণ হাসিয়া কহিল, “সমস্তই দেবতার আশীর্বাদ।”

এই সময়ে অসীম ফিরিয়া আসিলেন; এবং সুদর্শনকে আহ্বান করাইয়া স্বয়ং ভোজন করিলেন। মণিয়া স্বতন্ত্র তাষুতে আহার করিতে গেল। সেই সময়ে অসীম সুদর্শনকে জিজ্ঞাসা করিলেন, “দাদা, তুমি বাদ্জীকে কিছুদিন আশ্রয় দিতে পারিবে?” সুদর্শন সানন্দে কহিলেন, “কেন পারিব না! কর্ত্তা আপত্তি না করিলেই হইল।” “তবে এতক্ষণ ধর্ম্ম গেল, জাতি গেল, বলিয়া চীৎকার করিতেছিলে কেন?” “কি জান ভাই, একে বাদ্জী, রূপসী যুবতী, তাহার উপর যবনী স্ততরাং ব্রাহ্মণ-পণ্ডিত মানুষ, চীৎকার না করিয়া করি কি? প্রথম ভয় ধর্ম্মের, দ্বিতীয় ভয় বড়বধূর। এখন সে সমস্ত গোল কাটিয়া গিয়াছে, বাদ্জীর প্রকৃত পরিচয় পাইয়াছি। সে অতি সাধু, সমঝদার লোক। গুণী লোকের জাতি-বিচার থাকে না। কলাবতের

মধ্যে হিন্দু-মুসলমান ভেদ নাই। গুণের বলে যবন হরিদাস পরম বৈষ্ণব হইয়াছিলেন।” “বড় দাদা, তুমি একটা যাহুকর। এই মাত্র ছুইহাতে টিকি সামলাইয়া, ধর্ম্মনষ্ট হইল বলিয়া কাদিতে-ছিলে; আবার ইহারই মধ্যে ছাতিটি এত দৃঢ় করিয়া ফেলিলে কেমন করিয়া?” “সকল কলাবতের মধ্যেই একটা ভ্রাতৃত্ব আছে। সে কথাটা বাহিরের লোকে বুঝিতে পারে না। যতক্ষণ তাহার গুণের পরিচয় পাই নাই, ততক্ষণ তাহাকে চরিত্রহীনা, যবন-কণ্ঠা বলিয়া বোধ হইতেছিল। দেখ ভাই, তোমরা সকলেই জান, সুদর্শন ভট্টাচার্য্য কখনও বড়বধু ভিন্ন অপর কোন স্ত্রীলোককে স্পর্শ করে নাই; সুতরাং প্রায় পাগল হইয়া উঠিয়াছিলাম আর কি! কিন্তু এখন আর মনে কোন দ্বিধা নাই। ভূমিও যে, ভূপেনও যে, মণিয়াও সে।”

অপরাত্নে অসীম, ভূপেন ও সুদর্শন মণিয়ার সহিত হরিনারায়ণ বিদ্যালয়কারের আবাসে যাত্রা করিলেন।

সপ্তবিংশ পরিচ্ছেদ।

সরস্বতী বৈষ্ণবী

যৌবন অতীত হইলে সরস্বতী বৈষ্ণবী ভিক্ষাবৃত্তি অবলম্বন করিয়াছিল। সে জাতি-বৈষ্ণবের কণ্ঠা; সুতরাং ভিক্ষা করিতে কখন তাহার লজ্জা বোধ হয় নাই। নূতন বৃত্তিতে তাহার

স্বকণ্ঠ তাহাকে সর্বদাই সাহায্য করিত। তাহার কারণ, যৌবন ও যৌবনের সহিত বৈষ্ণবের প্রেম তাহাকে পরিত্যাগ করিলেও তাহার স্বকণ্ঠ তাহাকে পরিত্যাগ করে নাই। সে প্রভাতে উঠিয়া খঞ্জনী ও ভিক্ষার ঝুলি লইয়া বাহির হইত; এবং যেখানে যেমন প্রয়োজন, যে গ্রামের লোকের যেমন অভিক্রচি, তেমন গান গাহিয়া তাহাদের তৃপ্ত করিত; স্ততরাং বঙ্গভূমির সেই সুখ-স্বচ্ছন্দ-প্রাচুর্য্যের যুগে বিগত-যৌবনা সরস্বতী বৈষ্ণবীর কোনও দিন অন্তের অভাব হয় নাই। কখনও-কখনও শেষ বসন্তের কোকিলের মত, কোনও বিগত-যৌবন প্রেমিক বৈষ্ণব, সরস্বতীর সংসারের স্বাচ্ছন্দ্য দেখিয়া, প্রেমের ফাঁদ পাতিবার চেষ্টা করিলে, সরস্বতী অবজ্ঞাপূর্ণ দৃষ্টিতে তাহাকে জানাইয়া দিত যে, পুরুষ-জাতি যৌবনে তাহাকে যে শিক্ষা দিয়াছে, স্নিগ্ধ প্রোঢ়ে সে তাহা বিস্মৃত হয় নাই!

শ্রাবন মাস, সমস্ত দিন বৃষ্টি পড়িতেছে। গ্রাম্যপথ জগ্ৰশূন্য। সরস্বতী সেদিন আর ভিক্ষায় বাহির হইতে পারে নাই। সমস্ত দিন তাহার নির্জ্জন গৃহে একাকিনী বসিয়া তাহার কণ্ঠের মনও বিরক্ত হইয়া উঠিয়াছিল। সে আপন মনে খঞ্জনী লইয়া, ঘরের দাওয়ায় বসিয়া, গুণ্ গুণ্ করিয়া গান গাহিতেছিল—

সহসা কৰ্দ্ধময় গ্রাম্য-পথে মহুয়া-পদশব্দ শ্রুত হইল। সরস্বতী গীত বন্ধ করিয়া খঞ্জনী নামাইয়া রাখিল। গ্রামের এক প্রান্তে তাহার ক্ষুদ্র কুটার অবস্থিত; এবং নিতান্ত আবশ্যক না হইলে কেহ সে পথে চলিত না; স্ততরাং পদশব্দ শুনিয়াই সরস্বতী

বুঝিতে পারিল যে, কাহারও অত্যন্ত প্রয়োজন হইয়াছে। তাহা না হইলে এই দুর্ব্যোগে সে তাহার গৃহে আসিবে কেন? ক্রমে তাহার কুটারের বেড়ার উপর দিয়া একজন মানুষের মাথা ও একটা মাথাল দেখা গেল। সে ব্যক্তি বেড়ার দরজায় আসিবার পূর্বেই জিজ্ঞাসা করিল, “বলি, সরস্বতী দিদি বাড়ী আছ গা?” তাহার কণ্ঠস্বর শুনিয়া সরস্বতী রুগ্ণ হইল। তুষ্ঠ ২২ইবার কোন কারণ ছিল না; কারণ, আগন্তুক আজীবন তাহার শত্রুতা করিয়া আসিতেছিল। সরস্বতী কিন্তু মনের ভাব প্রকাশ করিল না। ভিক্ষাবৃত্তি অবলম্বন করিয়া সে অনেক নূতন জিনিষ শিখিয়াছিল;—ইচ্ছা করিয়া নহে—বাধ্য হইয়া। মনোবৃত্তি-সংঘম তাহার অন্ততম। সে মনের প্রকৃত ভাব গোপন করিয়া, শুষ্ক অধরোষ্ঠে শুষ্কতর হাসি আনিয়া কহিল, “কে, নবীন দাদা! এই দুর্ব্যোগে কি মনে করিয়া?” নবীন ছয়ারের ঝাঁপটা সরাইয়া আঙ্গিনায় প্রবেশ করিল; এবং সরস্বতীকে দেখিয়া একটা দীর্ঘনিঃশ্বাস ফেলিয়া কহিল, “আ! বাঁচিলাম! সরস্বতী দিদি, তুমি তবে ঘরেই আছ? আমি ভাবিয়াছিলাম, তুমি বুঝি ভিক্ষায় বাহির হইয়াছ। ইচ্ছা করিয়া কেন এত কষ্ট পাও দিদি,—একটা মালাচন্দন করিলেই পার! তোমার কি বৈষ্ণবের অভাব হয়! তোমার বয়সটা কি! তার উপর তুমি গুণী লোক।” সরস্বতী শুষ্ক হাসি পরিত্যাগ করিয়া সত্যসত্যই দীর্ঘ হাসিল; কারণ, সে বুঝিল, তাহার চিরশত্রু নবীন বিশেষ বিপন্ন হইয়া তাহার শরণ লইতে আসিয়াছে। সে কহিল, “বয়স আমার পঁয়তাল্লিশ, গুণে

কি যৌবন ঝাঁড়িয়া রাখিতে পারে দাদা ? তোমরা পুরুষ মানুষ, ভোমরার জাতি। যতক্ষণ মধু থাকে, ততক্ষণ তোমরা থাক। আমার যৌবনের মধু ফুরাইয়াছে ; সুতরাং এখন আর তোমরা আসিবে কেন ?” পরামাণিক-কুলশেখর নবীন বুঝিল যে, তাহার হস্তনিষ্কিপ্ত বাণটা যথাস্থানে পৌঁছে নাই। সে তাহার তৃণ হইতে শব্দভেদী বাহির করিল এবং কহিল, “দিদি ! সকল ভোমরা যদি প্রকৃত মধু চিনিত, তাহা হইলে কি সাধের ছুনিয়া-খানা এমন করিয়া ছারেখারে যাইত ? রূপ ক’ দিনের ? ফুলের পাঁপড়ির মত ভোমরার পদভরে ভাঙ্গিয়া পড়ে। গুণই প্রকৃত মধু,—যাহার মিষ্টতা চিরস্থায়ী এবং যাহা বাহির করিতে পরিশ্রম করিতে হয় ! কিন্তু প্রকৃত গুণের আদর দেশের কয়জন বুঝে দিদি !” ভ্রমর-চরিত্রাভিজ্ঞা সরস্বতী বুঝিল যে, নবীন-নরসুন্দর দীর্ঘকাল পরে আজি প্রীতিস্থাপন করিতে আসিয়াছে। সে তৎক্ষণাৎ রণকুশল ঘোঙ্কার ত্রায় কথাটা ফিরাইয়া লইয়া জিজ্ঞাসা করিল “দাদা, তামাকু সাজিব ?” নবীন হাসিয়া জিজ্ঞাসা করিল, “বলি, পীতাম্বর হুঁকাটা রাখিয়া গিয়াছে না কি ?” উঠানে বেগে নিষ্ঠীবন পরিত্যাগ করিয়া, বিকৃত কণ্ঠে সরস্বতী কহিল, “তার মুখে আগুন, পোড়ারমুখে আবার হুঁকাটা রাখিয়া যাইবে ? সে যেদিন তাহার চির-যৌবনী নূতন প্রাণেশ্বরীর কাছে গিয়াছে সেইদিনই তাহার হুঁকা, কলিকা, তোড়যোড়, মেরু সবই লইয়া গিয়াছে। তোমরা পাঁচজনে ভালবাস, মধ্যে মধ্যে আস, সেইজন্ত একটা কলিকা আর ছিলিম দুই তামাকু

সংগ্রহ করিয়া রাখিয়াছি।” নবীন পীতাম্বরের উচ্ছিষ্ট হাঁকি পাইবার আশায় বঞ্চিত হইয়া ক্ষহিল, “তা মাজ, মাজ, মাজ!” সরস্বতী একটা ভান্সা পিতলের ঘটতে জল পাড়াইয়া দিল। নবীন মাথালটা দাওয়ার ছাঁচে ঝুলাইয়া রাখিয়া পা ধুইয়া উঠিল। সরস্বতী একখানা চাটাই বিছাইয়া দিয়া, শোলা ও চকমকী লইয়া, কাঠের কয়লায় আগুন ধরাইতে বসিল। সময় বুঝিয়া নরসুন্দর-কুলতিলক আসল কথাটা পাড়িল।

“দিদি, এত জায়গায় ত যাও, একটু লম্বা পাড়ী। পানি পার?” “ব্যাপারটা কি?” “যদি রাজী হও ত খুলিয়া বলি।” “কারণ নগদ ত?” “নগদ বৈ কি! বিলক্ষণ নগদ! আর কাজটি রসাল,—ঠিক যেন খাজা কাঁঠাল?” “রূপক রাখ, নগদ কত বল দেখি?” “মাসখানেক মাস দুই লাগিবে,—তুমি গায়া কথা যাহা বলিবে, আমি আর তাহার উপর কথা কহিব না।” “দেখ নবীন দাদা, তুমিও আমায় চেন, আমিও তোমায় চিনি। কারবারে নগদ চুক্তির কথা খোলসা থাকাই ভাল। দুই মাস লাগিবে,—তবে দূরদেশের কথা। কিন্তু দেখিও ভাই, কান ও বোঝি—” “আরে রামচন্দ্র! বল কি সরস্বতী? নদ? হরেকৃষ্ণ, গোবিন্দ মাধব!” “গোপীনাথ, হৃষীকেশ, শ্যামসুন্দর, আর সবশেষে সেই রাইকিশোরী! বিটুকেলমো ছাড়, আদং কথাটা কি খুলিয়া বল।” সরস্বতীর হস্ত হইতে কলিকাটি লইয়া, দুই একটা টান দিয়া, নবীন কহিল, “কাজ তেমন শক্ত নয়—বিশেষতঃ তোমার মত জাঁহাদার মেয়েমানুষের কাছে।

আর ঐ যে কথাটা বলিলে, সে যৌবনে বাহা হইয়া গিয়াছে, তাহার আর চার নাই। এখন কেবল—” “যা করেন ঘোষেদের রাইকিশোরী।” “কি বল যে সরস্বতী দিদি! নবীনের কি আর সে কাল আছে? যাক্ সে কথা। রায়-গৃহিণীর কাছ হইতে আসিতেছি। বিছালন্ধারের মেয়ে দুর্গাঠাকুরাণীর খিট্কেলটা শুনিয়াছ ত? শুনিলাম, ছোট রায় না কি দুর্গাকে লইয়া পথ হইতে বুলিয়া পড়িয়াছে।” “দুর্গা তেমন মেয়ে নয়। আমার দুই কুড়ি বৎসর বয়স হইল,—এখন মেয়েমানুষের মুখ দেখিলেই বলিতে পারি সে কেমন।” “বড় ঘরের কথা,—আমরা ‘আদার ব্যাপারী,’—কাজ কি আমাদের ‘জাহাজের খবরে’ দিদি? রায়-গৃহিণী চান যে, ছোট রায় আর দুর্গা কোথায় কি ভাবে আছে, সেই খবরটা। এখন খরচ-খরচা বাদ কি চাই তা বল?” “তোমার বথরাটা কি শুনি?” “আমার বথরা—সে—তা—দিদি—নবীন তোমার খাইয়াই মানুষ—তুমি হাতে করিয়া বাহা লিবে, আমি মাথায় তুলিয়া লইব;—আর তোমার সঙ্গে যদি প্রবন্ধনা—নবীনের চৌদ্দপুরুষ যেন—হরেকৃষ্ণ, রাধেমাধব, গোবিন্দ, গোপীনাথ।” “বলি, কৃষ্ণের রাধা * ত?” “তা তুমি যখন বলিলে, আমি আর কি বলিব? আমার চন্দ্রাবলী † হইলেও চলিত; তবে তুমি যখন নিজমুখে বলিয়াছ—জয় রাধে কৃষ্ণ, শ্রীরাধেকৃষ্ণ।” কলিকাটা নামাইয়া রাখিয়া নবীনচন্দ্র

* আধাআধি।

† সিকি।

কহিল, “বায়নার বাবদ কিছু লইয়া আসিয়াছিলাম।” “দিয়া যাও।” নবীন কাছার খুঁট খুলিয়া চল্লিশটি টাকা বার করিল এবং সরস্বতীর হস্তে দিয়া জিজ্ঞাসা করিল, “এই বাবদ কি লাগিবে?” “অন্ততঃ পাঁচকুড়ি। হয় ত কাশী অবধি ঘাইতে হইবে।” “টাকাটা কাল সকালেই আনিয়া দিব। কখন যাইবে?” “কাল তৃতীয় প্রহরে।” নিজ বথরা বুঝিয়া লইয়া নবীন গৃহাভিমুখে যাত্রা করিল।

অষ্টাবিংশ পরিচ্ছেদ

প্রেম-প্রকাশে

সেই উদ্যানতলে সহস্র-সহস্র মুক্তাবিন্দু শ্রাগল দুর্বাদল-শীঘ্র আচ্ছাদিত করিয়া রাখিয়াছিল; স্বচ্ছ শিশিরের স্বল্প আবরণ তরুণির মণ্ডন করিয়াছিল। সন্ধ্যা-প্রবুদ্ধ বিহগকুল কুলায় পরিত্যাগ করিয়া দিগন্ত শব্দায়মান করিতেছিল। স্ববির অশ্বখমূলে খানা মুহূ হরিদ্বর্ণ ইরানী গালিচা দুর্বাশ্রাম ভূপৃষ্ঠে যেন অঁরা হইয়া পড়িয়া ছিল। তখন অরুণ-বরণ তরুণ তপন-কিরণে স্নিগ্ধ, শান্ত, উষার ঈষদালোকে প্রক্ষুটনোন্মুখ গোলাপের স্নায় স্তম্ভরী একটা রমণী নিঃশব্দ পাদক্ষেপে সেই শিশিরবিন্দু-শোভিত জীর্ণ অশ্বখতলে ঈষদকিরিৎ ইরানী গালিচার প্রান্তে আসিয়া উপস্থিত হইল।

রমণী যুবতী। যে যৌবনের প্রারম্ভে কুক্করীও পরমা সুন্দরী হয়, রূপসী সেই মনোবিমোহন প্রথম যৌবনের সীমায় পদার্পণ করিয়াছে মাত্র। গমনকালে তাহার সমস্ত সুগঠিত অঙ্গপ্রত্যঙ্গ দিয়া একটা অবর্ণনীয় তড়িৎ তরঙ্গ দেখা যাইতেছিল,—তাহা কেবল গতিশীলা, সজ্জাতা, অনির্করচনীয় সুন্দরীতেই দেখিতে পাওয়া যায়। হরিদ্বর্ণ ইরানী গালিচার প্রান্তে উপস্থিত হইয়া যুবতী সহসা তাহার এককোণে লুটাইয়া পড়িল, সেই কোণটা বারম্বার চুঘন করিতে লাগিল, তাহা মস্তকে রাখিল, হৃদয়ের উপরে স্থাপন করিল এবং অবশেষে পুনর্বার চুঘন করিতে আরম্ভ করিল।

কিয়ৎক্ষণ পরে প্রকৃতিস্থ হইয়া যুবতী সেই জীর্ণ অশ্বখের একটা উচ্চ মূলে উপবেশন করিল, এবং অক্ষুট স্বরে গীত গাহিতে আরম্ভ করিল। অক্ষুট স্বর ক্রমে স্পষ্ট হইয়া উঠিল।—

“ও মেরে পিয়ারে।

কভি না মিটি মেরি নয়নাকো পিয়াস,

ময় না ছোড়ে তেরি দরশনকে আশ।

বিত গয়ে কিতি দিবস রজনী,

বিত গয়ে মাহ্‌সাল।

বিত গয়ে মেরে রূপ যৌবন

বিত গয়ে খুস হাল।

গুজরে মালিক গুজরে মুন্সুক,

গুজরে দৌলৎ মাল।

গুজর গয়ে মেরে সুখ ও দুখ,

গুজর গয়ে মেরে কাল ।

সব সুখ গয়ে মেরে ও পিয়ারে—

মেরে দিল তবহঁ নহি হোয়ে নিরাশ ।”

গীত শেষ হইল । রমণী উহা পুনর্বার গাহিল । সেই সময়ে তাহার পশ্চাৎ হইতে এক শুভ্র-বসন-পরিহিত অনিন্দ্য-গৌরকান্তি যুবা তাহার নিকটে আসিলেন । রমণী কিন্তু সঙ্গীতে ও নিজ মনোভাবে তন্ময় হইয়া তাঁহার পদশব্দ শুনিতে পাইল না । যুবা যখন গালিচার নিকটে আসিয়া দাঁড়াইলেন, তখন রমণী চমকিত হইয়া মুখ তুলিয়া চাহিল,—তাহার মুখ লজ্জায় অরুণ হইয়া গেল । সে বলিয়া উঠিল, “আপনি—তুমি?” সম্বোধন শুনিয়া যুবা শিহরিয়া উঠিলেন । রমণী পুনরায় কহিল, “তুমি? পিয়ার, দিল,—তুমি?” যুবা দুই হস্ত পিছু ছটিয়া গেলেন এবং কহিলেন, “মণিয়া বাঈ, কি বলিতেছ?” “বলিতেছি কি জান, জানি? বলিতেছি যে, আমার এই ছাতির অন্তরে তোমার জন্ম তথ্ত-তাউশ পাতিয়া রাখিয়াছি । আমার কলিজা, আমার দিন ছনিয়া, আমার দিল, আমার বাদশাহ্—।” “মণিয়া—মণিয়া-বাঈ—কি বলিতেছ মণিয়াবাঈ? তুমি কি পাগল হইয়াছ? আমি যে তোমাকে একটা কাজের কথা বলিতে আসিয়াছি!” “কাজের কথা? আমার সঙ্গে তোমার আর কি কাজ থাকিতে পারে দিলের? দেখ, মহয়ার গন্ধে মৌমাছিওলা পাগল হইয়া

জুটিয়াছে,—বকুলতল ফোটা কুল গন্ধে আকুল করিয়া রাখিয়াছে। সমস্ত রাত্রি ফুল কুড়াইয়া তোমার জগ্ন শয্যা রচনা করিয়া রাখিয়া আসিয়াছি। দিলের, একবার বসিবে চল।” “ছি মণিয়া, ও কি বলিতেছ! এখনই কে আসিয়া পড়িবে,—হয় ত কে দেখিয়া ফেলিবে,—কি মনে করিবে?” “মনে করিবে? আমি তাহার সম্মুখে তোমাকে বক্ষে তুলিয়া লইব।” “রাম, ষাম,—মণিয়াবান্ধি, তুমি কি পাগল হইয়াছ?” “সে কথা কি এতদিনে বুঝিলে জানি? যেদিন আক্‌রাশিয়ব খাঁর তাম্বুর দুয়ারে তোমার অতুল রূপরাশির ডালি আমার নয়নপথে ধরিয়াছিলে, মণিয়া যে সেই মুহূর্ত্ত হইতেই তোমার জগ্ন পাগলিনী হইয়াছে, তাহা কি বুঝিতে পার নাই? এতদিন কি তোমার চোখের সম্মুখে পর্দা পড়িয়া ছিল? জানি, পাটনা সহরের প্রসিদ্ধা মণিয়া-বান্ধি কেমন করিয়া এক মুহূর্ত্তে পিতা, মাতা, নাম, যশঃ, প্রথম যৌবনের রোজগার ছাড়িয়া আসিয়া, তোমার দুয়ারে কুক্কুরের মত পড়িয়া আছে, তাহা কি বুঝিতে পার নাই? আউরং এক-মাত্র কারণে সমস্ত পরিত্যাগ করিতে পারে; এবং মণিয়া সেই-জগ্নই সমস্ত ছাড়িয়াছে।” কিয়ৎক্ষণ স্তব্ধ হইয়া থাকিয়া, অসীম দৃঢ়কণ্ঠে কহিলেন, “মণিয়া, সে কথা সত্যই আমি বুঝিতে পারি নাই। আমি ভাবিয়াছিলাম যে, তুমি আক্‌রাশিয়ব খাঁর ভয়ে আমার গৃহে আশ্রয় লইয়াছ। তুমি জান যে আমি হিন্দু, তুমি জান যে ইহা নিষ্ঠাবান হিন্দু-ব্রাহ্মণের গৃহ, তুমি জান যে অনাথা আশ্রয়হীন পরিচয়ে এ গৃহে স্থান পাইয়াছ, তুমি জান যে তুমি

ববনী, আমার অস্পৃশ্য ! মণিয়া, কাদিও না, কাদিয়া কোণে ফল নাই। এ কথা যদি পূর্বে বলিতে, তাহা হইলে এতদিন তোমাকে তোমার পিতৃগৃহে রাখিয়া আসিতাম।” মণিয়া কাদিতেছিল, অসীমের উক্তির শেষাংশ শুনিয়া সে সহসা স্থির হইয়া গেল ; এবং বস্ত্রাঞ্চলে চক্ষু মার্জনা করিয়া কহিল, “মেরিজান, তুমি যদি আজি মণিয়াকে খণ্ডবিখণ্ড করিয়া কাটিয়া কুকুরের মুখে নিক্ষেপ কর, তথাপি তাহার মুখে রক্ত কথা শুনিবে না। তোমরা—পুরুষেরা এই বুদ্ধি লইয়া রাজ্য শাসন কর ; অথচ বুদ্ধিতে পার না যে, একটা মানুষ, যে ধূলি তোমার পাদস্পর্শে পবিত্র হইয়াছে, তাহা অঙ্গে মাখিবার জন্ত ব্যাকুল হইয়া বেড়াইতেছে ? দিলের, জানি তুমি হিন্দু, জানি তুমি উচ্চবংশ জাত, জানি তুমি বেস্তা-কন্ডার পক্ষে দুর্লভ দেবতা—তথাপি জানি, আমি রমণী। মুহূর্ত্তের জন্ত তোমার চরণপ্রান্তে আমার হীনতা, দৈন্য, ক্ষুদ্র রূপ-যৌবন সমর্পণ করিয়াও আমি সুখী। সে যে কত সুখ, তাহা যে তোমরা বুদ্ধিতে পার না দিলের ! তুমি তোমার রূপ, যৌবন, ধন, মান, ধর্ম, বংশগৌরব অক্ষুণ্ণ রাখিয়া ফিরিয়া যাও ; ববনী বেস্তা-কন্ডাকে স্পর্শ করিয়া তাহা কলঙ্কিত করিও না। যদি কখনও সময় পাই—সুখ-সম্ভার, বৈভব, অতুল ঐশ্বর্যের মধ্যে যদি কখনও সময় পাই, তাহা হইলে বর্ষবর্ষান্তে একবার স্মরণ করিও, আমার আত্মা তাহাতেই তৃপ্ত হইবে।”

মণিয়া অশ্রুধূল পরিভ্যাগ করিল,—অসীম চিত্রার্পিতের দ্বাৰা

তাহার অগ্রসরণ করিলেন। রুদ্ধকণ্ঠে মণিয়া কহিল, “আপনি কোথায় আসিতেছেন, ফিরিয়া যান।” অসীমও রুদ্ধকণ্ঠে জিজ্ঞাসা করিলেন, “তুমি কোথায় যাইতেছ মণিয়া?” সহসা ফিরিয়া দাঁড়াইয়া মণিয়া কহিল, “বাবুসাহেব, আপনি নিশ্চিন্ত মনে চলিয়া যান,—আমার মুহূর্তের জন্য চিত্তবিভ্রম হইয়াছিল, এখন তাহা কাটিয়া গিয়াছে। আমি মণিয়া, পাটনা সহরের কসবী, মুজরা করিয়া খাই,—এখন আমার কসবী মায়ের ঘরে আবার কসব করিতে ফিরিয়া যাইতেছি। ভয় করিও না বাবুসাহেব, আমি মরিব না। আমার জাতির কি মরণ আছে?” সহসা অসীম অগ্রসর হইয়া মণিয়ার হস্ত ধারণ করিলেন এবং কহিলেন, “মণিয়া, জীবন তুচ্ছ বিবেচনা করিয়া যখন তোমাকে রক্ষা করিবার জন্য পাঠানের সম্মুখে দাঁড়াইয়াছিলাম—তখন স্বপ্নেও ভাবি নাই যে, তোমাকে এমন করিয়া বিদায় দিব! মণিয়াবান্ধে, তোমার পিতা-মাতা পাটনা সহরের এক প্রান্ত হইতে অপর প্রান্ত পর্যন্ত বলিয়া বেড়াইতেছে যে, অসীম রায় তাহাদের বালিকা কন্যাকে ভুলাইয়া আনিয়াছে। সেইজন্য তোমাকে বলিতে আসিয়াছিলাম যে, তুমি তোমার পিতৃগৃহে ফিরিয়া যাও। আর—আর—আর কি জান মণিয়া—এখনও পর্যন্ত কেহ আমাকে প্রেম-সম্ভাষণ করে নাই—তোমার—তোমার নিকট এ—এ সম্ভাষণ প্রত্যাশা করি নাই।” মণিয়া তাহার হস্তমুক্ত করিবার কোন চেষ্টা না করিয়া, অসীমের পদপ্রান্তে লুটাইয়া পড়িল,—তাহার অশ্রুধারা তাহার পদপ্রান্ত অভিষিক্ত

করিল। রুদ্ধকণ্ঠে উচ্চারিত হইল, “স্পর্শ করিলে কেন? আমার
বেশ্যা জননী জীবনে যে পথ আমার জন্ত নির্দেশ করিয়াছিল,
সেই পথ অবলম্বন করিতে যাইতেছিলাম দিলের। তুমি আমাকে
স্পর্শ করিলে কেন? তোমার পবিত্র স্পর্শে হীনা, যবনী,
বেশ্যাকন্যা যে পবিত্র হইয়া উঠিল! কেন তুমি আমার উদ্দেশ্য
বিফল করিলে? যে দেহ তোমার পবিত্র করস্পর্শে পূত
হইয়াছে দিলের, তাহা আর কামূকের পাপ করস্পর্শে কলুষিত
হইবে না—তাহা উৎসর্গীকৃত গুল্ল-পুষ্পের ত্রায় চির-নির্ম্মল
থাকিবে।” অসীম মণিয়ার হস্ত ত্যাগ করিলেন। মণিয়া চক্ষু
মুছিয়া দ্বিজ্ঞাসা করিল, “দিলের, তুমি যাহা বলিবে, আমি
তাহাই করিব। বল, আমি কোথায় যাইব?” অসীম অশ্রু-
কণ্ঠে কহিলেন, “মণিয়া, তুমি পিতৃগৃহে ফিরিয়া যাও।”

এই সময়ে সেই প্রভাত-স্বর্ষাকিরণ-প্রাবিত সুন্দর উদ্যান
মুখরিত করিয়া বামাকণ্ঠ-নিঃসৃত সঙ্গীত-ধ্বনি উথিত হইল—

“ভাল যদি বাস নিরবধি
তবে কেন ও কালবরণ,
কুঞ্জান্তরে সারানিশি ফিরে
উষাকালে এলে গুণনিধি?”

গৈরিক-বসন-পরিহিতা এক বঙ্গদেশীয়া বৈষ্ণবী খঞ্জনী
বাজাইতে বাজাইতে উদ্যান মধ্যে প্রবেশ করিল।

উনবিংশ পরিচ্ছেদ

বিরাগ

বৈষ্ণবী আসিয়া সেই অশ্বখমূলে দাঁড়াইল। অসীম তাহার মুখের দিকে চাহিয়া জিজ্ঞাসা করিলেন, “তোমার বাড়ী কোথায় গা?” বৈষ্ণবী হাসিয়া গড় হইয়া একটা প্রণাম করিল, এবং কহিল, “ছোট হজুর, আমাকে চিনিতে পারিলেন না, আমি যে সরস্বতী! সেই ডাহাপাড়ার ঠাকুরপাড়ায় আমার ঘর।” অসীম অত্যন্ত বিস্মিত হইয়া কহিলেন, “তাই ত, তুমি সরস্বতীই ত! এ দেশে কবে আসিলে সরস্বতী?” “কাল সন্ধ্যাবেলায় আসিয়াছি। ছোট হজুর ভাল আছেন ত? আপনারা দুই ভাই চলিয়া আসিবার পরে, গ্রাম যেন কাণা হইয়া গিয়াছে। কবে দেশে ফিরিবেন হজুর?” “দেশে যে কবে ফিরিব সরস্বতী, বলিতে পারি না; কখনও ফিরিব কি না সন্দেহ!” “সে কি কথা! অমন কথা মুখে আনিতে নাই। আপনার বাড়ী, আপনার ঘর, আপনার ধন-দৌলৎ, আপনি কাহার জন্ত যথাসর্বস্ব ছাড়িয়া পথের ভিখারী হইয়াছেন?” “সে অনেক কথা সরস্বতী! তুমি কোথায় যাইবে?” “বৈষ্ণবের মেয়ে আর কোথায় যায় হজুর? বয়স হইয়াছে,—দেশে আপনার বলিতে বড় কেহ নাই, স্ততরাং বৃন্দাবনে চলিয়াছি। আপনাদের পাচজনের আশীর্বাদে এতদূর আসিয়াছি। মদনমোহন যদি টানেন, তাহা হইলে শ্রীবৃন্দাবন অবধি পৌছিব।” “এতটা পথ কি

করিয়া চলিবে ?” “কেন, পায়ে হাঁটিয়া ?” “দিন শুজরান কি করিয়া ?” “ভক্ত জন দেখিলে নাম শুনাই,—প্রভু যেদিন যাহা জুটান, তাহাই খাই। যেখানে সন্ধ্যা হয়, সেইখানেই রাত্রি কাটাই। অন্য কোনও উপায় নাই।” “ভাল কথা, আমাদের সন্ধান পাইলে কোথায় ?” “শুনলাম, এইখানে একজন বাঙ্গালী আমীর আছেন। ভাবিলাম, আর কিছু হউক না হউক, একবেলার অন্ন ত জুটিতে পারে।” “বাঙ্গালী আমীর ! এটা ত বিজ্ঞানজ্ঞার মহাশয়ের বাসা।” “ওমা তাই বুঝি ! তবে এ বেলা এইখানেই প্রসাদ পাইব।” “তুমি অন্দরে যাও,—সন্ধ্যুখে পূজার ঘরে দুর্গাকে দেখিতে পাইবে।”

সরস্বতীও তাহাই প্রার্থনা করিতেছিল,—অনুমতি পাইয়াই সে নির্দিষ্ট পথে অগ্রসর হইল। অসীম যতক্ষণ সরস্বতীর সহিত আলাপ করিতেছিলেন, ততক্ষণ মণিয়া স্থির হইয়া দাড়াইয়া ছিল। এইবার অসীম তাহাকে জিজ্ঞাসা করিলেন, “মণিয়া, তুমি কখন যাইবে ?” মণিয়া কহিল, “এখনই।” “চল, আমি তোমাকে রাখিয়া আসি।” “আপনাকে আর ঝুট মুট তক্লিফ দিব না, আমি একাই যাইতেছি।” “তোমার একা যাওয়া উচিত নহে ; কারণ, তোমাকে প্রায় সমস্ত স্রহরটা ভেদ করিয়া যাইতে হইবে। পাটনা স্রহর, স্রহরাতঃ সকাল হইলেও নিরাপদ নহে।” “কোন চিন্তা নাই। পাটনা স্রহরের কোন লোক মণিয়ার সঙ্গে হস্তক্ষেপ করিবে না—সে করে কেবল দিল্লী ও আগরার লোক। যাইবার পূর্বে একটা কথা নিবেদন করিয়া

যাঁচি বাবু সাহেব, যদি কখনও সহসা তোমার সম্মুখে আসিয়া উপস্থিত হই, অথবা যদি দেখিতে পাও, যেখানে আমার উপস্থিত থাকিবার কথা নহে সেখানেও আমি উপস্থিত আছি, তাহা হইলে আশ্চর্য্যান্বিত হইও না।” “কথাটা বুঝিলাম না মণিয়া!” “বাবু সাহেব, এই সপ্তাহকাল তোমাকে নিরবধি দেখিতে পাইতেছি,—হয় ত মধ্যে মধ্যে চোখের দেখা দেখিবার প্রবল আকাঙ্ক্ষা দমন করিতে পারিব না,—মনের বল, দেশকাল-পাত্রের বিবেচনা ভাসাইয়া দিয়া, তুমি যেখানে আছ দিলের,—বাবু সাহেব, সেইস্থানে লইয়া গিয়া উপস্থিত করিবে। তুমি ভয় পাইও না, তোমার জাতি বা বংশমর্যাদার কোন হানি হইবে না।” “লজ্জা দিও না, মণিয়া, আমি যখন যেখানে যে অবস্থায় থাকিব, তুমি নিঃসঙ্কোচে আমার নিকট আসিও। যদি বাদশাহের দরবারে থাকি, তথাপি আসিও। কিন্তু তুমি একা যাইতে পারিবে না; চল আমি তোমাকে পৌছাইয়া দিয়া আসি।” “এটি মাফ করিও। আমার বিশেষ প্রয়োজন আছে, একাই যাইতে হইবে। দোহাই তোমার দিলের,—মাঝে-মাঝে ঐ সম্বোধনটা এখনও আসিতেছে; কিন্তু হিন্দু ও মুসলমানের একমাত্র ঈশ্বরের নাম লইয়া শপথ করিতেছি, কাল হইতে আর আসিবে না।”

মণিয়া উদ্ভান হইতে বাহির হইয়া রাজপথ অবলম্বন করিল; এবং কিয়দূর অতিক্রম করিয়া দেখিতে পাইল যে, একথানা তাঞ্জামে বসিয়া এক মুসলমান যুবা সহর হইতে ফিরিতেছে।

সে তাজামের সম্মুখে দাঁড়াইয়া বাহকদিগকে কহিল, “রাখা” আরোহী তাহার মুখের দিকে চাহিলে, সে মস্তকের অবশেষে সরাইয়া দিয়া কহিল, “ফরীদ, তাজাম হইতে নাম।” তাহার মুখদর্শন করিয়া ফরীদ এক লক্ষে তাজাম পরিত্যাগ করিল; এবং মণিয়ার হস্তধারণ করিয়া কহিল, “মণিয়া জান্, সমস্তই খোদার কেরামতী! আমার জানটা যেন এতদিন কলিজার খাঁচা ছাড়িয়া উড়িয়া গিয়াছিল। রহমৎউল্লাহ, জানি, বল, তুমি আজি আমার মজলিস্ গুলজার করিবে?” “যাইব,—কিন্তু দুই দণ্ডের অধিক থাকিতে পারিব না ভাই!” “সেটা কি কথার কথা মাশুকা?” “শোভান্ আল্লা! ও-নাম করিও না,—আমি নেকা করিয়াছি।” “তোবা, তোবা,—ঝুট্ বলিও না। এই প্রথম যৌবনের হাজার মজা ছাড়িয়া, তুমি কেন নেকা করিতে যাইবে মণিয়া জান্? যাহার নাক নাই, যাহার কাণ নাই, যাহার কোমর বাঁকা, যাহার যৌবনের আশ্ৰিত্য চলিয়া পড়িয়াছে, তাহার গিয়া বিশটা করিয়া নেকা করুক। মণিয়াজান্, তুমি পাটনা সহরের আঁধারের রোশনি, স্বাবিবাহারের বুলবুল। তোমায় কয়দিন না দেখিয়া আমি ফকীরী লইতেছিলাম।” “দেখ্ ফরীদ! পথের মাঝখানে দাঁড়াইয়া পাগলাম করা ভাল নয়। যদি বেশী গোলমাল করিবি, তাহা হইলে তোর মজলিসে যাইব না। তোর তাজামটা একবার ছাড়িয়া দে, আর আমাকে একবার মহেন্দ্রুতে লইয়া চল।” “কি ভাই, আশনাই?” “ঝাড়ু মারি আশনাইয়ের

শুধু! দুনিয়ায় আসিয়া বহুৎ আশনাই করিলাম, এখন দিনকতক পরকালের কথা ভাবিতে দে।”

মণিয়া তাঞ্জামে আরোহণ করিল এবং মস্তকের অবগুষ্ঠন টানিয়া দিল। ধনী-সন্তান ফরীদ খাঁ তাহার নিতান্ত অত্মগত ভূত্যের দ্বায় সঙ্গে-সঙ্গে চলিল। মহেন্দ্র পাটনা সহরের অদূরে অবস্থিত। তখন এই অঞ্চলে অনেক সাধু সন্ন্যাসী বাস করিত। মহেন্দ্রর নিকটে আসিয়া মণিয়া ফরীদকে জিজ্ঞাসা করিল, “ফরীদ ভাই, তোর সঙ্গে কোন হিন্দু ফকীরের আলাপ আছে?” ফরীদ বিস্মিত হইয়া কহিল, “তোবা, তোবা! হিন্দু ফকীর কি করিবে মণিয়াজান?” “আমার খসমটা নেকা করিয়া বিগ্ড়াইয়াছে,—তাহাকে বশ করিবার ঔষধ মাগিতে যাইব।” “তোমার খসম বিগ্ড়াইয়াছে? মণিয়াজান, না জানি পাটনা সহরের বাকী আউরংগুলার খসম কি অবস্থায় থাকে!” “তাহারা এলাজ শিথিয়া রাখিয়াছে! আমার ত এতদিন খসম ছিল না, সুতরাং এলাজের জরুরও ছিল না।” “তোবা, তোবা। মণিয়াজান, তোমার খসম হয় পাগল, নয় দেওয়ানা।” “সে কথা ছাড় ভাই,—আমাকে একজন হিন্দু ফকীরের নিকট লইয়া চল।”

মহেন্দ্রতে একটা পুরাতন পুষ্করিণীর তীরে একদিকে ব্রহ্মচারী ও সন্ন্যাসীরা এবং অপর দিকে ফকীরেরা বাস করিত। সন্ন্যাসী ফকীর নিত্য আসিত, যাইত; তথাপি, সেই প্রাচীন পুষ্করিণীর উভয় তীর সর্বদা সন্ন্যাসী-ফকীরে পরিপূর্ণ থাকিত।

পুষ্করিণীর অদূরে তাগাম ও ফরীদ থাকে রাখিয়া মণিয়া পদতুচ্ছ অগ্রসর হইল। পুষ্করিণী-তীরে এক প্রাচীন তিস্তিড়ী-মূলে বৃহজ্জটাজুটধারী এক সন্ন্যাসী ধূনি জালিয়া বসিয়া ছিলেন,— মণিয়া তাহাকে সাষ্টাঙ্গে প্রণাম করিয়া জিজ্ঞাসা করিল, “বাবা, আপনাকে একটা কথা জিজ্ঞাসা করিতে পারি কি?” সন্ন্যাসী তাহার বেশভূষা দেখিয়া কহিলেন, “পহেলে সেবা লাগাও!” মণিয়া পুনরায় জিজ্ঞাসা করিল, “কি সেবা লাগাইব বাবা?” সন্ন্যাসী শ্রিতবদনে কহিলেন, “দো-চার রোজ হাম্‌কো ভজন তো করো।” মণিয়া বিরক্ত হইয়া সে স্থান পরিত্যাগ করিল।

নিকটে আর এক বৃক্ষতলে জনৈক অসংযত যুবা ব্রহ্মচারী নয়নদ্বয় বিস্তারিত করিয়া তাহার প্রথম-যৌবন স্পর্শে বিকশিত কমনীয় কাস্তির প্রতি ক্ষুধিত ব্যাপ্তের ন্যায় চাহিয়া ছিল। মণিয়া তাহাকে প্রণাম করিয়া জিজ্ঞাসা করিল, “বাবা, আপনাকে একটা কথা জিজ্ঞাসা করিতে পারি কি?” যুবা সাগ্রহে কহিল, “একটো কৈও, বিশটো পুছো, হাজারটো পুছো। লেকেন বয়টো—” মণিয়া বিরক্ত হইয়া স্থানান্তরে চলিয়া গেল। একে একে সকল সন্ন্যাসীকে দূর হইতে দেখিয়া, সে অবশেষে পুষ্করিণীর এক কোণে এক বৃদ্ধ ব্রহ্মচারীর নিকটে উপস্থিত হইল। তিনি কহিলেন, “তোমার যদি অধিক কথা জিজ্ঞাসা করিবার থাকে, তাহা হইলে অল্প সময়ে আসিও।” মণিয়া উত্তর শুনিয়া বুঝিল যে, এই স্থানেই তাহার উদ্দেশ্য সিদ্ধ হইবে; স্মরণ্য সে বস্ত্রাঞ্চল হইতে একটা রক্তমুদ্রা বাহির করিয়া ব্রহ্মচারীর

পদপ্রান্তে রাখিল। ব্রহ্মচারী তাহা দেখিয়া বিরক্ত হইয়া কহিলেন, “অর্থ দিলে প্রশ্নের উত্তর পাইবে না।” মণিয়া লজ্জিতা হইয়া টাকাটি উঠাইয়া লইল; এবং প্রণাম করিয়া দূরে বসিল। তাহা দেখিয়া ব্রহ্মচারী কহিলেন, “মাগি, বলিয়াছি ত, অধিক কথা বলিবার সময় এখন নাই,—দুইএকটা কথা এখন যদি জিজ্ঞাসা করিতে চাও, তাহা হইলে জিজ্ঞাসা করিয়া লও।” মণিয়া খতমত থাইয়া আম্তা-আম্তা করিয়া জিজ্ঞাসা করিল, “বাবা, আমি বেশাকণ্ঠা,—কিন্তু আমার পিতা মুসলমান।” এই পর্য্যন্ত বলিয়া মণিয়া থামিল; কিন্তু ব্রহ্মচারী কথা কহিলেন না। তাহা দেখিয়া মণিয়া আবার বলিতে আরম্ভ করিল, “বাবা, আমি কি হিন্দু হইতে পারি?” ব্রহ্মচারী কহিলেন, “যদি উদ্দেশ্যবিহীন হইয়া হিন্দু হইতে চাও, তাহা হইলে এখনই হইতে পার।” মণিয়া সাগ্রহে জিজ্ঞাসা করিল, “কেমন করিয়া?” “শরীর, মন আর কথায় হিন্দুর অনুকরণ করিও,—মুসলমানের আচার-ব্যবহার পরিত্যাগ করিয়া হিন্দুর আচার-ব্যবহার গ্রহণ করিও। ইহা যদি পার, পরে আমার সহিত সাক্ষাৎ করিও,—এখন যাও।” মণিয়া উঠিল। তাহার যৌবন-মাধুরী মণ্ডিত দেহের লালিত্য-দর্শনলোনুপ বিংশতিযুগল সমারত্যাগী সন্ন্যাসীর নয়ন তাহার পশ্চাদ্ধাবন করিল।

ত্রিংশ পরিচ্ছেদ

দুইগ্রহ

মণিয়া যখন গৃহে ফিরিয়া গেল, তখন বড়বধু রন্ধন করিতে-
ছিলেন। সহসা গৃহের প্রাঙ্গনে কে বলিয়া উঠিল, “জয় রাধে
কৃষ্ণ, বৌ-ঠাকুরণ ভিক্ষে দাও গো।” পাটনা শহরে মুরশিদা-
বাদের গ্রাম্য উচ্চারণ ও খাটী বাঙ্গালা কথা শুনিয়া বড়বধু
চমকিতা হইলেন। তিনি ফিরিয়া দেখিলেন দীর্ঘ রসকলি
কাটিয়া, খঞ্জনীহস্তে, নামাবলী অঙ্গে, গতযৌবনা সরস্বতী বৈষ্ণবী
অঙ্গনে দাঁড়াইয়া আছে। বড়বধু রন্ধন পরিত্যাগ করিয়া বাহিরে
আসিলেন এবং সরস্বতীকে ঠাহর করিয়া দেখিয়া কহিলেন, “ওমা,
সরস্বতীই ত। তুমি এদেশে কবে আসিলে ? এস, এস, বস বস।”
সরস্বতী উপরে উঠিয়া রন্ধনশালার দুয়ারে বসিল এবং কহিল,
“কাল সন্ধ্যাবেলায় আসিয়াছি।” “কোথায় যাইবে সরস্বতী
দিদি ?” “বৃন্দাবন। বৈষ্ণবের মেয়ে বুড়া হইলে আর কোথায়
যায় বল ?” “একেবারে মায়া কাটাইলে ?” “আমার কে আছে
বল বৌ-ঠাকুরণ, যাহার মায়ায় আমি ঘরে আটকাইয়া থাকিব ?
বুড়া হইয়াছি, গলা বেচিয়া খাইতাম, তাহাও বুজিয়া আসিতেছে।
মুরশিদাবাদে ভিক্ষা মেলা দুষ্কর। তাই মনে করিলাম বৃন্দাবনে
যাই ; গোবিন্দজী মদনমোহনের দুয়ারে পড়িয়া থাকি। দুর্গা-
দিদি কোথায় গা ?” অপরিচিত কণ্ঠস্বর শুনিয়া দুর্গাঠাকুরাণী
অতি ধীরে সরস্বতীর পশ্চাতে আসিয়া দাঁড়াইয়াছিলেন, সরস্বতী

তাহা জানিতে পারে নাই। তিনি এই সময়ে বলিয়া উঠিলেন, “তবু ভাল, এতক্ষণে দুর্গাকে মনে পড়িয়াছে।” সরস্বতী পিছন ফিরিয়া, জিহ্বা কৰ্ত্তন করিয়া, সাষ্টাঙ্গে প্রণাম করিয়া কহিল, “ও মা, সে কি দিদি, সে কি কথা! তোমায় কোলে-পিঠে করিয়া মাতুষ করিয়াছি, তোমায় কি ভুলিতে পারি? তুমি যে আমার নয়নমণি। কেমন আছ দুর্গাদিদি?” “আছি আর কেমন বল দিদি? ভগবান যেমন রাখিয়াছেন তেমনই আছি।”

সরস্বতী দেখিল যে ডাহাপাড়া পরিত্যাগ করিয়া দুর্গাঠাকুরাণীর কোনই পরিবর্তন হয় নাই। সে অতিশয় বুদ্ধিমতী, সুতরাং সহজেই মনের ভাব গোপন করিতে পারিল। ডাহাপাড়া গ্রামে নবীন নাপিতের নিকটে এবং অত্যান্ত লোকের মুখে সে দুর্গাঠাকুরাণীর বিষয়ে ও বিদ্যালঙ্কার মহাশয়ের গ্রাম পরিত্যাগ সম্বন্ধে বাহা শুনিয়াছিল, তাহা সমস্তই কাল্পনিক বৃত্তিতে পারিয়া সরস্বতী অত্যন্ত সাবধান হইয়া গেল। সে শুনিয়াছিল যে হরিনারায়ণ বিদ্যালঙ্কারের বিধবা কন্যা অসীমের বিরহ সহ্য করিতে না পারিয়া পিতার সহিত দেশত্যাগিনী হইয়াছে, বিধবার বেশ পরিত্যাগ করিয়া পুনরায় সধবা সাজিয়াছে এবং বাঙ্গালাদেশের ভদ্রমহিলার অলঙ্কার—লজ্জা পরিত্যাগ করিয়া বেশাবৎ আচরণ করিতে আরম্ভ করিয়াছে। সে দেখিল যে বিদ্যালঙ্কারের কন্যার শীর্ণ, অনশন-ক্লিষ্ট দেহে বিলাসের চিহ্নমাত্র নাই। বাঙ্গালা দেশের সধবার কোন চিহ্নই তাঁহার অঙ্গে উঠে নাই এবং প্রগল্ভতার ছায়ামাত্র তাঁহার আচরণে দেখিতে পাওয়া যায় না।

স্বতরাং সরস্বতী অবস্থা বুঝিয়া স্বর পরিবর্তন করিল। সে কহিল,
 “তা ত বটেই দিদি, তা ত বটেই ! এতদিন বাদে দেখা হ’ল,
 একটা কথা ত জিজ্ঞাসা করিতে হয়—কি আর জিজ্ঞাসা করি
 বল ? মুখপোড়া ভগবান কি আর তোমাকে মাহুষ রাখিয়াছে ?
 ঠাকুর কোথায় ?” “তিনি পূজায় বসিয়াছেন। তাঁহার মনের
 ভাব এখনও যে রকম আছে, তাহাতে তিনি যে ডাহাপাড়ার
 কোন লোকের সহিত দেখা করিবেন, আমার ত তাহা মনে হয়
 না। তুমি দুঃখ করিও না সরস্বতী, ইদানীং বাবা যেন কেমনতর
 হইয়া গিয়াছেন।” “হবারই ত কথা নদি, মাহুষের প্রাণে আর
 কত সয় ? এই আমাকে দিয়াই দেখ, অনেক দুঃখে পৈত্রিক ভিটা
 ত্যাগ করিয়া আসিয়াছি দিদিঠাকুরণ।”

এই সময়ে গুণ গুণ করিয়া গান গাহিতে গাহিতে এক দীর্ঘাকার
 যুবা গৃহের অঙ্গনে প্রবেশ করিলেন। তাঁহাকে দেখিয়া বড়বধু
 মস্তকের অবগুণ্ঠন ঈষৎ টানিয়া দিলেন। সরস্বতী বৈষ্ণবী উঠিয়া
 গিয়া সাষ্টাঙ্গে প্রণাম করিল। যুবা কহিলেন, “নি সাসা, গা মা
 পা। বোষ্টমদিদি যে, বল দেখি কি গাহিতেছি ?” প্রশ্ন শুনিয়া
 বড়বধু অবগুণ্ঠনের অন্তরাল হইতে জনান্তিকে বলিয়া উঠিলেন
 “রকম দেখিয়া গা জলিয়া যায় ! সময় নাই, অসময় নাই, কেবল
 গান, কেবল গান, কেবল গান। মাহুষটা এতটা পথ আসিয়াছে,
 তাহাকে কোথায় আদর-অভ্যর্থনা করিবে, বসিতে বলিবে, না
 কি গাহিতেছি বল, কি গাহিতেছি বল, কি গাহিতেছি বল ?”
 স্তূর্দর্শন হাসিয়া কহিলেন, “রাগ কর কেন ? যাহার যাহা বাতিক ;

—তোমরা পাঁচজনে বসিলে যেমন গুস্তানির পাঁচ রকম ফোড়নের
পঁচিশ রকম আলোচনা হয়, আমাদেরও তেমনই এক-পেশার
লোক দেখিলে সেই কথাই কহিতে ইচ্ছা করে।”

বড় বধু। এইবার গুস্তানি খাইতে আসিও ঠাকুর!

দুর্গা। রাগ করিস্ কেন ভাই, দাদা ত ভাল কথাই
বলিয়াছে?

বড়। আহা, বোনটি যেন ভাইয়ের ছোড়া!

হু। মুখে আগুন।

সু। ভাল জালা, বলি সরস্বতী দিদি, আসিলে কবে? নি,
সা সা, গামাপা।

বড়। দেখিলি ভাই, সাধ করিয়া বলি, চঙ দেখিয়া অঙ্গ
জলিয়া যায়?

সুদ। ও মাগীর কথায় কাণ দিওনা সরস্বতী দিদি!

সর। কাল সন্ধ্যাবেলায় আসিয়াছি।

সুদ। চলিয়াছ কোন্ পথে?

সর। বৈষ্ণবী বুড়া হইলে যে পথে যায়—শ্রামটাদের
শ্রীবৃন্দাবনে।

সুদ। নিসাসা, গামাপা। স্বরটা জমিয়াছে মন্দ নয়!
বোষ্টম দিদি, বল দেখি কি?

বড়। না ভাই ঠাকুর-ঝি তুই বস, আমি উঠিয়া যাই।

সুদ। রাগ কর কেন গো? তোমার গুস্তানি, মাছের ঝোল
যেমন জমে, গানও তেমনি জমে। সরস্বতী দিদি, তোমার মত

গুণীলোক মেয়েমাহুষের মধ্যে অতি অল্পই দেখিয়াছি। বল
দেখি সুরটা কি ?

সর। দাদাঠাকুর, গানটা আর একবার গান।

সুদ। নি সা সা, গা মা পা, পা, পা, পা, পা, সা, মামা,
মামা, গা মামা, গা মামা, গা রে সা, রে, রে নি, সা সা, গামাপা।

সর। ভীম-পলশ্রী।

সুদ। তুমি না হইলে এমন কথা কে বলে বৈষ্ণবী দিদি ?
আজ সকাল হইতে সুরটা মাথার ভিতর ঢুকিয়াছে। মণিয়াবাঈ
কোথায় গেল দুর্গা ?

বড়। সে গুড়ে বালি। চিড়িয়া ফুড়ুং।

দুর্গা। দাদা, মণিয়া এই মাত্র বলিয়া গেল যে সে বাপের
বাড়ী যাইতেছে।

সুদ। একাই গেল ?

দুর্গা। হাঁ, বলিয়া গেল সে ছোটদাদার অনুমতি লইয়াছে।
কর্তার সহিত দেখা করিতে চাহিল না, বলিল, সে পাটনা ছাড়িয়া
এখন অল্পটুকু যাইবে না, আর একদিন আসিয়া তাঁহার নিকট
বিদায় লইয়া যাইবে।

সুদ। আপদ গেল, বাঁচা গেল।

বড়। আমি ভাবছিলাম, সংবাদ শুনিয়া তোমার বুক
ফাটিয়া যাইবে।

সুদ। ছুঁড়ীটার গলার আওয়াজটি বড় মিঠা, কিন্তু আর
সমস্তই বদ। গিয়াছে—বাঁচিয়াছি। ছোট রাঘটার জগ

স্বাক্ষিতে আমার ভাল ঘুম হইত না। সেটা আবার কোথায় গেল ?

বড়। দেখ-দেখ, হয় ত মণিয়া আঁচলে বাঁধিয়া লইয়া গিয়াছে।

হুদু। সর্বনাশ ! ঠাট্টা নহে, সরস্বতী দিদি, তুমি যে ক'দিন পাটনায় থাকিবে, আমাদের বাড়ীতেই থাকিও, আমি ছোট-রায়েবের সঙ্কানে চলিলাম।

স্বদর্শন ব্যস্ত-সমস্ত হইয়া গৃহত্যাগ করিলেন। তাহা দেখিয়া সরস্বতী দুর্গাঠাকুরাণীকে জিজ্ঞাসা করিল, “দাদাঠাকুর কোথায় যান ?” দুর্গা উত্তর দিবার পূর্বেই বড়বধু হাসিয়া কহিলেন, “ও আমার পোড়া কপাল ! তা বুঝি জান না বোষ্টম দিদি ? ঠাকুরটি পাটনায় আসিয়া অবধি এক বাঈজীর প্রেমে একেবারে হাবুডুব। ছোটরায়েব নাম করিয়া নিজে কেবল তাহার পিছু-পিছু ঘুরিতেছেন।” দুর্গাঠাকুরাণী বলিয়া উঠিলেন, “মুখে আগুন তোর পোড়ারমুখী ! নিরপরাধ ব্রাহ্মণের নামে বুঝি অপকলঙ্ক দিতেছিস, তোর যে মহাপাতক হইবে ?” বধু হাসিয়া ননন্দাকে কহিলেন, “হউক আমার মহাপাতক, তাহার অর্দ্ধেক ত ব্রাহ্মণেই পাইবে ?”

সরস্বতী ভিতরের কথা বুঝিতে না পারিয়া কোন কথা কহিল না, সে নিতান্ত নির্কোষের স্থায় প্রশ্ন করিল, “সে মণিয়াবাঈ কি জাত গা” বড়বধু হাসিয়া কহিলেন, “এইবার ঠকাইয়াছ বোষ্টম দিদি।” বৈষ্ণবী জিজ্ঞাসা করিল, “কেন ?” “বাঈজীর কি জাতি আছে ?”

একত্রিংশ পরিচ্ছেদ

ময়ূর সিংহাসনের পথে

বিক্রমাব্দের অষ্টাদশ শতাব্দীর শেষভাগে পাটনা নগরের পূর্বপ্রান্তে একটি লা-ওয়ারিস প্রাচীন আশ্রয়স্থান ছিল। সরকারী কাগজপত্রে তাহার নাম ছিল আফ্‌জল খাঁর বাগিচা, কিন্তু আফ্‌জল খাঁ কে ছিল এবং কবে বিলুপ্ত ছিল, তাহার কোন পরিচয় পাওয়া যাইত না। বাগানটির প্রকৃত মালিক ছিল পল্লীর বালক-বৃন্দ; কারণ তাহারাই উহার ফল ভোগ করিত,— অবশ্য পক্ষ হইবার বহুপূর্বে এবং বিনা লবণে। হিজরীর ১১২৪ অব্দে আফ্‌জল খাঁর বাগিচা সহসা জনাকীর্ণ হইয়া উঠিয়াছিল, কারণ শাহজাদা ফররুখ্‌সিয়র, মুরশিদাবাদ হইতে শাহজহানাবাদ পর্য্যন্ত কুচ্ করিতে করিতে পাটনায় আসিয়া, এই উদ্যানে আশ্রয় গ্রহণ করিয়াছিলেন। বহুদিন ধরিয়া একস্থানে খাটান থাকায় তাম্বুলি মলিন হইয়া গিয়াছিল, দুই একটা ছিঁড়িয়া পড়িতেছিল, সমস্ত শিবিরটা যেন শ্রীহীন হইয়া পড়িয়াছিল। বৈশাখ মাসের প্রারম্ভে একদিন প্রভাতে জনৈক খর্কাকার যুবা সেই শিবিরে একপ্রান্তে একটি সহকার-তরুতলে পাদচারণ করিতেছিলেন। অর্দ্ধদণ্ডপরে একজন সওয়ার আসিয়া তাঁহাকে অভিবাদন করিয়া কহিল, “তিনি তাড়ুতে নাই।” যুবা পাদচারণ পরিত্যাগ করিয়া বলিয়া উঠিলেন, “রায়জীকে অমুসন্ধান করা তোমার কার্য্য নহে, একজন হিন্দু সওয়ার পাঠাও।” সওয়ার অভিবাদন

করিয়া চলিয়া গেল এবং যুবা পুনরায় পাদচারণ আরম্ভ করিলেন।

সরস্বতী বৈষ্ণবী বিদ্যালঙ্কার মহাশয়ের অন্তঃপুরে প্রবেশ করিবার পরে, অসীম দ্রুতপদে উজানের বাহিরে আসিয়া দেখিলেন যে মণিয়া অদৃশ্য হইয়াছে। অনেকক্ষণ ধরিয়া চারিদিক অতুসন্ধান করিয়া দেখিলেন; কিন্তু মণিয়ার কোনই চিহ্ন দেখিতে পাইলেন না। তখন পথে লোকজন চলিতেছিল না। সুতরাং তিনি কাহারও নিকট কোনও সন্ধান পাইলেন না। অতঃপর হইয়া চলিতে চলিতে তিনি ক্রমশঃ মণিয়ার মাতার গৃহের সম্মুখে আসিয়া উপস্থিত হইলেন। বৃদ্ধ পাঠান তখন ফরসীটা হস্তে লইয়া দুয়ারে দাঁড়াইয়া তামাকু সেবন করিতেছিল। অসীম তাহাকে জিজ্ঞাসা করিলেন “খাঁ সাহেব, মণিয়া বাঈ কি গৃহে ফিরিয়া আসিয়াছে?” বৃদ্ধ ক্রোধে কাঁপিতে কাঁপিতে কহিল, “বদবখ্ৎ, আমি কি তোমার উপহাসের পাত্র? আমার যদি উপযুক্ত পুত্র থাকিত, তাহা হইলে তোমার ধুটতার সমুচিত শাস্তি দিত।” অসীম বিস্মিত হইয়া কহিলেন, “খাঁ সাহেব, আমার অপরাধ মাক্ করিবেন। আমি আপনার সহিত পরিহাস করি নাই। মণিয়া কি সত্যসত্যই গৃহে ফিরে নাই?” “কথায় বিশ্বাস না কর, গৃহে প্রবেশ করিয়া দেখিতে পার।” “তবে সে কোথায় গেল?” “সে বখার জবাব তুমি ভিন্ন আর কেহ দিতে পারিবে না।” “ঈশ্বরের দোহাই খাঁ সাহেব, মণিয়া আমার নিকট হইতে বিদায় লইয়া চলিয়া

আসিয়াছে।” “তবে বোধ হয় তাহার, তোমার নত অপর একজন খুবস্বরং খরিদার জুটিয়াছে।” “তোবা তোবা, ঈশ্বরের দিব্য খাঁ সাহেব, আমি মণিয়ার খরিদার নই।” অসীম এই বলিয়া পাঠানের গৃহ পরিত্যাগ করিয়া অগ্রসর হইলেন। তিনি দৃষ্টির বহির্ভূত হইলে গৃহান্তর হইতে বৃদ্ধ ক্রতুম্দিন্ খাঁ কম্পিতপদে হুঁকা-হস্তে গুলশের খাঁর নিবটে আসিয়া জিজ্ঞাসা করিল, “বলি, কি হে গুলশের খাঁ ! দামাদ কি দিয়া গেল?” প্রশ্ন শুনিয়া গুলশের খাঁ জলিয়া উঠিল; কহিল “এই কাকের যদি আমার দামাদ হয় তাহা হইলে আমি যেন কখনও আর দোজখের বাহিরে না আসি।” কসম্ শুনিয়া দ্বিতীয় বৃদ্ধ বলিয়া উঠিল, “তোবা তোবা, করিলে কি? কসবীর গর্ভজাত কন্যার জন্ত এত বড় একটা কসম খাইয়া ফেলিলে? যে রকম দিন-কাল পড়িয়াছে, তাহাতে ওরকম একটা মাতুষ হাতে থাকিলে অনেক উপকার হয়। বলি খবরটা শুনিয়াছ কি?” গুলশের খাঁ বিষন্ন বদনে কহিল, “খবর আর কি শুনিব? মণিয়া বোপ হয় ঐ হারামখোরকে ছাড়িয়া অপর কোথাও চলিয়া গিয়াছে।” ক্রতুম্দিন্ খাঁ তাহার দন্তহীন বদন ব্যাদান করিয়া কহিল, “আরে না না, সে খবর না, এই বড়ী কসবীটা তোমাকে এমনই আচ্ছন্ন করিয়া দিয়াছে যে, আর কোন কথাই তোমার মাথায় প্রবেশ করিবে না। বলি নূতন খবরটা শুনিয়াছ?” “আবার কি খবর?” “শোভান্ আল্লা! বাদশাহ আজীম্ উশ্শান যে ফৌৎ! নূতন বাদশাহ জহাঁদার শাহ আর তিন ভাইকে

ফুটে করিয়া দিল্লী আসিতেছেন।” “জহান্নমে যাক্।” “দেখ গুলশের খাঁ, তোমার ঘটে একবিন্দুও বৃদ্ধি নাই। তোমার যে মরগুম্ পড়িয়াছে হে! বুঝিতেছ না, ফরুকখ্‌সিয়রকে হয় মরিতে হইবে না হয় লড়িতে হইবে। ফরুকখ্‌সিয়র যদি লড়াই কতে করে?” “তাহাতে আমার কি?” “আরে আহম্মক্, তোর কত্তা যে উজ্জীরের বেগম হইবে।” “তোবা তোবা!”

সেই সময়ে পথ দিয়া একজন সওয়ার নক্ষত্র বেগে ঘোড়া ছুটাইয়া উত্তর দিকে চলিয়াছিল। সে এই বৃদ্ধদ্বয়কে দেখিয়া সহসা ঘোড়া থামাইল; সুন্দর বলবান আরববংশীয় অশ্ব আকর্ষণের বেগে পশ্চাতের পদদ্বয়ে ভর দিয়া দাঁড়াইয়া উঠিল। সওয়ার জিজ্ঞাসা করিল, “সাহেব, এই পথ দিয়া একজন গৌরবর্ণ দীর্ঘাকার যুবককে যাইতে দেখিয়াছ?” গুলশের খাঁ মুখ ফিরাইয়া রহিল; তাহার প্রশ্নের জবাব দিল না; কিন্তু রক্তমুদিল্ খাঁ তাহার দশন-বিহীন, লোলচর্শ্ব বদন ব্যাদান করিয়া কহিল, “হাঁ দেখিয়াছি, তুমি নূতন বাঙ্গালী আমীর রায়জী সাহেবের কথা জিজ্ঞাসা করিতেছ কি?” সওয়ার তাহার উত্তর শুনিয়া যেন স্বর্গ হাতে পাইল; সে সানন্দে বলিয়া উঠিল, “হাঁ, তিনি কোন্ পথে গেলেন বলিতে পার?” রক্তমুদিল্ খাঁ অসীম যে পথে গিয়াছিলেন, তাহা দেখাইয়া দিল, সওয়ার একটা নূতন টাকা ফেলিয়া দিয়া ঘোড়া ছুটাইয়া চলিয়া গেল।

বৃদ্ধ টাকা উঠাইয়া লইয়া বাজাইতে বাজাইতে সওয়ার অসীমকে ধরিয়া ফেলিল। সে ঘোড়া হইতে নামিয়া অসীমকে

কহিল, “জনাব, জোর তলব, আপনি আমার ঘোড়া লইয়া যুন, আমাকে হাঁটিয়া যাইতে হইবে।” অসীম তাহাকে দেখিয়া অত্যন্ত বিরক্ত হইলেন; তাঁহার মনে তখন মণিয়ার চিন্তাই প্রবল হইয়া উঠিয়াছিল; সে কোথায় গেল, পিতৃগৃহে ফিরিল না কেন, তাহা তিনি বুঝিতে পারিতেছিলেন না। বিরক্তি দমন করিয়া তিনি সওয়ারকে জিজ্ঞাসা করিলেন, “জোর তলব কেন বলিতে পার, কিঞ্চিৎ বিলম্বে গেলে হইত না?” সওয়ার সাগ্রহে কহিল, “হজুর, দিল্লী হইতে সওয়ার আসিয়াছে। সে বোধ হয় কোন দুঃসংবাদ আনিয়াছে, কারণ আমি জন্মে কখনও শাহজাদাকে উতলা হইতে দেখি নাই।”

অসীম অত্যন্ত বিরক্ত হইয়াও মনোবেগ দমন করিয়া অশ্বে আরোহণ করিলেন; এবং নিমেষের মধ্যে শিবিরে ফিরিয়া আসিলেন। সেই খরস্রুতি যুবা তখনও সহকারতলে পাদচারণা করিতেছিলেন—তিনি অসীমকে দেখিয়া দীর্ঘনিঃশ্বাস ত্যাগ করিয়া কহিলেন, “তুমি আসিয়াছ? বাঁচিলাম! বন্ধু আমি ভাবিয়াছিলাম যে, আমার দুঃসময়ে তুমিও আমার পরিত্যাগ করিয়া চলিয়া গিয়াছ।” অসীম অত্যন্ত বিস্মিত হইয়া জিজ্ঞাসা করিলেন, “দুঃসময় কেন শাহজাদা?” “আর কি, সমস্তই শেষ! সুখ স্বাচ্ছন্দ্য, বাদশাহীর স্বপ্ন—সমস্তই শেষ হইয়া গিয়াছে। দিল্লী হইতে সওয়ার আসিয়াছে; পিতা নিহত, জহাঁদারশাহ মঘুরসিংহাসনের অধিকারী।” অসীম কিয়ৎক্ষণ চিন্তা করিয়া কহিলেন, “শাহজাদা, ইহা অধীর হইবার সময় নহে। প্রকাশ

রাজপথে দাঁড়াইয়া এ সকল কথার আলোচনা করা উচিত নহে,—তাঁহুর ভিতরে চলুন।”

উভয়ে বস্ত্রাবাসের মধ্যে প্রবেশ করিলেন। অসীম ফররুখসিয়রের মুখে লাহোরের যুদ্ধের ফল শুনিলেন। সমস্ত ঘটনা ব্যক্ত করিয়া অবশেষে ফররুখসিয়র কহিলেন, “বন্ধু, আজি বন্ধুভাবে তোমাকে ডাকিয়াছি ; কারণ, আমি আর রাজপুত্র নহি,—হিন্দুস্থানের পথের ভিখারীও আমি অপেক্ষা ভাগ্যবান। এখনও আমার চারিদিকে রাজপুত্রের যোগ্য সাজসজ্জা আছে বটে, কিন্তু আমার প্রকৃত অবস্থা কি জান? আমি হয় ত আফরাশিয়ব খাঁর বন্দী। এই মুহূর্ত্তে কে হয় ত একমুষ্টি সুবর্ণ-মুদ্রার জন্ত আমার ছিন্নশির জহাঁদার শাহকে নজর পাঠাইয়া দিবে। বন্ধু, আজি প্রকৃত বন্ধুর কার্য্য কর,—আমার কণ্ঠাটির ভার লও—আর আমার কেহ নাই।” অসীম ধীরে-ধীরে কহিলেন, “শাহজাদা, আপনি কি করিবেন?” “ভাবিতেছি, ফকীরী লইয়া আসামে কি আরাকাণে যাইব।” “গুজার পরিণাম স্বরণ আছে?” “সেইজন্তই ত তোমাকে অচরোধ করিতেছি, আমার কণ্ঠার ভার লও।” “শাহজাদা, বিনা আয়াসে বিনা চেষ্টায় সমস্ত ত্যাগ করিয়া যাইবেন? ইহা কি পুরুষোচিত কার্য্য হইবে?” “কি করিব বল, আজীম উশ-শান্ বাদশাহের প্রিয়পাত্র ছিলেন; ধনবল, সৈন্তবল, বুদ্ধিবল সমস্তই তাঁহার ছিল। কিন্তু আমি বুদ্ধিহীন, সৈন্যহীন, ধনহীন; জহাঁদার সিংহাসনে উপবিষ্ট। আমি কি লইয়া দিল্লীর বাদশাহের বিরুদ্ধে

নাড়াইব? স্বাধারী কোজ প্রায় বিজোহী। শিবিরে কয়জন আহাদী আছে? আহমদবেগ বলিতেছিল যে, মুরশিদাবাদের টাকা ফুরাইয়া আসিয়াছে।” ফররুখশিয়রের উক্তি শেষ হইলে অসীম প্রায় একদণ্ডকাল অধোবদনে চিন্তা করিলেন। পরে ধীরে-ধীরে কহিলেন, “শাহজাদা, ধনহীন, বুদ্ধিহীন, বলহীন জহাঁদার শাহ যদি সিংহাসন অধিকার করিতে পারে, তাহা হইলে আপনি কেন পারিবেন না?” ফররুখশিয়র কহিলেন, “রায়জী, তুমি জান যে, স্বয়ং আসদ্‌খাঁ ও তাঁহার পুত্র জুলফীকার খাঁ জহাঁদার শাহের পৃষ্ঠপোষক?” “তাহাতে কিছুই আসে যায় না। আসদ্‌খাঁ বা জুলফীকার খাঁ অপেক্ষাও যোগ্যতর লোক পাওয়া যাইতে পারে। শাহজাদা, ফকীরীতে আর মৃত্যুতে অধিক প্রভেদ নাই। মৃত্যুর পরে যাহা হয় তাহা আমাদের বর্তমান বুদ্ধির অগম্য। মৃত্যুই যদি শেষ, তাহা হইলে মৃত্যু ত যে কোন সময়েই আলিঙ্গন করা যাইতে পারে। কিন্তু তাহার পূর্বে একবার শেষ চেষ্টা করিয়া দেখিলে হয় না?” “কি চেষ্টা করিব রায়জী?” “আপনার পিতা ও জ্যেষ্ঠ ভ্রাতা অবর্তমানে আপনি সিংহাসনের অধিকারী। চেষ্টা করিয়া দেখুন; ফল না হয় তখন ফকীরীতে আছেই।” “রায়জী, এই পাঁচশত আহাদীর ভরসায় তুমি আমাকে জুলফীকার খাঁর সম্মুখীন হইতে বল?” “বাদশাহ! পাঁচশত পাঁচলক্ষ হইতে অধিকক্ষণ লাগে না।”

ফররুখশিয়র সেই জীর্ণ, ছিন্ন, বস্ত্রাবাসের মধ্যে বসি

বহুক্ষণ চিন্তা করিলেন। প্রায় দুইদণ্ড অতিবাহিত হইল। তখন ফররুখশিয়র সহসা বলিয়া উঠিলেন, “রায়জী, তোমার কথাই সত্য,—আমি মৃত্যুর ভয়ে অভিভূত হইয়াছিলাম। হয় সিংহাসন, না হয় মৃত্যু—ফররুখশিয়রের তৃতীয় পছন্দ নাই। আমি অন্তরে চলিলাম। মাতার নিকট আরও দুই হাজার আশরফী আছে, তাহা দিয়া সুবাদারী ফৌজ বশ করিতে হইবে। তুমি শিবির ছাড়িয়া অধিকক্ষণ বাহিরে থাকিও না।”

তখন ফররুখশিয়র ময়ূর-সিংহাসনের এবং অসীম মণিয়ার সন্ধানে নির্গত হইলেন।

দ্বাত্রিংশ পরিচ্ছেদ

দ্বিতীয় অসীম

মণিয়া ফিরিয়া আসিল। অসীম চলিয়া যাইবার এক-প্রহর পরে ফরীদ খাঁ তাহার তাঞ্জামে করিয়া মণিয়াকে তাহার পিতৃ-গৃহে দিয়া গেল। মণিয়ার মাতা বিস্মিতা হইয়া দেখিল যে, তাহার কন্যা পায়জামা ছাড়িয়া সাড়ী পরিয়াছে, সমস্ত অলঙ্কার ত্যাগ করিয়াছে; কিন্তু সে কোন কথা জিজ্ঞাসা করিল না। তাহার উপার্জনা-ক্ষমতা কন্যা গৃহে ফিরিয়া আসিয়াছে, ইহাই তাহার পক্ষে যথেষ্ট। মণিয়া আমিষ আহার পরিত্যাগ

করিয়াছিল; গৃহে ফিরিয়া স্বহস্তে রন্ধন করিয়া আহার করিল, তাহাতেও তাহার মাতা কিছু কহিল না। সন্ধ্যাবেলায় করীন্দ্রী যখন মণিয়ারকে লইতে আসিল, তখন সে যথাযোগ্য বেশ-ভূষা করিয়া চলিয়া গেল। তাহা দেখিয়া মণিয়ার মাতা ইফ্ ছাড়িয়া বাঁচিল,—পাড়ার দরগায় গিয়া পীরের পূজা দিয়া আসিল এবং কতকটা নিশ্চিন্ত হইল।

শিবির পরিত্যাগ করিয়া অসীম পুনরায় মণিয়ার সন্ধানে বহির্গত হইলেন। ভূপেনের আদেশে, অসীম যতক্ষণ নবরুক্ষসিয়রের সহিত আলাপ করিতেছিলেন, নবরুক্ষ ততক্ষণ শিবিরের এক প্রান্তে দাঁড়াইয়া ছিল। অসীম বাহির হইলে সে তাঁহাকে সান্নিধ্যে প্রণাম করিয়া কহিল, “হজুর, খাবার তৈয়ারী।” কথটা সে এত অধিক বিনয়ের সহিত কহিল যে, তাহা মণিয়ার চিন্তা-গ্রস্ত অসীমের কর্ণকুহরে প্রবেশ করিল না। তাহা দেখিয়া নবরুক্ষ স্বর একটু মধ্যমে চড়াইয়া কহিল, “হজুর?” চিন্তাস্রোত বাধা পাইল; ক্র-ভঙ্গী করিয়া অসীম জিজ্ঞাসা করিলেন, “কি চাহ?” নবরুক্ষ সাহসে ভর করিয়া বলিয়া ফেলিল, “হজুর, খাবার তৈয়ারী।” অসীম অত্যন্ত বিরক্ত হইয়া কহিলেন, “ছোট হজুরকে খাইতে বল, আমি এখন খাইব না।” অসীম সেস্থান ত্যাগ করিতে উগ্গত হইয়াছেন, এমন সময়ে নবরুক্ষ আবার জিজ্ঞাসা করিল, “হজুর?” “আবার কি?” “ঠাকুর মহাশয়ের বাড়ী খাইবেন কি?” “ঠাকুর মহাশয় জাহান্নামে যাউক।” অসীম এই বলিয়া সে স্থান ত্যাগ করিলেন।

নবকৃষ্ণ বড়ই চতুর ভৃত্য। অসীম সে স্থান ত্যাগ করিলেও সে প্রায় অর্দ্ধদণ্ড সেই স্থানে দাঁড়াইয়া রহিল। সে ভাবিল, হুজুরের লক্ষণ সুবিধার নহে। বান্ধজীটি আসিবার পর হইতে এই সমস্ত লক্ষণ প্রকাশ পাইয়াছে; সুতরাং শীঘ্র এই রোগের প্রতীকার না করিলে ফল গুরুতর হইবে। তিনজন লোককে এখনই সংবাদ দেওয়া কর্তব্য। প্রথম ছোট হুজুর, দ্বিতীয় সুদর্শন ঠাকুর এবং তৃতীয় দুর্গাঠাকুরাণী। এই কথা ভাবিয়া নবকৃষ্ণ তাড়াতাড়ি ফিরিয়া গেল, এবং ভূপেন্দ্রকে জানাইল যে, হুজুর বলিয়া গেলেন, তিনি আহার করিবেন না, ছোট-হুজুর যেন একা আহার করেন এবং ঠাকুর মহাশয় জহান্নমে যাইতে পারেন। তাহার উক্তির শেষভাগ শুনিয়া ভূপেন্দ্র ভ্র-ভঙ্গী করিয়া জিজ্ঞাসা করিলেন, “কি বলিলি?” নবকৃষ্ণ করযোড়ে চক্ষু মুদ্রিত করিয়া কহিল, “হুজুর, আমি নিমকের চাকর, হুজুর মা-বাপ, বড়-হুজুর নিজমুখে এ কথা না বলিলে, আমার নাথ্য কি যে এমন কথা মুখ দিয়া বাহির করি।” ভূপেন্দ্র তাহার জবাব শুনিয়া চিন্তিত হইলেন এবং কহিলেন, “দাদাকে কি বিশেষ চিন্তিত দেখিলি?” “হুজুর প্রায় পাগলের মত। চক্ষু দুইটা রক্তবর্ণ, পাগড়ীটা খুলিয়া গিয়াছে, জোব্বার অর্দ্ধেকটা নাই।” “নবা, আমিও আহার করিব না। তুই তাঞ্জাম ডাক, আমি বাহিরে যাইব।”

তাঞ্জাম আসিলে ভূপেন্দ্র বাহিরে আসিলেন। শিবিরে আসিয়া তিনি যে সংবাদ পাইলেন, তাহাতে তাঁহার মন অধিক-

তর উদ্বিগ্ন হইল। সকলেই ভয়ে অস্থির; একটা অজ্ঞাত অমঙ্গলের আশঙ্কায় উদ্বিগ্ন। কেহ কাহারও কথা শুনিতেছে না, অথচ সকলেই আপন মনে বলিয়া যাইতেছে। সকলেরই মুখে এক কথা, “কপাল ভাঙ্গিয়াছে।” কথায়-কথায়, ভূপেন বসিতে পারিলেন যে, নবীন বাদশাহ আজীম উশ্-শান পরাজিত ও নিহত হইয়াছেন এবং তাঁহার জ্যেষ্ঠ ভ্রাতা জহাঁদার শাহ ময়ূর-সিংহাসনে আসীন। ফররুখ্-সিয়রের অনুচরবর্গের অনেকেই তাঁহাকে পরিত্যাগ করিয়া পলায়ন করিতে প্রস্তুত; সকলেই বলিতেছে যে, তাঁহার মৃত্যু নিশ্চয়। কেবল দুই একজন সাহসে ভর করিয়া তাঁহাকে বাদশাহ্ সম্বোধন করিতেছে। ভূপেন্দ্র ব্যাকুল হৃদয়ে তাঙ্কামে আরোহণ করিয়া স্তুদর্শনের সন্ধানে নির্গত হইলেন।

ভূপেন্দ্র চলিয়া গেলে, নবরুফ স্বয়ং সাজিতে বসিল। নিজের মলিন বস্ত্রখানি পরিত্যাগ করিয়া, অসীমের একখানি বহুমূল্য ঢাকাই ধুতি চুনট করিয়া পরিধান করিল। পা ধুইয়া, তাহাতে অসীমের একজোড়া দিল্লীর জরিদার লপেটা আরোপ করিল। একখানা কাঠের কাঁকই দিয়া তাহার দীর্ঘ, কুঞ্চিত কেশ তৈল সজ্জা করিয়া আঁচড়াইয়া লইল। তাহার পরেই তাহার বিষম বিপদ হইল। তাহার নিকট অসীমের অনেকগুলো ঢাকাই ও বেনারসী কামদার জামা ও আঁচকান্ ছিল;—কিন্তু তাহার একটাও তাহার সঙ্গে মানাইল না। তখন সে নিতান্ত দুঃখিত হইয়া ভূপেন্দ্রের একটা পুরাতন মেরজাই সেলাই করিয়া পরি

অসীমের একখানা বেনারসী জোড় গায়ে জড়াইল; এবং ভূপেনের একটা নতুন জোড় লইয়া পাগড়ী বাধিল। তাহার পর একখানা রঙ্গীন রুমালে আতর মাখাইয়া লইয়া তাম্বু হইতে বাহির হইল।

বাহির হওয়াই নবকৃষ্ণ আর এক বিপদে পড়িল তাম্বুর বাহিরে একজন আহদী দাঁড়াইয়া ছিল। সে তাহাকে দেখিয়া, অসীম মনে করিয়া, অভিবাদন করিল, এবং কহিল “জনাব, শাহজাদা সন্ধ্যাকালে আপনাকে তলব করিয়াছেন।” নবকৃষ্ণ ফাঁকরে পড়িল। অসীমের আদেশ-মত এই সংবাদ লইয়া তাম্বুতে ভূপেক্ষা করা উচিত; কিন্তু অপেক্ষা করিলে বেশ-ভূষা ছাড়িতে হয়; তাহা না হইলে ধরা পড়িয়া গ্রহণ ভোগ করিবার সম্ভাবনা। আবার এমন বেশ-ভূষা লইয়া পাটনা সহরে বাহির হইবার আশা অতি অল্প। নবকৃষ্ণ অনেক দিন ধরিয়া বাজারে এই ময়ূর পুচ্ছে সজ্জিত হইয়া বেড়াইবার আকাঙ্ক্ষা হৃদয়ে পোষণ করিতেছে। অনেক চিন্তা করিয়া সে পাঁচক ব্রাহ্মণকে ডাকিয়া আনিল, এবং তাহাকে তাম্বুর দুয়ারে বসাইয়া কহিল, “দাদাঠাকুর, তুমি এইখানে বসিয়া থাক। হজুর আসিলে বলিবে যে, শাহজাদা তাঁহাকে সন্ধ্যাবেলায় নিমন্ত্রণ করিয়াছেন। কি বলিবে বল দেখি?” ব্রাহ্মণের নিবাস সিংহভূম। সে-অসীমকে অত্যন্ত ভয় করিত এবং ভূপেন্দ্রকে ততোধিক ভালবাসিত। ব্রাহ্মণ রন্ধন এবং গঞ্জিকা-সেবন এই দুইটি বিজ্ঞা শিক্ষা করিয়াছিল। ভূপেন্দ্র তাহাকে মধ্যে মধ্যে কিঞ্চিৎ অর্থ

দিত। সেইজন্ত পাটনায় আসিয়া সে গঞ্জিকার মাত্রা বৃদ্ধি করিয়াছিল; কারণ, বিহারে গঞ্জিকার মূল্য অতি সামান্য। গঞ্জিকার মাত্রা বৃদ্ধিত হওয়ায় ব্রাহ্মণের মস্তিষ্ক কিঞ্চিৎ শুষ্ক, মেজাজটা অতীব রুষ্ট এবং স্থূল-বুদ্ধিটা স্থূলতর হইয়াছিল। সে জিজ্ঞাসা করিল, “তু কুথাকে যাচ্ছিস?” নবকৃষ্ণ কহিল, “আমার শ্বশুর অত্যন্ত পীড়িত; তাহাকে দেখিতে যাইতেছি।” গঞ্জিকা-ধূমাচ্ছন্ন মস্তিষ্কের মধ্যেও কথাটা প্রবেশ করিল। ব্রাহ্মণ বুঝিল যে, এই মাহেন্দ্রক্ষণ,—এই সুযোগে নবকৃষ্ণের নিকট হইতে কিছু আদায় হইতে পারে। সে সুদীর্ঘ শিখা আন্দোলন করিয়া কহিল, “আমি লারবো ভাই!” নবকৃষ্ণ অত্যন্ত বিরক্ত হইয়া জিজ্ঞাসা করিল, “লারবি কেন,—কাজটা এমন আর কি কঠিন?” ব্রাহ্মণ দ্বিতীয়বার শিখা আন্দোলন করিয়া কহিল, “রাজা মালুম বটে, ডর লাগে।” নবকৃষ্ণ বড়ই বিপদে পড়িল,—অমূল্য সময় নষ্ট হইয়া যায়। তখন সে তাম্বুর এক কোণ হইতে একপাত গঞ্জিকা বাহির করিয়া জিজ্ঞাসা করিল, “এইবার পারিবি ত?” ব্রাহ্মণ সানন্দে জিহ্বা বিস্তার করিয়া কহিল, “হাঁ।” নবকৃষ্ণ বাহির হইয়া গেল।

পথে যাইতে-যাইতে তাহার সহিত এক মুসলমানের দাক্ষাৎ হইল। সে তাহাকে এক দিন ভূপেন্দ্রের নিকট সুপারিস করিয়া বেড়াষাত হইতে রক্ষা করিয়াছিল। তাহাকে দেখিয়া সানন্দে বলিয়া উঠিল, “এই যে দোস্ত, বড় শুভকণ্ঠেই দেখা হইয়াছে। আমার এক দোস্তের ঘরে আজ মজলিস আছে,—”

খুবস্বরং তওয়াইফ আসিবে ; তোমাকে আজ আর ছাড়িতেছি না।” দুই-সরস্বতী নবকৃষ্ণের স্বক্ষে ভর করিয়াছিলেন, তাহার প্ররোচনায় সে বলিল, “চল দোস্ত, অনেকদিন ধরিয়া অনুরোধ করিতেছি, আজি আর তোমাকে ফিরাইব না। সমস্ত দিন শাহ্ জাদার দরবারে বসিয়া মাথাটা গরম হইয়া উঠিয়াছে, আজ আমার ছুটি।” মুসলমান পূর্বে শাহ্ জাদার শিবিরে নবকৃষ্ণের প্রতিপত্তি দেখিয়াছিল ; স্মতরাং সে তাহার কথায় সন্মত করিল না ; বরঞ্চ সরল মনে জিজ্ঞাসা করিল, “তুমি দরবারে কি কাজ কর বন্ধু ?” নবকৃষ্ণ বুক ফুলাইয়া কহিল, “আমি খাস খাজাকী।” নবকৃষ্ণের সহিত নানাবিধ আলাপ করিতে-করিতে মুসলমান তাহাকে নগরোপকণ্ঠে এক উত্থান-বাটিকায় লইয়া গেল। সেখানে অনেকগুলি মুসলমান যুবা একত্র আমোদ-প্রমোদ করিতেছিল। নবকৃষ্ণ তাহাদের নিকট পরিচয় দিল, তাহার নাম অসীম রায়। সে শাহ্ জাদা করকৃষ্ণসিয়রের অন্তরঙ্গ বন্ধু এবং তাহার খাস খাজাকী ; অনবরত রাজকার্য্যে পরিশ্রান্ত হইয়া একদিন বিশ্রাম করিতে আসিয়াছে। নবকৃষ্ণ মন খুলিয়া তাহাদিগের সহিত মিশিল ; একজনের অনুরোধে দুই পাত্র মত্তপান করিল ; দ্বিতীয়ের অনুরোধে চারি ছিলিম গঞ্জিকা সেবন করিল, তৃতীয়ের বাক্য অবহেলা করিতে না পারিয়া এক-লোটা ভাজ টানিয়া ফেলিল ; এবং চতুর্থের সনির্কঙ্ক অনুরোধে এক-বর্ষীয়সী বারনারীর কণ্ঠালিঙ্গন করিয়া অচেতন হইয়া গেল।

ইহার অর্দ্ধদণ্ড পরে এক দীর্ঘাকার মুসলমান যুবা সেই

উজানে প্রবেশ করিয়া অপর বয়স্কাদিগকে জিজ্ঞাসা করিল, “এ ব্যক্তিকে ?” সকলে কহিল, “রাজা অসীম রায়।” আগন্তুক জিহ্বা দংশন করিয়া কহিল, “তোবা, তোবা, এ হারামখোর কোথা হইতে আসিল ?” মগ্ধপের মোহিত হইতে অধিকক্ষণ লাগে না ; সুতরাং আগন্তুকের বয়স্কাগণ নবকৃষ্ণের সরলতায় ও ব্যবহারে মুগ্ধ হইয়াছিল। তাহার একবাক্যে বলিয়া উঠিল, “হাঁ হাঁ, কর কি ? অমন কথা মুখে আনিও না, রাজা-সাহেব বড় মজাদার আদমী।” আগন্তুক ক্র-কুঞ্চিত করিয়া কহিল, তাহাতে আমার কোন আপত্তি নাই, কিন্তু মণিয়া আসিতেছে যে ?” সংবাদ শুনিয়া মাদক-বিহ্বল যুবকবৃন্দ উন্মত্ত হইয়া উঠিল, তাহাদিগের মধ্যে একজন কহিল, “মণিয়া আসিতেছে ! উত্তম কথা, তাহাতে রাজা-সাহেবের কি ?” আগন্তুক বিস্মিত হইয়া কহিল, “তুমি কি জান না, মণিয়া যে ইহার জন্ত দেওয়ানা।” “তুমি পাগল হইয়াছ করীদ খাঁ ? আমাদের মণিয়াটাদ কি এমন বানরের কণ্ঠলগ্না হয় ? তুমি নিশ্চিন্ত মনে তাহাকে লইয়া আইস।” উজানস্বামী ফরীদ খাঁও তখন ভাবিতেছিল যে, অসীম রায়ের এমন কি আকর্ষণী শক্তি আছে, যাহার জন্ত মণিয়া তাহার প্রথম ঘোঁবনে দেহ, মন প্রাণ সমস্তই নিবেদন করিয়া দিয়াছে। এই কথা ভাবিতে-ভাবিতে ফরীদ খাঁও মণিয়ার গৃহাভিমুখে চলিল।

ত্রয়স্ত্রিংশ পরিচ্ছেদ ।

ফরিদ্ খাঁর উদ্যান

অসীম শিবির পরিত্যাগ করিয়া সেই নিদাঘ-মধ্যাহ্নে অনশনে, পাটনা নগরের পথে-পথে উন্মাদের গায় ভ্রমণ করিতে লাগিলেন। ক্রমে অপরাহ্ন সমাগত হইল; মানসিক উত্তেজনা সত্ত্বেও পরিশ্রান্ত দেহ আর উদ্বেগহীন ভ্রমণ সহ করিতে পারিল না। অসীম ক্ষুধা-তৃষ্ণায় অধীর হইয়া এক অশ্বখ-বৃক্ষের ছায়ায় বসিয়া পড়িলেন। সেই অশ্বখ-তলে একখণ্ড প্রস্তরের উপর বসিয়া জনৈক গৌরবর্ণ পশ্চিমদেশীয় যুবা নিশ্চিন্ত মনে ফুটাহা চর্ষণ করিতেছিল। সে অসীমের অবস্থা দেখিয়া জিজ্ঞাসা করিল, “আপনার বোধ হয় তৃষ্ণা পাইয়াছে। এই ইঁদারার জল বরফের গায় শীতল,—এক লোটা তুলিয়া দিব কি?” অসীম মাত্র মস্তক সঞ্চালন করিয়া সম্মতি জ্ঞাপন করিলেন। যুবা পিত্তল-পাত্রে গভীর কূপের শীতল জল উঠাইয়া আনিল। অসীম তাহা এক নিঃশ্বাসে পান করিয়া ফেলিলেন। তুই পাত্র জল শেষ করিয়া তবে অসীমের বাক্যস্মৃতি হইল। তিনি কহিলেন, “বন্ধু, বড়ই উপকার করিলে। তোমার নাম কি?” যুবা কহিল, “আমার নাম সভাচন্দ্র, নিবাস জলন্ধরে। উদয়ান্নের জন্ত এতদূরে আসিয়াছি। আপনার নিবাস?” অসীম তাহার সদালাপে প্রীত হইয়া কহিলেন, “আমার নিবাস? মুরশিদাবাদের নিকট

ডাহাপড়া। আমরা জাতিতে কায়স্থ। আমার নাম অসীমচন্দ্র রায়। শাহ্ জাদার ফৌজের সহিত মুরশিদাবাদ হইতে আসিয়াছি, কোথায় যাইব তাহা বলিতে পারি না।” সভাচন্দ্র ইত্যবসরে রুমালের ফুটাহাগুলি শেষ করিয়া আনিয়াছিল। এই সময়ে অসীম জিজ্ঞাসা করিলেন, “বন্ধু, আমাকে কিছু খাইতে দিতে পার?” শেষ মুঠাটা বদনে নিক্ষেপ করিয়া যুবা বলিয়া উঠিল, “এতক্ষণ বলিতে হয়, তাহা হইলে অর্ধেকগুলি দিতাম? এ অঞ্চলে ভদ্রলোকের যোগ্য খাদ্য কিছু পাওয়া যায় বলিয়া বোধ হয় না। তথাপি আমি একবার চেষ্টা করিয়া দেখি।” যুবা আসন পরিত্যাগ করিয়া উঠিল এবং পথ পার হইয়া এক তালবনে প্রবেশ করিল। অসীম অস্থখ-তলে বসিয়া রহিলেন। অল্পক্ষণ পরে সভাচন্দ্র একটা তালপত্রের পাত্রে করিয়া দুই মুষ্টি ফুটাহা একং কতকগুলি পক্ষ মহয়া লইয়া আসিল। অসীম অমৃত মনে করিয়া সেগুলি গলাধঃকরণ করিলেন। আহার শেষ হইলে অসীমের মূল্যের কথা স্মরণ হইল। সভাচন্দ্রকে জিজ্ঞাসা করিলেন। সে কহিল যে মূল্য দেওয়ার কোনই প্রয়োজন নাই; কারণ, সে এক সন্ন্যাসীর নিকট হইতে উহা চাহিয়া আনিয়াছে এবং সন্ন্যাসী এই মাত্র ভিক্ষায় বাহির হইয়া গেল।

অসীম ও সভাচন্দ্র ধীরে-ধীরে নগরোপকণ্ঠ পরিত্যাগ করিয়া নগরের দিকে ফিরিলেন। পথে আসিতে-আসিতে অসীম সহসা দাঁড়াইয়া গেলেন। একখানা রূপার তাঞ্জামে চড়িয়া যথোচিত সজ্জায় সজ্জিত একটি যুবতী সেই পথে যাইতেছিল,—

তাহার পরিচ্ছদ প্রচার করিতেছিল যে, সে বারনারী। যুবতী তওয়াইফের কাগদায় অসীমকে কুণীশ করিল। অসীম তাহা দেখিয়াই দাড়াইয়া গেলেন। সভাচন্দ্র কহিল, “দাড়াইলেন কেন?” অসীম কিন্তু তাহার প্রশ্ন বুঝিতে পারিলেন না। তাঁহার তখন প্রবল হাস্যোদ্বেক হইয়াছিল; এবং সে বেগ দমন করিতে না পারিয়া, জনাকীর্ণ প্রকাশ্য রাজপথে তিনি অকস্মাৎ হাসিয়া উঠিলেন। প্রভাত হইতে যে দুশ্চিন্তা তাঁহাকে গ্রাস করিয়া রাখিয়াছিল এবং তাঁহার স্বাভাবিক সদানন্দভাব আচ্ছন্ন করিয়াছিল, তাহা প্রবল বায়ুর মুখে একথণ্ড মেঘের ন্যায় সহসা বহু দূরে চলিয়া গেল। অকস্মাৎ একজন ধীর, শান্ত পথিককে হাসিতে দেখিয়া, দুই চারিজন পথিকও আশ্চর্য হইয়া গিয়াছিল। সভাচন্দ্র এত বিস্মিত হইয়াছিল যে, সে পড়িতে-পড়িতে রহিয়া গেল। সে জিজ্ঞাসা করিল, “আপনার শরীর কি অসুস্থ বোধ হইয়াছে?” কারণ, তাহার মনে হইল যে, তাহার সঙ্গী অকস্মাৎ উন্মাদ হইয়া গিয়াছে। দুশ্চিন্তার দুর্ভার দূর হইবামাত্র অসীম প্রকৃতিস্থ হইয়াছিলেন। তিনি বলিয়া উঠিলেন, “না, কিছু না। তুমি চল ভাই, আমার মাঝে মাঝে অমন হাসি আসে।” সভাচন্দ্র এই সময়ে আর এক জন পথিককে জিজ্ঞাসা করিল, “তাজামে করিয়া গেল—ও স্ত্রীলোকটি কে?” পথিক বিস্মিত হইয়া জিজ্ঞাসা করিল, “তুমি কি পার্টনায় নতুন আসিয়াছ না কি? ঐ স্ত্রীলোকটি বিখ্যাত তওয়াইফ মণিয়াবাদী।”

কিয়ৎক্ষণ পরে অসীম ও সভাচন্দ্র এক প্রশস্ত উদ্দানবাটিকার

চত্বরে প্রবেশ করিল। সে উদ্যানের মধ্যে অনেকগুলি ক্ষুদ্র-ক্ষুদ্র গৃহ ছিল,—সভাচন্দ্র তাহার একটির মধ্যে প্রবেশ করিয়া অসীমকে অভ্যর্থনা করিয়া বসাইল; এবং অনেকগুলি ঐক ফল একখানি থালায় সাজাইয়া তাঁহার সম্মুখে ধরিল। অসীম তাহার শয্যায় বসিয়া নিশ্চিন্ত মনে আহার করিতে আরম্ভ করিলেন।

সভাচন্দ্রের ক্ষুদ্র গৃহের নিকটে উদ্যান-মধ্যে একটি প্রকাণ্ড দীর্ঘিকা ছিল; তাহার প্রস্তর-নির্মিত ঘাটে বসিয়া কতকগুলি মৃগপ কলহ করিতেছিল। তাহার মধ্যে একজন বারবার বলিতেছিল, “জানিস—আমার নাম রাজা অসীম রায়।” কথাটা জুই তিনবার শুনিয়া অসীম গৃহের বাহিরে আসিয়া দাঁড়াইলেন; এবং মৃগপদিগকে দেখিয়া পুনরায় হাসিয়া উঠিলেন। সভাচন্দ্র এবার আর কিছু জিজ্ঞাসা করিল না। অসীম জিজ্ঞাসা করিলেন, “বন্ধু, এ উদ্যানটি কাহার?” সভাচন্দ্র কহিল, “স্ববাদারের দেওয়ানের।” “আমি তাঁহার সহিত একবার সাক্ষাৎ করিতে চাই।” “তিনি প্রায়ই এখানে আসেন না।” “তবে ইহার কাহার?” “তাঁহার পুত্র ফরীদ খাঁর সঙ্গী।” “ভাল কথা, ফরীদ খাঁর সহিত সাক্ষাৎ হইতে পারে?” “স্বচ্ছন্দে! ফরীদ খাঁ খোশ্-মেজাজী লোক,—তাঁহাকে বলিলেই তিনি হয়ত এখানে আসিয়া উপস্থিত হইবেন। যদি অমুমতি করেন ত দেখিয়া আসি, তিনি এখন আছেন কি না।” অসীম মন্তক সঞ্চালন করিয়া সম্মতি জ্ঞাপন করিলেন,—সভাচন্দ্র বাহির হইয়া গেল।

সহসা অসীমের স্মরণ হইল যে, তাহার উপদেশ মত শাহ-জাদা ফররুখ্‌সিয়র দিল্লীর সিংহাসন লাভের জন্ত অত্ন হইতেই চেষ্টা আরম্ভ করিয়াছেন; এবং তাঁহাকে শিবির পরিত্যাগ করিয়া অধিকক্ষণ বাহিরে থাকিতে নিষেধ করিয়া দিয়াছেন। সঙ্গে-সঙ্গে মনে পড়িয়া গেল যে, তাহার বৃদ্ধ অধ্যাপক বলিতেন, কামিনী ও কাঞ্চন জগতের সমস্ত অনর্থের মূল। তিনি যাহার জন্ত ব্যাকুল হইয়া সমস্ত দিন নগরের পথে-পথে ভ্রমণ করিয়াছেন, সে যথারীতি প্রসাধিতা হইয়া সন্ধ্যাগমে নবনায়কসম্ভাষণে চলিয়াছে। শিবিরে ফিরিয়া যাইবার জন্ত অসীম অত্যন্ত অস্থির হইয়া উঠিলেন।

এই সময়ে সভাচন্দ্র ফিরিয়া আসিল; কিন্তু সে কিছু বলিবার পূর্বেই অসীম জিজ্ঞাসা করিলেন, “বন্ধুসল, বৈশী জাঁড়ে যোগাড় করিয়া দিতে পার?” সভাচন্দ্র এক রকম এইখানেই করিল, “আমার প্রভুপুত্রের সহিত সাক্ষাৎ বসিয়া গেলাম কি? নহে, ফিরিয়া আসিয়া। দোস্তু, হঠাৎ এখানে বিলম্ব করিতে-কাজের কথা মনে হইয়াছে। কথাটা এত হইলে আমি একটা ঘোড়া কিনিতে পর্যাস্ত র হইয়া উঠিল। সভাচন্দ্র হাসিয়া কহিল, “পরস্য হইলে ছনিয়ায় হয় না যুথের দিকে অতি অল্পই আছে।” তাহার কথা শুনিয়া অসীম ক্রম করিয়া মোহর বাহির করিয়া তাহার হস্তে দিলেন। সভাচন্দ্র তাহা তিনি পুনরায় বাহিরে চলিয়া গেল। এই সময়ে উদ্ভানে মধ্যকাল তারস্বরে চীৎকার করিয়া উঠিল। তাহা শুনিয়া অসীম অ-

একবার বাহিরে আসিলেন ; এবং দেখিলেন যে, সকলে উৰ্দ্ধ হস্তে ‘মণিয়া-মণিয়া’ বলিয়া চীংকার করিতেছে এবং নৃত্য করিতেছে।

এই সময়ে সভাচন্দ্র ফিরিয়া আসিয়া কহিল, “মহাশয়, ঘোড়া কিনিতে পারি নাই। তবে একটা ভাড়া পাইয়াছি ; কিন্তু যাহার ঘোড়া সে রাতারাতি বড় মানুষ্য হইতে চাহে। কারণ, এক আশরফীর কম ঘোড়া ছাড়িতে চাহে না।” অসীম জিজ্ঞাসা করিলেন, “একটা ঘোড়ার ভাড়া এক আশরফী কত দিনের জন্ত ?” “যত দিন ইচ্ছা,—এক দিনই রাখুন, আর এক মাসই রাখুন।” “এক আশরফী দিয়া ঘোড়াটা লইয়া গিয়া যদি ফিরিয়া না আসি ?” “দোস্ত, যে এক দিনের জন্ত এক আশরফী ঘোড়ার এবাধ আছে, সে কি আর তাহার ব্যবস্থা না করিয়াছে ?” “কি বন্ধু, এ উত্তানটি : “নগদ তিন আশরফী জমা না রাখিলে দেওয়ানের।” “আমি।”

চাই।” “তিনি প্রায়শ্চেষ্টে আরও দুইটা আশরফী লইয়া সভাচন্দ্র কাহার ?” “তাঁহা স্বর্গদেবতার অর্থ আনিয়া উপস্থিত করিল। ফরীদ খাঁর সহি দেখিয়া হাসিয়াই অস্তির হইলেন। অশ্বপৃষ্ঠে থাঁ খোশ-করিয়া তিনি সভাচন্দ্রকে কহিলেন, “দেখ বন্ধু, এ এখানে দি পথে মরিয়া যায়, তাহা হইলে কি আমার আশরফী দেখিয়া মারা যাইবে ?” সভাচন্দ্র কহিল, “সে কথাটা জিজ্ঞাসা সঞ্চাল নাই। আপনি ত ফিরিয়া আসিতেছেন, আসিলেই হইত্তর পাইবেন।”

চতুস্ত্রিংশ পরিচ্ছেদ

সরস্বতীর কষ্টব্য

সন্ধ্যার প্রাকালে গৃহের সম্মুখে অস্থতলে কমল বিছাইয়া হরিনারায়ণ তামাকু সেবন করিতেছিলেন,—এই সময়ে সরস্বতী বৈষ্ণবী সেই স্থানে আসিয়া অদূরে উপবেশন করিল। হরিনারায়ণ হঁকা হইতে মুখ তুলিয়া জিজ্ঞাসা করিলেন, “কি সরস্বতী, খবর কি?” সরস্বতী প্রণাম করিয়া কহিল, “খবর আর কি বাবাঠাকুর, আপনার চরণ দর্শন পাইয়া মনে করিয়াছিলাম যে, এই আশ্রয়েই অনেকটা পথ কাটিয়া যাইবে।” “কেন, তুমি কি আমাদের ছাড়িয়া চলিবে না কি?” “কি আর করি বাবা, বৃন্দাবন অনেক দূরের পথ, শীতও পড়িয়া আসিল, বেশী জাড়ে কি পথ চলিতে পারিব? আপনারা ত এক রকম এইখানেই বসিয়া গেলেন!” “সে কি সরস্বতী, বসিয়া গেলাম কি? আমরাও ত শীঘ্রই কাশী যাইব।” “তবে এখানে বিলম্ব করিতেছেন কেন বাবাঠাকুর?”

প্রশ্ন শুনিয়া হরিনারায়ণের সহাস্ত বদন গম্ভীর হইয়া উঠিল। সরস্বতী উত্তর পাইবার আশায় দুই একবার তাঁহার মুখের দিকে চাহিল; কিন্তু কপালে ভ্রুকুটী দেখিয়া মন্তক অবনত করিয়া বসিয়া রহিল। তখন হরিনারায়ণ ভাবিতেছিলেন যে, তিনি পাটনায় বসিয়া কি করিতেছেন? তাঁহার মন এ প্রশ্নের কোন

সহুত্তর দিতে পারিল না। সে জ্ঞাত তাঁহার চিন্তা বাড়িয়া গেল। তিনি অত্যাচার প্রাপীড়িত হইয়া দেশের বাস উঠাইয়া বারাণসী যাত্রা করিয়াছিলেন; পথে অসীম রায়ের সহিত সাক্ষাৎ হইয়াছিল। বাদশাহের পৌত্র পাটনায় আছেন বলিয়া, অসীম ও ভূপেন পাটনায় আছে; কিন্তু তিনি কি জ্ঞাত পাটনায় রহিয়াছেন? তাঁহার মন এ প্রশ্নের কোন সহুত্তর দিতে পারিল না। হরিনারায়ণ বিরক্ত হইলেন,—তাঁহার নিজের মনের উপরে ক্রুদ্ধ হইলেন। পঞ্চাশদ্ব্যাপী জীবনে তাঁহার মন তাঁহার নিকটে কখনও এইরূপ বার-বার অপরাধী হয় নাই। পাটনায় আসিয়া বাসা ভাড়া লইয়া এতদিন বাস করিবার কি আবশ্যকতা ছিল? অসীমের সহিত বাদশাহের পৌত্রের পরিচয় হইয়াছে বটে, কিন্তু তাহার জ্ঞাত তাঁহার পাটনায় থাকিবার কোনই প্রয়োজন ছিল না। সুদর্শনের যদি কোন চাকরী হয়, তাহার জ্ঞাত সে থাকিতে পারে; কিন্তু তিনি কেন বারাণসী চলিয়া যান নাই? সেই দিন তৃতীয়বার হরিনারায়ণ বিছালঙ্কারের মন প্রশ্নের সহুত্তর দিতে পারিল না।

সন্দেশ কাণে-কাণে বলিয়া গেল যে, ইহার ভিতরে একটা গুরুতর দুর্ভাগ্য আছে। মন বলিল, “না”; কিন্তু তাহার কথা গ্রাহ্য হইল না; কারণ, সে বার-বার তিন বার প্রশ্নের উত্তর দিতে পারে নাই। সুবিধা পাইয়া সন্দেশ আবার কহিল, ইহার ভিতর নিশ্চয় একটা চক্রান্ত আছে। কে তাঁহাকে পাটনায় বাস করিতে পরামর্শ দিয়াছিল? সুদর্শন। সুদর্শন

তাঁহার পুত্র, কিন্তু সে অসীমের বন্ধু। সে নিৰ্বোধ নহে, কিন্তু সে সুরলচিত্ত; সে কি অসীমের পরামর্শে তাঁহাকে পাটনায় বাস করিতে অহুৰোধ করিয়াছিল। অসীমের তাহাতে স্বার্থ কি? দুর্গার জ্ঞা? তবে কি অসীম দুর্গার জ্ঞার? বৃদ্ধ ব্রাহ্মণের মস্তিষ্ক-মধ্যে ক্ষীত্র জ্বালা অহুভূত হইল। কলিকার আগুন নিবিয়া গিয়াছিল,—কাঠকয়লার ছাই হাওয়ায় উড়িয়া সৰ্ব্বাঙ্গে বেড়াইতে দিল;—তাহা দেখিয়া সরস্বতী জিজ্ঞাসা করিল, “আর একটা সাজিয়া আনিব কি বাবাঠাকুর?” বিজালঙ্কার অত্যন্ত বিবক্ত হইয়া বলিয়া উঠিলেন, “না।” সরস্বতী ভয়ে জড়সড় হইয়া বাসিল। কিয়ৎক্ষণ পরে বিজালঙ্কার সরস্বতীকে জিজ্ঞাসা করিলেন, “দেখ বৈষ্ণবী, আমি যে কাশী না গিয়া এতদিন কেন বৃথা বিলম্ব করিয়াছি, তাহা কিছুতেই বুঝিতে পারিতেছি না।” সরস্বতী কহিল, “হঁ।” হরিনারায়ণ তখন সরস্বতী বৈষ্ণবীর অস্তিত্ব বিস্মৃত হইয়া পুনরায় চিন্তাগগন হইলেন। অসীম যদি দুর্গার জ্ঞার, তাহা হইলে সে নিত্য তাঁহার গৃহে আসে না কেন? দুর্গাও কখন তাহার নাম করে না। হয় ত স্মৃদর্শন বা ভূপেন না জানিয়া দৌত্যকার্য্য সম্পন্ন করে। ইহা যদি সত্য হয়, তাহা হইলে দুর্গা কখনও সহজে পাটনা পরিত্যাগ করিতে চাহিবে না। স্মতরাং তাহাকে প্রশ্ন করিলেই রহস্য সহজেই উদঘাটিত হইবে।

হরিনারায়ণ আসন ত্যাগ করিয়া উঠিলেন এবং কূপ হইতে জল লইয়া মুখ প্রক্ষালন করিলেন। বধু আসিয়া জানাইল যে, আহিকের আয়োজন প্রস্তুত। তিনি কহিলেন, “মা, আমি

গঙ্গাতীরে চলিলাম, আফ্রিক সেইখানেই সারিয়া লইব। তুমি একবার দুর্গাকে ডাকিয়া দাও।” কন্না আসিলে বৃদ্ধ জিজ্ঞাসা করিলেন, “মা, আমি গঙ্গাতীরে যাইতেছি,—বাজার হইতে কি কোন জিনিষ আনিতে হইবে?” দুর্গা বলিলেন, “কিছু না বাবা। তবে আমার গঙ্গামাটি ফুরাইয়া গিয়াছে; যদি পার ত একটুখানি হাতে করিয়া আনিও,—কারণ, আমার দুই দিন শিবপূজা বন্ধ আছে।” “ভাল কথা মনে করাইয়া দিলে মা। আমরা ত দেখিতেছি মুরশিদাবাদ ছাড়িয়া পাটনায় বাস করিলাম। বিশ্বনাথ কি তবে বিমুখ হইলেন?” “বাবা, আমিও তোমাকে বলিব-বলিব মনে করিয়া বলিতে পারি নাই। দাদা যদি মেজদাদার কাছে থাকিতে চাহে, তবে চল না কেন, বোকে পাটনায় রাখিয়া আমরা কাশী চলিয়া যাই?”

উত্তর শুনিয়া হরিনারায়ণ স্তব্ধ হইলেন। অসীম যদি দুর্গার জ্ঞান, তবে সে কেন স্বেচ্ছামনে তাহাকে ছাড়িয়া যাইতে চাহে? সেইদিন চতুর্থবার বিজ্ঞানকারের মন প্রশ্নের সছত্তর দিতে পারিল না। কিছুই স্থির করিতে না পারিয়া চিন্তাঘূর্ণিত মনে বিজ্ঞানকার গৃহ হইতে নিষ্কান্ত হইলেন। পৃথ্বীতে তাঁহার সহিত স্মদর্শন ও ভূপেনের সাক্ষাৎ হইল। তাহাকে দেখিয়া স্মদর্শন সাগ্রহে জিজ্ঞাসা করিল, “হাঁ বাবা, ছোট রায় কি এখানে আসিয়াছে?” বিজ্ঞানকার কহিলেন, “না।” ভূপেন কহিল, “ঠাকুর মহাশয়, দাদাকে আর নবা খানসামাকে সকাল হইতে খুঁজিয়া পাওয়া যাইতেছে না। দাদা একবার শাহজাদার দরবারে গিয়াছিল।

আফরাশিয়ব খাঁ কহিল যে, তাঁহার সন্ধ্যাবেলায় দরবারে ফিরিবার কথা আছে ; কিন্তু এখনও তাঁহার দেখা নাই।” বিছালকার তাহার প্রশ্নের উত্তর না দিয়া, সুদর্শনকে কহিলেন, “সুদর্শন, তুমি আসিয়াছ, ভালই হইয়াছে। আমি আর গঙ্গাতীরে যাইব না,— তোমায় সহিত একটা পরামর্শ আছে।” উদারচিত্ত সুদর্শন কহিল, “বাবা, যতক্ষণ ছোট রায়ের সন্ধান না মিলিতেছে, ততক্ষণ আমার সহিত পরামর্শ করিয়া বিশেষ কোন ফল হইবে না।” বৃদ্ধ ক্রুদ্ধ হইয়া জিজ্ঞাসা করিলেন, “হাঁরে সুদর্শন, ছোট রায় তোর কে?” সুদর্শন মাথা চুলকাইতে চুলকাইতে কহিল, “তাহা এত সহজে বলিতে পারিলাম না বাবা।” “তুই জানিস, আমি কি কারণে গৃহ ত্যাগ করিয়া আসিয়াছি?” “আপনার বন্ধু হরনারায়ণের জন্ত।” “সে অসীমের কে?” “বৈমাত্রেয় ভ্রাতা এবং বিয়ম শত্রু।” “তুই জানিস, অসীম সমস্ত অনর্থের মূল?” সরলচিত্ত সুদর্শন সম্মিত বদনে কহিল, “না।” পুত্রের উত্তর শুনিয়া বৃদ্ধ দ্বিতীয়বার স্তব্ধ হইলেন। মনকে জিজ্ঞাসা করিলেন, ভগিনীর কলঙ্ককথা শুনিয়াও সুদর্শন কেন অসীমের পক্ষাবলম্বন করে? সে-সময়ে ভূপেন অস্তঃপুরে গিয়াছিল। সুদর্শন তাহাকে ডাকিয়া কহিল, ভূপেন, বাহরে আয়।” দূর হইতে ভূপেন কহিল, “ধাই।” সহসা বিছালকার বলিয়া উঠিলেন, “দেখ সুদর্শন, আমরা আর কেন পাটনায় বসিয়া থাকি ; চল, কাশী যাই।” সুদর্শন কাতর হইয়া কহিল, “বাবা, একটা দিন অপেক্ষা করুন,—ছোট রায়ের সন্ধান পাইলেই

আমি নৌকা ঠিক করিয়া আসিব।” “তুমি না হয় বৌমাকে ও দুর্গাকে লইয়া এইখানে বাস কর,—আমি বৃদ্ধ হইয়াছি,—আমি একাই বারাণসী যাত্রা করি।” “উহারা এখানে কি করিবে? বরঞ্চ আপনার সঙ্গে থাকিলে আপনার সেবা করিতে পারিবে। আর আমিও ছোট রাঘের সঙ্গে টিকিতে পারিব বলিয়া বোধ হয় না। অনেকক্ষণ তাহার সন্ধান পাই নাই বলিয়া মনটা ব্যাকুল হইয়াছে। সে ফিরিয়া আসিলেই সকলে মিলিয়া যাত্রা করিব।” পুত্রের উত্তর শুনিয়া বিদ্যালঙ্কার তৃতীয় বার স্তব্ধ হইলেন।

সুদর্শন ভূপেনকে ডাকিয়া কহিল, “ওরে কাণা বাঁদর, বাড়ীর ভিতর বসিয়া কি করিতেছিস,—গিলিতে বসিয়াছিস বুঝি? আর সে যে সমস্ত দিন অনাহারে আছে।” হরিনারায়ণ বধুকে আহ্বিকের আয়োজন করিতে বলিয়াছেন, সে-কথা বিস্মৃত হইয়া গঙ্গাতীরোত্তরে যাত্রা করিলেন। সরস্বতী বৈষ্ণবী এতক্ষণ দুয়ারের অন্তরালে লুকাইয়া ছিল;—বিদ্যালঙ্কার গৃহত্যাগ করিলে, সে গৃহ-মধ্যে প্রবেশ করিল।

পঞ্চত্রিংশ পরিচ্ছেদ

নবকুষ্ঠের পতন

উজান-বাটিকার মধ্যস্থিত একটি ক্ষুদ্র কক্ষ তামাকুর ধূম, মিষ্ট মদিরার গন্ধ, গণিকার সুকণ্ঠোথিত গীতধ্বনি ও মজার

অব্যক্ত কোলাহলে পরিপূর্ণ হইয়া উঠিয়াছিল। রজনীর দ্বিতীয় প্রহর শেষ হইয়াছে;—মিষ্ট পারসীক মদিরা তখন গণিকাকণ্ঠেও জড়তা আনয়ন করিয়াছে; সেই সময়ে দুইজন যুবা সেই ক্ষুদ্র কক্ষে প্রবেশ করিল। তাহাদিগকে দেখিয়া যাহারা উত্থানশক্তি রহিত হয় নাই, তাহারা উঠিয়া দাঁড়াইল; যাহারা উত্থানশক্তি রহিত হইয়াছিল,—তাহারা উঠিবার চেষ্টা করিল; এবং গণিকাত্রয় সসম্মমে অভিবাদন করিল। দুইজন নবাগত ব্যক্তির মধ্যে একজন, যে গণিকা গায়িতেছিল তাহাকে গায়িতে নিষেধ করিয়া অপরাধে কহিল, “মণিয়াজান, ইনি আমার নূতন বন্ধু, নাম গায়েব। তুমি আমাদের পাটনা সহরের বুলবুল। তোমার আওয়াযের মত মিঠা আওয়ায বোধ হয় কখনও ইহার কণ্ঠকূহে প্রবেশ করে নাই। একবার মেহেরবানী কর।” মণিয়া উঠিয়া গৃহস্থামীর বন্ধুকে দ্বিতীয়বার অভিবাদন করিল এবং জিজ্ঞাসা করিল, “ফরীদ, তোমার বন্ধুর নামটা কি, গায়েব? না নামটা উপস্থিত গায়েব আছে?” আগন্তুক ঐষং হাসিল; কিন্তু উত্তর দিল না। তাহা দেখিয়া মণিয়া কহিল, “গায়িব কি ভাই, আমার মাগুক আর কথা কহিতেছে না।” ফরীদ থা বিস্মিত হইয়া জিজ্ঞাসা করিল, “পিয়ার, আবার কে নূতন মাগুক জুটিল?” মণিয়া কুণীশ করিয়া, কক্ষের কোণে এক বিবস্ত্র যত্নপকে দেখাইয়া দিল, এবং কহিল, “ইনি রাজা অসীম রায়, বাঙ্গালা মুলুকের আমীর।” নাম শুনিয়া দ্বিতীয় আগন্তুক ঐষং হাসিয়া কহিল, “সত্য না কি? রাজা অসীম

রায়। তাঁহার সহিত আমার পরিচয় আছে।” তিনি অগ্রসর হইলেন। মণিয়া মণপের হাত ধরিয়া টানিয়া উঠাইল; এবং কহিল, “মাণ্ডুক, জানি, আমার কলিজা, একটা কথা কও!” মণপ কহিল, “আমি,——হিক—আমি——রাজা অসীম রায়।” মণিয়া তাহার মুখের নিকট ঝুঁকিয়া পড়িয়া কহিল, “আলবৎ, জরুর। তুমি রাজা অসীম রায়। কোন্ দাগাবাজ বলে তুমি অসীম রায় নও। পিয়ার, তোমার মলুক হইতে এক দোস্ত আসিয়াছে— একবার চোখ মেলিয়া দেখ—আমায় একবার জানি বলিয়া ডাক।” মণিয়ার উত্তেজনায় মণপ বহু কষ্টে চক্ষুঃস্নান করিয়া আগন্তকের দিকে চাহিল। তাহাকে দেখিয়াই তাহার চক্ষু স্থির হইয়া গেল! সে বলিয়া উঠিল, “বাপ!” মণিয়া কৃত্রিম সোহাগে তাহার কণ্ঠালিঙ্গন করিয়া কহিল, “জানি, কি হইয়াছে জানি?” মণপ চক্ষু মুদ্রিত করিয়া জড়িত কণ্ঠে কহিল, “না বাবা, আমি তোমার জানি না, বাপ! আমি যমের বাড়ী যাব।” মণিয়া ক্রন্দনের ভান করিয়া বলিয়া উঠিল, “আমার জানি কেন এমন করে গো,—তোমরা সকলে দেখ না গো!”

দ্বিতীয় আগন্তুক অগ্রসর হইয়া মণপকে ডাকিলেন, “হজুর!” মণপ জড়িত কণ্ঠে কহিল, “হজুর!” গৃহস্থামী দরদীর্ঘা বিস্মিত হইয়া তাঁহার মুখের দিকে চাহিল। আগন্তুক পুনর্বার মণপকে জিজ্ঞাসা করিলেন, “তুই এখানে কি করিতেছিস নবা?” সে কহিল, “রাজা সাজিয়াছি হজুর।” “কেন সাজিলি?” “বেকুবী, মণিয়া ততক্ষণ তাহার কণ্ঠালিঙ্গন করিয়াই ছিল।

সে বলিয়া উঠিল, “জানি, কি বলিতেছ জানি?” নবকৃষ্ণ চক্ষু মুদ্রিত করিয়াই কহিল, “পয়জার, বাপধন, এখন ছেড়ে দে।”

গৃহস্থামী ফরীদ খাঁ আগন্তুককে জিজ্ঞাসা করিল, “দোস্তু, রহস্যটা কি বুঝিতে পারিলাম না।” আগন্তুক ঈষৎ হাসিয়াই কহিলেন, “উহাকেই জিজ্ঞাসা করুন না কেন।” ফরীদ খাঁ মছপের নিকট অগ্রসর হইয়া জিজ্ঞাসা করিল, “কি দোস্তু, ব্যাপার কি?” মছপ চক্ষু মুদ্রিত করিয়া ধীরে-ধীরে কহিল, “পয়জার।” “কেন, পয়জার কেন?” “রাজা সাজিয়াছি বলিয়া।” “তুমি কে?” “নবা খানসামা।” তাহার শেষ কথা শুনিয়া সকলে সম্মুখে জিজ্ঞাসা করিয়া উঠিল, “খানসামা—কাহার খানসামা?” “রাজা অসীম রায়ের।” মণিয়া কৃত্রিম দীর্ঘশ্বাস ত্যাগ করিয়া কহিল, “জানি, তবে তুমিও দাগাবাজ! তুমি তবে রাজা অসীম রায় নও?”

এই সময়ে আগন্তুক তীব্রস্বরে ডাকিল, “নবা।” মছপ অধিকতর জড়িত কণ্ঠে উত্তর দিল, “হজুর।” “উঠিয়া আয়।” নবকৃষ্ণ উঠিবার চেষ্টা করিয়া, টাল খাইয়া পড়িয়া গেল। মণিয়া খিলখিল করিয়া হাসিয়া উঠিল। আগন্তুক ক্রোধে ভ্রুকৃষ্ণিত করিয়া গৃহস্থামীকে কহিল, “আপনি মেহেরবানী করিয়া ইহাকে বাহির করিয়া দিন, এবং মাথায় দশ মসক জল ঢালাইয়া দিন।” ফরীদ খাঁর আদেশে দুই-তিনজন পরিচারক আসিয়া নবকৃষ্ণকে বাহিরে লইয়া গেল। মজলিস পুনরায় জমিল।

গৃহস্থামীর আদেশে আর দুইজন গণিকা গীত গাহিল; কিন্তু

কেহই মণিয়াকে গাওয়াইতে পারিল না। মণিয়া কহিল, “যাহারা গায়েব থাকে, তাহাদের সম্মুখে গাহিতে বড় লজ্জা করে।” ইহা শুনিয়া ফরীদ খাঁ আগন্তুককে কহিল, “দোস্তু, অন্ততবে বুঝা গেল যে, এখানে কেবল তুমিই গায়েব আছ। আমাদের পাটনা সহরের বুলবুল বড় দিলখুলাসা। তুমি আপনার দিলটা খুলাসা করিয়া প্রকাশ হইয়া বড়,—তাহা হইলেই বুলবুলের মিঠি আওয়াজ শুনিতে পাইবো।” এই সময়ে মণিয়া কৃত্রিম লজ্জায় মস্তকের অবগুষ্ঠন ঈষৎ টানিয়া দিয়া, অপাঙ্গে মনো-বিমোহন কটাক্ষ সন্ধান করিল। সে কটাক্ষ ক্ষুদ্র কক্ষে কাহারও দৃষ্টি অতিক্রম করিল না,—সকলেই অল্পবিস্তর হাসিল। লজ্জায় আগন্তকের মুখ রক্তবর্ণ হইল। এক বৃদ্ধ রসিক উঠিয়া তাঁহার নিকটে গিয়া কহিল, “জনাব, আপনার মত নসীব কয়জনের হয়? মণিয়া ইচ্ছা করিয়া যাহার দিকে অমন করিয়া চাহে, সে খোদার বড়ই প্রিয়পাত্র। কত আমীর-ওমরাহ ঐ গোলাপী চরণে আশ্রয় পাইবার জন্য বাদশাহের দৌলৎ লুটাইয়া দিয়া গিয়াছে, তাহার ইয়ত্তা নাই। আজ যে চাহনি মণিয়াজান বিনামূল্যে তোমার উপর বর্ষণ করিল, তাহার লক্ষ অংশের জন্য কত রাজার রাজ্য গিয়াছে। দোস্তু, তুমি আমার তুলনায় এখনও বালক, এমন মওকা হেলায় হারাইও না। নিজ নামটি প্রকাশ করিয়া ফেল,—তোমার সহিত আমরাও বেহেস্তে চলিয়া যাই।”

মণিয়া চক্ষুর কোণে হেনার আঁতর লাগাইয়া দুইদশ বিন্দু

অশ্রুবিসর্জন করিল; এবং সুগন্ধসিক্ত রেশমের কুমাল দিয়া তাহা বারবার মুছিয়া, রক্তবর্ণ করিয়া তুলিল। তাহা দেখিয়া একজন ভাবুক সুরা-বিহ্বল চিত্তে সত্যাসত্যই কাদিয়া ফেলিল এবং আগন্তকের পদদ্বয় জড়াইয়া ধরিয়া মদিরা-জড়িত কণ্ঠে মিনতি করিতে লাগিল। আগন্তক বিরক্ত হইয়া গৃহস্থামীকে কহিলেন, “আমাকে অনুমতি করুন, আমি এখন গৃহে ফিরিয়া যাই।” ফরীদ খাঁ ভদ্রসন্তান,—তিনি সঙ্গিগণের ব্যবহারে লজ্জিত হইয়া কহিলেন, “আপনার সহিত আমরা বড়ই অগ্নায় ব্যবহার করিয়াছি; আপনি আমাদের মাফ করুন।” আগন্তক উঠিয়া দাঁড়াইয়া কহিলেন, “মাফ করিবার কিছুই নাই,—ক্ষুতির আসরে এইরূপ হইয়াই থাকে। রাত্রি অধিক হইয়াছে, আমি তবে বিদায় হইলাম।” আগন্তক কক্ষের দ্বারের দিকে অগ্রসর হইবার পূর্বেই, মণিয়া ক্ষিপ্ৰহস্তে একজন বাদকের নিকট হইতে একটা এস্রাজ ছিনাইয়া লইয়া, সেই কক্ষের একমাত্র প্রবেশপথে বসিয়া গেল, এবং গায়িল :—

“সখি, হামে ছোড়ি ঘাতি বংশীধারী, •

নিঠুর কপট শঠ মোহন মুরারী ॥

সারা দিবস রজনী, কহ, কহলো সজনী,

রাধা কাহার ধোয়ানী,

সখি রি চিকণকাল বড়ি অহঙ্কারী ॥

মিছা এ মোহন বেশ চিঞ্চ বিনন কেশ,

আজু সব ভেল শেষ,

চলি যায় শ্রামরায় ছোড়িয়ে পিয়ারী ॥”

গান শেষ করিয়া মণিয়া সত্য-সত্যই কাঁদিয়া ফেলিল।
আগন্তুক স্তম্ভিত হইয়া দাঁড়াইয়া রহিলেন। অল্পক্ষণ পরে মণিয়া
উঠিয়া দাঁড়াইয়া কুণিস করিল এবং পথ ছাড়িয়া দিল। আগন্তুক
কক্ষ পরিত্যাগ করিলে একজন জিজ্ঞাসা করিল, “মণিয়াজান,
এত খাতির করিলে,—লোকটা কে?” মণিয়া গম্ভীরভাবে উত্তর
দিল, “বাহার নফরকে এতক্ষণ এত খাতির করিলে এ সেই।”
ভাবুক ভাববিহ্বল হইয়া বলিয়া উঠিল, “আরে নাদান,
আশনাইয়ের ফের তুই কি বুঝবি বল?”

সে রাত্রিতে ফরীদ খান মজলিস আর তেমন করিয়া
জমিল না।

ষট্‌ত্রিংশ পরিচ্ছেদ

জ্যোতিষী

সরস্বতী প্রত্যুষে গঙ্গাস্নান করিতে গিয়াছিল। সে কোন্
পথে গিয়াছিল, বিজ্ঞানকার তাহা দেখিতে পান নাই। তিনি
যখন গঙ্গাতীরে আফ্রিক সারিয়া সহরে ফিরিতেছেন, তখন

দেখিলেন যে, সরস্বতী এক সন্ন্যাসীর আখড়ায় একটি তুলসীমঞ্চ দেখিয়া স্নানান্তে অসংখ্য প্রণাম করিতেছে। তাঁহাকে দেখিয়া বৈষ্ণবী বলিয়া উঠিল, “আ দাদাঠাকুর, কি লক্ষ্মীছাড়া দেশ! সবগুলুই কি অধম্মে ঠাকুর?” “অধম্মে ঠাকুর কি সরস্বতী?” “ঐ যে, আমার নাম করিতে নাই,—বেলপাতা না হইলে যাহার পূজা হয় না।” “কি জালা, শিব ঠাকুর বুঝি?” “রাধে মাধব, যেমন ঠাকুরের রূপ, তেমনই ঠাকুরের ছিঁড়ি! গঙ্গাস্নান করিয়া সারাটা সকাল একটা রাধাকৃষ্ণের মন্দির খুঁজিয়া বেড়াইতেছি।” “রাধাকৃষ্ণ ছাড়া বুঝি আর ঠাকুর বলিতে নাই?” “আমি বৈষ্ণবের মেয়ে বাবা, কেমন করিয়া তোমাদের ঠাকুরকে ঠাকুর বলি বল? সে কথা যাক, গোপীনাথ কবে দয়া করিবেন বল দেখি?” “সকল বৈষ্ণবই কি এই কথা বলে?” “কেমন কথা বাবা, অধম্মে ঠাকুরের না গোপীনাথের?” “গোপীনাথ মাথায় থাকুন, অধম্মে ঠাকুরের কথাই বলিতেছি।” “না, তা কেন বাবা, এই ভরতপুরের গৌসাইবাড়ীর ছোট বৌ সেই রাক্ষসীর বাড়ীর—” “রাক্ষসীর বাড়ীর কি সরস্বতী?” “তুমি জালাতন করিলে বাবাঠাকুর, সেই যে গো জ্যাস্তো থেকো মাগী!” “জ্যাস্তো থেকো, ও: জীবন্ত! সরস্বতী কি কিরীটেশ্বরীর মার কথা বলিতেছ?” “হ্যাঁ, হ্যাঁ, আমাদের কি ও নাম করিতে আছে বাবা! তা, সেই রাক্ষসীর বাড়ীর বৌ আসিয়া গৌসাইবাড়ী নিত্য কাদা দিয়া অধম্মে ঠাকুর তৈয়ার করে তার পূজা হয়।” “ঐ, যা বলিলে!” “এইজন্যই এমন করিয়া বাঙ্গালা দেশে

আশুন লাগিয়াছে। সরস্বতী, গোপীনাথ ত এখনও স্মরণ করেন নাই, কবে যে করিবেন তাহাও জানি না।” “তাই ত দাদাঠাকুর, কাশীযাত্রা করিয়া আপনি যে পথে বড় বিষম আটকাইয়া গেলেন! আমি বড় ভরসা করিয়া আসিয়াছিলাম, যে আপনার সঙ্গে দেখা হইল, অনেকটা পথ আপনার আশ্রয়ে যাইব। তা, দাদাঠাকুর, আপনি আর এখানে কেন বসিয়া আছেন?” “এ কথার জবাব দেওয়া বড় সহজ নহে সরস্বতী! তুমি কালও একবার কথাটা জিজ্ঞাসা করিয়াছিলে, আমি কিন্তু সেই অবধি মনকে জিজ্ঞাসা করিয়া উত্তর খুঁজিয়া পাই নাই। বাহাই হউক, গোপীনাথ এখনও স্মরণ করেন নাই; সুতরাং আরও কিছুদিন পাটনায় অবস্থিতি আছে।”

কাশীযাত্রার কথা সে যে আর একবার জিজ্ঞাসা করিয়াছিল, এ কথাটা সরস্বতীর একেবারেই মনে ছিল না। সুতরাং বিদ্যালঙ্কার মহাশয়ের মুখে সে কথাটা শুনিয়া, সরস্বতী আত্ম-সম্বরণ করিতে না পারিয়া, জিহ্বা দংশন করিল, দুর্ভাগ্যক্রমে বিদ্যালঙ্কার তাহা দেখিতে পাইলেন।

সরস্বতী আর কোন কথা জিজ্ঞাসা না করিয়া গৃহে চলিয়া গেল। বিদ্যালঙ্কার অন্তমনস্ক হইয়া চিন্তা করিতে-করিতে, গৃহের পথ অবলম্বন না করিয়া অন্য পথে চলিলেন। সে পথটা দুইশত আট বৎসর পূর্বে তখনকার পাটনা সহরে চৌক বলিয়া পরিচিত ছিল। তখন প্রথম বাজার বসিয়াছে; সুতরাং চৌক জনাকীর্ণ। সেই জনতার মধ্যে পাষাণাজ্ঞাদিত পথে বসিয়া

এক হিন্দু জ্যোতিষী ভূমিতে রেখাঙ্কন করিয়া ভাগ্য গণনা করিতেছিল; এবং তাহার পার্শ্বে এক মুসলমান বৃদ্ধকক ঔষধের দোকান সাজাইয়া বসিয়াছিল। বৃদ্ধককের অদৃষ্ট তখনও প্রসন্ন হয় নাই; সুতরাং তাহার দোকানে খরিদারের নিতান্ত অভাব। জ্যোতিষী কর-রেখা দেখিয়া যথেষ্ট উপার্জন করিতেছিল; এবং তাহা দেখিয়া হিংসায় মুসলমান জলিয়া মরিতেছিল।

বিদ্যালঙ্কার যখন সেখানে আসিয়া দাঁড়াইলেন, তখন এক প্রোচা মুসলমানী জ্যোতিষীর নিকট ভাগ্য গণনা করাইতেছিল। বিদ্যালঙ্কার দূর হইতে তাহার সম্বন্ধে জ্যোতিষীর উক্তি শুনিতে লাগিলেন। জ্যোতিষী কহিল, “তোমার বিবাহ হয় নাই।” মুসলমানী চটিয়া কহিল, “আরে বাবু, সে কথা তোকে জিজ্ঞাসা করি নাই।” জ্যোতিষী তাহার কথায় কর্ণপাত না করিয়া বলিতে লাগিল, “কিন্তু যাহার সহিত তোমার বিবাহ হইবার কথা, তুমি এখন তাহারই আশ্রয়ে বাস করিতেছ। তোমার একটিমাত্র সন্তান জীবিত থাকিবে। সেটি কন্যা, রূপসী; তাহারও বিবাহ হইবে না। কিন্তু তাহার চিত্তের দৃঢ়তা তোমা অপেক্ষা অনেক অধিক। যবনী তুমি কস্বী। তোমার কন্যা সুগায়িকা হইবে; কিন্তু বেষ্ঠাবৃত্তি করিবে না!” গণকের কথা শুনিয়া মুসলমানী বিরক্ত হইয়া হাত ছিনাইয়া লইল; কিন্তু পরক্ষণেই আর একজনকে অগ্রসর হইতে দেখিয়া পুনর্বার হস্ত প্রসারণ করিল। জ্যোতিষী জিজ্ঞাসা করিল, “আর কি জানিতে চাহ?” প্রোচা ওষ্ঠে ওষ্ঠ পেষণ করিয়া কহিল, “আমি যে

কথা জানিতে চাহি, কাফের, তুমি ত তাহা শুনিলেই না,—আপন মনে বকিয়া যাইতেছ। আমার কত্না কি করিবে না করিবে, সেই কথাই ত তোমাকে জিজ্ঞাসা করিতেছি ; কিন্তু তুমি আমার প্রশ্ন শুনিতেছ কৈ ?” জ্যোতিষী কিছুমাত্র চঞ্চল না হইয়া অর্দ্ধমুদ্রিত-নেত্রে কহিল, “বহুং আচ্ছা, তুমি বলিয়া যাও, আমি শুনিয়া যাই।”

“আমার কত্না রূপসী, সে সুগায়িকা ; কিন্তু সম্প্রতি তাহাকে দানো পাইয়াছে ; না হয় সে পাগল হইয়াছে। কিন্তু কি হইয়াছে বুঝিতে না পারিয়াই আমি তোমার নিকট আসিয়াছি।” জ্যোতিষী খড়ি দিয়া ভূমিতে অঙ্ক লিখিয়া, কিয়ৎক্ষণ পরে কহিল, “বিবি, তোমার কত্নার পাগল হইবার সম্ভাবনা অল্প ; এবং তাহার চিত্তের দৃঢ়তা এত অধিক যে, প্রেতঘোনি তাহাকে সহজে স্পর্শ করিবে না। বোধ হয় কোন রোগ হইয়াছে। কিন্তু না ! এখন তোমার কত্নার বয়স বিংশতি বৎসর, এখন তাহার কোন রোগেরই সম্ভাবনা নাই।” প্রোটা প্রশ্না হইয়া কহিল, “এ কথাটা ঠিক। হকিম ডাকিয়াছিলাম, তাহার নাড়ী টিপিয়া কহিল, মেয়ের আমার কিছুই হয় নাই। রোজা ডাকিলাম ; সে কহিল, আমার মেয়েকে হিন্দুর ভূতে পাইয়াছে,—মুসলমানের রোজার মস্ত্রে সে ভূত ছাড়িবার নহে। সেই জন্তই ত তোমার নিকট আসিয়াছি।” জ্যোতিষী হাসিয়া কহিল, “বিবি, আমি হিন্দু বটে, কিন্তু ভূতের ওঝা নহি। তোমার কন্যাকে ভূতে পায় নাই, কোন অপদেবতার এমন সাধ্য নাই যে তোমার কন্যাকে স্পর্শ করে। তুমি নিশ্চিন্ত মনে

ঘরে ফিরিয়া যাও।” “আরে প'গল, ঘরেই যদি ফিরিয়া যাইব, তবে তো'র নিকট মরিতে অ'সিয়াছি কেন? মেয়ে আমার আপন মনে হাসে; আপন* মনেই কাঁদে; বিড় বিড় করিয়া কি বলিতে থাকে, তাহার কিছুই বুঝিতে পারি না। জিজ্ঞাসা করিলে বলে, কৈ, কিছুই না।” “লোকে বলে, উপদেবতা যাহাদিগকে আশ্রয় করে, তাহারা না কি এই রকমই আচরণ করিয়া থাকে। কিন্তু বলিলাম ত, কোন উপদেবতা তোমার কন্যার ত্রিসীমানায় আসিতে পারিবে না। দেখ বিবি, নিজের অতীত যৌবনের কথা স্মরণ কর,—তোমার কন্যা প্রেমে পড়িয়াছে।” “কাফের, সে কথা শুনিবার জন্য তোমাকে পয়সা দিবার কোনও আবশ্যকতা ছিল না। আমার প্রতিবেশী রুস্তম্‌দিল্‌খাঁ এ কথা অনেক দিন হইতে বলিয়া আসিতেছে।” “তোমার প্রতিবেশী অতি বিচক্ষণ লোক, এবং তাহার পরামর্শ শুনিলে তোমাকে অনর্থক অর্থ ব্যয় করিতে হইত না। দেখ বিবি আমি গণনা করিয়া জীবিকা উপার্জন করি বটে, কিন্তু আমি ভিক্ষুক নহি। যে সন্তুষ্ট হইয়া একটি পয়সা দেয়, তাহা আমি লক্ষ টাকা বলিয়া মাথায় তুলিয়া লই। কিন্তু যে অর্থ দিতে অসন্তুষ্ট হয়, তাহার অর্থ আমি গ্রহণ করি না। তুমি নিশ্চিন্ত মনে ঘরে ফিরিয়া যাও। তোমার কন্যাকে উপদেবতায় পায় নাই; স্মৃতরাং হিন্দু ওঝাতে তাহার কিছুই করিতে পারিবে না। আমি তোমার নিকট হইতে একটি পয়সাও লইব না; কারণ, তুমি অর্থ দিতে কাতর।”

প্রোঢ়া জ্যোতিষীর কথা শুনিয়া আর্তনাদ করিয়া উঠিল ; এবং বহু মিনতি করিয়া তাহাকে প্রসন্ন করিল। প্রসন্ন হইয়াও জ্যোতিষী মুসলমানীর নিকট হইতে অর্থ গ্রহণ করিতে সম্মত হইল না। সে কহিল, “আমি তোমার নিকট হইতে অর্থ গ্রহণ করিতে পারিব না ; তবে যথাসাধ্য তোমার প্রশ্নের উত্তর দিতে চেষ্টা করিব।” এই সময়ে জ্যোতিষী এবং মুসলমানীর চারিদিকে লোক জমিয়া গিয়াছিল। এমন কি, পূর্বোক্ত মুসলমান বৃদ্ধকও দোকানে খরিদারের অভাব দেখিয়া উঠিয়া দাঁড়াইয়াছিল। প্রোঢ়া জিজ্ঞাসা করিল, “আমার কন্ডার কি হইয়াছে ?” গণক কহিল, “তোমার কন্ডা প্রেমে পড়িয়াছে।” “কাহার ?” “একজন হিন্দুর।” “তোবা, তোবা ! তাহার মুখে হাজার ঝাড়ু মারি।” “তাহার অপরাধ কি ? সে তোমার কন্ডার প্রেমে পড়ে নাই ; এবং সে তোমার কন্ডাকে কখনও কামনা করিবে না।” “তবে ?” “তবে কি ?” “কি উপায় হইবে ?” “বিবি, আমি গণিয়া কি হইয়াছে, তাহা বলিতে পারি ; কি হইবে তাহাও কতক-কতক পারি ; কিন্তু উপায় একমাত্র ভগবান।” “আমার কন্ডার কি হইবে ?” “তোমার কন্ডা এখন হইতে তোমার পক্ষাধিকারিবে না ; এবং তোমার অহরোধ-মত বেঙ্গাবৃত্তি করিয়া তোমার জন্ম অর্থ উপার্জন করিবে না। সে শীঘ্রই দেশ ত্যাগ করিয়া দেশান্তরে ঘুরিবে।” “সর্বনাশ ! তবে আমার কি হইবে কাকের ?” “তোমার কখনও অন্নভাব হইবে না।” “তাবিজ মাদুলীতে—” “সে সংবাদ আমি রাখি না বিবি।”

এই সময়ে বৃদ্ধরূপ পশ্চাৎ হইতে বলিয়া উঠিল, “তাহার জন্য চিন্তা কি বিবি সাহেব, এক তাবিজে তোমার কন্যাকে বশ করিয়া দিব। তাবিজের মূল্য নগদ এক টাকা।” প্রোঢ়া গণককে ছাড়িয়া বৃদ্ধরূপের দিকে অগ্রসর হইল; এবং জনতার মধ্য হইতে সরিয়া গেল। এক সঙ্গে দশ জন লোক তাহার স্থান অধিকার করিতে অগ্রসর হইল; কিন্তু জ্যোতিষী দূর হইতে বিদ্যালঙ্কারকে দেখিয়া তাঁহাকে ডাকিল। বিদ্যালঙ্কার জনতার বাহিরে যাইবার চেষ্টা করিতেছিলেন। তাহা দেখিয়া গণক কহিল, “ব্রাহ্মণ, তুমি বঙ্গবাসী, ত্রায়শাস্ত্রে পারদর্শী। জ্যোতিষ শাস্ত্রে তোমার বিশ্বাস অতি অল্প। ক্ষণকাল অপেক্ষা কর।” বিদ্যালঙ্কার স্থির হইয়া দাঁড়াইলেন। গণক কহিল, “যাহা ভাবিয়াছ তাহাই সত্য, এবং যাহা শুনিয়াছ তাহা মিথ্যা। তোমার কন্যার শত্রু বাঙ্গালা দেশ হইতে এই পাটনা সহরে আসিয়াছে; কিন্তু এখনও হিন্দু খুঁজিয়া পায় নাই। সাবধান ব্রাহ্মণ, বিদ্যা ও বংশগোরবের দস্তে মহাপাতক করিও না।” বিদ্যালঙ্কার স্তম্ভিত হইয়া দাঁড়াইলেন। গণক পুনরায় কহিল, “আজি সকালে যে তোমাকে জিজ্ঞাসা করিয়াছিল তুমি কবে কাশী যাইবে, সে তোমার শত্রু এবং শত্রুর চর। সাবধান, স্মরণ রাখিও যে স্ত্রীজাতি তোমার শত্রু এবং তোমার কন্যার শত্রু।” বৃদ্ধ কিংকর্তব্যবিমূঢ় হইয়া জিজ্ঞাসা করিলেন, “আমি কি তবে চলিয়া যাইব?” জ্যোতিষী কহিল, “বৃদ্ধ, কিন্তু কাশী যাইও না।” বিদ্যালঙ্কার জ্যোতিষীর কথা চিন্তা করিতে-করিতে গৃহে ফিরিলেন।

সপ্তত্রিংশ পরিচ্ছেদ

সন্ন্যাসিনী

সন্তোষাতা দুর্গা নিদাঘ-প্রভাতে করবী-মূলে কুসুম চয়ন করিতেছিলেন; অদূরে তাঁহার দ্রাবিড় অশ্বখতল হইতে দুর্গা-সংগ্রহ করিতেছিলেন; এমন সময় সরস্বতী বৈষ্ণবী সেই স্থানে আসিয়া দাঁড়াইল। তাহাকে দেখিয়া দুর্গা বলিয়া উঠিলেন, “বৈষ্ণবদিদি, আজ একাদশী,—একটা নাম শুনাইবে?” সরস্বতীর তখন নাম শুনাইবার অবসর ছিল না; কারণ, সে তখন অল্প মতলবে আসিয়াছিল। সে বলিয়া উঠিল, “রাধেকৃষ্ণ, রাধেকৃষ্ণ, এমন পোড়ার দেশে মানুষ আসে! একটা ঠাকুরবাড়ী নাই, আখড়া নাই, পোড়া কপাল দেশের! খেংরা মারি, খেংরা মারি।” দুর্গাঠাকুরাণী দ্বিতীয়বার বলিয়া উঠিলেন, “বলি, ও বৈষ্ণব দিদি, দেশ চুলায় যাক,—একটা নাম শুনাইবে?” “এমন দেশেও মানুষ আসে! সোণার বাংলা দেশ ছাড়িয়া দাদাঠাকুর না কি এই দেশে আসিয়া বাস করিবেন! এত বড় সহর,—মা পল্লার ধার,—সারাটা গ্রহর একটা ঠাকুরবাড়ী খুঁজিয়া পাইলাম না!—” “বলি ও সরস্বতী দিদি, একটা নাম শুনাইবে?” “নাম, আ-আমার পোড়া কপাল! নাম শুনিবে—তা’ আমার এতক্ষণ বলিতে হয়!” “বলিয়া বলিয়া যে গলা ধরিয়া গেল ভাই,—তুমি কথা কাণে তোলা কই? বলি, সকালবেলা ঠাকুরঘর, ঠাকুর-

ঘর করিয়া মরিতেছ কেন ? আবার কি বৈষ্ণব জুটাইবার সাধ হইয়াছে না কি ?” “গলায় দড়ি আমার ! দিদিঠাকরণ যেন কি !”

পুষ্পচয়ন সাক্ষ হইল। দুর্গাঠাকুরাণী কহিলেন, “বৈষ্ণব দিদি, চল, বাঁড়ীর ভিতর যাই। বলি, ও বৌ, এত বাহির-বাহির মন কেন ?” হৃদশ্রবণের স্ত্রী বলিয়া উঠিলেন, “বাবা ননদিনী রায়বাঘিনী,—একটু ঘরের বাহিরে আসিবার উপায় নাই ! চল ভাই, ভিতরে যাইতেছি। কি খবর ?” “বৈষ্ণবদিদি নাম শুনাইবে।” “বলিস্ কি,—আমাদিগের কি এমন সৌভাগ্য হইবে ? চল, চল।”

রমণীদ্বয় অন্তঃপুরে প্রবেশ করিলে, এক সন্ন্যাসিনী গৃহের দুয়ারে আসিয়া দাঁড়াইল। সন্ন্যাসিনী যুবতী, রূপসী। গৈরিক বসনে তাহাকে ভ্রাম্মাচ্ছাদিত অগ্নির তায় দেখাইতেছিল। কেহ যদি সে সময় লক্ষ্য করিয়া দেখিত, তাহা হইলে বৃদ্ধিতে পারিত যে, সন্ন্যাসিনী অতি অল্প দিন বিলাস-বাসনা পরিত্যাগ করিয়াছে। কারণ, তাহার আকর্ষণ-বিশ্রান্ত নয়নযুগলের কোণ হইতে কঙ্কলের রেখা বহু চেষ্টা সত্ত্বেও সম্পূর্ণরূপে মুছিয়া যায় নাই ; এবং হস্তের ও পদের নখে মেহেদীর বর্ণ তখনও স্পষ্ট ছিল। এমন কি, উভয় হস্তের দশ অঙ্গুলিতে গুরুভার অঙ্গুরীয়ক-গুলির দাগ তখনও মিলাইয়া যায় নাই। সন্ন্যাসিনী দুয়ারে দাঁড়াইয়া চারিদিকে চাহিল ; কিন্তু কোন দিকে কাহাকেও দেখিতে না পাইয়া, গৃহের সম্মুখের উত্তানে প্রবেশ করিল। ক্রমে উত্তান পরিত্যাগ করিয়া, সে অতি ধীরে গৃহের দুয়ারে গিয়া

দাঁড়াইল। গৃহমধ্যে প্রাঙ্গণে দুর্গা, তাহার ভ্রাতৃবধু ও সরস্বতী বসিয়া ছিল। সন্ন্যাসিনী অনেকক্ষণ ধরিয়া তাহাদিগকে দেখিল। সহসা পশ্চাৎ হইতে তাহার পৃষ্ঠে কে হস্তার্পণ করিল। সে চমকিতা হইয়া ফিরিয়া দাঁড়াইল। সে যতক্ষণ প্রাঙ্গণে রমণী-ত্রয়কে লক্ষ্য করিতেছিল, ততক্ষণ গৃহস্থামী স্বয়ং তাহার গতিবিধি লক্ষ্য করিতেছিলেন। গণকের কথায় বিশ্বাস না হইলেও, বিদ্যালঙ্কারের কৌতূহল উদ্দীপ্ত হইয়াছিল। আবাসগৃহের দ্বারে নূতন লোক দেখিতে পাইয়া তিনি প্রথমে আশ্চর্যান্বিত হইয়াছিলেন; কিন্তু পরে তাহাকে শত্রুর চর মনে করিয়া, তাহার গতিবিধি লক্ষ্য করিতেছিলেন।

সন্ন্যাসিনী ফিরিয়া দাঁড়াইলে, তিনি তাহাকে কহিলেন, “কথা কহিও না, তাহা হইলে বিপদে পড়িবে। এই গৃহ আমার। বাহিরে আইস।” সন্ন্যাসিনী প্রথমে মনে করিয়াছিল যে, সে চীৎকার করিয়া উঠিবে; কিন্তু তাহার যখন মনে পড়িয়া গেল যে, সে সামান্য তত্ত্বেরে হ্রায় গৃহে প্রবেশ করিয়াছে, তখন আর বাক্যব্যয় না করিয়া, গৃহস্থামীর অনুসরণ করিল। গৃহ হইতে কিয়দূরে গিয়া বিদ্যালঙ্কার জিজ্ঞাসা করিলেন, “তুমি কে, এবং কি জন্ত গোপনে আমার গৃহে প্রবেশ করিয়াছিলে?” সন্ন্যাসিনী চতুরা,—উত্তর দিতে তাহার কিছুমাত্র বিলম্ব হইল না। সে বলিয়া উঠিল, “এই গৃহে আমার এক দুঃখ আছে,—আমি তাহার সন্ধানে আসিয়াছি।” “তোমার দুঃখ কে?” “এক বান্ধালী।” “আমিও বান্ধালী,—আমিই কি তোমার দুঃখ?”

ঠাহর করিয়া দেখিবার ছলে সন্ন্যাসিনী কতকটা চিন্তা করিয়া লইল; এবং কহিল, “না, তুমি বৃদ্ধ, সে যুবা।” “তাহার নাম কি?” “নাম ঠিক বলিতে পারি না,—বান্দালা মুলুকের নাম শ্রবণ রাখা কঠিন।” সহসা বিদ্যালঙ্কারের শ্রবণ হইল, তিনি এই রমণীকে পূর্বে কোথায় দেখিয়াছেন। তিনি জিজ্ঞাসা করিলেন, “তুমি কি কয়দিন পূর্বে অসীম রায়ের সহিত আমাদের বাড়ীতে আসিয়াছিলে?” রমণী কহিল, “না, আমি এ অঞ্চলে কখনও আসি নাই। অসীম রায় কে, তাহা আমি জানি না।” “তোমার দুঃখ কি এখনও এই ঘরের ভিতরে আছে?” “একজন আছে।” “সে কে?” “রমণী।” “চল, তাহাকে দেখাইয়া দিবে।” বিদ্যালঙ্কারের পশ্চাতে গৃহের দুয়ারে দাঁড়াইয়া, সরস্বতী বৈষ্ণবীকে দেখাইয়া দিয়া, সন্ন্যাসিনী চলিয়া গেল,—বিদ্যালঙ্কার তাহার দিকে চাহিয়া রহিলেন। সে দৃষ্টির অন্তরাল হইলে, বৃদ্ধ অশ্বখবৃক্ষতলে দাঁড়াইয়া মনে-মনে চিন্তা করিতে লাগিলেন, এ কে?

বিদ্যালঙ্কারের গৃহের বহির্দ্বারে আসিয়া, সন্ন্যাসিনী দূর হইতে এক পুরুষকে দেখিয়া দাঁড়াইয়া পড়িল। সহসা তাহার মুখ লজ্জায় রক্তবর্ণ হইয়া উঠিল। সে একবার অগ্র পথে চলিয়া যাইবার চেষ্টা করিল; কিন্তু দুই এক পদ গিয়া তাহার চরণ আর চলিতে চাহিল না। যাহাকে দেখিয়া তাহার এমন অবস্থা হইয়াছিল, সে দ্রুতপদে তাহার নিকটে আসিয়া কহিল, “মণিয়া-বাঈ, এ কি? তুমি কি বহুরূপী? কাল তোমাকে তওয়াইফ

মণিরাবাইয়ের চেহারা দেখিয়াছি,—আজি আবার এ কি ভোল ?” সন্ন্যাসিনী লজ্জায় মস্তক অবনত করিয়া রহিল, উত্তর দিতে পারিল না। আগন্তুক পুনর্ব্বার জিজ্ঞাসা করিল, “মণিয়া, তুমি কোথায় আসিয়াছিলে ?” সন্ন্যাসিনী অতি ধীরে কহিল, “ভূর্গাঠাকুরাণীর নিকট।” “তাহার সহিত দেখা হইয়াছে ?” “হইয়াছে, এখন আমি যাই।” “না, দাঁড়াও। তোমার সহিত অনেক কথা আছে।” “না, এখন আমি নাই,—অল্প সময়ে কথা কহিবেন।” “না মণিয়া, পাটনা সহরে অসীম রায়ের সময় বড় বেশী নাই। বাদশাহ ফররুখসিয়র শীঘ্রই দিল্লী যাইবেন, তাঁহার সঙ্গে বোধ হয় আমাকেও যাইতে হইবে। মণিয়া, প্রভাতে যখন আমাকে ত্যাগ করিয়া গেলে, তখন তোমার ভাব দেখিয়া আমার বড় ভয় হইয়াছিল। ভাবিয়াছিলাম হয় ত তুমি আত্মহত্যা করিবে, এবং আমাকে সেই মহাপাতকের ভাগী করিয়া যাইবে। কিন্তু মণিয়া, সমস্ত দিন অনাহারে পাটনা সহরের পথে-পথে ফিরিয়া, গোধূলির ক্ষীণ আলোকে যখন তোমার নব-অভিসারিকা বেশ দেখিলাম, তখন আমি স্তম্ভিত হইয়া গেলাম। এই মহানগরীর লোক ভাবিল, আশ্চর্য্য শোকে অসীম রায় পাগল হইয়া গিয়াছে। ফরীদ খাঁর উজ্জানে তোমার যে মূর্ত্তি দেখিয়াছি মণিয়া, সেই কি তুমি ? শুনিয়াছি, রমণী প্রহেলিকা। নারী-চরিত্র কখনও অধ্যয়ন করি নাই—” গৈরিকরঞ্জিত অঞ্চলে মুখ ঢাকিয়া মণিয়া কাঁদিয়া ফেলিল। তাহা দেখিয়া অসীমের বাক্যশ্রোত রুদ্ধ হইয়া গেল। তিনি কহিলেন,

“মণিয়া, এ আবার কি ? ফরীদ খাঁর প্রমোদ-উত্থানে—” আর বলিতে হইল না,—সন্ন্যাসিনী অসীমের পদযুগল জড়াইয়া ধরিয়া, উচ্চৈঃস্বরে কঁাদিতে লাগিল। বহু কষ্টে তাহাকে শাস্ত করিয়া উঠাইয়া, অসীম জিজ্ঞাসা করিলেন, “কঁাদ কেন মণিয়া ?” অশ্রুধ্বজ কণ্ঠে মণিয়া কহিল, “কঁাদি কেন, তাহা পুরুষে বুঝিবে না। যদি রমণী হইতে, তাহা হইলে জিজ্ঞাসা করিতে না। ভুল বুঝিয়াছিলাম প্রভু ! ভাবিয়াছিলাম, রূপের মোহ তোমাকে আকর্ষণ করিবে। আমার অভিসারিকা বেশ দেখিলে হয় ত হিংসায় তুমি আমার হইতে চাহিবে—সে ভুল আজি বুঝিয়াছি। ক্ষমা কর।” অসীম কহিলেন, “ক্ষমা কিসের মণিয়া ? তুমি আমার জন্ত দেহত্যাগ করিতে চাহিতেছ জানিয়া, সারাদিন পথে পথে তোমার অনুেষণ করিয়াছি। সন্ধ্যাকালে যখন দেখিলাম যে, তুমি পূর্ববন্ধুপরিবৃত্তা হইয়া সানন্দে উত্থান-বিহারে চলিয়াছ, তখন সে মোহ কাটিয়া ফেল। মণিয়া, তুমি হিন্দু সন্ন্যাসিনী সাজিয়াছ কেন ?” মুখ হইতে অঞ্চল সরাইয়া মণিয়া বলিয়া উঠিল, “কেন, তাহা শুনিতে চাহ ? আমি হিন্দু হইয়াছি। কারণ, শুনিয়াছি হিন্দুর পুনর্জন্ম হয়। হিন্দুকণ্ঠা একজন্মে যাহার উপাসনা করে, পরজন্মে তাহাকে পায়। এ জন্মে যাহা আমার অসাধ্য, পরজন্মে তাহা পাইবার ভরসায় হিন্দু হইয়াছি। আমার এ সাধে বাধা দিও না দিলদার !”

অষ্টত্রিংশ পরিচ্ছেদ

গচ্ছিত ধন

“কৈ বৈষ্ণবী দিদি, গাহিলে না?”

“এই গাচ্ছি” সরস্বতী এই বলিয়া অঞ্চল হইতে খজ্ঞনী বাহির করিল। এই সময়ে বাহিরের দুয়ারে দড়োইয়া কে ডাকিল
“বোঠান, দাদা আছে?”

বধূ মস্তকে অবগুণ্ঠন দিয়া কহিলেন, “কে, ছোটদাদা? এ! এন। দেখি তোমার দাদাঠাকুরটি কোথায়।”

এই সময়ে সরস্বতী এক স্তদীর্ঘ প্রণাম করিয়া কহিল, “হজুর, দিদিঠাকরুণের হুকুম মত একটা গান ধরিয়াছিলাম, হুকুম হইবে কি?”

অসীম ঈষৎ হাসিয়া কহিলেন, “ভাল, অনেকদিন তোমার গান শুনি নাই, কি গাহিবে গাও।”

বৈষ্ণবী গাহিল :—

“ভাল যদি বাস তবে

ফিরে আর এস না।

পথ-মাঝে যেতে যেতে

ফিরে ফিরে চেও না ॥

বারবার চাহ ফিরি

কাতর নয়নে,

বুঝ নাকি যদি মোর

লুটে তব চরণে,

যথা চাহ তথা রহ

দেখা আর দিও না।”

গীত সমাপ্ত হইবার পূর্বেই দুর্গা উঠিয়া দাঁড়াইলেন এবং গীত শেষ হইলেই বলিয়া উঠিলেন, “বৈষ্ণবী দিদি, এই বুঝি তোমার নাম শোনান?”

সরস্বতী কিছুমাত্র অপ্রস্তুত না হইয়া বলিয়া উঠিল, “এ ত ঠাকুরদের গান দিদিঠাকুরণ!”

বধূ দূরে দাঁড়াইয়া ছিলেন; তিনি কহিলেন, “ছাই গান বৈষ্ণবী দিদি, ইহাতে ত ঠাকুর-দেবতার নাম-গন্ধও নাই।”

সরস্বতী খজ্ঞনী অঞ্চলে বাঁধিয়া গীত ব্যাখ্যা করিতে বসিল। সে কহিল, “কেন থাকিবে না? তোমরা গানটা ভাল করিয়া বুঝিয়া দেখ। শ্রীরাধা আগ্নান ঘোষের বাড়ী গিয়াছেন—”

দুর্গাঠাকুরাণী ক্রুদ্ধ হইয়া বলিয়া উঠিলেন, “তোমার আর ব্যাখ্যান করিতে হইবে না, আমরা সব বুঝিতে পারিয়াছি। দাদা, বড়দাদা ঘরে নাই, তুমি কি বসিবে?”

সরস্বতী অদূরে এমনভাবে দাঁড়াইল যে, তাহার ভঙ্গী দেখিয়া শিশুতেও বুঝিতে পারে যে সে অসৌম্য ও দুর্গাঠাকুরাণীর হাবভাব লক্ষ্য করিতেছে। তাহা দেখিয়া বধূ আর ক্রোধ দমন করিতে পারিলেন না; তিনি বলিয়া উঠিলেন, “বৈষ্ণবী দিদি, ওখানে দাঁড়াইয়া কি করিতেছ, তরকারী কুটিবে এস।”

সরস্বতী জন্মণ তুলিবার ভাণ করিয়া কহিল, “সে কি কথাবো-ঠাক্করণ, আর দুই একটা নাম শুনিবে না?”

“পোড়াকপাল তোমার নামের, সকাল বেলায় বাসি মুখে আর এমন নাম শুনিয়া কাজ নাই! দুর্গা, তুই ঠাকুরপোর সঙ্গে কথা ক’, আমরা রান্না-ঘরে যাই।” সরস্বতী দুর্গা ও অসীমের প্রতি একটা ক্রুর কটাক্ষপাত করিবার প্রলোভন বহুকষ্টে সম্বরণ করিয়া বধূর সহিত রন্ধনশালায় চলিয়া গেল।

দুর্গা পুনর্বার জিজ্ঞাসা করিলেন, “ছোট-দাদা, তুমি কি বসিবে?”

অসীম দুয়ারের নিকট দাঁড়াইয়া ছিলেন; তিনি সেইখানেই দাঁড়াইয়া কহিলেন, “না দিদি, আর বসিব না, তোমাকে একটা কথা বলাইবার জন্মই সুদর্শনকে খুঁজিতে আসিয়াছিলাম। মনে করিয়াছিলাম যে সুদর্শনকে দিয়া বলাইলে তুমি হয় ত মনে ব্যথা পাইবে না; কিন্তু সে যখন নাই, তখন তোমাকেই বলিতে হইল। আমরা যে কখন চলিয়া যাইব, তাহা বলিতে পারি না। নূতন বাদশাহের মতি স্থির নাই। তিনি যখন কুচ করিতে ছকুম করিবেন, তখনই চলিতে হইবে। দেখ দিদি, যাহা বলিব তাহা মন দিয়া শুন, না বুঝিয়া উত্তর দিও না।” দুর্গা আশ্চর্য্যাম্বিতা হইয়া তাঁহার মুখের দিকে চাহিয়া রহিলেন। অন্তরালে দাঁড়াইয়া আর দুইজন সাগ্রহে অসীমের কথা শুনিতেছিল; কিন্তু তাহাদের অস্তিত্বের কথা ইহারা জানিতে পারেন নাই। অসীম পুনরায় কহিলেন, “দেখ দিদি, যেদিন

ভিখারীর ছায় পিতৃগৃহ পরিত্যাগ করিয়া আসি, সেদিন তুমি
 স্বেচ্ছায় তোমার স্বামীর আজীবন-সঞ্চিত ধনরাশি ভূপের
 মঙ্গলের জন্ত অন্ধকারে একাকিনী আসিয়া আমাকে দিয়া
 গিয়াছিলে। তখন আমি নিঃস্বল। তোমার সেই কয়টি
 মোহর আমার নিকটে বাদশাহের ধনভাণ্ডার বলিয়া মনে
 হইয়াছিল এবং তাহার বলেই আমি নিজের পায়ে ভর দিয়া
 দাঁড়াইতে পারিয়াছি বলিয়াই বলিতেছি দিদি, আজি আর
 আমার সে অর্থের প্রয়োজন নাই। তুমি দুঃখ করিও না দিদি!
 অদৃষ্টচক্রের পরিবর্তনের সহিত আমারও অবস্থার পরিবর্তন
 হইয়াছে। সহসা মনে হইল, যে অর্থের আমার প্রয়োজন নাই,
 সে অর্থের প্রয়োজন হয় ত তোমার হইতে পারে; তোমার না
 হয় স্মদর্শনের হইতে পারে। দেখ দিদি, আমাদের অবস্থাস্থর
 দেখিয়া তোমার দয়ার্দ্র হৃদয় ব্যাকুল হইয়াছিল। সেই ব্যাকুল-
 তার ফলে তুমি কলকভাগিনী, তোমার পিতা ও ভ্রাতা গৃহত্যাগী,
 তাহা আমি জানি। তোমাদের অভাব হইয়াছে মনে করিয়া
 আমি এই অর্থরাশি ফিরাইয়া দিতে আসিয়াছি, তাহা ভাবিও
 না। যে অর্থ আমার অভাবের সময়ে তুমি দিয়াছিলে, এখন
 আর আমার সে অর্থে প্রয়োজন নাই, অথচ সে অর্থ তোমার
 নিকট থাকিলে হয় ত অপরের অভাবমোচন হইবে, এই ভাবিয়া
 ফিরাইয়া আনিয়াছি। তুমি আমার অপরাধ লইও না দিদি।”

অসীমের উক্তির শেষভাগ শুনিয়া দুর্গা হাসিয়া কহিলেন,
 “তাহার জন্ত এত কুণ্ঠিত হইতেছ কেন দাদা? ভগবান তোমার

উন্নতি করিয়াছেন, তাহাতে আমরা যত সুখী, জগতে এত সুখী বোধ হয় আর কেহ নহে। দেখ দাদা, মোহরগুলি এখন তুমি রাখ, আমার যখন প্রয়োজন হইবে, আমি তখন তোমার নিকট হইতে চাহিয়া লইব।”

“দেখ দিদি, যে উপজীবিকা অবলম্বন করিয়াছি, তাহাতে মরণের জন্ম সর্বদাই প্রস্তুত হইয়া থাকিতে হয়। আমার এমন কেহ নাই, যাহার নিকট বিশ্বাস করিয়া তোমার ধন গচ্ছিত রাখিয়া দাইতে পারি। যদি মরিয়া যাই বা যদি আর সাফাং না হয়, তাহা হইলে তোমার স্বামীর বহুযত্নে সঞ্চিত অর্থরাশি হয়ত অপব্যয় হইবে।” দুর্গা দ্বিতীয়বার হাসিলেন এবং তাঁহাকে হাসিতে দেখিয়া অসীম বিম্মিত হইলেন।

দুর্গাঠাকুরাণী কহিলেন, “দাদা, দেখা যদি না-ই হয় এবং অর্থ যদি ফিরিয়াই না পাই তাহাতে ক্ষতি কি? অর্থ ত আমার নহে; যিনি দিয়াছিলেন, তাঁহার আদেশ মত ব্যয় করিয়াছি। যাহাকে দিয়াছিলাম, সে তাহা ফিরাইয়া দিতেছে। যখন তাঁহার আদেশমত এই অর্থ ব্যবহার করিবার সুযোগ পাইব, তখন তোমার নিকট যেমন করিয়া পারি সমুদয় পাঠাইব। যদি ভাগ্যচক্রের পরিবর্তনে তুমি না থাক কিম্বা অর্থ যদি দাতার ইচ্ছামত দ্বিতীয়বার প্রযুক্ত হইতে না পারে, তাহার জন্ম তুমি বা আমি দোষী নহি। একবার দাতার ইচ্ছা পূর্ণ হইয়াছে। একই অর্থ যে দুইবার ব্যবহৃত হইবে, ইহা দাতা হয়ত জানিতেন না।”

অসীম দুর্গাকে বাধা দিয়া কহিলেন, “দিদি, বতদিন এই মোহরগুলি ফিরাইয়া না লইবে, ততদিন আমি ইহার জন্ত দায়ী। গচ্ছিত অর্থ ফিরাইয়া না দিয়া যদি মরি, তাহা হইলে নরকেও আমার স্থান হইবে না। না, তাহা হইবে না। মুরশিদাবাদের মাণিকচাঁদ শেঠ প্রসিদ্ধ ধনী। হিন্দুস্থানের সর্বত্র তাহার কুঠী আছে, তোমার নামে এই অর্থ তাহার নিকট জমা দিতে চলিলাম। আর একটা কথা বলিয়া যাই! ভূপ রহিল, সে অন্ধ স্তবরাং অসহায়। যদি আমি মরি, তাহা হইলে তুমি আর স্মদর্শন তাহাকে দেখিও। মাতৃহীন শিশুকে পুত্র-নির্কিশেষে পালন করিয়াছি, তোমাকে আর অধিক কি বলিব?”

দুর্গাঠাকুরাণী এতক্ষণ স্থির হইয়া ছিলেন, ভূপেনের কথা শুনিয়া তাঁহার চক্ষু জলে ভরিয়া আসিল। তিনি অশ্রুজল-কণ্ঠে জিজ্ঞাসা করিলেন, “দাদা, তুমি যেখানে লড়াই করিতে যাইবে, ভূপেনও কি তোমার সঙ্গে যাইবে?”

“যতদূর পারিব তাহাকে সাবধানে রাখিবার চেষ্টা করিব, কিন্তু তাহাকে বাঁচাইতে পারিব কি না, তাহা বলিতে পারি না। আমাদের দেশে বাদশাহের মৃত্যু একটা মহাপ্রলয়ের সমান হইয়া দাঁড়াইয়াছে—”

অসীমের উক্তি শেষ হইবার পূর্বেই, যে ব্যক্তি বহির্দ্বারে দাঁড়াইয়া ছিল, সে গৃহে প্রবেশ করিয়া কহিল, “ভূপেনের জন্ত কোন চিন্তা করিও না, আমি স্মদর্শনকে তোমার সঙ্গে দিব, সে ভূপেনের সঙ্গে সঙ্গে থাকিবে। অসীম, তুমি যখন জয়ী হইয়া

কিরিয়া আসিবে, তখন আমি কাশীবাস পরিত্যাগ করিয়া আবার দেশে ফিরিব। আমি তোমার পিতার অঙ্গে প্রতিপালিত ; তোমাকে বঞ্চিত হইতে দেওয়া আমার উচিত হয় নাই। দেখ অসীম, আমি চেষ্টা করিলে হরনারায়ণের কবল হইতে তোমার বিষয় রক্ষা করিতে পারিতাম ; কিন্তু আমি অন্ধ হইয়াছিলাম,— তাহার বন্ধুত্বে মুগ্ধ হইয়াছিলাম, এবং কর্তব্য বিন্মত হইয়াছিলাম ; সেই জন্তই বোধ হয় ভগবান আমাকে শাস্তি দিয়াছেন।

অসীম বিদ্যালয়কে প্রণাম করিয়া বিদায় হইলে সরস্বতী প্রাক্কণের যে কোণে লুকাইয়া ছিল, সেস্থান পরিত্যাগ করিয়া বড়বধুর নিকট গিয়া বলিয়া উঠিল, “বৌ-ঠাক্কণ, পেট কমন গুলুচে, আমি একবার আসি।” উত্তরের অপেক্ষা না করিয়াই সরস্বতী প্রস্থান করিল।

একোনচত্বারিংশ পরিচ্ছেদ

অন্ধ প্রেম

বিদ্যালয়কারের গৃহ পরিত্যাগ করিয়া মণিষা কম্পিত পদে চলিতে আরম্ভ করিল। সে তখন অন্ধ-অন্ধ ; কোন্ দিকে যাইতেছে বা কোন্ পথে চলিতেছে, তাহা সে বুঝিতে পারিতেছিল না। কিয়দূর চলিবার পরে সে একটা ক্ষুদ্র খর্জুরবৃক্ষের উপর পড়িয়া আঘাত পাইল এবং তখন তাহার চেতনা ফিরিয়া

আসিল। সে চক্ষু মুছিয়া দেখিল যে, তীক্ষ্ণ খর্জুর-কটকের আঘাতে তাহার পরিধেয় বস্ত্র ছিন্ন ভিন্ন হইয়া গিয়াছে, অঙ্গেও আঘাত লাগিয়াছে এবং নানাস্থান হইতে রক্তস্রাব হইতেছে। নিকটে একটা ক্ষুদ্র পুষ্করিণী ছিল; মণিয়া তাহাতে নামিয়া হস্ত মুখ প্রক্ষালন করিল এবং ক্ষতস্থান ধোত করিল। সে যেস্থানে আসিয়া পড়িয়াছিল, সে স্থানটা নগরোপকণ্ঠ; পথে লোকজন ছিল না, মধ্যে মধ্যে দূরে শবটচক্র-নির্ঘোষ শুনা যাইতেছিল। মণিয়া পুষ্করিণী-তীরে তালবৃক্ষের ছায়ায় উপবেশন করিল।

বেলা বাড়িল; ক্রমশঃ সূর্য্যের উত্তাপ অসহ্য হইয়া উঠিল; খর্জুরবৃক্ষের স্বল্পছায়া দূরে সরিয়া চলিল; মণিয়া তাহা বুঝিতে পারিল না, সে সেই প্রচণ্ড নিদাঘ-রৌদ্রে বসিয়া রহিল। দ্বিতীয় প্রহর অতীত হইল। সে পথে যে দুই-একজন লোক চলিতেছিল, তাহারাও ছায়ায় আশ্রয় লইল। মণিয়া বসিয়াই রহিল। তৃতীয় প্রহর আরম্ভ হইলে যে স্থানে খর্জুরবৃক্ষের ছায়া ছিল, সে স্থান হইতে বামাকণ্ঠে প্রস্থ হইল, “আহা, বহিন, তোমার দেহটা যে জলিয়া গেল, এমন সোণার অঙ্গ মলিন হইয়া গেল?” মণিয়া মুখ তুলিয়া চাহিল এবং দেখিল বৃক্ষচ্ছায়ায় বসিয়া সরস্বতী বৈষ্ণবী উভয়হস্তে ঋগ্ননী বাজাইতেছে। সে কিঞ্চিৎ আশ্চর্য্য হইয়াই জিজ্ঞাসা করিল, “তুমি কখন আসিলে? আমি ত কিছুই বুঝিতে পারি নাই?” “বুঝিতে পারিবে কি বহিন! প্রেমবিষ যাহাকে জ্বর-জ্বর করে, তাহার কি বাহুজ্ঞান থাকে? এই প্রচণ্ড বৈশাখ মাসের রৌদ্র, আর তুমি কি না একপ্রহর কাল ধরিয়া থালি

মাথায় রৌদ্রে বসিয়া আছি।” “আমি কি রৌদ্রে বসিয়া আছি ? কেন, আমি ত ছায়ায় বসিয়া ছিলাম !” “সে যে প্রায় দুই প্রহরের কথা । বাপ ! রৌদ্র বলিয়া রৌদ্র, আমার মাথার গামুচাখানা চারিবার শুকাইয়া গেল। একবার করিয়া শুকায়, আবার ভিজাইয়া আনি ; কিন্তু তুমি ত একবারও নড়িলে না ? এ কি যেমন-তেমন বিষ, প্রেমবিষ—কালসাপের বিষ অপেক্ষাও তীব্র।” তাহার কথা শুনিয়া মণিয়া কিয়ৎক্ষণ তাহার মুখের দিকে চাহিয়া রহিল এবং পরে ধীরে ধীরে কহিল, “আশুনাই কি জ্বর ? বহিন, প্রেম কি বিষ ? দেখ, এই হাজার হাজার বছর ধরিয়া কবিকুল প্রেমের মহিমা-কীর্তন করিয়া আসিতেছে,—যাহার জন্ত দুনিয়া পাগল। তাহা কি বিষ,—ইহা কি সম্ভব ?”

সরস্বতী খজ্জুরবৃক্ষের ক্ষীণ ছায়া হইতে উঠিয়া আসিয়া মণিয়ার হাত ধরিয়া তাহাকে ছায়ায় লইয়া গেল। পুষ্করিণী হইতে দুই তিন বার গামছা ভিজাইয়া আনিয়া তাহার হাতে-মুখে জল দিল ; কিন্তু মণিয়া তাহাতে বিন্দুমাত্র তৃপ্তি অনুভব করিল না। সে পুনরায় জিজ্ঞাসা করিল, “বহিন, আশুনাই কি জ্বর ? তুমি বোধ হয় বড় দাগা পাইয়াছ ? দেখ, কবি আশুনাইয়ের জন্ত দেওয়ানা হইয়া গিয়াছিল। সে কি জ্বর ?” সরস্বতীর মুখ দৃঢ় হইল, সে উত্তেজিত হইয়া বলিয়া উঠিল, “বহিন, এখনও তোমার রূপ-যৌবন পূর্ণমাত্রায় আছে সুতরাং আশুনাই ত মিঠা লাগিবেই ! এই রূপ আর এই যৌবন যখন ঐ সূর্য্যের মত পশ্চিম দিকে ঢলিয়া পড়িবে, যখন মধুর অভাব বোধ করিয়া ভ্রমর

আর আসিবে না ; তখন বুঝিবে যে প্রেম বিষ এবং এ বিষ যাহাকে
 স্পর্শ করিয়াছে, তাহার আর উদ্ধার নাই। দেখ বহিন, এই
 সরস্বতী বৈষ্ণবী এমন চেহারা লইয়া দুনিয়ায় আসে নাই। এমন
 দিন ছিল, যেদিন কত কত রাজা-রাজড়া তাহাকে দেখিবার
 আকাঙ্ক্ষায় দরিদ্র বৈষ্ণবের কুটীরের আশে-পাশে ঘুরিয়া বেড়াই-
 য়াছে। সে দিন গিয়াছে ; এখন আর সরস্বতী মাটিতে পা দিলে
 তাহার পায়ের তলে পদ্মবর্ণ ফুটিয়া উঠে না, হাসিলে গুণ্ডুলে
 গোলাপের আভা দেখা দেয় না ; সেইজন্ত সরস্বতীও ফুলের বাস
 ছাড়িয়া এই গৈরিক ধরিয়াছে, কারণ তাহার চারিদিকে তাহার
 যৌবনের রূপমাধুর্যের আকর্ষণে যে শত শত ভ্রমর গুঞ্জন করিয়া
 বেড়াইত, কালধর্ম্মে তাহারা ছাড়িয়া দূরে চলিয়া গিয়াছে। বহিন,
 এমন দিন চিরদিন থাকিবে না। এই চাঁপার বরণ জলিয়া কাল
 হইয়া যাইবে ; ঐ চোখের কোলে বিষের জ্বালা কালির দাগ
 টানিয়া দিবে ; ঐ কোকিল-কুঞ্জনের মত কর্ণস্বর হয় ত দাঁড়কাকের
 আওয়াজ ধরিবে।—তখন বুঝিবে এ বাঙ্গালী সরস্বতী বৈষ্ণবী
 কেন এ কথা বলিয়াছিল। বহিন, ফিরিয়া যা ; গেকুয়া ধরিবার
 অনেক সময় আছে,—এই ত তোরা প্রথম যৌবন, সারাটা জীবন
 দীর্ঘ পথের মত সম্মুখে পড়িয়া আছে। ফিরিয়া যা। যতদিন
 যৌবন আছে, ততদিন উপার্জন করিয়া নে ; তাহা হইলে বুড়া
 বয়সে আর সরস্বতীর মত খঞ্জনী বাজাইয়া মুরশিদাবাদ ও
 পাটনার পথে-পথে ভিক্ষা করিয়া উদর পূরণ করিতে হইবে না।”

প্রৌঢ়ার রেখাদীর্ণ গুণ্ডুল বহিয়া দুই বিন্দু অশ্রু বহিল,

কোমল-হৃদয়া মণিয়া তাহা দেখিয়া ব্যথা পাইল। সে তাহার গৈরিক বসনের অঞ্চল দিয়া সরস্বতীর চক্ষু মুছাইয়া কহিল, “কাঁদি কেন বহিন, যাহা হইয়া গিয়াছে, তাহার আর উপায় কি?” “কাঁদি কেন? বহিন, তাহা এখন বুঝিতে পারিবে না, যতদিন উপায় থাকে মানুষ ততদিন বুঝিতে পারে না। এই দেখ তুমি না জানিয়া না বুঝিয়া প্রথম যৌবনে যোগিনী সাজিয়াছ কেন? পুরুষ-ভ্রমর বুঝি দুই দিনের জন্ত অগ্ন্যত্র গিয়াছে, দুইদিন বুঝি অনাদর করিয়াছে?” “না।” “তবে কি?” “বহিন, আমার ভ্রমর একদিনের জন্তও আমার কামনা করে নাই।” “তবে তুমি এ বেশ ধরিয়াছ কেন?” “কেন, তাহা বলিতে পারি না বহিন! আমি যাহার চরণে মন সমর্পণ করিয়াছি, সে ধন আমার অপ্রাপ্য—দুঃপ্রাপ্য নহে বহিন—অপ্রাপ্য।” সরস্বতী ঝিলঝিল করিয়া হাসিয়া উঠিল। মণিয়া তাহা দেখিয়া অতীব বিস্মিতা হইয়া বৈষ্ণবীর মুখের দিকে চাহিয়া রহিল। তখন সরস্বতী কহিল, “বহিন, স্ত্রীলোক এমন করিয়াই মরিয়া থাকে। যতদিন সময় থাকে, রূপ থাকে, যৌবন থাকে, ততদিন রমণী নিজের অসীম ক্ষমতা বুঝিতে পারে না। সে ক্ষমতা যখন যায়, তখন সে বুঝিতে পারে যে, সে কি আধিপত্য হেলায় হারাইয়াছে। তুমি ঘরে কিরিয়া যাও। যাহার জন্ত যোগিনী সাজিয়াছ, তাহার দিকে কিরিয়াও চাহিও না। গৈরিক ছাড়িয়া ফুলের সাজ ধর, দেখিবে দুইদিন পরে সে আপনিই তোমার পায়ে লুটাইয়া পড়িবে।” “বহিন, আর যদি সে না পড়ে?” “তাহাতে

কতি কি বহিন? একটা না পড়ে আর দশটা পড়িবে।”
 “তাহা হয় না বহিন, এই দুনিয়ায় সেই একজনই আমার সব;
 সে যদি না আসে, এ দুনিয়া অঁধার।” “ঐ ত মরণের লক্ষণ
 বহিন! ঐ করিয়া আমি মরিয়াছি,—আমার মত শত শত
 মরিয়াছে। চোখের সামনে দেখিতে পাইতেছি, তুমিও মরিতে
 যাইতেছ। তোমাকে স্পষ্ট বলিতেছি, তবু তুমি ত বুঝিতেছ
 না! পুরুষ তোমাকে যে চোখে দেখে, তুমি আমি ত তাহাকে
 সে চোখে দেখিতে পারি না; পুরুষ জানে যে আমরা তাহা
 পারি না এবং এই সন্ধিস্থল জানে বলিয়াই কঠিন পুরুষ চিরদিন
 অবলা নারীজাতিকে হেলায় পদদলিত করিয়া থাকে। শোন
 বহিন, এখনও সময় আছে, ঘরে ফিরিয়া যা। যদি তোর সে
 এতই কঠিন হয়, তবে তাহাকে ভুলিয়া যা। তাহার কঠিনতা
 কি তোকে কঠিন করিতে পারে না?”

বৈষ্ণবীর কথা শুনিতে-শুনিতে মগিয়া আবার অশ্রুধারায়
 অন্ধ হইয়া গেল। সে কঁাদিতে কঁাদিতে কহিল, “না,
 পারিব না বহিন, পারি কৈ? অনেক চেষ্টা করিয়া
 দেখিয়াছি, ভুলিতে পারি কৈ? শোন বহিন, আমি বেষ্টাকন্ডা,
 বেষ্টাবৃত্তি আমার পেশা। আমার পিতামাতা ইচ্ছা করিয়া
 আমাকে এই বৃত্তি অবলম্বন করাইয়াছে, স্ততরাং স্বভাবতঃ
 আমার মন সচরাচর পুরুষ অপেক্ষা সহস্রগুণ কঠিন। কিন্তু
 আমি ত কঠিন হইতে পারি নাই। তিনি আমার পক্ষে দেব-
 জলভ,—তিনি স্বর্গের দেবতা, আমি কুমি। তাহার পদস্পর্শ

আমার পক্ষে অসম্ভব বহিন, আমার মাতা হিন্দু, পিতা মুসলমান; আমি জারজা; আর তিনি সম্বংশজাত হিন্দু বাদ-শাহের সত্য উচ্চপদে প্রতিষ্ঠিত। আমার পক্ষে তিনি দেবদুর্লভ, তাঁহাকে স্পর্শ করা দূরে থাক্ দর্শনও আমার পক্ষে দুর্ভাগ্য। বহিন, তোমার চোখে জল দেখিয়া বুঝিয়াছি যে, তুমিও জলিয়াছ,—আমা অপেক্ষা শতগুণ, সহস্রগুণ জলিয়াছ। বহিন, যে আমার মত হীনা, তাহার মনে এ উচ্চাকাঙ্ক্ষা কেন আসে? যে কীট, সে কেমন করিয়া দেবদুর্লভ পদ কামনা করে? এ দুর্দমনীয় আশা, এ অশেষ বাসনা, এ অদম্য মনোবেগ যেখানে অসম্ভব,—যিনি হিন্দু ও মুসলমানের ঈশ্বর, যিনি দিন-রাত্রির সৃষ্টিকর্তা, তিনি সেখানে কেন তাহা আসিতে দেন, কেন দেন,—তুমি ত হিন্দু, তাহা বলিতে পার কি?”

অশ্রুধারায় মণিয়ার গণ্ডস্থল প্রাবিত হইল। সন্ন্যস্তীও উত্তর না দিয়া নীরব রহিল। বহুক্ষণ পরে সন্ন্যস্তী জিজ্ঞাসা করিল, “বহিন, কে সে? কেমন পুরুষ সে, যে তোমার এই প্রথম যৌবন, তোমার এই অতুল রূপরাশির ডালি হেলান উপেক্ষা করে? সে কেমন, তাহাকে একবার দেখিতে পাই। পুরুষ-ভ্রমর-সমাজেও এমন পুরুষ দুর্লভ।” বৈষ্ণবীর প্রশ্ন শুনিয়া মণিয়া অনেকক্ষণ উত্তর দিল না। প্রায় একদণ্ড পরে সে চক্ষু মুছিতে মুছিতে কহিল, “বহিন, আমার অপরাধ লইও না। আমি নীচ, তিনি পবিত্র। আমি কলুষিত। শুনিয়াছি, হিন্দুর পক্ষে যবনী দর্শন হয়,—বারনারী-স্পর্শ অধর্ম। তাঁহাকে দেখিলে

মনের বেগ সত্বরণ করিতে না পারিয়া যদি কিছু বলিয়া ফেলি ? না বন্ধন, তুমি আমাকে লোভ দেখাইও না, মাক করিও। হিন্দু ও মুসলমানের যিনি একমাত্র ঈশ্বর, তিনি তোমার মঙ্গল করুন।”

মণিয়া এই বলিয়া উঠিল। সরস্বতী বসিয়াই রহিল। মণিয়া একমনে পথ ধরিয়া সহরের দিকে চলিল। সে চক্ষুর অন্তরাল হইবার পূর্বে সরস্বতী অতি সাবধানে তাহার অনুসরণ করিল। তখন অপরাহ্ন; নগরোপকণ্ঠের পথেও দুই-একজন লোক চলিতে আরম্ভ করিয়াছে। সরস্বতী মণিয়ার অনুসরণ করিতে করিতে চকের নিকটে গিয়া উপস্থিত হইল। সে স্থানে এক ব্যক্তি তাহাকে দেখিয়া তালপত্রের ছত্রের অন্তরালে মুখ লুকাইল। সরস্বতী কিন্তু তাহা বুঝিতে পারিল না। তখন হইতে সরস্বতী মণিয়ার, এবং সেই নবাগত সরস্বতীর অনুসরণ করিতে লাগিল।

চত্বারিংশ পরিচ্ছেদ

মুনশীর পত্র

“কাল বিড়ালের লেজ একতোলা, কাণা হরিণের শিং একতোলা, আর বাহুড়ের ডানা একতোলা—এই তিনটি মিলাইয়া ছইসের জলে নূতন হাঁড়ীতে চাণাইবে। যতক্ষণ জাল দিবে,

বামদিকে ফিরিবে না, বাম অঙ্গ দিয়া স্পর্শ করিবে না, খাটি এক পোয়া থাকিতে নামাইবে।”

“জী, এমন জিনিস কোথায় পাইব?” “সমস্ত মৌজা বিবি-জান, একমাত্র কড়ির কথা। কড়ি ফেলিলেই সমস্ত হাজির। আর এই একখানা তাবিজ বোঙ্গাদের পীর মক্কাশরিফ হঠাতে আজমীরসরিফে আনিয়াছিলেন; এবং ইহার জোরে আলমগীর বাদশাহ তখত পাইয়াছিল, দারাশেকোর কাকেরী ছুটিয়া গিয়াছিল।”

“আমি বড় গরীব, এত পয়সা কোথায় পাইব যে এখন তাবিজ কিনিয়া লইয়া যাইব?” “বিবিজান, আমার ওস্তাদের হুকুম, যে যেমন লোক, তাহার কাছে সেই রকম দাম লইবে,—তাহা না হইলে কি আমাদের ব্যবসা চলে? খোদা যাহাকে বুলন্দ করিয়াছেন, সে যদি আমার মত গরীবের নিকট কোনও উপকার পায়, তাহা হইলে সে তাহার ওজন মাক্কিক দেয়;—আর দেওয়ানা ফকীর, সে আর কি দিবে,—দোয়া করিয়া যায়।” যাহারা বৃজরুককে ঘিরিয়া দাঁড়াইয়া ছিল, তাহাদের মধ্যে একজন বলিয়া উঠিল, “ওঃ নবীবখশ মিঞা কি মেহেববান!” বৃজরুক তাহার কথায় কর্ণপাত না করিয়া কহিল, “বিবিজান, ঐশ্বরের জন্ত এক টাকা, আর তাবিজের দুই টাকা দিয়া তুমি জিনিস লইয়া যাও,—মতলব হাসিল হইলে যাহা তোমার মনে আসে দিয়া যাইও।”

মতিয়া তিনটাকা দিয়া তাবিজ ও ঐশ্বধ লইয়া গৃহে ফিরিল।

উপরে উঠিয়া দেখিল যে, তাহার কণ্ঠা কেশবিজ্ঞাস করিতেছে। সে প্রথম তাহাকে তিরস্কার করিতে যাইতেছিল; তাহার পরে কি ভাষিয়া আর কোনও কথা কহিল না,—তাবিজ ও ঐষধ লুকাইয়া রাখিয়া, গৃহকর্মে মন দিল। প্রসাধন শেষ হইলে মণিয়া ডাকিল, “আম্মা!” মতিয়া মশলা পিষিতে-পিষিতে কহিল, “কেন?” “ওস্তাদরা আসিবে না?” “কেমন করিয়া জানিব বল?” “ডাকিতে পাঠাও।” “কেন, তোমার কি মজুরা আছে না কি?” “আছে।” “কোথায়? কেহ ত বায়না করিয়া যায় নাই!” “ফরীদ থা। যে আমাকে বায়না দিয়া রাখিয়াছে,—কাল অনেক রাত্রিতে আসিয়াছিল।” বলিয়া দিতে মনে ছিল না।” মণিয়া বজ্রাঙ্কল হইতে দুইটা নূতন আশরফী খুলিয়া লইয়া মাতার হস্তে দিল। বৃদ্ধা অর্থ লইয়া, মশলা ফেলিয়া রাখিয়া, ওস্তাদ ডাকিতে চলিল।

মণিয়া নীচে নামিয়া আসিল; এবং এক প্রতিবেশী পুত্রকে একটা ডুলি আনিতে বলিয়া দুয়ারে দাঁড়াইল। বালক ডুলি ডাকিতে গেল, মণিয়া দাঁড়াইয়াই রহিল। ক্ষণকাল পরে সে দেখিতে পাইল যে, সরস্বতী বৈষ্ণবী আসিতেছে। তাহাকে দেখিয়া মণিয়া হাসিল, কিন্তু নড়িল না। সরস্বতী তাহার সম্মুখ দিয়া যাইবার সময়ে দুই তিনবার তাহার দিকে চাহিল। মণিয়াও তাহাকে দেখিল; কিন্তু সে যে তাহাকে চিনিতে পারিয়াছে, এমন ভাব প্রকাশ করিল না। সুতরাং সরস্বতীও তাহার সহিত কথা কহিতে ভরসা করিল না। সরস্বতী চলিয়া

গেল; কিন্তু মণিয়া তখনও দাঁড়াইয়া বহিল। এক মুহূর্ত পরে তালপত্রের এক ছত্র মাথায় দিয়া এক ব্যক্তি সেই পথে আসিল। সেও মণিয়াকে দেখিয়া একবার দাঁড়াইল এবং তাহাকে ভাল করিয়া দেখিয়া চলিয়া গেল। মণিয়া তাহার সহিতও কথা কহিল না। ডুলি আসিল, ওস্তাদও আসিল; মণিয়া ফরিদ খাঁর উত্তানে চলিয়া গেল। মতিয়া আশ্রুতা হইয়া ঔষধ জাল দিতে বসিল।

সরস্বতী সন্ধ্যাকালে নগরপ্রান্তে এক ঠাকুরবাড়ীতে প্রবেশ করিল। সেটা বৈষ্ণবদিগের একটা আখড়া;—একজন মহাস্ত তাহার একটি সেবাদাসী এবং অনেকগুলি চেলা ও চেলী লইয়া সেই আখড়ার অধিবাসী। মহাস্ত অঙ্গনে বসিয়া গঞ্জিকা সেবন করিতেছিলেন। দুই একজন চেলা প্রসাদের প্রত্যাশায় নিকটে বসিয়া ছিল। সরস্বতী আখড়ায় প্রবেশ করিয়া মাটিতে বসিয়া গড়িল। মহাস্ত স্মিতমুখে ভান্ধা ভান্ধা বাঙ্গালায় জিজ্ঞাসা করিলেন, “কি বৈষ্ণবী দিদি, কি হোইলো, মতলব হাসিল?” সরস্বতী কহিল “ছাই হাসিল বাবা! আমি যে আর কতদিন এমন করিয়া বসিয়া থাকিব, তাহা বলিতে পারি না। বাবা, একটা জরুরী কাজ আছে, একখানা চিঠি পাঠাইতে হইবে।” “বৈষ্ণবী দিদি, তোমার সমস্ত কামই জরুরী। এখন সন্ধ্যাবেলা চিঠি লিখিবে কে, ভেজিবে কে?” “না বাবা, বড় জরুরী কাজ, এখনই একজন লোক পাঠাইয়া দাও।” “লোক এখন আসিলে বহুত পরশা লাগিবে।” “লাগুক, নগদ একটাকা দিব।”

কম্বী,—মনের কামনা দূর করিয়া ফেলিয়া দিব; বাসনা ও আকাঙ্ক্ষা অনলে দগ্ধ করিয়া—”মণিয়া আর বলিতে পারিল না। বৃদ্ধ বিণালকার তাহার হস্তধারণ করিয়া বসাইলেন; এবং ধীরে-ধীরে কহিলেন, “মা, তুমি আমার দুর্গার মত চির-দুঃখিনী; আজি হইতে আমার নিকট দুর্গাও যে, তুমিও সে। বস, শুন,—অসীম শত্রু-বেষ্টিত; কিন্তু সে নিরপরাধ। তাহার শত্রুবর্গ প্রবল; আর অসীম বালকের মত অসন্দিগ্ধ-চিন্ত। আমি ষাট বছরের বৃদ্ধা; কিন্তু এ কথা কাল সন্ধ্যাকালে বৃদ্ধিতে পারিয়াছি মা। অসীম যখন শিশু, তখন তাহার পিতা তাহার অঙ্ক কনিষ্ঠ ভ্রাতাপ্রহর; কারণ, এইমাত্র আশা আমার করে সমর্পণ করিয়া থা।” মুনশী জেবে হাত দিয়া দেখিল টাকাসম। মোহে আচ্ছন্ন সে টাকাটি লইয়া তাহার অম্লসরণকারীকে বহু ধন্যবাদী বায় আজ দ্বিতীয় ব্যক্তি এই সময়ে মুনশীকে জিজ্ঞাসা করিল, “আপনি কি আখড়ায় থাকেন?” মুনশী কহিল, “রাম রাম, আমি শকসেনা কায়স্থ,—আমি আখড়ায় থাকিতে যাইব কেন? এক বাঙ্গালী আউরং একখানা জরুরী ঋণ লিখাইবার জন্ত একটাকা কবুল করিয়া ডাকাইয়া লইয়া গিয়াছিল। আখড়ায় কি ভদ্রলোক থাকে?” “মহাশয় কি এই দেশের লোক?” “রাম রাম, বাবুজী, এই পাটনা সহর দোজখ। আমার নিবাস লখনউ, আমি ওয়াকিয়ানবীশের নকলনবীশ।” “কত দিন আছেন?” মুনশী দরিদ্র; সহানুভূতি পাইয়া সে একেবারে গলিয়া গেল এবং তাহার মনে যত দুঃখ সঞ্চিত ছিল তাহা আগন্তুককে

দ্বিচত্বারিংশ পরিচ্ছেদ

নবীন দূত

যখন হরিনারায়ণ বিছালকার পাটনা নগরে মণিয়ার সহিত কথা কহিতেছিলেন, তখন মুরশিদাবাদের পরপারে জাহাপাড়া গ্রামে, গঙ্গাতীরে কানুনগোই হরনারায়ণ রায়ের অটালিকার সম্মুখে দাঁড়াইয়া এক নাপিত চোপদারকে জিজ্ঞাসা করিতেছিল, “কর্তা কি খোরী হইবেন?” চোপদারের হৃদয় প্রেমপ্রবণ, সে কহিল, “নবীনদাদা, একবার তামাকু ইচ্ছা করিবে না কি? কলিকা তৈয়ার,—তুমি সেবা কর, আমি কর্তাকে জিজ্ঞাসা করিয়া আসি।” চোপদার হঁকা হইতে কলিকাটা তুলিয়া লইয়া নবীনের হস্তে দিল। নবীন তাহা লইয়া দ্বারের সম্মুখে উপবেশন করিল। চোপদার অন্তরে প্রবেশ করিল।

অন্দরে সুদীর্ঘ প্রশস্ত দুঃখকেননিভ শয্যায় বসিয়া কানুনগোই হরনারায়ণ তামাকু সেবন করিতেছিলেন। তাঁহার সম্মুখে দুই গজ পরিমাণ ভূমি ব্যাপিয়া তাঁহার অর্দ্ধাঙ্গিনী বিরাজ করিতে ছিলেন। একজন দাসী তালবৃন্ত লইয়া গৃহিণীকে ব্যঞ্জন করিতেছিল; অপরা একটি প্রকাণ্ড ছিলিমচি স্বন্ধে লইয়া দাঁড়াইয়া ছিল, তৃতীয়া এক বিশাল তাম্বুলাধার উভয় হস্তে গৃহিণীর সম্মুখে ধরিয়া দাঁড়াইয়া ছিল। কর্তা কহিলেন, “তাই ত, আপদ যে গিয়াও যায় না।” গৃহিণী কহিলেন, “তোমার এত ভয় কেন?” গৃহিণী

তাহাতে আমার কোনই আপত্তি নাই। বিশেষতঃ, এই দলিল-
অনুসারে পৈত্রিক সম্পত্তি দান অথবা বিক্রয়ের অধিকার যখন
আমার নাই, তখন আর আমি কি বলিব ?” “সুদর্শনকে কি
তোমার আবশ্যক আছে ?” “আমার আবশ্যক না থাকিলেও,
বাদশাহ তাহাকে ছাড়িবেন বলিয়া বোধ হয় না।” “স্ত্রীলোক-
গুলিকে লইয়া বড়ই বিপদ হইল। যখন ভদ্রাসন ত্যাগ করিয়া
আসি, তখন মনে করিয়াছিলাম যে, দুই-এক দিন পরে হর-
নারায়ণ স্বয়ং আসিয়া আমাকে ফিরাইয়া লইয়া যাইবে। কারণ
মানুষ এত সহজে অত দিনের প্রেম, জীবন-ব্যাপী বন্ধুত্ব বিস্মৃত
হইতে পারে না। ভুল অসীম, বড় ভুল,—কামিনী-কাঞ্চনের
জন্ত মানুষ পারে না এমন কার্য্য নাই। স্ত্রীলোকগুলিকে লইয়া
বড় বিপদ হইল ; সংসারে পুরুষ মাত্র আমরা দুইজন ;—একজন
যদি বাদশাহের সহিত দিল্লী যায়, আর অপর যদি মুরশিদাবাদ
যায়, তাহা হইলে স্ত্রীলোকগুলা কোথায় যায় ?” “যাইবে আর
কোথায়,—আপনি সঙ্গে লইয়া যান।” “তাহারা আমার সহিত
গেলে সুদর্শনের কষ্ট হইবে না ?” “কিসের কষ্ট ? আর সে বুদ্ধ-
বাত্রী—স্ত্রীলোক লইয়া যাত্রা তাহার অসম্ভব। আপনি দেশে
ফিরিয়া যাইতেছেন ; সুতরাং আপনার সহিত তাহাদের যাওয়াই
যুক্তিযুক্ত।”

পরিবারস্থিত স্ত্রীলোকগণের প্রসঙ্গ-কালে হরিনারায়ণ বিজা-
লকারের চক্ষুর কোণে বিষন্নতা দেখা দিয়াছিল ; কিন্তু অসীমের
কথা শুনিয়া, তাহার মুখ আবার প্রসন্ন হইল। তিনি কহিলেন,

“তবে তাহাই হউক ; তুমি কিন্তু আমার সহিত পরামর্শ না করিয়া, বিষয় সম্বন্ধে কাহাকেও কোনও কথা দিও না, অথবা কোন কাগজপত্র সহি করিও না।” “আপনি যাহা বলিবেন, তাহাই হইবে। আপনি কি এখন মুরশিদাবাদে যাইবেন?” “উপস্থিত দুই-চারি দিন নহে।” “আমাদের বোধ হয় শীঘ্রই দিল্লী যাত্রা করিতে হইবে।” “তবে আমি এখন আসি। তোমরা দুইজন খুব সাবধানে থাকিও ; কাহারও নিকট কোন কথা প্রকাশ করিও না। জানিয়া রাখিও, হরনারায়ণের গুপ্তচর তোমাদের সঙ্গে সঙ্গে ফিরিতেছে।” “চরটা কে বিজ্ঞানস্বর মহাশয়?” “সরস্বতী বৈষ্ণবী ত একজন ; তাহার সহিত আর কয়জন আছে, তাহা বলিতে পারি না।”

হরিনারায়ণ বিজ্ঞানস্বর বিদায় হইলেন ; সঙ্গে-সঙ্গে সরস্বতী বৈষ্ণবীও তাঁহার অনুসরণ করিল।

পঞ্চচত্বারিংশ পরিচ্ছেদ

কালীপ্রসাদ

“কৈ ঠাকুর, কড়ি কৈ?” “তাই ত বাবা, কড়ি ত নাই।” “ওসব ভ্রাকাপনা রাখ ঠাকুর, ভেবেছ যে, পায়ের ধূলা দিয়া হীরাপাটনীর কাছে পার হইবে! এমন জিনিসটি হবার জো

নাই। দেখ ঠাকুর, যদি ভাল চাপ, তবে কড়ি রাখিয়া নৌকা হইতে নাম।” “বড় বিপদে ফেলিলে বাপু! আসিবার সময় খেয়ার চড়ি ভাঙ্গাইতে ভুল হইয়া গিয়াছে।” “তাহার জ্ঞা চিন্তা নাই। টাকা বাহির কর, আমিই ভাঙ্গাইয়া দিতেছি।” “টাকা নহে বাপু, আমার নিকট মোহর আছে।” “আঃ, ঠাকুর হীরাপাটনী কি তাহাতে ডরায়? ভাল, মোহরই বাহির কর।” ব্রাহ্মণ কৌচার খোট হইতে নস্তুর আধার, এবং তাহার মধ্য হইতে একটি নস্তুরজিত স্বর্ণ-মুদ্রা বাহির করিল; এবং তাহা পাটনীর হস্তে দিয়া, পরীক্ষা করিয়া লইতে বলিল। পাটনী তাহা জলে ধুইয়া লইল, এবং আর একজন ব্যক্তিকে দিয়া কহিল, “দেখ ত ভাই, মোহরটা আসল কি না?” সে ব্যক্তি অতি বিচক্ষণ লোক। সে কাছার খোট হইতে একটি থলিয়া বাহির করিল। সেই থলিয়ার ভিতর হইতে একখানি কপি, এক শিশি তৈল, আর দুই টুকরা সোণা বাহির হইল। তাহা দেখিয়া ব্রাহ্মণ জিজ্ঞাসা করিল, “বাপু, তুমি কি সেকরা?” সে ব্যক্তি কহিল, “আজ্ঞা না, আমরা নরহুন্দর।” “নাম?” “নবীন দাস।” “নিবাস?” “পূর্বে ছিল রুকনপুর, উপস্থিত ডাহাপাড়া।” “কোন ডাহাপাড়া?” “শহরের পশ্চিম পার?” “ঢাকার পশ্চিম পারে ত কোন ডাহাপাড়া নাই?” “টাকা কেন ঠাকুর, শহর বলিলে কি ঢাকা বুঝায়? শহর ত শহর মুরশিদাবাদ।” তাহার কথা শুনিয়া ব্রাহ্মণ হাসিল। নবীন মোহর পরীক্ষা করিল; এবং তাহা পাটনীর হস্তে দিয়া মাথা নাড়িল।

পাটনী বারটি টাকা ও একখণ্ড কম এক কাহন কড়ি ব্রাহ্মণকে দিল। নৌকা তীরে লাগিল। যাত্রিগণ নামিল, ব্রাহ্মণও তাহাদিগের সহিত নামিল। নবীন দাস ব্রাহ্মণের সঙ্গ হইল।

কিয়ৎক্ষণ চলিতে চলিতে ব্রাহ্মণ পশ্চাতে ফিরিয়া চাহিল; এবং দেখিল যে, দূরে থাকিয়া নবীন দাস তাহার অনুসরণ করিতেছে। ব্রাহ্মণ স্থির হইয়া দাঁড়াইয়া গেল। সেইস্থানে পথটি অত্যন্ত বক্র বলিয়া নবীন তাহা দেখিতে পাইল না। তখন প্রায় সন্ধ্যা হইয়া আসিয়াছে। বৃক্ষতলে অন্ধকার ঘন; সুতরাং যে বৃক্ষতলে ব্রাহ্মণ দাঁড়াইয়াছিল, নবীন দাস যখন তাহার নিকটে আসিল, তখন আর তাহাকে দেখিতে পাইল না। দেখিতে না পাইয়াও নবীন দাঁড়াইল না,—ধীরে-ধীরে চলিতে লাগিল।

অন্ধকার ক্রমে গাঢ় হইয়া আসিল; এবং সঙ্গে-সঙ্গে বনমধ্যে পথের রেখা ক্ষীণ হইতে ক্ষীণতর হইয়া গেল। কিয়দ্দূর গিয়া নবীন দাঁড়াইতে বাধ্য হইল; কারণ সেই স্থানে পথের উপরে একটা প্রকাণ্ড বাঁশ পড়িয়াছিল; এবং তাহা সরাইতে নবীনের সাহসে কুলাইল না। একে রাত্রিকাল, তাহার উপর জনশ্রুত অরণ্য; কোন দিকে মাহুষের আবাসের চিহ্নমাত্র নাই। নবীন এদিক-ওদিক চাহিয়া ব্রাহ্মণকেও দেখিতে পাইল না। তখন সে বিষম ফাঁপরে পড়িল। কিয়ৎক্ষণ বিবেচনা করিয়া সে স্থির করিল যে, গম্ভাতীরে ফিরিয়া যাইবে। সে দুই-একপদ অগ্রসর হইবামাত্র সম্মুখে একটা দীর্ঘ নরককাল দেখিতে পাইয়া মুচ্ছিত হইয়া পড়িয়া গেল।

তাহার পতনের সঙ্গে-সঙ্গে ককালটাও পড়িয়া গেল ; এবং বৃক্ষ হইতে এক মনুষ্য-মূর্তি নামিয়া আসিয়া ককালটা উঠাইয়া লইয়া গেল। কিয়ৎক্ষণ পরে সে কিরিয়া আসিয়া, নবীনের হস্তপদ দৃঢ়রূপে রজ্জু দিয়া বন্ধন করিল ; এবং অনায়াসে তাহাকে স্বন্ধে উঠাইয়া লইয়া চলিয়া গেল। পথে যাইতে যাইতে তাহার সহিত আমাদের পূর্ব-পরিচিত ব্রাহ্মণের সাক্ষাৎ হইল। আগন্তুক তাঁহাকে দেখিয়া নবীন দাসের দেহ নামাইয়া রাখিল ; এবং প্রণাম করিয়া জিজ্ঞাসা করিল, “গুরুদেব, ইহাকে কি আপনি আনিয়াছেন ?” ব্রাহ্মণ হাসিয়া কহিলেন, “আমি আনি নাই বটে, তবে এ ব্যক্তি আমার জগুই বনে আসিয়াছে।” “সে কি ? এ কি তবে দীক্ষিত ?” “উহার নাম নবীন দাস, জাতিতে নাপিত। খেয়ার কড়ি লইয়া যাইতে ভুলিয়া গিয়াছিলাম ; সেইজগু একটা মোহর বাহির করিতে হইয়াছিল। সেই মোহর দেখিয়া নবীনচন্দ্র আমার পশ্চাৎ-পশ্চাৎ বনে আসিয়াছে।” “জগদম্বার ইচ্ছা প্রভু, মা’র বৃদ্ধি এত দিনে তৃষ্ণা অসহ হইয়া উঠিয়াছে ?” “কেন কালী-প্রসাদ, এত পণ্ডিতেও কি মা তৃপ্তা নহেন ?” “গুরুদেব, আপনি আমাকে এ কথা জিজ্ঞাসা করিতেছেন ইহা বড়ই আশ্চর্য্য।” “আশ্চর্য্য নহে কালীপ্রসাদ,—আমি কোন দিনই মহাবলির পক্ষপাতী নহি।” “এমন আজ্ঞা করিবেন না প্রভু ! অমানিশার মহানিশায় মা মহামায়া মহাবলি ভিন্ন মহাতৃষ্ণি লাভ করেন না।” “ইহাকে কি বলি দিবে না কি ?” “চারি ঘাস যাবৎ একটিও ফাঁদে পড়েনাই প্রভু ; সুতরাং বলি না দিয়া আর উপায় কি ?”

নবীন দাসের ততক্ষণে জ্ঞানোদ্রেক হইয়াছিল। কিন্তু প্রভু-
 শিষ্যের কথোপকথন শুনিয়া তাহার অঙ্গ হিম হইয়া গিয়াছিল।
 সে বন্ধাবস্থাতেই গড়াইয়া আসিয়া ব্রাহ্মণের পদযুগল ধারণ
 করিয়া কাদিয়া উঠিল; কিন্তু মুহূর্ত্ত মধ্যে তাহার আৰ্ত্তনাদ
 থামিয়া গেল; কারণ কালীপ্রসাদ তাহার গণ্ডে এমন এক
 চপেটাঘাত করিল যে, সে দ্বিতীয়বার মূচ্ছিত হইল। তখন
 গুরু শিষ্যকে কহিলেন, “দেখ কালীপ্রসাদ অমাবস্থার বিলম্ব
 আছে; স্মরণ্য ইহাকে তোমার অনেক দিন ধরিয়া রাখিতে
 হইবে।” শিষ্য কহিল, “প্রভু, অনুমতি করিলে গুরুপক্ষেই ইহার
 সদগতি করিয়া দিই।” “তাহাতে আর প্রয়োজন নাই। আমি
 বলি কি, ইহাকে ছাড়িয়া দাও।” কালীপ্রসাদ চমকিত হইয়া
 উঠিল; এবং কহিল, “প্রভু, বলেন কি! এমন কাজ করিলে কি
 মহামায়া আর রক্ষা রাখিবেন? চারিমাস মহাবলি না পাইয়া
 মহামায়ার কণ্ঠতালু শুক হইয়া আছে। সেইজন্য মা নিজের বলি
 স্বয়ং সংগ্রহ করিয়াছেন।” “কালীপ্রসাদ!” অত্যন্ত সঙ্কুচিত হইয়া
 কালীপ্রসাদ কহিল, “আজ্ঞা?” “তুমি জান, আমি কে?”
 বেদ্রাহত কুকুরের গায় অবনত মস্তকে শিষ্য কহিল, “জানি
 প্রভু!” “ইহাকে লইয়া গিয়া, মহামায়ার মন্দিরে বজ্রকুটিমে
 রাখিয়া আইস।”

নবীন যখন পুনর্বার চেতনা লাভ করিল, তখন সে স্পষ্ট
 বুঝিতে পারিল না যে, সে কোথায় আসিয়াছে। সে যে-স্থানে
 পতিত ছিল, তাহার অদূরে একটা পুরাতন মন্দিরমধ্যে অগ্নি

জলিতেছিল। তাহার আলোকে দেখিতে পাইল যে, সে একটা ক্ষুদ্র কক্ষ পতিত আছে। কক্ষের চারিদিকে চাহিয়া নবীন দাস তৃতীয়বার মুচ্ছিত হইল। সে দেখিয়াছিল যে, কক্ষের দুইটি দ্বারে দুইটা দীর্ঘ নরকঙ্কাল ত্রিশূল হস্তে দাঁড়াইয়া আছে ; এবং তৃতীয় দ্বারে একটা বৃহৎ বিষধর সর্প তাহাকে দংশন করিবার জগ্ৰ মস্তক উত্তোলন করিয়াছে। শীতল কর-স্পর্শে তাহার জ্ঞান পুনরায় ফিরিয়া আসিল। সে চক্ষু মেলিয়া দেখিল, সেই ব্রাহ্মণ তাহার শিয়রে বসিয়া মুখে জল সেচন করিতেছেন এবং কঙ্কালদ্বয় ও সর্প অন্তর্হিত হইয়াছে। ব্রাহ্মণ জিজ্ঞাসা করিলেন, “কি বাপু, কেমন আছ ?” প্রত্যুত্তরে নবীন আর কোন কথা কহিল না ; কিন্তু তাহার চক্ষুর কোণ দিয়া একবিন্দু জল গড়াইল। তাহা দেখিয়া ব্রাহ্মণের মন একটু নরম হইল। তিনি মস্তকে হস্তার্পণ করিয়া কহিলেন, “তোমার কোন ভয় নাই, তুমি উঠিয়া আইস।” নবীন উঠিল এবং ঘরের চারি দিকে চাহিয়া যখন ত্রিশূলধারী কঙ্কাল বা বিষধর সর্প দেখিতে পাইল না, তখন সে ধীরে-ধীরে গৃহের বাহির হইল। বাহিরে আসিয়া নবীন দেখিল যে, একটা বহু পুরাতন ইষ্টক-নির্মিত মন্দিরের সম্মুখে কতকটা পরিচ্ছন্ন স্থান। মন্দিরমধ্যে বৃহৎ কুণ্ডে অগ্নি জলিতেছে,—পূজক কালীপ্রসাদ। তাহার পশ্চাতে একটা মৃতদেহ, দুই-তিনটা সর্প ও কতকগুলো শৃগাল বসিয়া আছে। মন্দিরের অভ্যন্তরে, তিন দিকে তিনটা জীর্ণ পুরাতন গৃহ এবং তাহারই একটার মধ্যে সে আবদ্ধ ছিল। ব্রাহ্মণ মন্দিরান্ধন পার হইয়া অপর পার্শ্বের গৃহে প্রবেশ করিলেন,

—নবীন দাসও তাঁহার সঙ্গে-সঙ্গে চলিল। শিবা ও সর্পগুলি তাহাদিগকে দেখিলও না।

কক্ষমধ্যে প্রবেশ করিয়া ব্রাহ্মণ জিজ্ঞাসা করিলেন, “কিছু আহার করিবে কি?” নাপিত-পুত্র মাথা নাড়িল। “তৃষ্ণা পাইয়াছে কি?” নবীন দাস কহিল, “হাঁ।” ব্রাহ্মণ-প্রদত্ত মৃৎপাত্রে জল পান করিয়া নবীন দাস গৃহের এক কোণে উপবেশন করিল। ব্রাহ্মণ জিজ্ঞাসা করিলেন, “দেখ বাপু, তুমি বোধ হয় বেশ বৃদ্ধিতে পারিতেছ যে, এখানে আমার সাহায্য বাতীত তোমার আর রক্ষা নাই?” প্রত্যুত্তরে নবীন দাস সাষ্টাঙ্গে প্রণাম করিয়া ব্রাহ্মণের পদধূলি গ্রহণ করিল। ব্রাহ্মণ পুনর্বার জিজ্ঞাসা করিলেন, “বল দেখি, আমার পাছু লইয়াছিলে কেন?” নবীন কহিল “চোর-ডাকাইতের হাত হইতে আপনাকে রক্ষা করিবার জন্ত।” “ভাল কথা,—আমার সঙ্গে আসিলে না কেন?” “পাছে আপনি সন্দেহ করেন। প্রভু, আমি কোন মন্দ অভিসন্ধিতে আপনার পাছু লই নাই। আপনার আশীর্বাদে আমার মোহরের অভাব নাই।” নবীন এই বলিয়া কৌচাব খুঁট হইতে দশ থান মোহর খুলিয়া ব্রাহ্মণকে দেখাইল। ব্রাহ্মণ সন্তুষ্ট হইয়া কহিলেন, “ভাল কথা। তোমাকে প্রভাতে বাদশাহী সড়কে পৌছাইয়া দিয়া আসিব।” নবীন বাগ্র হইয়া কহিল, “প্রভু, সকাল হইলে কাল ঠাকুরটি যদি না ছাড়েন?” “তুমি চিন্তা করিও না। আমি এখানে থাকিতে আর কেহ তোমাকে স্পর্শ করিতে ভরসা করিবে না। এখনও প্রায় এক প্রহর রাত্রি

অবশিষ্ট আছে,—তুমি কি বিশ্রাম করিতে চাহ?” বিশ্রামের নামে নবীন শিহরিয়া উঠিল; এবং কহিল, “প্রভু, বিশ্রাম করিব কি—এখানে পা ফেলিতে অন্তরাব্রা শুকাইয়া আসিতেছে। মনে হইতেছে, এখনই সাপে খাইবে,—না হয় ত উপদেবতার হস্তে প্রাণটা যাইবে।” “তবে জাগিয়াই থাক; কিন্তু ভয় পাইও না।”

ষট্চত্বারিংশ পরিচ্ছেদ

জলে অগ্নি

পূজা সাঙ্গ হইলে কালীপ্রসাদ গৃহের দ্বারের দাঁড়াইয়া কহিলেন, “গুরুদেব, মহাপ্রসাদ?” ব্রাহ্মণ কহিলেন, “বাপু হে, অগ্নি আমার উপবাসের দিন; তুমি আহার করিয়া বিশ্রাম কর।” শিখা চলিয়া গেল। ব্রাহ্মণ একটা বৃহৎ তাম্রকুণ্ডে জল ভরিয়া কক্ষের মধ্যস্থলে রাখিলেন, এবং দীপ নির্বাপিত করিলেন। নবীন ভয়ে তটস্থ হইয়া ব্রাহ্মণের দিকে ঘেঁসিয়া বসিল। ব্রাহ্মণ স্থির, নিশ্চল। কিয়ৎক্ষণ পরে নবীনের মনে হইল যে, তাম্রকুণ্ডের জলে চন্দ্রালোক আসিয়া পড়িয়াছে; কিন্তু সে গৃহের দ্বার ও বাতায়নের দিকে চাহিয়া দেখিল, কোন দিক হইতেই কক্ষমধ্যে চন্দ্রালোক আসিতেছে না। তখন সে অত্যন্ত ভীত হইল বটে, কিন্তু জ্ঞানহারা হইল না।

দেখিতে দেখিতে তাম্রকুণ্ডের জলে অগ্নিশিখা খেলিয়া

বেড়াইতে লাগিল। প্রাণভয়ে নবীনদাস ডাকিল, “প্রভু, ঠাকুর!” কেহ উত্তর দিল না। তখন নবীনদাস ভয়ে ঘরের চারিদিক হাতড়াইয়া বেড়াইল; কিন্তু কাহাকেও খুঁজিয়া পাইল না। সে ভয়ে অর্দ্ধমৃত অবস্থায় পলাইবার চেষ্টা করিল, কিন্তু প্রতি দুয়ার হইতে এক-একটি সর্প তাহাকে ফিরিয়া আসিতে বাধ্য করিল। তাম্রকুণ্ডের জল আগুন লাগিয়া দপ্‌দপ করিয়া জলিয়া উঠিল,—ধূমে গৃহ পরিপূর্ণ হইয়া গেল। তাহা দেখিয়া নবীন এক কোণে বসিয়া কাঁপিতে লাগিল। দেখিতে-দেখিতে সে বসিয়া বসিয়াই জ্ঞান হারাইল।

তখন অন্ধকার হইতে ব্রাহ্মণ জিজ্ঞাসা করিলেন, “নবীন, তুমি কি জাগিয়া আছ?” উত্তর হইল, “না।” “তবে উত্তর দিতেছ কেমন করিয়া?” “আপনার আদেশে।” “উত্তম, তাম্রকুণ্ডের দিকে চাহিয়া দেখ।” “দেখিতেছি।” “কি দেখিতেছ?” “জল জলিতেছে।” “আর কি?” “ধূম। ধূমের মধ্যে একটা মানুষ। স্ত্রীলোক, বয়স অল্প; তেমন সুন্দরী নহে, সন্ন্যাসিনীর বেশ। কোন এক সম্পন্ন গৃহস্থের বাটীর অঙ্গনে দাঁড়াইয়া আছে। কি বলিতেছে তাহা আমি বুঝিতে পারিতেছি না। শুনিয়াছি, সে বলিতেছে, ‘যদি আমি সত্য হই, তাহা হইলে আমার মনের বলে আমার স্বামী আবার ফিরিয়া আসিবে, আবার আমাকে গ্রহণ করিবে,—তোরা দেখিবি, দেখিবি, দেখিবি।’ আর একদল রমণী তাহাকে পরিহাস করিতেছে।” অন্ধকার হইতে ব্রাহ্মণ কহিলেন, “বৈশ্বানর, বর্তমান হইতে

অভীতে যাও। নবীন কি দেখিতেছ ?” “রাত্রি শেষ। সেই গৃহের চারিদিকে অনেকগুলো কুকুর কলরব করিতেছে। অন্ধনে অনেক কলার পাতা পড়িয়া আছে,—বোধ হয় রাত্রিতে বৃহৎ ভোজ ছিল। চেলীর কাপড় পরিয়া বর ও বধূ সেই অন্ধনে আসিয়া দাঁড়াইল। আর কেহ তাহাদিগের সহিত আসিল না। বাড়ীর সকলে ঘুমাইতেছে। বর বধূকে কি বলিল, বধূ কাদিতেছে। বর তাহাকে পদাঘাত করিয়া চলিয়া গেল : কিন্তু তাহার চেলীর উত্তরীয় বধূর সাটীর সহিত বাঁধা রহিল। বধূ মুচ্ছিত হইয়া পড়িয়া গেল। প্রভাত হইয়াছে, চারিদিক হইতে বহু স্ত্রী-পুরুষ মুচ্ছিতা বধূকে বেঠন করিয়া দাঁড়াইয়া আছে। কেহ তাহাকে গালি দিতেছে, কেহ হুঃখ করিতেছে, কেহ বা তাহার মুখে জল ছিটাইতেছে। বধূ উঠিল ; কিন্তু সে কাহারও তিরস্কার মানিল না, সাশ্বনা লইল না। স্বামীর পরিত্যক্ত উত্তরীয় অঙ্গে জড়াইয়া কহিল, সে সতী,—তাহার স্বামী যেখানেই থাকুক, তাহার সতীত্বের বলে আবার ফিরিয়া আসিয়া তাহাকে গ্রহণ করিবে।” অন্ধকার হইতে পুনরায় কে কহিল, “আরও দূরে যাও।” নবীন আবার বলিতে আরম্ভ করিল “প্রশস্ত নদীতীরে দীর্ঘ অটালিকা। তাহার দুয়ারে দুইটা হাতী দাঁড়াইয়া আছে। আটজন গোলাম একখানা রুপার তাজাম বহিয়া আনিল। অটালিকার মধ্য হইতে দুইজন গোলাম আসিয়া একখানা প্রকাণ্ড গালিচা বিছাইয়া দিল। গোলামেরা গালিচার উপর তাজাম রাখিল। একজন সন্ন্যাসী আসিয়া গালিচার

উপর দাঁড়াইল,—গোলামেরা তাহাকে অপমান করিয়া নামাইয়া দিল। সন্ন্যাসী তাঙ্কামের আরোহীকে কি বলিল। আরোহী তাহার উত্তর দিল না। সন্ন্যাসী বলিতেছে, ‘তোমার দর্প চূর্ণ হইবে; তোমার এই ‘অতুল ঐশ্বর্য, অপরিমিত ক্ষমতা অতি শীঘ্র ভস্ম হইয়া যাইবে। ইহার কণমাত্র থাকিবে না। তুই পথে-পথে ছুয়া-ছুয়া করে ভিক্ষা করিয়া বেড়াইবি; লোকালয় ছাড়িয়া শ্মশানে আশ্রয় লইবি; তবে তোমার পাপের প্রায়শ্চিত্ত হইবে। যাহার রূপের মোহে দেবগুরু বিন্মত হইয়াছিল সে বিষধরী হইয়া তোকে দংশন করিবে। তাহার বিষের যন্ত্রণায় ঐশ্বর্য, পদ, সর্বস্ব পরিত্যাগ করিয়া দেশের গ্রামে-গ্রামে, নগরে-নগরে ছুটিয়া বেড়াইবি।’ নবীন থামিল। গৃহমধ্যে আবার কে কহিল, “বৈশ্বানর, স্থির হও,—ভবিষ্যতে যাও।” নবীন পুনরায় বলিতে আরম্ভ করিল, “আর একটা নদীতীর, সম্মুখে প্রকাণ্ড অট্টালিকা, তাহার সম্মুখে হাজার সওয়ার তলওয়ার খুলিয়া পাহারা দিতেছে। এ অট্টালিকা আমি চিনি, ইহা মুরশিদাবাদের স্ববাদার জাফর কুলী খান দেউড়ী। তাঙ্কামে চড়িয়া একজন আমীর আসিল,—সে হিন্দু, বাঙ্গালী। সে দেখিতে অনেকটা আজিকার ব্রাহ্মণের মত। আরজবেগী স্বয়ং আসিয়া তাহাকে অভ্যর্থনা করিয়া লইয়া গেল।” অন্ধকার হইতে পুনরায় শব্দ হইল, “আরও দূরে যাও।” নবীন পুনরায় বলিতে আরম্ভ করিল। “গঙ্গাবক্ষে একখানা প্রকাণ্ড ছিপ নক্ষত্রবেগে ছুটিয়াছে। তাহা দেখিতে-দেখিতে পদ্মার মোহনায় পৌঁছিল। তিনজন

ছিপ্ হইতে লাফাইয়া পড়িয়া, একথানা গ্রামের মধ্যে প্রবেশ করিল। সেই গ্রামের পথে একটি যুবতী স্ত্রীলোক বসিয়াছিল। সে বোধ হয় পাগলী ; কারণ, তাহার পরণে লাল কস্তাপেড়ে সাড়ী, কপালভরা সিন্দূর, অঞ্চলে একথানা জীর্ণ পুরাতন চেলীর উত্তরীয় বাধা। নোকার আরোহীকে দেখিয়া সেই পাগলী উঠিয়া দাঁড়াইল। আরোহী অগ্রসর হইয়া তাহার হস্তধারণ করিল। প্রকাশে গ্রামের মধ্য দিয়া সেই পাগলী তাহার হাত ধরিয়া লইয়া চলিয়াছে। গ্রামের অনেক লোক তাহাদিগের সঙ্গে চলিয়াছে। মেয়ে পুরুষ সকলেই বলিতেছে, যে, এতদিনে পাগলী পিতার জাতি নষ্ট করিল। পাগলী তাহা শুনিল। সে হাসিতেছে, এবং একরাশি রুক্ষ জটীর উপরে কাপড় টানিয়া দিয়াছে। সকলে একটা পুরাতন বাটীর ভিতরে প্রবেশ করিল। একজন বৃদ্ধ ব্রাহ্মণ অঙ্গনে নামিয়া আসিল। নোকার আরোহী ও পাগলী তাহাকে প্রণাম করিল। অঙ্গনটা আমার পরিচিত এইখানে বিবাহের রাত্রিতে বর বধূকে পদাঘাত করিয়া চলিয়া গিয়াছিল।” অন্ধকার হইতে শব্দ হইল, “স্থির হও। বৈশ্বানর প্রত্যাবর্তন কর। এই ব্যক্তি কোথায় যাইবে ?” নবীন বলিতে আরম্ভ করিল, “একটা প্রশস্ত নদীতীরে এক প্রৌঢ় বৈষ্ণবী বসিয়া আছে,—আমি তাহাকে চিনি। সে ডাহাপাড়ার সরস্বতী বৈষ্ণবী। আমার পরামর্শানুসারে কাহ্ননগোই হরনারায়ণ রায় তাহাকে গোয়েন্দা করিয়া পাটনায় পাঠাইয়াছিলেন। প্রকাণ্ড সহর,—বোধ হয় পাটনা। এ সহর আমি কখনও দেখি নাই। সরস্বতীর পার্শ্বে একটি পরমা

সুন্দরী যুবতী বসিয়া আছে। তাহার রূপ এত যে, বস্ত্র-
অলঙ্কারের অভাবে গৈরিক বসনে তাহাকে অধিকতর সুন্দরী
দেখাইতেছে।”

“নদীতীরে একখানা নৌকা লাগিল। সেখানা গহনার
নৌকা। কারণ, অনেক লোক মালপত্র লইয়া নামিল। আমিও
তাহার মধ্যে ছিলাম। সরস্বতী আমাকে দেখিয়া উঠিয়া
আসিল, কিন্তু আমি তাহার সহিত কথা কহিব কি,—মেয়েটির
রূপ দেখিয়া আমার মাথা ঘুরিয়া গেল। আমি তাহাদের সহিত
সহরে চলিলাম। প্রকাণ্ড চোক,—অনেক দোকান-পসার।
একটা বেণিয়ার দোকানের সম্মুখে একজন বাঙ্গালী ব্রাহ্মণ বসিয়া
আছেন। আমি তাঁহাকে চিনি। তিনি ডাহাপাড়ার হরি-
নারায়ণ বিজ্ঞানস্বর। এই লোকটাকে সরাইতে পারিলে একশ’
থান মোহর বকশিশ পাইব। আর যদি কাবার করিতে পারি
—” কক্ষ মধ্যে শব্দ হইল, “অগ্নি, যথাস্থানে প্রত্যাবর্তন কর।”
সংহসা কক্ষের ধূম দূর হইয়া গেল,—তাম্রকুণ্ডের অগ্নি নিবিয়া
গেল। দ্বিতীয়বার শব্দ হইল, “নবীন, তুমি ঘুমাও।” নবীন দাস
যেখানে বসিয়া ছিল, সেইখানেই ঘুমাইয়া পড়িল।

সে যখন জাগিয়া উঠিল, তখন মুক্ত বাতায়ন-পথে সূর্য্যরশ্মি
আসিয়া তাহাকে স্পর্শ করিয়াছে। চারিদিক অহুসঙ্কান করিয়া
সে ত্রিশূলধারী নরকঙ্কাল, বিষধর সর্প অথবা তাম্রকুণ্ড কিছুই
দেখিতে পাইল না। নবীন দাস উজ্জ্বল দাসে কক্ষত্যাগ করিয়া
পলায়ন করিল।

সপ্তচত্বারিংশ পরিচ্ছেদ

প্রেমানন্দের আবির্ভাব

ভস্মরাশি যেমন প্রজ্জ্বলিত হতাশনকে আবদ্ধ রাখিতে পারে না, মলিন বসনও তেমনই রূপসীর রূপ লুকাইতে পারে না। রমণী-রূপ বহুবিধ। কবিকুল তাহার মধ্যে স্নিগ্ধ ও তীব্র রূপের বর্ণনাই করিয়া থাকেন। মণিয়ার রূপ তীব্র। যে মানুষের মনে বল নাই, তাহার চক্ষু এ রূপে ঝলসিয়া যায়। বিদ্যালঙ্কার-গৃহ হইতে ফিরিয়া আসিবার পরে, আচার-ব্যবহার ও রীতি-নীতির পরিবর্তনে সে রূপ যেন তীব্রতর হইয়া উঠিয়াছিল। সামান্ত গৈরিক বসনের এমন কি শক্তি আছে যে, সে জলন্ত রূপ-শিখা আচ্ছন্ন করিয়া রাখে। মণিয়া যখন পথে চলিত, তখন পথের লোক আশ্চর্য্য হইয়া তাহার দিকে চাহিয়া থাকিত। তাহার মাতা দুঃখ করিত যে, কত্যা এমন রূপের মর্যাদা বুঝিল না,—সময় থাকিতে কিছু উপার্জন করিয়া লইল না। তাহার ভক্তবৃন্দ তাহার এই পরিবর্তনে ক্রমশঃ অভ্যস্ত হইয়া গিয়াছিল। মণিয়া যখন মজুরা করিতে যাইত, তখন সে রীতিমত পেশোয়াজ ও ওড়না চড়াইয়া যাইত; কিন্তু অপর সময়ে সে হিন্দু-সন্ন্যাসিনী সাজিয়া থাকিত। ইদানীং সে প্রায় সমস্ত দিনই সরস্বতীর সঙ্গে-সঙ্গে ঘুরিত। তাহার এক ভয় ছিল, পাছে মজুরা করিতে যাইবার সময় সরস্বতীর সহিত তাহার সাক্ষাৎ হয়।

একদিন অপরাহ্নে সে সরস্বতীর সহিত চৌক দিয়া বাইতে-ছিল। একটা দোকানের সম্মুখে একজন লোককে দেখিয়া সরস্বতী দূরে দাঁড়াইয়া গেল; এবং মণিয়াকে কহিল, “বহিন, তুমি ঘরে যাও; আমি এখন বাইতে পারিব না।” মণিয়া আর কোন কথা জিজ্ঞাসা না করিয়া চলিয়া গেল। সরস্বতী সেই দোকানের পাশে দাঁড়াইয়া রহিল। কিয়ৎক্ষণ পরে অসীম ও হরিনারায়ণ দোকান হইতে বাহির হইলেন। তখন সরস্বতী অন্তরাল হইতে আসিয়া একজনকে জিজ্ঞাসা করিল, “এ দোকানটা কাহার?” সে ব্যক্তি কহিল, “মনোহর সাহা বণিয়ার। সাহাজী সহরে খুব নগরের লোক,—তুমি কি নতুন আসিয়াছ?” সরস্বতী তাহার কথার স্পষ্ট উত্তর না দিয়া, পাশ কাটাইয়া সরিয়া গেল; এবং দূরে থাকিয়া অসীমের অনুসরণ করিল। কিন্তু অসীম ও হরিনারায়ণকে ছাউনীর পথে অগ্রসর হইতে দেখিয়া সে ফিরিয়া আসিল। ফিরিয়া আসিতে-আসিতে পথে তাহার সহিত এক মুসলমানের সাক্ষাৎ হইল। মুসলমান তাহার দিকে একদৃষ্টিতে চাহিয়া আছে দেখিয়া, সরস্বতী দাঁড়াইয়া গেল। তাহার মুখখানা পরিচিত বোধ হইলেও, সরস্বতী কিছুতেই তাহাকে চিনিতে পারিল না। তাহার কিংবর্তব্যবিমূঢ় ভাব দেখিয়া মুসলমান হাসিয়া কহিল, “বিবি, স্তালাম, মূই বাঙ্গলা ছাশ হইতে আয়েলাম, এ ছাশের কথা ত বুঝি পারি নে?” তাহার কণ্ঠস্বর শুনিয়া সরস্বতী হাসিয়া কহিল, “ওমা, নবীন দাদা বুঝি। এ আবার কি সঃ?” মুসলমান হাসিয়া উঠিল;

এবং কহিল, “তবে প্রথমটা চিনিতে পার নাই! সরস্বতী দিদি! এবারে একবারে একশ’ থান মোহর বকশিশ! তোমার সঙ্গে রাধেকৃষ্ণ সম্পর্ক অর্থাৎ নিন্দী, কৃষ্ণ বলরাম আর বলিব না। কোন গতিকে বুড়াকে কাশী কি বৃন্দাবন পার করিতে পারিলেই হয়।” সরস্বতী তাহার উৎসাহে উৎসাহিত না হইয়া কহিল, “মামলাটা যত সোজা মনে করিয়াছ নবীন দাদা, ততটা সোজা নহে। ছোটরায় আর বামুনঠাকুর কয়দিন ধরিয়া কি কানাঘুষা করিতেছে, আমি কিছুই সমঝাইতে পারিতেছি না। তুমি আসিয়াছ, ভালই হইয়াছে। কিন্তু তুমি থাকিবে কোথায়? যে পোষাকে আসিয়াছ,—আমাদের আখড়ায় ত জায়গা পাইবে না।” “তাহার জন্ত চিন্তা করিও না। তুলসীর কণ্ঠী, জপের মালা, এবং নামাবলী সঙ্গেই আছে; স্ততরাং থা সাহেবের প্রেমানন্দ বাবাজী সাজিতে বিলম্ব হইবে না।” এই সময়ে সরস্বতীকে পশ্চাৎ হইতে কে ডাকিল, “কি বহিন, এখনও এইখানেই আছ?” সরস্বতী বিস্মিত হইয়া চাহিয়া দেখিল যে, তাহার পশ্চাতেই মণিয়া দাড়াইয়া আছে। তাহাপেক্ষা সহস্রগুণ অধিক বিস্ময় নবীনচন্দ্রকে অভিভূত করিয়া ফেলিয়াছিল। সে বিস্ময়বিস্ফারিত নেত্রে মণিয়ার দিকে চাহিয়া ছিল। সরস্বতী তাহার অবস্থা দেখিয়া ক্রুদ্ধ হইল, এবং অশ্রুট ঝরে কহিল, “আ মর মিনসে, মেয়েটাকে যেন হাঁ করিয়া গিলিতেছে,—একটু লজ্জাও করে না?” নবীন বহু কষ্টে আশ্ব-সম্বরণ করিল। মণিয়া তাহার রকম দেখিয়া মুখ টিপিয়া হাসিতেছিল। সে জিজ্ঞাসা করিল, “বহিন, থা সাহেব

বুঝি তোমার দেশের লোক ?” সরস্বতী অনেক ভাবিয়া চিন্তিয়া কহিল, “বহিন, ও আমাদের দেশের বহুরূপী,—তু’পয়সা রোজ-গারের চেষ্ঠায় পাটনায় আসিয়াছে। ও মুসলমান নয় হিন্দু, উহার নাম নবীন।” নবীন নিজের নাম শুনিয়া হাসিয়া ফেলিল। তাহা দেখিয়া মণিয়াও ঈষৎ হাসিল স্ততরাং নবীন কৃতকৃতার্থ হইয়া গেল। নিজের রূপ-পরিবর্তনে কৃতিত্ব দেখাইবার জন্য নবীন ভাঙ্গা হিন্দিতে বলিল, “বিবি, আমি এই এক লহমা ঐ গাছটার আড়াল হইতে আসিতেছি,—তোমরা এইখানেই দাঁড়াও।” সরস্বতী ও মণিয়া মুখ ফিরাইয়া দাঁড়াইয়া রহিল। নবীন একটা বৃহদাকার তিস্তিড়ী-গাছের অন্তরালে গিয়া, মুহূর্ত্তমধ্যে বাঙ্গালী বৈষ্ণব সাজিয়া আসিল। সে ফিরিয়া আসিলে সরস্বতী জিজ্ঞাসা করিল, “নবীন দাদা, পরচূলা আর কাপড়গুলো কি করিলে ?” নবীন একটা গৈরিক-রঙিত বস্ত্রের ঝুলি দেখাইয়া কহিল, “এই যে, ইহার মধ্যে।” এই বলিয়া সে একবার প্রশংসা আকর্ষণ করিবার জন্য মণিয়ার দিকে চাহিল। মণিয়া তাহা বুঝিতে পারিল; এবং একমুখ হাসিয়া কহিল, “বাঃ! তোফা!” নবীন ভাবিল, শিষ্ণুদূত আসিয়া গল্পপুটে তাহাকে সশরীরে বৈকুণ্ঠে লইয়া গেল।

সরস্বতী ও মণিয়ার সহিত নবীন আখড়ায় চলিল। পথে যাইতে-যাইতে নবীন মণিয়ার প্রতি ঘেরূপ লোলুপ দৃষ্টিপাত করিতেছিল, তাহা হইতে বুদ্ধিমতী মণিয়ার বুঝিতে বিলম্ব হইল না যে, ইহারই মধ্যে নবীন দাস তাহার অভুগত দাসাভূদাস

হইয়া পড়িয়াছে। যাইতে যাইতে মণিয়া জিজ্ঞাসা করিল, “বহুরূপী-সাহেব, তুমি কাল কি সাজিবে?” প্রশ্ন শুনিয়া নবীন বিষম সমস্তায় পড়িল। সরস্বতী তাহাকে বাঁচাইবার জন্য বহুরূপী বলিয়া পরিচয় দিয়াছিল মাত্র; কিন্তু সে ত সত্য-সত্যই বহুরূপী নহে; স্বতরাং রূপ-পরিবর্তনে তাহার অভ্যাস নাই। প্রায় অর্দ্ধদণ্ড পরে নবীন একটা উত্তর খুঁজিয়া পাইল। সে কহিল, “বিবি স্নাহেব যাহা বলিবেন, তাহাই সাজিব।” মণিয়া কহিল, “কাল বাঙ্গালী রাজা সাজিও।” নবীন চরিতার্থ হইয়া বলিল, “যো হুকুম।” আখড়ার দরজায় আসিয়া মণিয়া, সরস্বতী ও নবীনের নিকট বিদায় লইল। তখন সরস্বতী তাহার হাত ছাড়াইতে পারিলে বাঁচে; এবং সেও সরস্বতীর নিকট হইতে দূরে যাইতে চাহে; কারণ, সরস্বতী অন্তরালে নবীনের নিকট সংবাদ জানিতে ইচ্ছুক, এবং মণিয়ারও একটা বড় মজলিসে মজুরা ছিল।

আখড়া ছাড়িয়া মণিয়া উর্দ্ধ্বাঙ্গে ছুটিল; পথে যাইতে যাইতে তাহার অদৃষ্টক্রমে একখানা একা মিলিয়া গেল। সে একায় চড়িয়া বসিল, এবং চালককে দ্রুতবেগে চালাইতে আদেশ করিল। একা যখন তাহার গৃহের নিকটবর্তী হইয়াছে, তখন সে দেখিতে পাইল, হরিনারায়ণ পদব্রজে গৃহে ফিরিতেছেন। তাঁহাকে দেখিয়া মণিয়া একা থামাইয়া নামিল। হরিনারায়ণ জিজ্ঞাসা করিলেন, “কি সংবাদ, মা?” মণিয়া কহিল, “বাণজান, সংবাদ আছে; তবে জরুরী কি না তাহা বলিতে পারি না।

সরস্বতীর দেশের এক দোস্ত আসিয়াছে, তাহার নাম নবীন,—
 সে বহুরূপী।” “নবীন, বহুরূপী! লোকটা দেখিতে কেমন?”
 মণিয়া যতদূর পারিল নবীনের রূপ বর্ণনা করিল। তাহা শুনিয়া
 হরিনারায়ণ কহিলেন, “লোকটাকে একবার দেখাইতে পার?”
 “তাহার জন্ত চিন্তা কি? বোধ হয় আমি যাহা বলিব সে
 তাহাই করিবে।” হরিনারায়ণ উত্তর শুনিয়া হাসিলেন; এবং
 কহিলেন, “প্রভাতে ও সন্ধ্যায় আমাকে মনোহর সাহার দোকানে
 পাইবে।”

অষ্টচত্বারিংশ পরিচ্ছেদ

নব-নবীন-মিলন

নবীন দাস নিশ্চিত মনে শীতল প্রভাত-সমীরণের সহিত
 তামাকু-সেবন করিতেছিল। সেই সময়ে আখড়ার সম্মুখ দিয়া
 একজন পুরুষ চলিয়া যাইতেছিল। লোকটাকে দেখিয়া নবীনের
 মনে হইল যে, সে বাঙ্গালী। নবীন প্রথমে মনে করিল যে,
 বাঙ্গালীই হউক, আর বিহারীই হউক, সে কথায় তাহার
 প্রয়োজন কি? তাহার পরে আবার কি ভাবিয়া জিজ্ঞাসা
 করিল, “বলি ওহে, তুমি কি বাঙ্গালী না কি?” সে ব্যক্তি
 বাঙ্গালী; সুতরাং প্রশ্ন শুনিয়া কিরিল, এবং আখড়ার দাওয়ায়
 উঠিয়া নবীনকে জিজ্ঞাসা করিল, “আপনি কতদিন এখানে

আসিয়াছেন ?” নবীন তাহাকে বসিতে বলিয়া কহিল, “কাল সন্ধ্যাবেলায়। তোমরা—আপনারা ?” “আমরা নাপিত, নিবাস গোড়। একজন আমীরের সহিত চাকরী লইয়া এদেশে আসিয়াছিলাম।” “বটে—বটে, আমরাও পরামাণিক, তামাক ইচ্ছা হইবে কি ?”

আগন্তুক হুঁকা লইয়া দাওয়ায় বসিয়া গেল। এ-কথা সে-কথার পর নবীন জিজ্ঞাসা করিল, “কাহার কাছে চাকরী কর বন্ধু ?” আগন্তুক দুঃখিত হইয়া কহিল, “চাকরী আর করি কই বন্ধু ! উপস্থিত সেটি গিয়াছে।” “কোথায় চাকরী করিতে ?” “একজন কায়স্থ রাজা,—নূতন বাদশাহের দোস্ত,—বড় আমীর লোক। আমার বরাতের দোষেই চাকরীটা গেল।”

নবীন দাস বুদ্ধিমান ব্যক্তি। চাকরী যে কেন গেল, তাহা জিজ্ঞাসা করিয়া, সে আগন্তুকের আত্মাভিमानে আঘাত করিল না ; বরঞ্চ কথাটা ফিরাইবার জন্ত সে জিজ্ঞাসা করিল, “আমীরের নামটা কি ?” আগন্তুক কহিল, “রাজা অসীম রায়।” কিছুমাত্র ঔৎসুক্য প্রকাশ না করিয়া, নবীন জিজ্ঞাসা করিল, “পূর্বদেশের লোক বুঝি ?” আগন্তুক কহিল, “না দাদা, নূতন মুরশিদাবাদ সহরের লোক। বয়স কম, পয়সারও দরদ নাই। দিব্য আরামে ছিলাম,—বিলক্ষণ ছুঁটাকা উপরি পাওনা ছিল। অদৃষ্টদোষে সব গেল দাদা, সব গেল।”

এই সময় নবীন হুঁকাটা লইল।

নবীন কিছু কহিল না, শুধু একটা দীর্ঘনিশ্বাস পরিত্যাগ

করিল। আগন্তুক বলিতে লাগিল, “মনিবের আমার দিলখানা ছিল যেন দরিয়া;—বরাত দাদা, বরাত! মেয়েমানুষের জুতা দুনিয়াটা ছারেখারে গেল।” নবীনচন্দ্র দ্বিতীয়বার দার্শনিকাস ভাগ করিয়া হুঁকাটা আগন্তুকের হস্তে প্রদান করিল। কলিকার তামাকু শেষ হইয়া আসিয়াছিল; সুতরাং আগন্তুক একটা টান দিয়াই কাশিয়া উঠিল। নবীন সেই অবসরে হুঁকাটা আত্মসাৎ করিয়া, নিজে টানিতে আরম্ভ করিয়া দিল। কাশি সামলাইয়া আগন্তুক বলিতে লাগিল, “দাদা রে, বামন হইয়া চাঁদে হাত দিতে গেলেই, এইরূপ হইয়া থাকে। এই সহরে টা খুবসুরং বাড়ীজী আছে,—তাহার নাম মণিয়া। এই উঠু বয়স,—চোরাখানাও জম্‌কালো, গলাটা বুলবুলের মত,—হাসিটা এসাজের আওয়াজের মত। আমি দাদা গরীবের ছেলে,—বড়লোকের জুতা বহিতে আসিয়া, দু’দিন সোণার মুখনলে অম্বরী তামাক টানিয়া, মনিব বাহির হইয়া গেলে মথমলের মসনদে বসিয়া, মাথাটা ঘুরিয়া গিয়াছিল। মেয়েমানুষটার সহিত মনিবের গলায় গলায় ভাব!”

এতক্ষণে নবীন দাস বিচলিত হইল। সে জিজ্ঞাসা করিল, “বটে! মেয়েমানুষটার বুঝি তখন তোমার উপর টান?”

“আরে রামচন্দ্র! সে তেমন চিড়িয়াই না। বন্ধু, পাটনা সহরের মণিয়া বাড়ি যেন লোটন পায়রা,—ঘতটা দম পায়, ততটা ঘুরপাক খায়। পয়সা ভিন্ন সে ভাল করিয়া কথাই কয় না।”

“তবে কি হইল ?”

“বেকুবের যাহা হইয়া থাকে ! একদিন মনিবের শাল-দোশালা চড়াইয়া, নকল রাজা সাজিয়া বাজারটা ঘাচাই করিতে গেলাম ; কিন্তু সে বাজারে মেকী চলা ভার । কত আসল রাজা সে নিত্য কিনিয়া বেচিতেছে,—নকল রাজা চিনিতে তাহার বাজাইতেও হইল না । বরাত, বন্ধু, বরাত । নেশাটা ভালরকম জমিয়া গিয়াছিল ; সুতরাং মনিব আসিয়া যখন ধরিয়া ফেলিল, তখন পলাইবার উপায় পর্য্যন্ত রহিল না । ফলে চাকরীটি পর্য্যন্ত গেল ।”

নবীন দাস একটি দীর্ঘনিঃশ্বাস ত্যাগ করিয়া উঠিল ; এবং কলিকার ভাঙ্গ ঢালিয়া ফেলিয়া, পুনরায় তামাকু সাজিতে উত্তত হইল । তাহা দেখিয়া আগন্তুক ব্যস্ত হইয়া কলিকাটা লইয়া তামাকু সাজিতে আরম্ভ করিল । নবীন প্রীত হইয়া জিজ্ঞাসা করিল, “তোমার নামটি কি দাদা ?”

আগন্তুক কহিল, “নবকৃষ্ণ ।”

“বান্ধজীটির নাম কি বলিলে ভাই ?”

“মণিয়া বান্ধ ।”

“সে এ সহরে কোথায় থাকে ?”

“সহরের মধ্যেই ।”

এই সময়ে নবকৃষ্ণের তামাকু সাজা শেষ হইল ; কিন্তু সে পূর্বেই নবীনের তামাকু-সেবন-পদ্ধতি জানিতে পারিয়াছিল ; সুতরাং সে কলিকাটি নবীনের হস্তে না দিয়া, নিশ্চিন্ত মনে

ধূমপান করিতে লাগিল। ইহা দেখিয়া নবীন মনে-মনে অল্প-বিস্তর বিরক্ত হইল ; কিন্তু নবকৃষ্ণকে চটাইবার ভয়ে কিছু বলিতে ভরসা করিল না। কলিকার তামাকু যখন প্রায় শেষ হয়-হয় হইয়াছে, তখন নবকৃষ্ণ কলিকাটি নবীনের হস্তে সমর্পণ করিয়া উঠিল। নবীন জিজ্ঞাসা করিল, “এখন চলিলে কোথায় ?”

“চাকরীর চেষ্টায়।”

নবীন ব্যস্ত হইয়া উঠিয়া দাঁড়াইল ; এবং জিজ্ঞাসা করিল, “বন্ধু, ওবেলায় দর্শনটা পাওয়া যাইবে ত ?”

নবকৃষ্ণ কহিল,—“যাইবে, অবশ্য যাইবে। আমি নিজেই আসিব।” নবকৃষ্ণ চলিয়া গেলে, নবীন সরস্বতীর সন্ধানে আখড়ার দিকে গেল ; এবং তাহাকে গৃহকক্ষে ব্যাপৃত দেখিয়া, পুনরায় দাওয়ায় আসিয়া, তাহাকে সাজিতে বসিল। এই সময়ে স্নানিয়া আসিয়া আখড়ার দুয়ারে দাঁড়াইল ; এবং নবীনকে দেখিয়া দ্রুত হাসিয়া কহিল, “কি ভাই সাহেব, শহরে বাহির হও নাই ?” হাসি দেখিয়া নবীনের হৃদয় যে দীর্ঘ ক্ষুদ্র দিয়াছিল, সম্বোধন শুনিয়া অর্দ্ধপথে তাহা স্তম্ভিত হইয়া গেল। নবীন দীর্ঘকাল প্রেমের ব্যবসা করিয়া আসিয়াছে ; সুতরাং একেবারে আশা ত্যাগ করিল না। সে অস্বাভাবিক ভাবে সম্বোধন হজম করিয়া কহিল, “বিবিসাহেব, আমাদের মুরশিদাবাদ শহরে বহরপীরা সন্ধ্যার সময়ে বাহির হয়। তোমাদের পাটনা শহরের নিয়ম কি ?”

মণিয়া কহিল, “ভাই সাহেব, বহরুপীদের নিয়ম কি তাহা ত বলিতে পারি না ; তাহারা যখন বহরুপী সাজিয়া আসে, তখনই দেখিতে পাই। ঘরে ত কাহাকেও দেখি নাই। কোন-কোন দিন মেলাতে যেন সকালেও বহরুপী দেখিয়াছি।”

“ভাল কথা, আজ বিকালে সাজিয়া বাহির হইব। বিবি-সাহেব, কোথায়-কোথায় যাইব, আমি ত শহরের পথ চিনি না। তোমার যদি অবসর থাকে, তাহা হইলে আমাকে পথ চিনাইয়া লইয়া যাইতে পারিবে ত ?”

মণিয়া হাসিয়া বলিল, “কেন পারিব না !” মণিয়ার সঙ্গ-লাভের সম্মতি পাইয়া, নরহৃন্দর-কুলশেখর নবীন তৎক্ষণাৎ শরীরে বৈকুণ্ঠে চলিয়া গেল ; তাহার দেহখানা মাত্র পাটনা শহরের আশুড়ায় পড়িয়া রহিল।

বহুক্ষণ পরে আত্মসম্বরণ করিয়া সে জিজ্ঞাসা করিল, “বিবি, কোথায়-কোথায় যাইব বলিলে না ?”

মণিয়া কহিল, “শহরের আমীর-ওমরাহ—কাহারও নাম শুনিয়াছ কি ? পথে-পথে ঘুরিলে উপার্জন অধিক হয় না ; দুই দণ্ড পথে না ঘুরিয়া, যদি একদণ্ড আমীরদের ঘরে-ঘরে ফির, তাহা হইলে রোজগার স্থিগুণ হইবে।”

নবীন কিয়ৎক্ষণ চিন্তা করিয়া কহিল, “আমীর ওমরাহ ত কাহাকেও চিনি না। তবে শুনিয়াছি যে, এই সহরে এক বিখ্যাত বাদ্গী আছে,—সকল আমীর-ওমরাহ না কি তাহার জুতা বহিয়া চলে।” “বটে ! এমন বাদ্গী কে ?” “মণিয়া

বাঈ।” মণিয়া গম্ভীর হইয়া গেল; এবং কিছুক্ষণ পরে কহিল,
 “নাম শুনিয়াছি বটে, তবে দেখি নাই।” নবীন উৎসুক হইয়া
 জিজ্ঞাসা করিল, “তাহার ঠিকানা জান?” “ঠিকানা জানিতে
 কতক্ষণ লাগিবে? আমি এখনই জানিয়া আসিতেছি।”
 “বিবিসাহেব, তবে চল আজ সন্ধ্যাবেলায় মণিয়া বাঈয়ের ঘরে
 যান্ধিয়া থাক। যদি অদৃষ্টে রোজগার থাকে, তাহা হইলে সেই-
 খানেই দুই-চারিটা আমীর মিলিয়া যাইবে।” মণিয়া বহু কষ্টে
 আত্মসম্বরণ করিয়া, আখড়ার দুয়ার হইতে চলিয়া গেল;
 সরস্বতীর সহিত আর সাক্ষাৎ করিল না।

উনচত্বারিংশ পরিচ্ছেদ

প্রত্যাবর্তনের পথে

“তবে সেই ভাল, আমাদের বোধ হয় দুই এক দিনের মধ্যেই
 ছাউনি উঠাইয়া এলাহাবাদে যাইতে হইবে। বাদশাহ স্বয়ং
 এই পত্রখানা লিখিয়া দিয়াছেন কিন্তু তাহার সহিত দেওয়ানের
 যে সম্পর্ক তাহাতে পত্রে কোন কার্য হইবে বলিয়া বোধ হয়
 না। দেওয়ানের দরবারে আরজি পেশ করিতে হইলে বহু
 অর্থের প্রয়োজন; অত টাকা কোথায় পাইব, কাকা?” “আমি
 কি তোমার নিকট অর্থ চাহিয়াছি বাপু? যদি তোমার সম্পত্তি

তোমাকে কখনও ফিরাইয়া দিতে পারি, তাহা হইলে ঋণ পরিশোধ করিবার বহু অবসর পাইবে। ভাল কথা! মণিয়ার সহিত কি তোমার সম্প্রতি সাক্ষাৎ হইয়াছে?” “না।” “নবীন নাপিত পাটনায় আসিয়া পছঁ ছিয়াছে। কেন আসিয়াছে তাহা বলিতে পারি না তবে সংবাদটা আমাদের পক্ষে শুভ নহে।” “এই বাদশাহী ছাউনীর মধ্যে নবীন আর আমার কি করিবে? আপনারা ত চলিয়া যাইতেছেন স্ততরাং ভয়ের কোন কারণই নাই।” “দেখ বাপু, নবীনচন্দ্র নরসুন্দর কি জ্ঞাত পাটনায় আসিয়াছে, তাহা যতক্ষণ জানিতে না পারিতেছি ততক্ষণ হরিনারায়ণ শর্মা পাটনা শহরের বাহিরে পদার্পণ করিতেছেন না।”

হরিনারায়ণ আসন ত্যাগ করিয়া উঠিলেন, অসীম তাঁহাকে প্রণাম করিলেন; ভূপেন্দ্র তাহুর দুয়ারে দাঁড়াইয়াছিল। সেও আসিয়া প্রণাম করিল। হরিনারায়ণ বস্ত্রাবাস পরিত্যাগ করিলেন। সেদিন নগরোপকণ্ঠে ভীষণ জনতা। দলে দলে নর-নারী পথ ধরিয়া চলিয়াছে, হরিনারায়ণ ধীরে ধীরে চৌকের দিকে চলিলেন। পথে যাইতে যাইতে তাঁহার মনে হইল কে যেন তাঁহার উত্তরীয় ধরিয়া আকর্ষণ করিতেছে। তিনি পশ্চাৎ ফিরিয়া দেখিলেন আপাদ মস্তক গৈরিকবসনমণ্ডিতা এক রমণী দাঁড়াইয়া আছে। তিনি পথের ধারে সরিয়া গেলেন, রমণী বলিল “বাপজান, আমি মণিয়া। আমার সঙ্গে আসুন।” হরিনারায়ণ পথ ছাড়িয়া মণিয়ার পশ্চাতে ধাক্কা ক্ষেত্রের মধ্যে

প্রবেশ করিলেন। দূরে ক্ষেত্রের মধ্যে একটা কবর ছিল, তাহার চারিদিকে প্রাচীর দিয়া ঘেরা, মণিয়া সেই কবরস্থানের সম্মুখে আসিয়া দাঁড়াইল। তাহার অঙ্গুলীনির্দেশ মত হরিনারায়ণ দেখিলেন একটা প্রকাণ্ড জীর্ণ সমাধির অন্তরালে বসিয়া দুই জন মানুষ বাঙ্গালায় কথা কহিতেছে। হরিনারায়ণ শুনিলেন একজন বলিতেছে “নগদ একটা হাজার টাকা, বুঝিলে বন্ধু?” “হাজার টাকা পাইলে আমি সব করিতে পারি।” “দেখ তোমার মনিবের সঙ্গে মুরশিবাদ হইতে এক বুড়া বামুন আসিয়াছে তাহার নাম হরিনারায়ণ বিদ্যালঙ্কার, তাহাকে চেন কি?” “বিলক্ষণ চিনি।” “সেই বামুনকে যদি পার করিতে পার তাহা হইলে এখনই নগদ হাজার টাকা।” “দাদা বুড়াত মন্দ লোক নয়, তবে তাহাকে পার করিতে চাও কেন?” “কে ভাল কে মন্দ লোক, বুঝিলে ভায়া সে কথা বলা বড়ই কঠিন; বিশেষতঃ বড় লোকের সম্পর্কে। বুড়া হয়ত ভাললোক কিন্তু তাহার একটি বিধবা মেয়ে আছে জান কি? তাহার সহিত, বুঝিলে কি না, তোমার মনিবের—বুঝিতে পারিয়াছ ত? বুড়া সমাজের ভয়ে দেশ ছাড়িয়া পলাইয়া আসিয়াছে কিন্তু মেয়েটা এখনও, বুঝিলে কিনা, তোমার মনিবকে—বুঝিতে পারিয়াছ ত? দেখ ভায়া তোমার মনিবও যে আমার মনিবও সে। আমি তোমার মনিবের বড় ভাইয়ের খাস নফর; তাহারই হুকুমে বুড়া বামুনকে আর তাহার মেয়েটাকে ছোট কর্তার সঙ্গ ছাড়াইতে আসিয়াছি। দেখ, যদি কোন গন্তিকে

এই লক্ষ্মীছাড়া মেয়েটাকে আর বুড়াটাকে কাবু করিতে পার তাহা হইলে নগদ একটি হাজার টাকার তোড়া তোমার দুয়ারে পছন্দইয়া দিয়া আসিব।” “বুড়াকে কেমন করিয়া পার করিব?” “সে কথা তুমি বুঝ। পার করার অনেক উপায় আছে—ছালায় ভরিয়া থেয়ার নৌকায় গঙ্গার পরপারেও রাখিয়া আসা যায় আবার এক ঘায়ে বৈতরণী পার করিয়াও দেওয়া যায়।” “বৈতরণী পার করাই সুবিধা কারণ মড়ায় কথা কহে না।” “তবে তুমি ভার লইবে?” “হাজার টাকা অনেক টাকা দাদা। এখন হইতে চেষ্টায় রহিলাম।”

মণিয়া ইসারা করিয়া হরিনারায়ণকে ডাকিল, হরিনারায়ণ প্রাচীরের অন্তরাল ছাড়িয়া দূরে সরিয়া আসিলে মণিয়া বলিল “বাপুজান, এখন হইতে আমার কথা শুনিয়া চলিতে হইবে, আপনার সঙ্গে তিন চারিজন লোক দিতেছি। পাটনা সহরে নবকৃষ্ণ খানসামা মুঠা মুঠা সোণা ছড়াইয়া যাহা না করিতে পারিবে, আপনার আশীর্বাদে আমার মুখের কথায় তাহা হইবে।” মণিয়া হরিনারায়ণকে সঙ্গে করিয়া লইয়া সহরে ফিরিল এবং তিন চারিজন লোক তাঁহার সঙ্গে দিয়া হরিনারায়ণকে মনোহর সাহার দোকানে পাঠাইয়া দিল। সে হরিনারায়ণকে বলিয়া দিল যে সে নিজে তাঁহার বাড়ীতে সংবাদ দিয়া আসিবে।

পঞ্চাশত্তম পরিচ্ছেদ

জিন

“কাঁদ কেন ?” স্বদর্শন উত্তর না দিয়া ঘন ঘন বস্ত্রের কোণ দিয়া চোখ মুছিতে আরম্ভ করিল, বধু জিজ্ঞাসা করিল “সকাল বেলায় শুধু শুধু কাঁদিতে বসিলে কেন ?” স্বদর্শন চক্ষু মুছিয়া বলিল, “বড় বউ—একে তুমি—তাহার উপর তম্বুরা—” ব্রাহ্মণ সত্যসত্যই কাঁদিয়া আকুল হইল। তখন ব্রাহ্মণী নিজে অস্ত্র ধরিলেন, তিনি বলিলেন, “ঠাকুর, চুপ্ করিবে কি ?” ব্রাহ্মণ চক্ষু মুছিয়া বলিল, “হঁ।” “তবে চুপ কর।” ব্রাহ্মণের ক্রন্দন সত্যসত্যই থামিল। ব্রাহ্মণী জানিল যে তিনটি তম্বুরা, দুইটি পাখোয়াজ ও একটি স্বরবাহার ছাড়িয়া যাইতে হইবে বলিয়া ব্রাহ্মণের শোক উপস্থিত হইয়াছে। বুদ্ধিমতী ব্রাহ্মণী কহিল, “তার জন্ত ভাবনা কেন ? পাটনা সহরে তোমার ত কত বন্ধুবান্ধব রহিয়াছে, তাহাদের একজনের কাছে রাখিয়া বাওনা কেন ?” তাহা শুনিয়া ব্রাহ্মণ সানন্দে বলিয়া উঠিল “ঠিক বলিয়াছ ব্রাহ্মণী, এ পাটনা সহরে আমাকে চিনিয়াছে তিনজন, তুমি, নূতন বাদশাহ আর মণিয়া বাড়ি।”

ব্রাহ্মণ তখনই তম্বুরা আর পাখোয়াজগুলি লইয়া বাহির হয়। দেখিয়া বধু জিজ্ঞাসা করিলেন, “এত বেলায় যাইতেছ খাইয়া

“যাওনা কেন?” সুদর্শন বলিল “না না তাহা হইলে বিলম্ব হইয়া আসিবে, আমি ফিরিয়া আসিয়াই আহার করিব।”

বাড়ী ছাড়িয়া সুদর্শন একমনে শহরের দিকে চলিল, তাহার অজ্ঞাতসারে তাহার পদদ্বয় তাহাকে মণিয়ার গৃহে লইয়া চলিল। মণিয়া তখন গৃহে ছিল না, মণিয়ার মাতা সুদর্শনকে দেখিয়াই চটিয়া গেল। সুদর্শন যখন জিজ্ঞাসা করিল “মণিয়া কোথায় ও কখন আসিবে” তখন সে সকল কথাতেই বলিল “আমি জানি না।” মতিয়া ঘরের দুয়ার বন্ধ করিয়া দিল তাহা দেখিয়া সুদর্শন তম্বুরা ও পাথোয়াজগুলি লইয়া অদূরে এক বৃক্ষ তলে উপবেশন করিল। দেখিতে দেখিতে দুই দণ্ড কাটিয়া গেল; কিন্তু মণিয়া আসিল না। ব্রাহ্মণ ক্ষুধার যন্ত্রনায় অস্থির হইয়া পুনরায় মণিয়ার দুয়ারে কড়াঘাত করিল।

পুনরায় সুদর্শনকে আসিতে দেখিয়াই বৃদ্ধা জলিয়া উঠিল এবং কহিল, “তুই কের আসিয়াছিস্?” সুদর্শন অত্যন্ত আশ্চর্য হইয়া উত্তর দিতে ভুলিয়া গেল। বৃদ্ধা তখন দ্রুতবেগে গৃহ হইতে বাহির হইয়া গিয়া, দুয়ার বন্ধ করিয়া দিল; এবং বাহিরে দাঁড়াইয়া চীৎকার করিয়া কাদিতে আরম্ভ করিল। তাহার ক্রন্দনে পল্লীর আবাল-বৃদ্ধ-বনিতা গৃহের সম্মুখে আসিয়া দাঁড়াইল; এবং সকলেই একসঙ্গে তাহাকে প্রশ্ন করিতে আরম্ভ করিল; কিন্তু সে উত্তর দিল না। বৃদ্ধা ক্রন্দনের মধ্যে দুই একবার “জিন-জিন” বলিয়া চীৎকার করিতেছিল। তাহা হইতে দুই-একজন বুদ্ধিমান্ প্রতিবেশী বুঝিল যে, জিন মতিয়া

বাঁকে ধরিতে আসিয়াছে। তাহারা জিজ্ঞাসা করিল, “জিন কোথায়?” বৃদ্ধা চীৎকার বন্ধ না করিয়াই, গৃহের দ্বার দেখাইয়া দিল। দুই-চারিজন সাহসী পুরুষ সাহসে ভর করিয়া দুয়ার খুলিয়া দেখিল, বৃদ্ধ গৃহস্থামী ও একজন অপরিচিত পুরুষ হস্তভষ্ম হইয়া দাঁড়াইয়া আছে। সুদর্শনকে দেখিয়া বৃদ্ধার চীৎকারের মাত্রা বাড়িল; এবং সে বলিল, “ঐ জিন, ঐ জিন।” তখন সকলে মিলিয়া সুদর্শনকে ধরিয়া বাঁধিয়া ফেলিল। সুদর্শন এত আশ্চর্য হইয়া গেল যে, তাহার বাক্যস্মৃতি হইল না। সহৃদয় প্রতিবেশিগণের মধ্যে একজন ওঝা ডাকিতে ছুটিল; একজন কাজী ডাকিতে গেল; এবং দুই-চারিজন দল বাঁধিয়া ফোজদারকে সংবাদ দিতে গেল। সুদর্শনের তথুরা ও পাখোয়াজগুলি বৃদ্ধতলে পড়িয়া ছিল,—তাহা যে শাইল সে-ই উঠাইয়া লইয়া গেল।

ওঝা ও কাজী আসিবার পূর্বে ফোজদার আসিয়া উপস্থিত হইল; এবং কোন কথা না জিজ্ঞাসা করিয়াই, সুদর্শনকে লইয়া কোতোয়ালীতে চলিয়া গেল। মণিয়া যখন বেশ পরিবেশন করিতে গৃহে আসিল, তখন মাতাকে দেখিতে না পাইয়া সে বিশেষ আশ্চর্যগ্ধিতা হইল না। কারণ, তাহার মাতা মধ্য-মধ্যে না বলিয়া চলিয়া যাইত। কোমল-হৃদয়া প্রতিবেশিনী-দিগের অল্পগ্রহে তাহার সংবাদ জানিতে বিলম্ব হইল না। তাহারা আসিয়া বলিয়া গেল যে, জিন তাহার সন্ধানে আসিয়াছিল; এবং তাহাকে না পাইয়া, তাহার মাতাকে

ধরিতে গিয়াছিল। পল্লীর সকলে মিলিয়া তাহার মাতাকে বাঁচাইয়াছে; এবং ফৌজদার আসিয়া জিনকে লইয়া গিয়াছে। মণিয়া প্রথমে মনে করিয়াছিল যে, হয় ত অসীম আসিয়াছিলেন; কিন্তু সে যখন শুনিল যে, জিন তালগাছের মত লম্বা এবং কৃষ্ণবর্ণ, তখন তাহার চিন্তা দূর হইল। সে প্রতিবেশিনীদিগকে বিদায় করিয়া কাক্রী বালক সাজিল, এবং বুখায় আপাদ-মস্তক মণ্ডিত করিয়া বাহির হইয়া গেল।

একজন প্রতিবেশী আসিয়া যখন অসীমকে সংবাদ দিল যে, হরিনারায়ণ বিদ্যালঙ্কার এবং সুদর্শন তখনও গৃহে ফিরিয়া যান নাই, তখন তিনি অত্যন্ত ব্যস্ত। বাদশাহ আদেশ দিয়াছেন যে, লঙ্কর প্রভাতে পাটনা ত্যাগ করিয়া কুচ করিবে। তিনি ভূপেন্দ্রকে বিদ্যালঙ্কার-গৃহে পাঠাইয়া দিয়া, যাত্রার ব্যবস্থা করিতে লাগিলেন। সন্ধ্যা হইয়া গেল,—শিবিরে অসংখ্য মশাল জলিয়া উঠিল,—রাত্রির প্রথম দণ্ড কাটিয়া গেল; কিন্তু ভূপেন্দ্র তখনও ফিরিল না দেখিয়া, অসীম উৎকণ্ঠিত হইয়া উঠিলেন। তিনি অশ্বপৃষ্ঠে বিদ্যালঙ্কার-গৃহে যাত্রা করিলেন।

তিনি গিয়া দেখিলেন যে ভূপেন্দ্রের নিকট হরিনারায়ণের সংবাদ পাইয়া দুর্গাঠাকুরাণী ও বধূ আশ্বস্তা হইয়াছেন বটে, কিন্তু তখনও কেহ আহার করেন নাই। অসীম বড় বধূর নিকট জানিলেন যে, সুদর্শন সম্ভবতঃ তম্বুরা ও পাথোয়াজগুলি স্বন্ধে লইয়া মণিয়ার গৃহে গিয়াছেন; এবং তাহা শুনিয়া ভূপেন্দ্রও সেই দিকে গিয়াছে। তিনি স্ত্রীলোকদিগকে আশ্বাস দিয়া মণিয়ার

গৃহাভিমুখে চলিলেন। মণিয়ার গৃহে কাহাকেও দেখিতে না পাইয়া, অসীম প্রতিবেশী দিগের নিকট জানিলেন যে, মণিয়ার পিতা ও মাতা কোজদারীতে গিয়াছে। তাহা শুনিয়া তিনি সহর কোতোয়ালীতে চলিলেন।

কোজদার তাঁহার পরিচয় পাইয়া স্মদর্শনকে ছাড়িয়া দিল।

একপঞ্চাশত্তম পরিচ্ছেদ

ত্রিবিক্রম

সন্ধ্যা হইয়া আসিল। পশ্চিমদিকে একখানা ক্ষুদ্র মেঘ দেখা দিল। তাহা দেখিতে দেখিতে সমস্ত গগন ছাইয়া ফেলিল। তখন হরিনারায়ণ ভীত হইলেন। ছিপ ক্রতবেগে চলিতে লাগিল। চারিদিক যখন অন্ধকার হইয়া আসিল, তখন অল্প-অল্প বাতাস উঠিল। প্রশস্ত গঙ্গাবক্ষে ক্ষুদ্রবৃহৎ বীচিম বা দেখা দিল। হরিনারায়ণ দাঁড়ীদিগকে জিজ্ঞাসা করিলেন “ঝড় উঠিল, তোরা কোথায় যাইতেছিস্?” পশ্চাৎ হইতে নাবিক উত্তর করিল, “আর এক ক্রোশ গেলেই পথ পাইব। যদি হাওয়া না উঠিত, তাহা হইলে একদণ্ডের মধ্যেই এক ক্রোশ চলিয়া যাইতাম।” “হাওয়া যখন ক্রমশঃ বাড়িয়া চলিয়াছে, তখন আর ছিপ চালাইয়া কাজ নাই; তুমি তীরে লাগাও।”

“এখানেটার জলে অনেক পাথর আছে,—হাওয়ার মুখে তীরে লাগান সহজ নহে।”

হরিনারায়ণ আর কিছু বলিলেন না; ছিপ পূর্ববৎ চলিতে লাগিল। সহসা বায়ুর বেগ বন্ধিত হইল। তাহার মুখে পড়িয়া ছিপ বিদ্যুৎবেগে উড়িয়া চলিল। হরিনারায়ণ বিস্মিত হইয়া দেখিলেন, তখনও দাঁড়ীয়া বাহিতে ছাড়ে নাই। দেখিতে দেখিতে অন্ধকার ঘনাইয়া আসিল। এবং বৃষ্টি আরম্ভ হইল। বহুদূরে একটা আলো দেখা গেল। পশ্চাৎ হইতে মাঝি কহিল, “ঝড়ে নৌকা পড়িয়াছে; এখনই পাথরে লাগিয়া গুঁড়া হইয়া যাইবে। ঠাকুর মহাশয় যদি একটু স্থির হইয়া বসেন, তাহা হইলে নোকগুলোকে বাঁচাইবার চেষ্টা করি।” হরিনারায়ণ কহিলেন, “আমার জন্ত চিন্তা করিও না। তোমার নৌকা ডুবিলেও আমি মরিব না।” দেখিতে-দেখিতে আলোক নিকটে আসিল। হরিনারায়ণ দেখিলেন, একখানা অতি বৃহৎ বোঝাই নৌকা ঝড়ের মুখে পড়িয়া বে-সামাল হইয়া পড়িয়াছে। তাহার মাঝিরা দুইটা নোঙ্গর ফেলিয়াছে; কিন্তু তাহা বাধে নাই। ঝড়ের বেগে মাস্তুলটা ভাঙ্গিয়া পড়িয়াছে; কিন্তু সেটা নৌকা ছাড়ে নাই। সুতরাং তাহার ভায়ে নৌকা বিষম হেলিয়া পড়িয়াছে; এবং প্রতি মুহূর্তে জল উঠিতেছে। ছিপ নিকটে আসিলে, বৃহৎ নৌকার মাঝি-মাল্লারা লাকাইয়া ছিপে উঠিল। ছিপের মাঝি জিজ্ঞাসা করিল, “ভোমাদের চড়নদার নাই?” তাহারা কহিল, “এক পাগলা ঠাকুর আছে; সে

কথাও কহে না, উঠেও না।” “সে কোথায়?” “নৌকাতেই আছে।”

ছিপ ফিরিল এবং মজ্জনোন্মুখ নৌকায় লাগিল। সকলে দেখিল, এক নগ্ন মূর্তি নৌকার সম্মুখে ধ্যানাসনে বসিয়া আছে। ছিপের মাঝি ডাকিল, “ঠাকুর!” উত্তর নাই। সে দ্বিতীয় বার ডাকিল, “বলি, ও ঠাকুর, নৌকা ঘে বানচাল হয়!” নগ্ন মূর্তি উত্তর দিল না। তখন নৌকার মাঝি কহিল, “তুমি কাহাকে ডাকিতেছ! ও ঠাকুর একেবারে পাগল। আজ সাতদিন রাজমহল ছাড়িয়াছি। ইহার মধ্যে সন্ধ্যাবেলায় এক গণ্ডুষ জল ছাড়া উহাকে কেহ কিছু খাইতে দেখি নাই।” ছিপের মাঝি ইঙ্গিত করিল; চারিজন ছিপের দাঁড়ী নগ্ন মূর্তি উঠাইয়া ছিপে আনিল,—ছিপ ছাড়িয়া দিল। সহসা শুভ্র অনলশিখা অসিত-বরণ গগন দীর্ণ করিল। তাহার আলোকে সকলে সভয়ে, সুবিস্ময়ে চাহিয়া দেখিল, একটা মহাকায় উর্দ্ধ আসিয়া নৌকা গ্রাস করিল। যখন দ্বিতীয়বার বিদ্যুৎ বলকিল, তখন আর তাহার চিহ্ন মাত্রও দেখা গেল না।

ছিপ ফিরিল; প্রবল বায়ুর বিরুদ্ধে অতি ধীরে ধীরে শিলাসঙ্কুল জলপথ অতিক্রম করিয়া তীরের নিকটে আসিল। সেই সময়ে আর একটা প্রকাণ্ড উর্দ্ধ ছিপ উঠাইয়া লইয়া তীরে শুকভূমিতে নিক্ষেপ করিল। প্রচণ্ড আঘাতে হৃদয় তরলী খণ্ডবিখণ্ড হইয়া গেল। সকলেই অল্পবিস্তর আঘাত পাইয়াছিল। বিদ্যুতালোকে মাঝিরা দেখিল যে, কেহই মরে নাই। সহসা

হরিনারায়ণ গুনিতে পাইলেন, অন্ধকারে তাহার পার্শ্বে কে বলিতেছে, “হাঁ দেখিলাম, এখন ফিরিয়া যাই। প্রভু, বিংশতি বৎসর যাবৎ আদেশ পালন করিয়া আসিয়াছি,—কখনও কণামাত্র অবহেলা করি নাই। আজি প্রথম অদৃষ্ট-চক্রের আবর্তনের বিরুদ্ধে চলিতে চেষ্টা করিয়াছিলাম।” আবার বিদ্যুৎ চমকিল। হরিনারায়ণ দেখিলেন, নগ্ন মূর্তি চক্ষু মেলিয়াছে। অন্ধকারে তাহার কথা গুনিয়া মাঝিমাল্লারা অত্যন্ত ভীত হইয়াছিল।

নগ্ন মূর্তি উঠিয়া দাঁড়াইল এবং হরিনারায়ণের হস্তাকর্ষণ করিয়া কহিল, “আমার সহিত আইস।” হরিনারায়ণ মন্ত্রমুগ্ধের ন্যায় তাহার সহিত চলিলেন। বিদ্যুতের আলোকে তাহাদিগকে চলিয়া যাইতে দেখিয়া, ছিপের মাঝি বলিয়া উঠিল, “ঠাকুর মহাশয়, কোথায় যান? আমার উপরে হুকুম আছে, আপনাকে পাটনায় ফিরাইয়া লইয়া যাইতে হইবে।” হরিনারায়ণ কহিলেন, “তবে তুমিও আইস।” মাঝি যখন তাহাদের অহুসরণ করিতে উত্তত হইল, তখন সহসা একটা প্রকাণ্ড বিষধর সর্প গর্জ্জন করিয়া উঠিল। বিদ্যুতের আলোকে হরিনারায়ণ দেখিতে পাইলেন, মাঝিমাল্লারা দ্রুতবেগে পলায়ন করিতেছে।

নগ্ন মূর্তি হরিনারায়ণের হস্ত ধারণ করিয়া দ্রুতবেগে চলিতে আরম্ভ করিল। চারিদিকে ঘন অন্ধকার, মূলধারে বৃষ্টি পড়িতেছে। হরিনারায়ণের পরিধেয় সিন্ধু হইয়া গিয়াছে; এবং তিনি কোন্ পথে চলিতেছিলেন, তাহা কিছুই বুঝিতে

পারিতেছিলেন না। নগ্ন মূর্তি চির-পরিচিতের দ্বারা দৃঢ় পাদ-
বিক্ষেপে অজ্ঞাত পথ অতিক্রম করিতেছিল। ক্রমে হরিনারায়ণের
অঙ্গ অবশ হইয়া আসিল,— তাঁহার পদস্থলন আরম্ভ হইল। নগ্নমূর্তি
তাহা দেখিয়া থামিল। হরিনারায়ণের অবসন্ন পদদ্বয় দেহের ভার
বহন করিতে পারিল না। তিনি পথের কর্দমের উপর বসিয়া
পড়িলেন। তাঁহার সঙ্গী তাঁহাকে পরিত্যাগ করিয়া চলিয়া গেল।
হরিনারায়ণ কতক্ষণ সেইভাবে বসিয়া ছিলেন, তাহা তাঁহার স্মরণ
ছিল না। পরে যখন তাঁহার চেতনা ফিরিল, তখন তিনি দেখিলেন
যে, দুই-তিনজন লোক মশাল ধরিয়া দাঁড়াইয়া আছে; এবং
আরও চারিজন লোক তাঁহাকে ভূমি হইতে উঠাইয়া একটা
ডুলিতে স্থাপন করিতেছে। ডুলি চলিল; এবং তিন চারি দণ্ড
পরে এক গ্রামের মধ্যে একটি অটালিকার সম্মুখে গিয়া দাঁড়াইল।

ধৌত পরিষ্কৃত হইয়া বৃদ্ধ হরিনারায়ণ যখন দুঃখফেননিভ
শয্যায় আশ্রয় গ্রহণ করিলেন, তখন গৃহস্থামী আসিয়া তাঁহাকে
জানাইলেন যে, তাঁহার সঙ্গী তাঁহার সহিত সাক্ষাৎ করিতে
চাহে। সঙ্গী আসিলে হরিনারায়ণ কিন্তু তাহাকে চিনিতে
পারিলেন না। তিনি গঙ্গাবক্ষে ও নদীতীরে যে নগ্ন মূর্তি
দেখিয়াছিলেন, এ মূর্তি তাহা হইতে বিভিন্ন। শুভ্র বসন পরিহিত
সৌম্য মূর্তি দেখিয়া হরিনারায়ণ তাহাকেই ঝটিকাবিন্দুক গঙ্গাবক্ষে
অঙ্কনোন্মুখতরঙ্গীর আরোহী বলিয়া কোনমতেই স্থির করিতে
পারিলেন না; কিন্তু তথাপি তাহাকে পূর্ব-পরিচিত বলিয়া
বোধ হইল। আগন্তুক তাঁহাকে এক দৃষ্টিতে চাহিতে দেখি

কহিল, “আমাকে কি চিনিতে পারিতেছেন না?” হরিনারায়ণ লজ্জিত হইয়া কহিলেন, “চিনিতে পারিব না কেন। তবে মনে হইতেছে যেন আপনাকে পূর্বে কোথায় দেখিয়াছি।” “আমাকে আর কোথায় দেখিবেন,—আমি বাঙ্গালী, নিবাস পূর্বদেশে, এদেশে সম্প্রতি আসিয়াছি।”

সহসা হরিনারায়ণ শয্যা ত্যাগ করিয়া উঠিলেন; এবং সে ব্যক্তির হস্ত ধারণ করিয়া বলিয়া উঠিলেন, “এমন করিয়া ‘সম্প্রতি’ কথাটা আর একজন ব্যবহার করিত, তুমি কি সে-ই?” হরিনারায়ণের ভাব দেখিয়া আগন্তুক সন্তুষ্ট হইয়া কহিল, “আপনি কাহার কথা বলিতেছেন? একটা কথা উচ্চারণের ভাব কতলোকের এক রকম হইয়া থাকে।” হরিনারায়ণ উভয় হস্তে আগন্তুকের হস্তদ্বয় ধারণ করিয়া বলিয়া উঠিলেন, “তুমি মিথ্যা বলিতেছ। আজ ত্রিশ বৎসরের মধ্যে তোমার মত ‘সম্প্রতি’ উচ্চারণ শুনি নাই। এই ষাট বৎসরের মধ্যে আর কেহ ত এই একটা কথা তেমন করিয়া উচ্চারণ করে নাই? বল, গোপন করিও না।—চেষ্টা করিলেও আমার নিকট গোপন করিতে পারিবে না। আমি হরিনারায়ণ, নরনারায়ণ ভট্টাচার্য্যের পুত্র। আশৈশব একগ্রামে বাস করিয়াছি, যৌবনে একত্র বিদ্যালিক্ষা করিয়াছি, তুমি কি আমার নিকট আত্মগোপন করিতে পার?—তুমি ত্রিবিক্রম, তুমি আর কেহ নহ, তুমি নিশ্চয় ত্রিবিক্রম।” আগন্তুক বৃদ্ধকে বাহুপাশে আবদ্ধ করিয়া কহিল, “হাঁ, আমি ত্রিবিক্রম।”

দ্বিপঞ্চাশত্তম পরিচ্ছেদ

মণিহরণ

সুদর্শন শয়ন করিয়াছেন, কিন্তু তখনও নিদ্রিত হন নাই, এমন সময়ে বহির্দ্বারে কে সবলবেগে করাঘাত করিতে আরম্ভ করিল। সুদর্শন গৃহের দ্বার খুলিয়া দেখিলেন, আগন্তুক একজন আহদী। আহদী তাঁহাকে কহিল, “আপনাকে বিশেষ প্রয়োজনে একবার ছাউনিতে যাইতে হইবে। বাদশাহ প্রভাতেই দিল্লী যাত্রা করিবেন; সুতরাং এখন না গেলে আপনার সহিত তাঁহার হয় ত সাক্ষাৎ হইবে না। আমীরও বলিয়া দিয়াছেন যে, তিনি আপনার দিল্লী-যাত্রার ব্যবস্থা করিয়া রাখিয়াছেন; সাক্ষাতে সমস্ত কথা জানাইবেন।” নূতন বাদশাহ ফরুখসিয়রের ফৌজে অসীম আমীর আখ্যায় পরিচিত ছিলেন।

সুদর্শন কোন আপত্তি না করিয়া, আহদীর সহিত গৃহত্যাগ করিলেন। তখন ত্রিবাঙ্গা রজনীর দ্বিতীয় বাম শেষ হইয়া আসিয়াছে। তিনি চলিয়া গেলে, ননন্দা ও ভ্রাতৃজায় শয়নকক্ষ পরিত্যাগ করিয়া, প্রদীপ লইয়া পূজার ঘরের সম্মুখে আসিয়া বসিলেন। বাদশাহী ছাউনীতে তখন তৃতীয় প্রহরের নোবৎ বাজিয়া উঠিল; এবং তাহা শেষ হইতে না হইতে, গৃহের দ্বারে পুনরায় করাঘাত হইল। তাহা শুনিয়া বধু বলিয়া উঠিলেন, “ঐ তাঁর ভাই আসিয়াছে। ভাই, দ্বার খুলিয়া

দিয়া আয়।” ব্যঙ্গ করিয়া দুর্গাঠাকুরাণী কহিলেন, “পোড়ারমুখী, হুনিয়ায় সকলেই কি আমার ভাই না কি?” “তবে তোর জ্ঞাত নূতন নাগর আসিয়াছে।” “দাড়া ভাই, কাহার নাগর আসিল, দেখিয়া আসি। পরিচিত গলার আওয়াজ না পাইলে, দুয়ার খুলিতেছি না।” দুর্গা প্রদীপ লইয়া দুয়ারের পাশে দাড়াইয়া জিজ্ঞাসা করিলেন, “কে?” উত্তর হইল “আমি।” “তুমি কে?” “এই কি স্মদর্শন ভট্টাচার্য্যের বাড়ী?” “হাঁ, তুমি কোথা হইতে আসিতেছ?” “আমি ফৌজদারের লোক,—জরুরী খবর লইয়া আসিয়াছি; শীঘ্র দুয়ার খুলিয়া দাও।” “বাড়ীর মালিক বাড়ীতে নাই; এখন ফিরিয়া যাও,—সকালবেলায় আসিও।” “আমার সংবাদ অত্যন্ত জরুরী,—বিলম্ব করিলে চলিবে না; শীঘ্র দুয়ার খুলিয়া দাও।” “বাড়ীতে পুরুষ নাই; হতরাং তুমি যেই হও, এখন দুয়ারের বাহিরে বসিয়া থাক;—বাড়ীর মালিক আসিলে দুয়ার খুলিয়া দিব।”

দুর্গাঠাকুরাণী ফিরিয়া আসিয়া, ঠাকুর-ঘরের সম্মুখে বসিলেন; এবং বধূকে জিজ্ঞাসা করিলেন, “বৌ, দাদা বাড়ী না ফিরিলে, কোনমতেই দুয়ার খুলিয়া দেওয়া উচিত নহে; কি বলিস?” বধূ কহিলেন, “সে কথা আর বলিয়া! বাড়ীতে পুরুষ নাই; লোকের মধ্যে আমরা দুইটি স্ত্রীলোক। দেশ নয়, ঘর নয়, যে পাড়াপড়শী ডাকিয়া আনিব। এই তৃতীয় প্রহর রাত্রি, এখন কি দুয়ার খুলিতে আছে?” ফৌজদারের লোক আরও দুই-তিনবার দ্বারে করাঘাত করিল এবং উত্তর না পাইয়া বোধ হয়

চলিয়া গেল। কিয়ৎক্ষণ পরে বড়বধূ দুর্গাঠাকুরাণীকে জিজ্ঞাসা করিলেন, “ঠাকুরঝি!” দুর্গা কহিলেন, “কি ভাই?” “তাহাকে যদি দুয়ার হইতে ধরিয়। লইয়া যায়?” “আমরা আর কি করিব ভাই! সকাল হইলে ছোট দাদাকে খবর দিব। একবার আড়াল হইতে দেখিলে হয় না,—লোকটা কি না?” “কোথা হইতে দেখিব?” “কেন, উপর হইতে?” “প্রাচীরের উপরে উঠিয়া?” “কেন, দোষ কি?” “তুই উঠিয়া পারিবি?” “আমি ভাই মোটা মানুষ, উঠিব কেমন করিয়া? ওঠ।”

দুর্গা প্রদীপ রাখিয়া বহির্দ্বারের নিকটে গেলেন। সেই সময়ে অন্ধনে গুরুভার দ্রবা পতনের শব্দ হইল। তাহা শুনিয়া বধূ চীৎকার করিয়া উঠিলেন। দেখিতে-দেখিতে দ্বিতীয়ার শব্দ হইল; এবং এক-এক করিয়া সাত-আটজন পুরুষ প্রাচীর ডিঙ্গাইয়া হরিনারায়ণ ভট্টাচার্য্যের গৃহে প্রবেশ করিল। তাহার ক্ষিপ্ৰহস্তে দুর্গা ও বড়বধূর হস্তপদ বন্ধন করিল; এবং বাহিরের দুয়ার খুলিয়া দিল। বাহিরে আমবৃক্ষ-তলে অঙ্ককারে আট-দশজন লোক দুইখানা ডুলি লইয়া লুকাইয়া ছিল। কলিকট মিলিয়া স্ত্রীলোক দুইজনকে ডুলিতে তুলিয়া প্রস্থান করিল। হরিনারায়ণের প্রতিবেশীরাও জানিতে পারিল না যে, তাহার বধূ ও কন্যা দস্যু কর্তৃক অপহৃত হইয়াছেন।

হরিনারায়ণের গৃহের অনূরে একজন পুরুষ ও একজন রমণী অপেক্ষা করিতেছিল; তাহারাও দস্যুদলের সঙ্গে চলিল। কিয়দূর গমন করিয়া, রমণী পুরুষকে জিজ্ঞাসা করিল, “বলি,

ও নবীন দাদা, তুমি বল কি গো! আমি একা যেতে পারব না। বিদেশ বিভূঁই, এ কি আমার রাষ্ট্রদেশ? আমি মেয়ে-মাল্লুষ—এত ভাল সামলান কি আমার কর্ম? কাজ হাসিল হইয়াছে,—দেশে ফিরিয়া চল। বড়কর্তার কাছে টাকাটা আদায় করিয়া, আমরা সরিয়া দাঁড়াই। বড় ঘরের কথা,—কখন কি হয় বলা যায় না!—আর তুমি এখন পাটনায় বসিয়া কি করিবে?” পুরুষ কহিল, “দোহাই সরস্বতী দিদি, এত চোঁচাইয়া কথা কহিও না। তোমার কল্যাণে নবীনচন্দ্রের পাটনা শহরে খাতির আছে। নবীনচন্দ্র ঘেঁহু তেঁহ লোক নহেন। এই সাতটা দিন দিদি—সাতটা দিন। কোনমতে যদি এই সাতটা দিন কাটাইয়া দিতে পার, তাহা হইলে নবীনচন্দ্র তোমার একেবারে কেনা গোলাম। তোমার বাজার করিয়া দিব; পালং শাকের ক্ষেত বানাইয়া দিব; লাউ কুমড়ার মাচা বাঁধিয়া দিব।” “বলি, তা ত দিবে। সাতদিন পাটনায় থাকিয়া তোমার হইবে কি?” “একটু পরকালের চর্চা করিব। অনেক কাল পরে মনের মত গুরু পাইয়াছি; হাতছাড়া হইলে এ জন্মে হয় ত আর পাইব না। শুক বলিয়াছেন, এই সাতটা দিন।” সরস্বতী কোন উত্তর খুঁজিয়া না পাইয়া, আপন মনে গরুগরু করিতে-করিতে চলিল।

আফ্জল খাঁর বাগানে যখন নৌবতে ভৈরবী বাজিয়া উঠিল, তখন ডুলি দুইখানি পাটনা শহর পরিত্যাগ করিয়া নগরোপকণ্ঠ দিয়া চলিতেছিল। পূর্ব দিক পরিষ্কার হইয়া আসিয়াছে।

যাহারা উপকণ্ঠ হইতে নগরে উপার্কন করিতে আসে, তাহারা তখন পথ চলিতে আরম্ভ করিয়াছে। পথে লোক দেখিয়া নবীন বাহকগণকে ক্রতপদে চলিতে আদেশ দিল; এবং সরস্বতীকে বড়বধূর ডুলির কাছে রাখিয়া, স্বয়ং দুর্গাঠাকুরাণীর ডুলির সহিত চলিতে আরম্ভ করিল। এত প্রত্যুষে নগরোপকণ্ঠে একসঙ্গে দুইখানি ডুলি দেখিয়া, যাহারা তখন পথ চলিতেছিল, তাহারা আশ্চর্য্য হইয়া গেল; কিন্তু সঙ্গে অস্ত্রধারী লোক ছিল দেখিয়া, কেহ কিছু বলিল না। পথের ধারে একখানা ক্ষুদ্র গৃহের সম্মুখে বসিয়া এক রমণী মুখ প্রকাশন করিতেছিল। নির্জন পথে সহসা এত অধিক জনসমাগম দেখিয়া, সে ক্রতপদে ঘরের ভিতরে পলাইল; নবীন বা সরস্বতী তাহাকে দেখিতে পাইল না। ডুলির পার্শ্বে নবীন ও সরস্বতী যখন সেই গৃহের সম্মুখ দিয়া চলিয়া গেল, তখন সে তাহাদিগকে দেখিয়া শিহরিয়া উঠিল। ডুলি দুইখানি অদৃশ্য হইবার পূর্বে, সে গৃহস্বামিনীকে সঙ্গে লইয়া অহুসরণ করিতে আরম্ভ করিল।

ক্রমে বেলা বাড়িয়া উঠিল। সূর্য্যের উত্তাপ প্রথর হইতেছে দেখিয়া, বাহকগণ পথের ধারে এক বৃক্ষতলে ডুলি নামাইল। তাহা দেখিয়া অহুসরণকারিণীদ্বয় একটা ঘোপের অন্তরালে লুকাইল। বেলা যখন দুই দণ্ড, তখন বাহকেরা ডুলি উঠাইল; এবং ক্রতপদে পশ্চিম দিকে চলিতে আরম্ভ করিল। তিন কোশ পথ চলিয়া, দ্বিতীয় প্রহর বেলায় ডুলি একখানা বৃহৎ গ্রামের দীর্ঘাঙ্কে অবস্থিত এক ধনীর উদ্যানে প্রবেশ করিল। উদ্যানের

মধ্যে দ্বিতলের একটি ক্ষুদ্র গৃহে বন্দিনীৰম্যকে আবদ্ধ করিয়া, দম্ভাগণ নবীন ও সরস্বতীকে বেঁধেন করিয়া দাঁড়াইল। নবীন তাহাদিগকে দুইটি করিয়া স্বর্ণ মুদ্রা দিল; তাহারা একে-একে সহরের দিকে ফিরিল। তখন নবীন কোথা হইতে একটা ভাঙ্গা কলিকা এবং কিঞ্চিৎ তামাকু সংগ্রহ করিয়া, গৃহের সম্মুখে বসিল; এবং সরস্বতী বাজার করিতে গ্রামে প্রবেশ করিল। অর্দ্ধদণ্ড পরে অনুসরণকারিণীদ্বয় সেই উত্তানের সম্মুখ দিয়া চলিয়া গেল। তাহাদিগের একজনের চলন দেখিয়া নবীন অনেকক্ষণ তাহার দিকে চাহিয়া রহিল; কিন্তু উঠিল না।

তৃতীয় প্রহর বেলায় সরস্বতী যখন চাউল, দাল, হাড়ি, কাঠ সংগ্রহ করিয়া ফিরিল, তখন নবীন জিজ্ঞাসা করিল, “বলি, ও সরস্বতী দিদি, তিন প্রহর বেলা হইল, ঠাকুরাণীরা খাইবে কি?” সরস্বতী বিস্মিতা হইয়া কহিল, “কেন, রাঁধিবে!” “আজি কি আর উহারা উঠিবে?” “তাহাও ত বটে!” “দিদি, তুমি একবার যাও।” “এঁটা পারিব না, নবীন দাদা। এক গাঁয়ের লোক,—মুখ দেখাইব কেমন করিয়া?” “কোন রকমে একবার নোকায় চড়াইতে পারিলে হয়।” “তবে আমিই যাই। তুমি কিছু ঘরের চেষ্টা দেখ।”



ত্রিপঞ্চাশত্তম পরিচ্ছেদ

নৌকাপথে

পরদিন প্রভাতে হরিনারায়ণ ত্রিবিক্রমের সহিত গৃহের বৈঠকখানায় উপবিষ্ট আছেন। হরিনারায়ণ একমনে চিন্তা করিতেছেন; এবং ত্রিবিক্রম একখানা গ্রন্থ অধ্যয়ন করিতেছেন। এই সময়ে গৃহস্থামী আসিয়া কহিলেন, “প্রভু, নৌকা প্রস্তুত।” তাহার কথা শুনিয়া হরিনারায়ণের চিন্তা ভঙ্গ হইল। তিনি জিজ্ঞাসা করিলেন, “নৌকা! নৌকা কি হইবে?” ত্রিবিক্রম কহিলেন, “ভাই, নৌকা আমি আনাহিতে বলিয়াছিলাম।” “কেন, কোথায় যাইবে?” “দেশে ফিরিব।” “কখন যাত্রা করিবে?” “তোমার আহার হইলেই নৌকা ছাড়িব মনে করিয়াছি।” “আমার জন্ত একখানা গরুর গাড়ির বন্দোবস্ত করিতে বল।” “গরুর গাড়ি কি হইবে?” “আমি পাটনায় ফিরিব।” “পাটনায় ফিরিবে কি জন্ত?” “কি বলে পাগল! আমার পুত্রকন্যা পুত্রবধূ সকলেই যে পাটনায় রহিয়াছে।” “এখন বেলা দুই দণ্ড, কেমন? তোমার পুত্র এখন পাটনা পরিত্যাগ করিতেছে; কন্যা এবং পুত্রবধূ অনেক দূর চলিয়া আসিয়াছে।” “বল কি! তাহারা কাহার সহিত আসিল, কেন আসিল?” “সে কথা পরে জানিতে পারিবে। গেলে কাহারও সহিত সাক্ষাৎ হইবে না।” “তবে কোথায়,

কখন তাহাদিগের সহিত সাক্ষাৎ হইবে?" "সাক্ষাৎ শীঘ্রই হইবে। তুমি শীঘ্র রন্ধন সারিয়া লও। দেড় প্রহর বেলায় যাত্রার সময় উৎকৃষ্ট।" "ত্রিবিক্রম, তুমি কি বলিতেছ ভাই, আমি কিছুই বুঝিতে পারিতেছি না। পুত্র কত্তা পাটনায় রহিল, আমি তাহাদিগকে ত্যাগ করিয়া কোথায় যাইব?" "তোমাকে পুত্র কত্তা ত্যাগ করিতে কে বলিতেছে? তাহাদিগের সহিত শীঘ্রই তোমার সাক্ষাৎ হইবে।" "তবে আমি এখন কোথায় যাইব?" "বিধিনির্দিষ্ট পথে।" "সে পথটা এখন কোন দিকে?" "পূর্বে।" "তবে চল।"

হরিনারায়ণ ও ত্রিবিক্রম উঠিলেন। গৃহস্থামী আজ্ঞাবহ ভৃত্যের দ্বারা তাহাদিগের অহুসরণ করিল। আহা রাস্তে উভয়ে পদব্রজে গঙ্গাতীরভিমুখে যাত্রা করিলেন। গঙ্গাতীরে একখানি ক্ষুদ্র নৌকা তাহাদিগের দৃষ্টিতে উপস্থিত হইল। তাহারা আরোহণ করিলে, মাঝি নৌকা ছাড়িয়া দিল। অমূল্য শ্রোতের মুখে নৌকা পূর্বদিকে চলিতে আরম্ভ করিল। সন্ধ্যা আসন্ন দেখিয়া মাঝিরা নৌকা তীরে লাগাইবার উপক্রম করিতেছে, এই সময়ে একজন দাড়ী হাঁকিল, "বাদশাহী ছিপ।" তাহা শুনিয়া মাঝি উঠিয়া দাঁড়াইল; এবং দেখিল, একখানা দীর্ঘাকার ছিপ তীরবেগে তাহাদিগের দিকে ছুটিয়া আসিতেছে।

ছিপে আরোহী মাত্র দুইজন; কিন্তু দাড়ী পক্ষাশজন। আরোহীদিগের মধ্যে একজন দূর হইতে নৌকা দেখিয়া মাঝিকে কহিল, "মাঝি, নৌকাখানা রাখিতে বল।" মাঝি দূর হইতে

অসীম

ইাকিল, “নৌকা রাখ্।” তাহা শুনিয়া নৌকার মাঝি শ্রোতের দিকে নৌকার মুখ ফিরাইয়া লগি পুঁতিয়া রাখিল। দেখিতে-দেখিতে ছিপ আসিয়া পড়িল; এবং ছিপের মাঝি জিজ্ঞাসা করিল, “নৌকা কোথাকার?” “পাটনার।” “কোথায় যাইবে?” “রাজমহল।” “চড়নদার কয়জন?” “এক সন্ন্যাসী বাবা, আর এক বৃদ্ধা ব্রাহ্মণ।” উত্তর শুনিয়া ছিপের প্রথম আরোহী বলিয়া উঠিলেন, “চড়নদারদের বাহিরে আসিতে বল।” কিন্তু নৌকার মাঝি কথা কহিবার পূর্বেই হরিনারায়ণ বলিয়া উঠিলেন, “এ যে অসীমের কণ্ঠস্বর।” এবং বলিতে-বলিতে বাহিরে আসিয়া দাঁড়াইলেন। তাঁহাকে দেখিয়া ছিপের দুইজন আরোহীই উল্লাসে চীৎকার করিয়া উঠিলেন। হরিনারায়ণ তাঁহাদিগকে দেখিয়া কহিলেন, “এ কি অসীম আর স্মদর্শন! তোমরা কোথা হইতে আসিলে? কেমন করিয়া সন্ধান পাইলে? স্মদর্শন, তুমি কাদিতেছ কেন?” অসীম কহিলেন, “যে ছিপে আপনি আসিতেছিলেন, তাহার দাঁড়ী-মাঝি গিয়া খবর দিল যে আপনি এক নাগা সন্ন্যাসীর সহিত কোথায় চলিয়া গিয়াছেন। তাহারা আপনার সঙ্গে যাইতেছিল; কিন্তু সাপের ভয়ে যাইতে পারে না। আপনি শীঘ্র পাটনার ফিরিয়া চলুন। বড় বিপদ হইয়াছে।” “তোমরা ভাল আছ ত, তবে আর বিপদ কিসের?” “কাল রাত্রিতে একজন লোক আমার নান করিয়া স্মদর্শনকে ডাকিয়া লইয়া যায়; এবং স্মদর্শন বাড়ীর বাহির হইলে, জোর করিয়া দুর্গাকে এবং বোঠাকুরাণীকে ধরিয়া লইয়া গিয়াছে।

কোথায় লইয়া গিয়াছে, ফৌজদার বা কোতোয়াল পর্যন্ত সন্ধান করিতে পারে নাই।” বৃদ্ধ ব্রাহ্মণ মন্তকে হস্তার্পণ করিয়া বসিয়া পড়িলেন। এই সময়ে নৌকার ভিতর হইতে ত্রিবিক্রম বাহিরে আসিয়া কহিলেন, “হরিনারায়ণ, তুমি চিন্তা করিও না,—তোমার কন্যা-পুত্রবধূর অন্ত কোনই আশঙ্কা নাই। তাঁহারা দুইজনই কুশলে আছেন।” ত্রিবিক্রমের কথা শুনিয়া হরিনারায়ণ বিষাদের ম্লান হাসি হাসিয়া কহিলেন, “ত্রিবিক্রম তুমি পাগল! তুমি না এইমাত্র দেশে ফিরিতে বলিতেছিলে? বলা কি, আমাকে লইয়া ত যাত্রা করিতেছিলে। দেশে প্রত্যাবর্তন আমার পক্ষে এখন অসম্ভব।” ত্রিবিক্রম কহিলেন, “তুমি ত এখন পাটনায় যাইবে না,—তুমি সত্য-সত্যই দেশে ফিরিবে।” “পাগল, বলে কি! কন্যা-পুত্রবধূকে ডাকাইতে ধারিয়া লইয়া গিয়াছে,—বিদেশে বান্ধব-হীন অবস্থায় জাতি যাইতে বসিয়াছে,—আর আমি কি না দেশে ফিরিব? ত্রিবিক্রম, তবে কি সত্য-সত্যই তোমার বৃদ্ধি-লোপ হইয়াছে? “দেখ দাদা, বৃদ্ধিবস্তির লোপ বা বৃদ্ধি কাহাকে বলে, তাহা এখনও বুঝিয়া উঠিতে পারি নাই। তবে এইমাত্র জানিয়া রাখিও যে, ত্রিবিক্রম যাহা বলে, তাহার প্রায় অলুথা হয় না।”

এই সময়ে অসীম ত্রিবিক্রমের নিকটে আসিয়া কহিলেন, “মহাশয়, আপনাকে যেন পূর্বে কোথায় দেখিয়াছি।” “হাঁ, দেখিয়াছি।” “তবে উপস্থিত আপনার নামটা স্মরণ হইতেছে না।” “আমার নাম ত শুন নাই বাপু, যে স্মরণ হইবে!”

“তবে আপনার মুখ পরিচিত বলিয়া বোধ হইতেছে।” “বলিয়াম ত বাপু, তোমার সহিত দেখা হইয়াছে।” “কিন্তু কোথায় দেখা হইয়াছে স্বরণ হইতেছে না।” “বখন সময় হইবে, তখন ঠিক স্বরণ হইব।” অসীম ত্রিবিক্রমের সহিত আর কথা না কহিয়া, হরিনারায়ণকে কহিলেন, “বিদ্যালঙ্কার মহাশয়, আর বিলম্বে কাজ নাই,—সন্ধ্যা হইয়া আসিল, আপনি ছিপে আস্থন।” এই সময়ে ত্রিবিক্রম বলিয়া উঠিলেন, “বুড়া মাতুষ, আর ছিপে তুলিয়া কাজ কি বাপু, ছিপখানাকে বল না, নোকাখানাকে টানিয়া লইয়া চলুক। বেলা দুই দণ্ড বাকী আছে, অতুল স্রোতের মুখে চলিতে বিলম্ব হইবে না।” অসীম বিস্মিত হইয়া জিজ্ঞাসা করিলেন, “অতুল স্রোতের মুখে?” “বাপু হে, রাজমহল কি প্রতিকুল স্রোতের মুখে?” “রাজমহল, কত! কি—” হরিনারায়ণ বলিয়া উঠিলেন, “তুমি ত্রিবিক্রমের কথা কাণে তুলিও না অসীম; চল, আমি এখনই কিরিয়া যাইব।” ত্রিবিক্রম হাসিয়া কহিলেন, “সাধ্য কি, ছিপও পাটনায় কিরিবে না,—তোমরাও কেহ পাটনায় কিরিবে না—সকলকেই দেশে ফিরিতে হইবে।”

অসীম হাসিয়া উঠিলেন এবং কহিলেন, “মহাশয়, যদি বিদ্যালঙ্কার মহাশয়ের গৃহে এই বিপদ না হইত, তাহা হইলেও আমি দেশে ফিরিতাম না। আমি যুদ্ধ-ব্যবসায়ী, স্বয়ং বাদশাহ আমার অন্নদাতা; সুতরাং আমাকে এখনই দিল্লী যাত্রা করিতে হইবে।” “যাত্রা করিতে পার; কিন্তু কোথায় পৌঁছিব, তাহা

কে বলিতে পারে ?” এই সময়ে অসীম পুনর্বার কহিলেন, “আমি ভৃত্য,—প্রভু যখন যাহা আদেশ করিবেন, তাহা আমার শিরোধার্য। প্রভু যখন আদেশ করিয়াছেন, দিল্লী যাইতে হইবে, তখন আমাকে যাইতেই হইবে।” “প্রভুর ক্ষমতা কি, তোমাকে দিল্লী লইয়া যান ! জান, প্রভুরও প্রভু আছেন ?”

হরিনারায়ণ ব্যস্ত হইয়া বলিয়া উঠিলেন, “ত্রিবিক্রম, উপস্থিত কল্যাণ ও পুত্রবধুর সন্ধানে আমি পাটনায় চলিলাম। তুমি অগ্রসর হও, আমি শীঘ্রই দেশে ফিরিব। এখন বড় বিপদের সময় ; স্মৃতিরাং আর বাধা দিও না ভাই।” ত্রিবিক্রম কহিলেন, “আমি বাধা দিব না ভাই। কিন্তু তোমাদের কাহারও পাটনায় ফেরা হইবে না। কল্যাণ ও পুত্রবধুর জন্ত চিন্তিত হইও না। তাহার নিকটেই আছে এবং সহর তোমার সহিত সাক্ষাৎ হইবে।” “কি বলে পাগল ! তাহাদিগকে ডাকাইতে ধরিয়া লইয়া গিয়াছে। ছাড়াইয়া না দিলে কেমন করিয়া আসিবে ?” “যে তাহাদিগকে মুক্ত করিবে, সে তাহাদিগের সঙ্গেই আছে। তোমরা কেহ তাহাদিগকে মুক্ত করিতে পারিবে না। এমন কি চেষ্টা করিলেও তাহাদিগের সাক্ষাৎ পাইবে না।” কিংকর্তব্য-বিমুঢ় হইয়া হরিনারায়ণ জিজ্ঞাসা করিলেন, “তবে কি করিব ?” ত্রিবিক্রম কহিলেন, “ছিপ ও নৌকা তীরে লাগাও, নামিতে হইবে।”

চতুঃপঞ্চাশত্তম পরিচ্ছেদ

মণিয়ার চার

যে প্রকোষ্ঠে দুর্গা এবং তাহার দাদু-বধূ, আবদ্ধা ছিলেন, তাহার সম্মুখে কিয়দূরে একটা বৃহৎ দীঘিকা ছিল। দীঘিকা-তীরে একটা অতি প্রাচীন অশ্বখ বরসের ভারে দীঘিকা-গর্ভে হেলিয়া পড়িয়াছিল; এবং তাহার বহু শাখা প্রশাখা বাহু বিস্তার করিয়া, অনেক মৃতন কাণ্ড স্থাপন করিয়াছিল। নবীন যখন তাহার বন্দিনীদ্বয়কে আহাৰ করিতে অনুরোধ করিবার জন্ত সেই প্রকোষ্ঠে প্রবেশ করিল, তখন যে দুইজন রমণী তাহাদিগের অনুসরণ করিয়াছিল, তাহারা সেই রমণীয় অশ্বখকূড়ে একটা স্থূল মূলের উপরে বসিয়া বিশ্রাম করিতেছিল।

নবীন কক্ষে প্রবেশ করিল; কিন্তু বন্দিনীদ্বয়ের একজনেও মুখ তুলিয়া চাহিল না। নবীন জিজ্ঞাসা করিল, “বলি, মা-ঠাকরাণরা, সেবা হবে না?” আপাদমস্তক বস্ত্র-মণ্ডিতা রমণীদ্বয় মৃতবৎ পড়িয়া রহিল, কেহই উত্তর দিল না। নবীন পুনরায় জিজ্ঞাসা করিল, “বেলা যে তিন পহর হ’ল?” তথাপি কেহ উত্তর দিল না। এই সময়ে দীঘিকা-তীরে অশ্বখকূড়ে উপবিষ্টা রমণীদ্বয়ের মধ্যে একজন গান ধরিল :—

মাহ্ কি জ্যোছনা হোয়ে আদিয়ার।

যব তুঁহু ছোড়ি গয়ে হমারে পিয়ার ॥

আকাশে বিদ্যুৎ চমকিলে পাদপদীন প্রান্তরে পথিক যেমন

চমকিয়া উঠে, গায়িকার কণ্ঠস্বর শুনিয়া নবীন সেইরূপ চমকিয়া উঠিল; এবং তৎক্ষণাৎ বন্দি-গৃহ পরিত্যাগ করিয়া বাহিরে আসিল। সে যখন কক্ষের দ্বারক্লক করিয়া দাখিকা-তটে আসিল, তখন রমণী গায়িতেছে :—

ভর দিবসে মিহির কি রোশনী,
নয়ন ছোড়ে মেরে হোয় রজনী,
তুঁহ বিনে আজি ছুনিয়া আঁধার ॥

নবীন দাস ভয় বিম্বৃত হইল। সহসা যেন তাহার যৌবন ফিরিয়া আসিল। সে বাধা-বিপত্তি অবহেলা করিয়া অস্থখতলে ছুটিল। গায়িকা কিন্তু তাহার দিকে ফিরিয়াও চাহিল না। সে একমনে গায়িতে লাগিল :—

যৌবন গুজরে যব ভর যৌবনী,
রূপ গয়ে মেরে যব ভর রূপিনী,
তুঁহারি বিহনে মেরি দিলদার ॥

গীত থামিল, নবীন ব্যগ্র হইয়া জিজ্ঞাসা করিল, “তুমি,—
আপনি—এখানে?” গায়িকা কহিল, “বাবুসাহেব, আমি
ভিখারিণী; নিতাই কি একস্থানে ভিক্ষা মেলে? সেইজন্য
এক-একদিন এক-এক গ্রামে যাই।” “কই, তুমি কাল আসিলে
না?” “ভিক্ষায় বাহির হইয়াছিলাম; কিন্তু আমি ত লোক
পাঠাইয়া দিয়াছিলাম।” “কাহাকে?” “কেন, মণিয়া বাঈয়ের
কাকী গোলামকে।” “সে কি তোমার লোক? আমি তাহার
কথা বুঝিতে পারি নাই। আর তাহার যে চেহারা!” এইবার

মণিয়া হাসিল; এবং সে হাসি দেখিয়া প্রৌঢ় নবীন দাসের মস্তিষ্ক ঘূর্ণিত হইল। মণিয়া কহিল, “বাবুসাহেব, ভাল চেহারা মন্দ চেহারায় তোমার প্রয়োজন কি? তুমি যাইবে মণিয়া বাদ্দিয়ের বাড়ীতে; তাহাকে রাজী করিয়া যাহাতে পাটনা সহরে দুই পয়সা রোজগার করিতে পার তাহার চেষ্টা কর। মন্দ চেহারার লোক দিয়া যদি সে কাজ ভাল হয়, তাহা হইলে খুব স্বরং চেহারায় আবশ্যক কি? তুমি কি জান যে, সেই কাজী গোলাম মণিয়া বাদ্দিয়ের ছাতীর ছাতী, কলিজার কলিজা? পাটনা সহরের লোক বলে, মণিয়া বাদ্দিও যে, হাবশী গোলামও সে।” “এত কথা কি জানি বিবিসাহেব? আমি তোমার গোলামের মত তোমার অপেক্ষায় দাঁড়াইয়া ছিলাম। তুমি আসিলে না, তখন হাবশী গোলামকে ফিরাইয়া দিলাম।” “ভাল কর নাই বাবুসাহেব! এ সকল কাজে কি মেজাজ দেখাইতে আছে?” “বিবিসাহেব, তুমি কি এখনই পাটনায় ফিরিবে?” “না, এখন ফিরিব না; আজি বোধ হয় এই গ্রামেই থাকিব।” “এইখানেই থাকিবে? আমিও বোধ হয় থাকিব। চল, তোমার বাসা দেখিয়া আসি।” “ভিখারিণীর আবার বাসা কি বাবুসাহেব? যেখানে সন্ধ্যা হইবে, সেইখানেই আবাস। হয় ত একটা মসজিদে, না হয় ত একটা ভাঙ্গা কবরে মাথা গুঁজিয়া রাত্রিটা কাটাইয়া দিব।” এই সময়ে মণিয়ার সঙ্গিনী বলিয়া উঠিল, “নিকটেই একটা মসজিদ আছে—আজ রাত্রিটা সেইখানেই কাটাইলে হয় না?” মণিয়া সাগ্রহে কহিল, “চল, দেখিয়া আসি।”

তাহারা কেহ নবীনকে আহ্বান করিল না; অথচ নবীন যন্ত্র-
মুকের ভ্রায় তাহাদিগের পশ্চাৎ-পশ্চাৎ চলিল।

দীক্ষিকার পরপারে আশ্র-পনসের বিস্তৃত উঠানের মধ্যে
একটা পুরাতন মসজিদ ছিল। মসজিদটি ক্ষুদ্র কিন্তু দ্বিতল।
নিম্নতলের খিলানগুলার ছয়ার বসাইয়া ক্ষুদ্র কক্ষে পরিণত করা
হইয়াছে।

মণিয়া প্রথমে উপরে উঠিল এবং দেখিল, মসজিদের ভিতরে
দুই-তিনখানা ছিন্ন পল্লব পত্রের চাটাই, দুই-তিনটা মৃৎভাণ্ড
এবং একখানা ছিন্ন কোরাণ সরিকের পুঁথি পড়িয়া আছে। নীচে
আসিয়া মণিয়া দেখিল যে, চারিদিকে বারটা খিলান; তাহার
মধ্যে এগারটা রুদ্ধ এবং একটি মাত্র মুক্ত। ভিতরে শব-বহন
করিবার দুই-তিনখানা খাটিয়া, মহরমের তাজিয়ার একখানা
কাঠাম এবং একটা বহু পুরাতন খজুর-পত্রের সম্মার্জনী পড়িয়া
আছে। মণিয়া সেই সম্মার্জনী লইয়া গৃহের আবর্জনা পরিষ্কার
করিতে আরম্ভ করিল। নবীন বাস্তব হইয়া তাহার হস্ত হইতে
সম্মার্জনী লইতে গেল; কিন্তু মণিয়া তাহা দিল না। তখন
নবীন তাজিয়ার কাঠামখানা গৃহের মধ্য হইতে টানিয়া এককোণে
লইয়া গেল। সেই অবসরে মণিয়া তাহার সঙ্গিনীকে বাহিরে
যাইতে ইঙ্গিত করিল; এবং স্বয়ং গৃহতল পরিষ্কার করিতে-
করিতে ছয়ারের দিকে অগ্রসর হইল। নবীন তখন একখানা
শব-বহনের গুরুভার খাটিয়া গৃহের এক কোণ হইতে অপর
কোণে লইয়া যাইতেছে। মণিয়া তাহা দেখিয়া, বিছাড়েগে

গৃহের বাহিরে চলিয়া গেল; এবং বাহির হইতে দ্বার বন্ধ করিয়া দিল। রুদ্ধদ্বারে শিকল লাগাইয়া মণিয়া সঙ্গীনাকে কহিল, “তুই এইখানে বসিয়া থাক। যদি গ্রামের কেহ আসে, তাহা হইলে বলিস্ যে ফরীদ খাঁর হুকুম,—তিনি না আসিলে এই দুয়ার যেন কেহ না খোলে।” তখন নবীন দুয়ারের নিকট আসিয়া ডাকিতে আরম্ভ করিয়াছে, “বিবিসাহেব, ও বিবিসাহেব, দুয়ার দিলে কেন গো?” মণিয়া তাহার কথার উত্তর না দিয়া উচ্ছ্বাসে ছুটিল।

রন্ধন করিতে-করিতে সরস্বতী বৈষ্ণবী নবীনদাসের সন্ধান করিতে আসিয়া দেখিল, গৃহে কেহই নাই। প্রৌঢ়া তখন আপন মনে বকিতে আরম্ভ করিল, “বুড়ার যেন ভীমরতি ধরিয়াছে। দুই-দুইটা ব্রাহ্মণের মেয়ে খামকা ধরিয়া আনিল; তিন-পহর রেলা হইয়া গেল,—তাহারা কি খায় তাহার ঠিক নাই। নিজের পেটে দানাপানি নাই; কোথায় গিয়াছে তাহারও ঠিক নাই।” সম্মুখে একটা ক্ষেত্রে একজন কৃষক হল-কর্ষণ করিতেছি। বৈষ্ণবী তাহাকে নবীনের কথা জিজ্ঞাসা করিল। সে নবীনকে দীর্ঘিকা-তীরে বাইতে দেখিয়াছিল; সুতরাং অশ্বখতল দেখাইয়া দিল। তখন বৈষ্ণবী ভাতের হাড়ীতে জল ঢালিয়া, ভিজা গামছা মাথায় দিয়া, নবীনদাসের সন্ধানে দীর্ঘিকা-তীরে, অশ্বখ-তলে চলিল।

দূর হইতে মণিয়া দেখিতে পাইল যে, সরস্বতী গৃহ ত্যাগ করিয়া চলিয়াছে। সে তীরবেগে ছুটিয়া গৃহের অপর পার্শ্ব

দিয়া প্রবেশ করিল ; এবং একে-একে সকল প্রকোষ্ঠ সন্ধান করিয়া কক দ্বারের সম্মুখে উপস্থিত হইল। মণিয়ার কণ্ঠস্থর শুনিয়া নবীনের মন এতই চঞ্চল হইয়াছিল যে সে যখন বাহিরে চলিয়া যায়, তখন দুয়ারে তালা লাগাইতে ভুলিয়া গিয়াছিল। দুয়ার খুলিয়া মণিয়া দেখিল যে, তখনও দুর্গা ও বড়বধু শয়ন করিয়া আছেন। সে ডাকিল, “বহিন্, বহিন্, শীঘ্র উঠ। আমি মণিয়া, ভয় নাই, আমি তোমাদের মুক্ত করিতে আসিয়াছি। পুরুষটাকে এক জাগ্রগায় বন্ধ করিয়া আসিয়াছি ; আর বৈষ্ণবী বাহিরে গিয়াছে। সে হয় ত এখনই ফিরিবে। উঠ, শীঘ্র উঠ, পলাও।” দুর্গা ও বড়বধু উঠিলেন। মণিয়া তাহাদের হাত ধরিয়া, বে-পথে আসিয়াছিল, সেই পথেই গৃহ ত্যাগ করিল। তখন দিবসের চতুর্থ প্রহর আরম্ভ হইয়াছে।

পঞ্চপঞ্চাশতম পরিচ্ছেদ

নবীনের মুক্তি

সন্ধ্যা পর্য্যন্ত গ্রানের চারিদিকে অতৃপ্তসন্ধান করিয়া সরস্বতী হতাশ হইয়া কিরিয়া আসিল, এবং চুল্লীর নির্দোষিত অগ্নি পুনরায় জালিয়া রন্ধনে মনঃসংযোগ করিল। রন্ধনান্তে আহার করিতে-করিতে তাহার স্মরণ হইল যে, দুইটি ব্রাহ্মণকন্যা তখনও অজ্ঞান আছে ! সরস্বতী স্বভাবতঃ কঠিন হৃদয়া ছিল না।

দুর্গা ও বড়বধূর অবস্থা স্বরণ হওয়ায়, তাহার অঙ্গে কচি সহসা
অন্তর্হিত হইল। অর্দ্ধভুক্ত অন্ন পরিত্যাগ করিয়া সে উপরে
গেল। তখন অন্ধকার হইয়া আসিয়াছে। পাখী যে পলাইয়াছে
এবং পিঞ্জর যে শূন্য, সরস্বতী তাহা বুঝিতে পারিল না। সে
অন্ধকারে শূন্য কক্ষের দুয়ারে দাঁড়াইয়া, বারবার ডাকিয়াও
যখন উত্তর পাইল না, তখন সে কক্ষে প্রবেশ করিয়া চারিদিকে
হাতড়াইতে আরম্ভ করিল। অল্পসন্ধান শেষ হইলে তাহার
মনে হইল, ধূর্ত নবীনদাস তাহাকে ফাঁকী দিবার জন্ত বন্দি-
ঘরকে লইয়া পলায়ন করিয়াছে। দুঃখে ও ক্রোধে গর্জন করিতে
করিতে সরস্বতী গৃহ হইতে নিষ্কাশিত হইল।

সেই দিন সূর্য্যাকালে এক বৃদ্ধ মুসলমান একাকী সেই পুরাতন
মস্জিদে আসিয়াছিল। বৃদ্ধ প্রায় দৃষ্টিশক্তিহীন, এবং বার্ককা-
বশতঃ প্রায় কোন কথাই শুনিতে পাইত না। তাহার কর্ণের
নিকটে আসিয়া গগনভেদী রব না করিলে, তাহাকে কোন
কথা শুনান অসম্ভব ছিল। বৃদ্ধ যখন মস্জিদের নিকটে
আসিল, তখন কারাকুজ নবীনদাস তাহার পদ-শব্দ শুনিত
পাইয়া চীৎকার করিতে আরম্ভ করিল। কিন্তু নরসুন্দরকুল-
তিলকের দুর্ভাগ্যবশতঃ তাহার সিংহনাদের কণামাত্র বৃদ্ধের কর্ণ-
বৃহরে প্রবেশ করিল না। মস্জিদের নিকটে আসিয়া বৃদ্ধ যখন
সোপানে আরোহণ করিতে আরম্ভ করিল, তখন নবীন হতাশ
হইয়া সবলে কবাটে আঘাত করিতে আরম্ভ করিল। প্রচণ্ড
আঘাতে কবাটের সহিত প্রাচীন মস্জিদের ভিত্তি কাঁপিয়া উঠিল।

দৃষ্টি ও স্বতীশক্তিহীন বৃদ্ধ সে কম্পন অনুভব করিল। সে সোপান অবলম্বন করিয়া নামিয়া আসিল, এবং দুয়ারের সম্মুখে দাঁড়াইয়া কম্পনের কারণ নির্ণয় করিবার চেষ্টা করিতে লাগিল; কিন্তু কিছুই বুঝিতে না পারিয়া, ক্ষতপদে গ্রামে কিরিয়া গেল।

গ্রামের সীমায় এক যুবাকে দেখিতে পাইয়া, বৃদ্ধ তাহাকে প্রত্যাগমনের কারণ জানাইল। যুবা মুসলমান,—দিনান্তে লালল-স্বন্ধে গৃহে ফিরিতেছিল। সে প্রথমে বৃদ্ধের কথায় পুরাতন মসজিদে ফিরিতে সম্মত হইল না; কিন্তু অবশেষে কোতুলপ্রণোদিত হইয়া বৃদ্ধের সহিত চলিল। তাহারা মসজিদের নিকটে আসিলে, নবীনদাস তাহাদিগের পদশব্দ শুনিতে পাইয়া, পুনরায় চীৎকার করিয়া ডাকিতে আরম্ভ করিল। সে ধ্বনি বৃদ্ধ শুনিতে পাইল না বটে, কিন্তু কৃষক-যুবা তাহা শুনিয়া, ভয়ে রুদ্ধ-গতি হইয়া দাঁড়াইল। বৃদ্ধ অনেক অনুরোধ করিয়াও তাহাকে দুয়ারের নিকটে আনিতে পারিল না।

মণিয়া যখন প্রথমে নবীনদাসকে বন্দী করে, তখন প্রৌঢ় নরসুন্দর প্রথমে কিঞ্চিৎ চিন্তাপ্রসাদ লাভ করিয়াছিল। সে মনে করিয়াছিল যে, মণিয়া ক্রমশঃ তাহার প্রতি অনুরাগিনী হইতেছে এবং এই বন্দীকরণ সেই অনুরাগের প্রথম লক্ষণ মাত্র। কিন্তু এক দণ্ডকাল পরেও বিবি সাহেব যখন দুয়ার খুলিয়া দিল না, এমন কি তাহার কাতর অনুরোধে বিচলিত হইয়া উত্তর পর্ধ্যাস্ত দিল না, তখন নবীনের মনে সন্দেহ হইল। সে তখন স্বয়ং মুক্তির উপায় অন্বেষণ করিতে আরম্ভ করিল। সেই পুরাতন

মস্জিদের নিম্নে প্রতিদিকে তিনটি করিয়া চারিদিকে ছাদশটি খিলান ছিল ; কিন্তু নবীনের দুরদৃষ্টবশতঃ তাহার মধ্যে একাদশটি চিররুদ্ধ ; এবং একমাত্র দ্বার বহির্দেশ হইতে অর্গলবদ্ধ ।

দুয়ার খুলিতে না পারিয়া নবীন ভিতর হইতে ভাঙ্গিবার চেষ্টা করিতে লাগিল ; এবং সেই উপলক্ষে শববহনের খটা ছই-খানা ভাঙ্গিয়া ফেলিল । দুয়ার ভাঙ্গিল না দেখিয়া, সে তারস্বরে চীৎকার করিতে আরম্ভ করিল ; এবং কণ্ঠ ও তালু শুষ্ক হইলে নিবৃত্ত হইল । পূর্বোক্ত বৃদ্ধ যখন প্রথমবার মস্জিদে আসিয়াছিল, তখন নবীন সেইমাত্র নীরব হইয়াছে ।

বৃদ্ধ যখন কৃষক-যুবাকে লইয়া কিরিয়া আসিল, তখন নবীনের স্বরভঙ্গ হইয়াছে । অন্ধকারে, জনশূন্য প্রান্তরে তাহার বিকৃত কণ্ঠের চীৎকার যুবাকে স্তম্ভিত করিয়া দিয়াছিল । চীৎকার করিয়াও যখন সে উত্তর পাইল না, তখন সবলে কবাটে আঘাত করিতে আরম্ভ করিল । প্রথম আঘাতের শব্দ শুনিয়াই যুবা জিন্, শয়তান, এই দুইটি শব্দ উচ্চারণ করিয়া উর্দ্ধশ্বাসে পলায়ন করিল । বৃদ্ধ তাহার কথা শুনিতে পাইল না বটে, কিন্তু তাহে বুঝিতে পারিল যে, যুবা অত্যন্ত ভীত হইয়াছে ; সুতরাং সে অথবা কালক্ষেপ না করিয়া, মস্জিদ পরিত্যাগ করিল ।

কৃষক-যুবা যখন গ্রামসীমায় উপস্থিত হইল, তখন একজন বিদেশী হিন্দু গ্রাম্য-পথ দিয়া গ্রামের বাহিরে আসিতেছিল । সে যুবাকে জিজ্ঞাসা করিল, “বন্ধু, এই গ্রামে কি মুসাফিরখানা আছে ?” যুবা তাহা শুনিতে না পাইয়া কহিল, “শয়তান—

জিন্” ; এবং দ্বিতীয় প্রশ্নের অপেক্ষা না করিয়া, দ্রুত-পদে পলায়ন করিল। আগন্তুক বিদেশী ; তাহার পরিচয় প্রদান করিতেছিল। যুবাকে পলায়ন করিতে দেখিয়া, সে বলিয়া উঠিল “গ্রামের জিন্ ও শয়তান হয় ত গ্রামের লোক অপেক্ষা মেহের-বাণ ; স্তরাং মানুষের অভাবে জিন্ বা শয়তানের আশ্রয়ে দোষ নাই।” কিয়দূর গমন করিতে-করিতে, তাহার সহিত পূর্বোক্ত বৃদ্ধের সাক্ষাৎ হইল। সে যথাসম্ভব নম্রতা সংগ্রহ করিয়া জিজ্ঞাসা করিল, “সাহেব, জিন্ কোথায় ?” বৃদ্ধ কিছুই শুনিতে পাইল না বটে, কিন্তু সে মহামুগ্ধের ছায়া দক্ষিণ-হস্তের অঙ্গুলি প্রসারণ করিয়া মসজিদটি দেখাইয়া দিল। আগন্তুক দ্বিতীয় প্রশ্ন না করিয়া, বৃদ্ধের নির্দেশমত চলিতে আরম্ভ করিল।

তাহার পদশব্দ শুনিয়া, নবীন দাস পূর্ববৎ চীৎকার ও কবাটে আঘাত করিতে আরম্ভ করিল ; কিন্তু আগন্তুক বিচলিত না হইয়া, মসজিদের সোপানে আরোহণ করিল। ক্লান্ত, বিকৃত-কণ্ঠ নবীন যখন নিবৃত্ত হইল, তখন আগন্তুক ধীরে-ধীরে ছয়ারের নিকটে গিয়া জিজ্ঞাসা করিল “দোস্ত, তুমি কি সত্য-সত্যই শয়তান ?” প্রশ্ন শুনিয়া নবীন স্তম্ভিত হইয়া গেল ; কোনও উত্তর দিল না। অল্পক্ষণ পরে আগন্তুক পুনরায় জিজ্ঞাসা করিল, “কি দোস্ত, জবাব দাও না কেন ? তুমি কি সত্যই শয়তান ? আমার উপস্থিত শয়তানের বিশেষ প্রয়োজন।” নবীন তাহার প্রশ্ন এবারেও বুঝিতে পারিল না ; কিন্তু সে ভরসা করিয়া কথা কহিল। সে কহিল, “আমি শয়তান নহি, মানুষ। তুমি ছয়ার

খুলিয়া দাও, আমি তোমাকে উপযুক্ত পুরস্কার দিব।” আগন্তুক হাসিয়া কহিল, “এ কথা জিন্ মাঝেই বলিয়া থাকে। তাহার পর মুক্ত করিয়া দিলে, ঘাড়টি ভাঙ্গিয়া রাখিয়া যায়। তুমি আমাকে যতটা বেকুব মনে করিতেছ জিন্, আমি ততটা বেকুব নহি। তুমি কোন্ দেশের জিন্?” নবীন ভাবিল, আগন্তুক তাহার সহিত রহন্ত করিতেছে; সুতরাং সে উত্তরে কহিল, “আমার নিবাস বাঙ্গালা দেশে।” “হঁ। শুনিয়াছি, মুসলমান বাঙ্গালা দেশে গেলেই ভূত হয়; এইজন্ত দিল্লীতে বাঙ্গালা দেশের নাম দোজখ্। তুমি যখন মসজিদে আবদ্ধ আছ, তখন তুমি নিশ্চয়ই মুসলমানের ভূত। আর আমি হিন্দু, সুতরাং দরজা খুলিলে, ঘাড়টি না ভাঙ্গিয়া ছাড়িবে না;—সঙ্গে-সঙ্গে চেলা বানাইবে। হরে, হরে, দোস্ত, তোমাদের খোদা তোমার সঙ্গতি করুন।” আগন্তুক উঠিয়া যায় দেখিয়া, নবীন দাস প্রথমে অতুনয় বিনয়, তাহার পরে ক্রন্দন করিতে আরম্ভ করিল। আগন্তুক কিন্তু দৃঢ়প্রতিজ্ঞ; সে কহিল “আমি ব্রিট্রের সম্মান;—পঙ্কাব হইতে বিহারে পয়সা রোজগার করিতে আসিয়াছি বটে, কিন্তু জ্ঞান দিতে ত আসি নাই। জানুই যদি গেল, তবে পয়সায় প্রয়োজন কি?” ব্যাকুল হইয়া নবীন দাস ক্রমশঃ মূল্যবুদ্ধি করিতে বাধ্য হইল। ক্রমে এক আশরুফি হইতে মূল্য পাঁচ আশরুফিতে গিয়া দাঁড়াইল। তখন আগন্তুক কহিল, “দোস্ত, শরতানের আশরুফি মাকুষের হাতে আসিলে, হাওয়া হইয়া উড়িয়া যাইবে না ত? একটা নমুনা ছাড় দেখি।”

নবীন দাস ব্যগ্র হইয়া দুয়ারের দ্বিমে একটা আশরুফি গড়াইয়া দিল। আগন্তুক তাহা লইয়া, টিপিয়া বাজাইয়া, নানা রূপে পরীক্ষা করিয়া দেখিল; এবং কহিল, “দেখ জিন্ সাহেব, পাঁচ-পাঁচ আশরুফির লোভে দুয়ার ত খুলিয়া দিতে রাজি হইয়াছি; কিন্তু দুয়ার খুলিয়া দিলে যদি আশরুফি না দাও?” নবীন যতগুলো দেবতার নাম জানিত, সকলের নাম লইয়া শপথ করিল; কিন্তু আগন্তুক তাহাতেও নরম হইল না। সে কহিল, “এ সকলগুলো ত হিন্দুর ঠাকুর; আর তুমি ত মুসলমানের ভূত?” নবীন কহিল, “দোহাই ধর্ম্মের, আমি হিন্দু।” “তোবা তোবা! আশরুফি বাদসাহের পরে হিন্দুর ভূত ভুলিয়াও মস্জিদের কাছ দিয়া যায় না।” “তবে কি করিলে তোমার বিশ্বাস হইবে?” “নগদ তিন আশরুফি বায়না ছাড়—আর বাকি দুইটা দুয়ারের নীচে গলাইয়া রাখ,—আমি এক হাতে টিপিয়া ধরি, আর এক হাতে দুয়ার খুলি।” নবীন একে-একে আরও দুইটি আশরুফি গলাইয়া দিল। তিনটি আশরুফি হস্তগত হইলে, আগন্তুক কহিল, “জিন সাহেব, তুমি আমীর ছিলে, সে বিষয়ে কোন সন্দেহ নাই। বাহাই হউক, তুমি যখন জিন্—মুসলমানের ভূত—আর আমি হিন্দু, তখন সাবধানে চলাই কর্তব্য। তুমি একটু বিলম্ব কর আমি আশরুফি তিনটা একজনকে দিয়া আসি।” নবীন তাহার কথা শুনিয়া উচ্চৈঃস্বরে রোদন করিতে আরম্ভ করিল। আগন্তুক তাহাতে কর্ণপাত না করিয়া স্বদীর্ঘ পাদক্ষেপে প্রস্থান করিল।

ষট্‌পঞ্চাশত্তম পরিচ্ছেদ

ফরীদের গৃহত্যাগ

ছিপ ও নৌকা ভীরে লাগিল; আরোহিণী অবতরণ করিলেন। সেই স্থানে রাজমহলের পথ ভীরের ধারেধারে বাকিয়া বাকিয়া চলিয়া গিয়াছে। হরিনারায়ণ প্রভৃতি দূর হইতে দেখিতে পাইলেন যে, একখানা রথ অতি দ্রুতবেগে পাটনার দিকে চলিয়াছে। রথখানির সাজসজ্জা অতি মূল্যবান; এবং রথের সারথিকে দেখিলে সম্ভ্রান্ত ব্যক্তি বলিয়া মনে হয়। দূর হইতে অনেক লোক আসিতে দেখিয়া সারথি কহিল, “মণিয়াজান্, দরিয়া হইতে অনেক লোক আসিতেছে।” রথের অভ্যন্তর হইতে মণিয়া কহিল, “রথ রাখ।” সারথি কহিল, “বাপ! মণিয়াজান্, অমন কাজ ফরীদ থা হইতে হইবে না।” “কেন ফরীদ?” “বেগানা জায়গা,—ফরীদ একা,—ফরীদের হাত হইতে যদি পাটনা সহরের সাত বাদশাহের দৌলত লুট হইয়া যায়, তাহা হইলে তাহার আর মুখ দেখাইবার উপায় থাকিবে না।” “চালাকী রাখ্, রথ থামা।” “বো হকুম জনাব।”

রথ থামিল; মণিয়া রথ হইতে নামিল। নদীতীর হইতে বাহারা আসিতেছিল, তাহাদিগকে দেখিয়া মণিয়া উল্লাসে চীৎকার করিয়া উঠিল, “আল্লা, ও আল্লা, ও হিন্দুর ভগবান্, তবে তুমি আছ! ফরীদ, আমি তোম মজলিসে পূরা একহুগা মজরা করিব। বহিন্, রথ হইতে নাম,—তোমার বাপ ও ভাই

আসিয়াছেন।” এই সময়ে অসীম কহিলেন, “দাদা, দূরে গেল্লয়া পরিয়া মণিয়ার মত একটা স্ত্রীলোক দাঁড়াইয়া আছে না?” স্বদর্শন কিয়ৎক্ষণ দেখিয়া কহিলেন, “সেই রকমই ত লাগে। ছোটরায়, ও বেটা কি মনে করিয়া আসিল?” হরিনারায়ণ কহিলেন, “মণিয়া বাঈ বটে, এবং আনাদিগকেই ডাকিতেছে।”

সকলে দ্রুতপদে রথের দিকে অগ্রসর হইলেন। এই সময়ে রথ হইতে দুর্গাকে অবতরণ করিতে দেখিয়া, বৃদ্ধ বিজালঙ্কার দৌড়িয়া গিয়া, তাহাকে কোলে তুলিয়া লইলেন। তখন অন্ধকার ঘন হইয়া আসিয়াছে। ফরীদ খাঁ রথের দ্বীপ জালিলে, সকলে তাঁহার চারিদিকে উপবেশন করিলেন। মণিয়ার মুখে সকল বৃত্তান্ত শুনিয়া অসীম কহিলেন, “এখন আপনারা কি করিবেন?” ত্রিবিক্রম কহিলেন, “এখনই সকলে মুরশিদাবাদ যাত্রা করিবেন।” হরিনারায়ণ আশ্চর্য্যান্বিত হইয়া কহিলেন, “তুমি আবার এই কথা বলিতেছ?”

ত্রিবিক্রম। এ কথা ত তোমাকে বরাবরই বলিয়া আসিতেছি।

হরিনারায়ণ। যাইব কেমন করিয়া?

ত্রিবি। কেন, কন্ডা পুত্রবধূ ত পাইয়াছ?

হরি। তৈজসপত্র?

অসীম। বিশেষ কিছু অবশিষ্ট নাই। নবীন যাহা রাখিয়া আসিয়াছিল, প্রতিবেশীরা তাহা ভাগ করিয়া লইয়াছে।

মণিয়া। এই রাত্রিতে পাটনায় ফিরিয়া যাওয়া উচিত নহে ; কারণ, গুণ্ডার দল আবার আক্রমণ করিতে পারে।

হরি। তৈজসপত্র যখন কিছুই নাই, তখন আর পাটনায় ফিরিয়া কি হইবে ? ত্রিবিক্রম, তোমার কথাই ঠিক,—আমরা এখনই মুরশিদাবাদ যাত্রা করিব।

ত্রিবি। তবে আর বিলম্ব করিয়া কাজ নাই,—এখন যাত্রা করিলেই ভাল।

হরি। অসীম, তুমি কোথায় যাইবে ?

ত্রিবি। অনেকদূর,—স্বতীর মোহনা পর্য্যন্ত।

অসীম। চলুন, আপনাদিগকে কিয়দূর অগ্রসর করিয়া দিয়া আসি। বাদশাহ এলাহাবাদ যাত্রা করিয়াছেন ; ভূপেন কোজের সঙ্গে গিয়াছে।

ত্রিবি। তাই ত ভাই,—বিবাহের সময়ে আনাকেই কোলবর সাজিতে হইবে ?

অসীম। বিবাহ ! আপনি কি বলিতেছেন ?

মণিয়া। পথে আর বিলম্ব করিয়া কাজ নাই। পাটনা সহরের চারিদিক তেমন ভাল জায়গা নহে।

সকলে গাত্রোথান করিলেন। সেই সময়ে মণিয়া ত্রিবিক্রমের নিকট আসিয়া জিজ্ঞাসা করিল, “আপু কেয়া করুমাতে হেঁ ? ইয়ে বাঙ্গালী রাজা সাহেব কেয়া সাদী করেন কে লিয়ে যা রহেঁ ?” ত্রিবিক্রম হাসিয়া উঠিলেন এবং কিয়ৎক্ষণ পরে কহিলেন, “জব্বর। আপ ভি উনকো সাখ্ সাখ্ আওয়েদে।” “কবহি

নেহি" বলিয়া মণিয়া পাশ কাটাইয়া চলিয়া গেল। চলিতে-চলিতে সহসা হরিনারায়ণ জিজ্ঞাসা করিলেন, "মণিয়া কোথায় গেল?" সকলে চাহিয়া দেখিলেন, মণিয়া বা ফরীদ খাঁ তাহা-দিগের সঙ্গে নাই। অসম জিজ্ঞাসা করিলেন, "ফরীদ খাঁও ত নাই?" ত্রিবিক্রম কহিলেন, "তাহারা দুইজনে রথে ফিরিয়া গিয়াছে। রাত্রি অনেক হইয়াছে,—এখন আর তাহাদের সন্ধানে ফিরিলে চলিবে না।" সকলে নৌকায় উঠিলেন; নৌকা ও ছিপ রাজমহলের দিকে চলিল।

মণিয়া ত্রিবিক্রমের নিকট হইতে সরিয়া গিয়া, ফরীদ খাঁর বস্ত্রাবধি করিল; এবং ধারে ধীরে তাহার সহিত অন্ধকারে মিশিয়া গেল। ফরীদ অল্পভবে বুঝিল যে, তাহার দুইজনে অন্য পথে চলিয়াছে। ক্রমে উভয়ে রথে ফিরিয়া আসিল। তখন ফরীদ খাঁ জিজ্ঞাসা করিল, "এখন কোথায় যাইব?" মণিয়া সাস্থ্যে জিজ্ঞাসা করিল, "কেন, পাটনায়।" ফরীদ সোজাসে অভিবাদন করিয়া কহিল, "যো হকুম, জনাব।" "এখান হইতে শহর কতদূর?" "আট-দশ ক্রোশ হইবে।" "কখন পৌছিবে?" "স্বৰ্য্যোদয়ের পূর্বে।"

রথ চলিতে আরম্ভ করিল। প্রায় দুইদণ্ড পরে ফরীদ খাঁ রথ থামাইয়া জিজ্ঞাসা করিল, "মণিয়া বিবি, তুমি কি জাগিয়া আছ?" মণিয়া কহিল, "হাঁ। আমি ত ঘুমাই নাই। নানা চিন্তায় ঘুম আসে নাই।" "রথ থামাইলাম তোমাকে একটা কথা জিজ্ঞাসা করিবার জন্য। যদি অনুমতি দাও, তাহা হইলে

জিজ্ঞাসা করি।” “এত বড় কি কথা করীদ ভাই, যে রথ থামাইতে হইবে?” “মণিয়া বিবি, হয় ত তোমার কাছে অতি ক্ষুদ্র; কিন্তু আমার কাছে প্রকাণ্ড। এই সমস্ত দুনিয়াটার মত বড়।” “করীদ ভাই, তুমি কি আমার উপর রাগ করিয়াছ?” এই দুই-তিন বৎসরের মধ্যে তুমি ত আমাকে মণিয়া বিবি বলিয়া ডাক নাই?” “সে কথা সত্য। দেখ মণিয়া, হঠাৎ একটা কথা মনে পড়িয়া গেল। তাহাতে আমার চোখে দুনিয়াটা যেন নূতন চেহারা ধরিল। অনেকদিন ধরিয়া ঝাম্‌ঝাম্‌ করিয়া একটা স্বর যেন কাণে বাজিতেছিল,—হঠাৎ সেটা যেন ঝঙ্কার দিয়া উঠিল; সঙ্গে-সঙ্গে সমস্ত শরীরের মধ্য দিয়া যেন তড়িৎপ্রবাহ ছুটিয়া গেল। মনের আবেগ সঞ্চার করিতে না পারিয়া রথ থামাইলাম। মণিয়া একটা কথা জিজ্ঞাসা করিব?” “কর।” “তুমি নিঃসঙ্কোচে উত্তর দিও।” “দিব।”

“দেখ মণিয়া, এতদিন ধরিয়া জীবনটা ক্লেমন করিয়া কাটাই-
য়াছি, তাহা এখন ভাল মনে পড়িতেছে না। কেহ যদি
জিজ্ঞাসা করে, এতদিন কি করিয়াছ, তাহা হইলে বোধ হয়
উত্তর দিতে পারিব না। আমার পিতা, পিতামহ ষে ভাবে
জীবন যাপন করিয়া গিয়াছেন, আমার প্রথম জীবনটা ত সে
ভাবে যাপন করি নাই! মণিয়া, জীবনের গতিটা পরিবর্তন
করিবার সময় বোধ হয় আসিয়াছে। সে পরিবর্তন নিতান্ত
সহজসাধ্য নহে। হয় ত একা পারিব না। তুমি কি আমাকে
সাহায্য করিবে?” “কেমন করিয়া করীদ ভাই?” “কেমন

ফরিয়া, সে কথা এক কথায় বলিতে পারিব না। মণিয়া, আমার মনে হইতেছে যে, জীবনের পথে প্রতি পদে যদি তোমার সঙ্গ পাই, তাহা হইলে হয় ত কখনও পদস্থলন হইবে না। তোমার সঙ্গ পাইবার অধিকার আমার নাই; কারণ আমি মদ্যপ, দুষ্চরিত্র;—কখনও উচ্ছৃঙ্খল চিত্তবৃত্তিকে সংযত করিবার চেষ্টা করি নাই। আমার নিকট তুমি দেবী,—তাহা জানিয়াও তোমাকে এই কথা জিজ্ঞাসা করিতেছি মণিয়া! কারণ, কে যেন আমাকে বলিতেছে যে, তোমার সঙ্গ যদি না পাই, তাহা হইলে প্রথম জীবনে উদ্দাম গতি রোধ করিতে পারিব না।” “ফরীদ, তুমি জান আমি কে, আর তুমি জান তুমি কে?” “জানি, তুমি রূপসী ঙ্গশালিনী দেবী—আর আমি, মদ্যপ, উচ্ছৃঙ্খল লম্পট।” “তুমি জান যে তুমি আনীরের পুত্র,—তোমার পিতা হিন্দুস্থানের একজন বিখ্যাত বীর,—আলমগীর বাদশাহের একজন বিখ্যাত কন্মচারী;—আর আমি হিন্দু বেস্তার মুসলমান উপপতির কন্যা,—উদরের জন্য পাটনার পথে-পথে দেহ বিক্রয় করিয়া বেড়াই। ফরীদ, আমি কি তোমার যোগ্য জীবনসঙ্গিনী?” “হঁ। মণিয়া,—একবার নহে শতবার, শতবার নহে সহস্রবার। আমি জানি আমি কি। পিতার পুত্র হইলেই সে পিতৃপদ লাভ করে না,—তাহার যোগ্যতা প্রতিপাদন করিতে হয়। প্রথম জীবন আমি তোমার সঙ্গে কাটাইয়াছি; যদি চিরদিন তোমার সঙ্গ পাই, তাহা হইলে হয় ত একদিন হিন্দুস্থানে পিতার পুত্র বলিয়া পরিচয় দিতে পারিব;—নতুবা নহে। মণিয়া জন্মকথা বিস্মৃত

হও। আমি মুসলমান,—আমার ধর্মে, হিন্দুর যে বাধা আছে, তাহা নাই। মণিয়া, আমাকে কি মাফুষ হইতে দিবে?” মণিয়া উত্তর দিতে পারিল না। অর্দ্ধদণ্ড পরে ফরীদ পুনরায় ডাকিল, “মণিয়া বিবি!” অশ্রুধ্বজ কণ্ঠে মণিয়া কহিল, “কি ভাই?” “আমার প্রশ্নের উত্তর দিলে না?”

মণিয়া সহসা রথের বাহিরে আসিয়া ফরীদ খাঁর উভয় হস্ত ধারণ করিয়া কহিল, “ফরীদ, তাহা হয় না ফরীদ। তুমি আমাকে যে সম্মান করিয়াছ, এ দুনিয়ায় কসবীর কন্যাকে সে সম্মান কয়জন করিতে পারে? কিন্তু আমি সে সম্মানের যোগ্য নহি;—আমি তোমার সে খাতির রাখিতে পারিলাম কই? ফরীদ, ভাই, আমি তোমাকে ভাইয়ের মত ভালবাসি। আমি জানি, আমার জন্য তুমি কত গঞ্জনা সহ্য করিয়াছ,—কত লাঞ্ছনা, কত অপবাদ হাসিমুখে উড়াইয়া দিয়াছ; কত বিপদে, কত আপদে বুক পাতিয়া দিয়া আমাকে রক্ষা করিয়াছ। ফরীদ ভাই, তোমার ঋণ আমি শোধ করিতে পারিব না। তুমি আমার ভাই,—আমার বড় ভাই। জীবনে কখনও ভ্রাতৃ-মেহ পাই নাই,—গত দুই বৎসর সে স্থান তোমাকে দিয়া পূরাইয়া রাখিয়াছি। ভাই, যতদিন বাঁচিয়া থাকিব,—যদি ছোট বহিন্ বলিয়া তোমার ঘনের কোণে একটু স্থান দাও,—তাহা হইলেই চরিতার্থ হইব।”

ফরীদ খাঁ নীরবে সমস্ত কথা শুনিয়া গেল। শেষ কথাটার সময়ে সে শিহরিয়া উঠিল। কিয়ৎক্ষণ নীরব থাকিয়া সে

কহিল, “বহুৎ আচ্ছা—যো তুম বিবি সাহেব।” মণিয়া রথের ভিতরে গিয়া শয্যা লুটাইয়া পড়িল। একদণ্ড পরে মণিয়া যখন মুখ তুলিয়া চাহিল, তখন রথ শূন্য। সে ব্যাকুল হইয়া কাদিতে কাদিতে জাকিল, “ফরীদ, ফরীদ, ফরীদ ভাই, ফরীদ থা!” দূর পৰ্ব্বত-প্রান্ত হইতে তাহার আকুল আহ্বানের ক্ষীণ প্রতিধ্বনি ফিরিয়া আসিল। পরদিন প্রভাতে ফরীদ খাঁর সুসজ্জিত শূত্র রথ পাটনা শহরে পৌঁছিল।

সপ্তপঞ্চাশত্তম পরিচ্ছেদ

সতী-বাক্য

গদ্যাতীর জনশূন্য। বিস্তৃত শুভ্র শুক সৈকত বিল্লীরবে মুখরিত। তীরে জীর্ণ ঘাটের সোপানের উপরে বসিয়া এক তরুণী একমনে মালা রচনা করিতেছিল। অদূরে গ্রামে কোন ধনি গৃহে রোশনচৌকী বাজিতে ছিল। মধ্যে মধ্যে তাহার শব্দ আসিয়া যুবতীকে অন্যমনস্ক করিয়া তুলিতেছিল। তখন দিবসের দ্বিতীয় প্রহর অতীত হইয়াছে, শুক তপ্তসৈকত জনশূন্য। বাতধ্বনি শুনিয়া তরুণী মধ্যে মধ্যে বিরক্ত হইয়া মালা রচনা বন্ধ করিতেছিল, আবার তখনই ক্ষিপ্ত হস্তে রাশি রাশি করবী সূত্রে গাঁথিতেছিল।

অদূরে একটা কুকুর প্রহৃত হইয়া আর্ন্তনাদ করিয়া উঠিল। তাহা দেখিয়া তরুণী অত্যন্ত বিরক্ত হইল, এবং সূত্র ও সূচী

দূরে ঠেলিয়া ফেলিয়া উঠিল। গ্রামের দিক হইতে পরিপূর্ণ খালা লইয়া এক প্রোচা রমণী আসিতেছিলেন, তরুণী বিরক্ত হইয়া তাঁহাকে জিজ্ঞাসা করিল, “আমীর কুকুরকে মারিলে কেন কাকিমা?” প্রোচা কহিলেন “না মারিলে ছুইয়া দেয় যে মা!” “দিলেই বা!” “ও আমার গোড়া কপাল! তোমাকে বুঝাই কি করিয়া মা? কুকুরের ছোঁয়া কি খাইতে আছে?” এই সময়ে লোষ্ট্রাহত কুকুরটি তরুণীর পশ্চাতে আসিয়া দাঁড়াইল। তাহা দেখিয়া সে তাহার মস্তকে হস্তার্পণ করিয়া সম্ভাষণ করিল, কুকুর লাঙ্গুল চালনা করিয়া কৃতজ্ঞতা জানাইল। প্রোচা এই অবসরে দেখিতে পাইলেন যে ঘাটের উপরে রাশি রাশি করবী ও শেফালি পড়িয়া আছে, তাহা দেখিয়া জিজ্ঞাসা করিলেন “শৈলের জন্ত মালা গাঁথিতেছি সুখি?” তরুণী কুপিতা হইয়া কহিল “শৈলের জন্য মালা গাঁথিব কেন, আমার নিজের জন্য গাঁথিতেছি।” “কেন তোমার মালা কি হইবে মা?” প্রশ্ন শুনিয়া সহসা তরুণীর সুন্দর মুখ লজ্জার রক্তবর্ণ হইয়া উঠিল। সে মস্তক অবশুর্গণ টানিয়া দিয়া কহিল, “আজি যে তিনি আসিবেন?” প্রোচা দুঃখের হাসি হাসিয়া কহিলেন, “তোমার কপালে আর তিনি আসিয়াছেন! এত দুঃখও ছিল তোমার বরাতে! সতীমা, ফুলগুলি নষ্ট করিও না মালা গাঁথিয়া শৈলকে দিয়া এস।” তরুণী প্রোচার কথা শুনিয়া রাগিল এবং মস্তকের বস্ত্র ফেলিয়া দিয়া কহিল, “শৈলকে দিব

কেন, তাহার বিবাহের দিন দিব।” প্রোচা হাসিয়া কহিলেন “রাগিস্ কেন মা, আজি ত শৈলর বিবাহ।” “কথখনো না।” “পাগলী, অমন অলক্ষণ কথা বলিতে নাই। ঐ শোন, নহবং, রৌশনচোকী বাজিতেছে।” “তা হোক শৈলের বিবাহ আজ হইবে না। কাকিমা ঐ দেখ পশ্চিমে মেঘ উঠিয়াছে, ঐ দেখ ঝড় উঠিল, ঐ দেখ নৌকা ডুবিল, বরষাত্রী সব, ডুবিয়া গেল—” “থাম্ থাম্ ও সতী, অমন কথা মুখে আনিতে নাই। পাগলী কি বলে গো! হরি রক্ষা কর, হরি রক্ষা কর, আমি বাই বাছা, মরিতে তোকে ফুলের কথা বলিতে গিয়াছিলাম!” “কাকিমা, যেওনা, ঐ যে দেখিতেছ শাদা বালির রাশি, এখনই জলে ভরিয়া যাইবে, ঐ অশ্বখ তলায় বরের নৌকা শত খণ্ড হইয়া আছড়াইয়া পড়িবে।”

প্রোচা রণে ভঙ্গ দিয়া পলায়ন করিলেন। পলায়ন কালে কুকুরটা তাঁহাকে ছুঁইয়া ছিল তিনি তাহা দেখিয়াও দেখিলেন না। তরুণী পুনরায় মালা গাঁথিতে বসিল; বাঘ থামিয়া গেল, গ্রামে কোলাহল বাড়িতে লাগিল, একটা, দুইটা, তিনটা করিয়া ক্রমে অনেকগুলি মালা গাঁথা হইল, তখন সুকোমল শুভ্রবাহতে শুভ্র পুষ্প শ্রজঃ সাজাইয়া লইয়া হৃন্দরী গঙ্গাতীর পরিত্যাগ করিল।

গ্রামে একখানা ইষ্টক নির্মিত গৃহের সম্মুখে বসিয়া এ প্রৌঢ় হঁকা লইয়া আহায়াস্তে তামাকু সেবন করিতেছিলো। তরুণী তাঁহাকে দেখিয়া দাঁড়াইল এবং মন্তকের অবগুণ্ঠন টানি

দিয়া ডাকিল, “বাবা” বিশ্বনাথ চক্রবর্তী কহিলেন, “কেন মা?”
 লজ্জাবনত মুখী কন্যা কহিল “বাবা, আজ যে তিনি আসিবেন?”
 পিতা বিস্মিত হইয়া জিজ্ঞাসা করিলেন, “তিনি কে মা?”
 আনত বদনে পদনথ দ্বারা মৃত্তিকা খনন করিতে করিতে কন্যা
 কহিল, “তোমার জামাই।” কন্যার কথা শুনিয়া বৃদ্ধ ছঁকা
 নামাইয়া রাখিয়া দিলেন, একবার দীর্ঘনিশ্বাস ত্যাগ করিয়া তাহা
 আবার উঠাইয়া লইলেন। কিয়ৎক্ষণ পরে কন্যা পুনরায়
 জিজ্ঞাসা করিল, “বাবা, জেলে ডাকিয়া আনিব?” অন্যমনস্ক
 বিশ্বনাথ জিজ্ঞাসা করিলেন “জেলে কি হইবে মা?” “কেন মাছ
 ধরিবে? অনেক লোক আসিবে।” “অনেক লোক কোথা
 হইতে আসিবে?” “কেন তাঁহার সঙ্গে?” বিশ্বনাথ মুখ
 ফিরাইয়া লইয়া দ্বিতীয়বার দীর্ঘনিশ্বাস ত্যাগ করিলেন। কন্যা
 আগ্রহে জিজ্ঞাসা করিল “জেলে ডাকিব?” অশ্রুঝঙ্ককণ্ঠে
 বৃদ্ধ চক্রবর্তী কহিলেন, “তোমার মাকে জিজ্ঞাসা করিয়া এস।”

কন্যা সানন্দে অন্তঃপুরে প্রবেশ করিল। বিশ্বনাথের পত্নী
 তখন আহা়ারান্তে গৃহের সম্মুখে বসিয়া বিশ্রাম করিতেছিলেন।
 কন্যা তাঁহার কণ্ঠালিঙ্গন করিয়া সাদরে জিজ্ঞাসা করিল “মা,
 জেলে ডাকিতে যাইব কি?” কন্যার শুষ্ক, রুক্ষ কেশগুচ্ছ
 কপাল হইতে সরাইয়া দিয়া মাতা সম্মুখে জিজ্ঞাসা করিলেন
 “কেন মা?” “আজ যে তিনি আসিবেন?” “তিনি কে?”
 মাদরিনী কন্যা অভিমানে মুখ ফিরাইয়া কহিল, “কেন,
 তোমার জামাই।” মাতার নয়নদ্বয় অশ্রুজলে অন্ধ হইয়া গেল।

তিনি রুদ্ধকণ্ঠে কহিলেন “ঘরে মাছ আছে।” “তাহাতে হইবে না, তাহার সঙ্গে অনেক লোক আসিবে না?” মাতার বাক্যশ্রুতি হইল না। তিনি চির দুঃখিনী কন্যাকে বুকে চাপিয়া লইয়া অশ্রু বিসর্জন করিতে লাগিলেন। তখন কন্যা মাতার চোখের জল মুছাইয়া দিয়া কহিল “মা, লোকে বলে আমি পাগল কিন্তু আমি ত পাগল নই। তুমি কখনও আমাকে মিথ্যা কথা বলিতে শুনিয়াছ?”

অষ্টপঞ্চাশতম পরিচ্ছেদ

সতীর পতিপ্রাপ্তি

চারিদিকে ঘন অন্ধকার, ঝড়ের শব্দে অন্যশব্দ শোনা যাইতেছিল না। ভগ্নবৃক্ষশাখা ও পর্ণ কুটারের ধ্বংসাবশেষে সঙ্কীর্ণ গ্রাম্যপথ রুদ্ধপ্রায়। সেই ভীষণ ঝড়ের রাজ্রিতে সতী একাকিনী সেই পথ ধরিয়া ভাগীরথী তীরে আসিল। তখন যেন ইন্দ্রজাল বলে ভাগীরথীর শুষ্ক বেলা অন্তর্হিত হইয়াছে, যে ভাগীরথী-বক্ষ সচরাচর ক্ষুদ্র বীচিখচিত প্রশান্ত, তাহা যেন সহসা কোন্‌ তীব্র মাদকের উত্তেজনায় উন্নত হইয়া উঠিয়াছে, নদীর জল প্রবল ঝড়ের তাড়নায় দীর্ঘ বেলা অতিক্রম করিয়া ঘাটের সোপানের পাদমূলে আছড়িয়া পড়িতেছে। সহসা বিদ্যুতের উজ্জ্বল আলোকে দশদিক উদ্ভাসিত হইয়া উঠিল

এবং মুহূর্তপরেই বস্তু ভীষণনাদে এক তরুণিরে আঘাত করিল। কিছুমাত্র ভীত না হইয়া সতী ঘাটের সর্বোচ্চ সোপানের উপরে দাঁড়াইয়া রহিল।

আবার বিদ্যুৎ চমকিল, আকাশ ঘেন সহস্রভাগে বিভক্ত হইয়া গেল, তাহার আলোকে সতী দেখিল একটা প্রকাণ্ড তরঙ্গ একখানা বৃহৎ নৌকাকে উর্দ্ধে উঠাইয়া আবার গভীর জলে নিক্ষেপ করিল, নৌকা সশব্দে চূর্ণ হইয়া গেল। ক্ষণকাল পরে তরঙ্গমালা দুই একটি মৃতদেহ ও বহু কাষ্ঠখণ্ড তীবে নিক্ষেপ করিয়া চলিয়া গেল। সতীর ইচ্ছা হইতেছিল যে, সে ছুটিয়া গিয়া দে গ্রে কে মরিল; কিন্তু একটা অদৃষ্ট শক্তি আসিয়া তাহার গতি রুদ্ধ করিয়া দিল।

ক্রমে বায়ুর বেগ মন্দ হইয়া আসিল, মূলধারে বৃষ্টি পড়িতে লাগিল, সতীর বস্ত্র নিষ্কৃত হইয়া গেল, তথাপি সে সেইখানেই দাঁড়াইয়া রহিল। তখন দূরে মহুগুপদশব্দ শ্রুত হইল, তাহার হৃদয় সহসা আনন্দে নাচিয়া উঠিল। সতী দ্রুতপদে গানের দিকে অগ্রসর হইল। একসঙ্গে তিনজন মানুষ আবির্ভূত হইল, তাহাদের মধ্যে একজন জিজ্ঞাসা করিল, “তোমরা কি কিছুই দেখিতে পাইতেছ না?” দ্বিতীয় ব্যক্তি কহিল, “মহাশয়, অনেকক্ষণ ধরিয়াই তো অন্ধকার দেখিতেছি।” প্রথম ব্যক্তি পুনরায় জিজ্ঞাসা করিল, “কি রায়জী, জায়গাটা চিনিতে পারিলে না?” তৃতীয় ব্যক্তি কহিল, “কেমন করিয়া চিনিব?” “ঐ দেখ গঙ্গার ঘাট, অদূরে পুষ্করিণী, তাহার জীর্ণ ঘাটে একটা

শৃগাল দাঁড়াইয়া আছে, গ্রামে আলোক নাই, বোধ হয় অনেক ঘর পড়িয়া গিয়াছে।” এই সময় দ্বিতীয় ব্যক্তি জিজ্ঞাসা করিল, “মহাশয়, আপনি কি সত্য সত্যই এই সমস্ত দেখিতে পাইতেছেন ? আমার কিন্তু মনে হইতেছে যে, সমস্তই ভোজবাজী।” “ভোজ-বাজী নহে সুদর্শন, বহুকাল অন্ধকারই দেখিয়া আসিতেছি, সেই জন্য আমার চক্ষুর সম্মুখে অন্ধকার দিবালোকের ন্যায় উজ্জ্বল হইয়া উঠে।”

দূর হইতে শেষ কথা সতীর কর্ণে প্রবেশ করিয়াছিল, সে শব্দস্পর্শে তাহার অঙ্গ রোমাঞ্চিত হইল। সতী কম্পিত কর্ণে জিজ্ঞাসা করিল, “অন্ধকারে দেখ, তুমি কে ?” তাহার কর্ণধর শুনিয়া ঘোর সূচীভেদে অন্ধকারে মল্লয়াত্রয় দাঁড়াইয়া গেল। সতী পুনর্বার জিজ্ঞাসা করিল, “অন্ধকারে দেখ তুমি কে ?” ত্রিবিক্রম উত্তর দিলেন না, তাহা দেখিয়া অসীম সাহসে ভর করিয়া কহিলেন, “মা, আমরা মাতুষ, অন্ধকারে পথ হারাইয়াছি, তুমি যদি পার, আমাদিগের নিকটে আইস।” সতী আবার জিজ্ঞাসা করিল, “তোমাদিগের মধ্যে যে অন্ধকারে দেখিতে পায় সে কোথায় ?” ত্রিবিক্রম তখনও নিরুত্তর। সতী তখন অসীমের নিকট আসিয়া বলিল, “বাবা কাল তোমার বিবাহ, নিকটে মৃতদেহ পড়িয়া আছে, স্পর্শ করিও না।”

আবার বিদ্যুৎ চমকিল, তীব্র আলোকে অসীম ও সুদর্শন দেখিল, আগন্তুক তরুণী, রূপসী, বিবাহের বেশে সজ্জিত। সতী আলোকে ত্রিবিক্রমকে দেখিয়া তাঁহাকে প্রণাম করিল।

তখন অসীম জিজ্ঞাসা করিল, “তুমি কে মা?” উত্তর হইল, “আমি সতী।” “এই দুখোঁগে নিশীথ রাত্রিতে কোথায় চলিয়াছ মা?” “স্বামীর নিকট।” “তোমার স্বামী কোথায়?” সতী ত্রিবিক্রমকে দেখাইয়া দিয়া বলিল, “ইনিই আমার স্বামী।”

দীর্ঘনিশ্বাস ত্যাগ করিয়া ত্রিবিক্রম জিজ্ঞাসা করিল, “তবে তুমিই কি আমার নিয়তি?” সতী বলিল, “সে কথা বলিতে পারি না। আমি বিশ্বনাথ চক্রবর্তীর মেয়ে; এই স্নেহে আসিয়া আপনি আমাকে বিবাহ করিয়া গিয়াছিলেন।” “তুমি কি করিয়া জানিলে যে, আমি তোমার স্বামী?” “সে বলিয়া দিয়াছে।” “সে কে?” “দ্বিপ্রহর রাত্রিতে শয়ানে গেলে সে আমার সহিত কথা কহে কিন্তু আমি কখনও তাঁহাকে দেখি নাই।” “তিনি কি বলিয়াছেন?” “আজ বলিয়াছেন যে দ্বিপ্রহর রাত্রির পরে অন্ধকারে পথ হারাইয়া আপনি এইখানে আসিবেন। আমি তাঁহার কথামত আপনাকে পথ দেখাইয়া লইয়া যাইতে আসিয়াছি।”

বৃষ্টির বেগ বাড়িল, ত্রিবিক্রম জিজ্ঞাসা করিল, “এখন কোথায় বাইব? আমার সঙ্গে অনেক লোক আছে, তাহা-
দিগের আশ্রয়ের ব্যবস্থাও করিতে হইবে।” সতী কিছুমাত্র বিবস্থিত না হইয়া বলিল, “সে কথাও সে বলিয়াছে, সকলের বন্দোবস্তই হইয়াছে। আপনার বন্ধু তাঁহার কন্যা ও পুত্রবধূ লইয়া দূরে দাঁড়াইয়া আছেন, আপনারা আমার সঙ্গে আসুন, গ্রামে গিয়া লোক পাঠাইয়া দিই।” অন্ধকারে তিনজন

পুরুষ সতীর পশ্চাৎ পশ্চাৎ বিশ্বনাথ চক্রবর্তীর গৃহে উপস্থিত হইল।

পিতৃগৃহে প্রবেশ করিয়া সতী পিতাকে কহিল, “বাবা, তাঁহারা আসিয়াছেন।” বিশ্বনাথ অত্যন্ত বিস্মিত হইয়া আগন্তুক-জয়ের প্রতি চাহিলেন, তাঁহার বিস্ময়ের কারণ বুঝিয়া ত্রিবিক্রম প্রণাম করিয়া বলিলেন, “আমিই আপনার জামাতা ত্রিবিক্রম।” বিশ্বনাথের বিস্ময় কিন্তু তাহাতেও দূর হইল না, তিনি বলিলেন, “বাপু, মাত্র একটি দিন তোমাকে দেখিয়াছিলাম, স্মরণে চিনিতে পারিলাম না তো? প্রমাণ না পাইলে কেমন করিয়া তোমাকে জামাতা বলিয়া গ্রহণ করিব?” ত্রিবিক্রম হাসিয়া বলিলেন, “সাক্ষীর প্রমাণ সবই আনিয়াছি, আমার একবন্ধু কন্যা ও পুত্রবধূ লইয়া প্রায় এককোশ দূরে দাঁড়াইয়া আছেন, আপনি তাহাদিগকে আশ্রয়ে আনিবার ব্যবস্থা করুন। জামাতা না হই, মনে করুন আমি অতিথি, বিপন্ন ও পথভ্রান্ত ব্রাহ্মণ।” বিশ্বনাথ দুই তিন জন গ্রামবাসীকে ডাকাইয়া, দুই তিনটা মশাল প্রস্তুত করাইয়া তাহাদিগকে হরিনারায়ণের সন্ধানে পাঠাইয়া দিলেন। অসীম ও সুদর্শন তাহাদিগের সহযাত্রী হইল। তৃতীয় প্রহর রাত্রিতে হরিনারায়ণ বিছালন্ধার কন্যা ও পুত্রবধূ সহ বিশ্বনাথ চক্রবর্তীর গৃহে আশ্রয় পাইলেন।

তখন বিশ্বনাথের প্রতিবেশী মিত্র-গৃহে জন্মনের বোল উঠিল, লোক আসিয়া বলিয়া গেল যে বরের নোকা ডুবিয়া গিয়াছে, বর ও বরযাত্রী দুই জনের দেহ ঘাটের নিকটে পাওয়া গিয়াছে।

একোনষষ্ঠিতম পরিচ্ছেদ

বুদ্ধ বৈষ্ণব

রথ পরিত্যাগ করিয়া মণিয়া পাগলিনীর ত্রায় ফরীদ খাঁর সন্ধান করিতে আরম্ভ করিল; কিন্তু রজনীর অন্ধকারে, জনশূন্য প্রান্তরে সে ফরীদের কোন চিহ্নই দেখিতে পাইল না। তখন তাহার চক্ষু যেদিকে ঘাইতেছিল, সে সেই দিকেই চলিতেছিল। চলিতে-চলিতে, একপ্রহর পরে দূরে একটা আলোক দেখিতে পাইয়া, মণিয়া সেই পথে চলিল। নিকটে গিয়া দেখিল, একটা জনশূন্য মন্দির মধ্যে আলোক জ্বলিতেছে। মণিয়া মন্দিরের ভিতরে ছায়ারের পৃষ্ঠে পৃষ্ঠ রাখিয়া ঘুমাইয়া পড়ি।

যখন তাহার নিদ্রাভঙ্গ হইল, তখনও সূর্যোদয় হয় নাই। মণিয়া জাগরিত হইয়া দেখিল, এক স্থলকায় খান্দের বুদ্ধ তাহার দিকে চাহিয়া দূরে দাঁড়াইয়া আছে। তাহা দেখিয়া, সে ব্যস্ত হইয়া উঠিয়া, মস্তকের বস্ত্র টানিয়া দিল। বুদ্ধ কহিল, “তোমার কোন ভয় নাই মা,—আমি বৃদ্ধা মানুষ, পথ চলিতে-চলিতে তোমাকে একাকিনী দেখিয়া দাঁড়াইয়া আছি। এই নবীন বয়সে ভরা রূপের ডালি লইয়া একা কোণায় চলিয়াছ মা? তুমি গেরুয়া কাপড় পরিয়া আছ বটে, কিন্তু তুমি ত সন্ন্যাসিনী নহ; কারণ, তোমার সর্বাঙ্গ দিয়া ভোগের চিহ্ন ফুটিয়া বাহির হইতেছে। আমার বোধ হইতেছে যে, তুমি অল্পদিন গৃহত্যাগ করিয়া আসিয়াছ।”

মণিয়া কি উত্তর দিবে খুঁজিয়া পাইল না। তখন বৃদ্ধ কহিল “না, আমি বুড়া, তোমার পিতামহের বয়সী, আমার নিকটে লজ্জা করিও না। তোমার অঙ্গুলিতে যে হীরকের অঙ্গুরীয়ক রহিয়াছে, তাহার মূল্য হাজার টাকার কম নহে। তুমি ধনীর বধু;—যদি স্বামীর সহিত বিবাদ করিয়া চলিয়া আসিয়া থাক, তাহা হইলে চল, আমি তোমাকে স্বামি-গৃহে দিয়া আসি। আমার সঙ্গে গেলে কোন দোষ তোমাকে স্পর্শ করিবে না।” এইবার মণিয়া উত্তর দিতে বাধ্য হইল। সে অবনত মস্তকে ধীরে ধীরে কহিল, “আনার স্থানী নাই।” “তবে কি তুমি বিধবা?” “না, আমার বিবাহ হয় নাই।” “ভাল কথা। তবে চল, তোমাকে তোমার পিতৃগৃহে রাখিয়া আসি।”

মণিয়া বিষম বিপদে পড়িল। সে তখন ফরীদ খাঁর চিন্তায় বিভ্রত। ধনীর পুত্র ফরীদ খাঁ আশৈশব স্তখে লালিত,—একাকী তাহার জন্ম কোথায় চলিয়া গিয়াছে। একদণ্ড তাহার সংবাদ না পাইলে, তাহার পিতামাতা আকুল হইয়া উঠে। না জানি, আজি দিনান্তে তাহাদিগের অবস্থা কি হইবে। সে কেমন করিয়া ফরীদ খাঁকে বুঝাইয়া, শাস্ত করিয়া পিতৃগৃহে ফিরাইয়া লইয়া যাইবে, ইহাই তখন মণিয়ার একমাত্র ধ্যান হইয়াছিল। বৃদ্ধ বৈষ্ণবের কথা তখন তাহার ভাল লাগিতেছিল না।

বুড়া তাহার মনের ভাব বুঝিল; বুঝিয়া হাসিল। সে কহিল, “মা, বুড়ার কথাগুলি বড়ই তিক্ত লাগিতেছে, তাহা বুঝিতেছি; কিন্তু কি করিব মা, আমি তোমাকে এই জনশূন্য

পথে একাকিনী রাখিয়া যাইতে পারিব না। গোপাল যতক্ষণ তোমাকে সন্মতি না দেন, ততক্ষণ তোমার সঙ্গেই रहিলাম।” বৃদ্ধের শেষ কথা শুনিয়া সহসা মণিয়া বলিয়া উঠিল, “গোপাল কে?” বিস্মিত হইয়া বৃদ্ধ জিজ্ঞাসা করিল, “তুমি হিন্দুর মেয়ে,—অথচ, গোপালের নাম শুন নাই? আমি বাঙ্গালী, আমরা গোপাল বলিয়াই ডাকি। এ দেশেও তাঁহার গোপালজী নামের অভাব নাই। তুমি বোধ হয় পঞ্জাবী? মা, যিনি গোপাল, তিনিই গোবিন্দ, তিনিই শ্রীচন্দ্র তিনিই পাণ্ডুরঙ্গ, তিনিই পার্থ-সারথী।” মণিয়া লজ্জিতা হইল, কারণ, নামগুলি সমস্তই তাহার নিকট অপরিচিত। সে অধোবদনে কহিল, “বাবা, আমি হিন্দুর মেয়ে নহি, আমি মুসলমানী।” বৃদ্ধ বৈষ্ণব অত্যন্ত আশ্চর্য্যাবিত হইয়া জিজ্ঞাসা করিল, “তবে গেরুয়া পরিয়াছ কেন মা?” মণিয়া অধিকতর লজ্জিতা হইয়া কহিল, “আমি হিন্দু হইতে চাহি।” তাহার কথা শুনিয়া বৃদ্ধ হাসিয়া উঠিল। মণিয়া পুনরায় কহিল, “বাবা, আমি মুসলমানী, নর্ত্তকী। কত্কা নর্ত্তকী। বেস্তাবৃত্তি পরিত্যাগ করিব বলিয়াই সন্ন্যাসিনী সাজিয়াছি।” বৃদ্ধ জিজ্ঞাসা করিল, “ভাল কথা মা, ধর্ম্মপথ ত মুসলমানেরও আছে, তবে নিজধর্ম্ম পরিত্যাগ করিতে চাহ কেন? আমাদের শাস্ত্রে বলে যে, নিজধর্ম্মে মৃত্যু পর্য্যন্ত বাঞ্ছনীয়। যিনি গোপাল, তিনিই পরমেশ্বর, তিনিই আল্লা। নামের ভেদ ও উপাসনার আকার-ভেদে কিছুই আসে যায় না। দেখ মা, আমি বুড়া হইয়াছি, সমস্ত দাঁতগুলি পড়িয়া গিয়াছে, চোখেও

ভাল দেখিতে পাই না। তবে এই জগতে বহুদিন বাস করিতেছি; অনেক ঠেকিয়া শিথিতে হইয়াছে। সুতরাং সকল জিনিস দেখিতে না পাইলেও, অল্পতবে বুঝিতে পারি। মা, আমার নিকট আত্মগোপন করিতেছ কেন? শুকতর কারণ না থাকিলে, লোকে স্বধর্ম পরিত্যাগ করে না।”

বুড়ার কথা শুনিয়া মণিয়ার মন গলিয়া গেল। সে কাঁদিয়া ফেলিল। বৃদ্ধ তাহা দেখিয়া সম্মুখে কহিল, “কাঁদ মা, প্রাণ ভরিয়া মন ভরিয়া কাঁদ,—প্রাণের ব্যথা আর মনের মলা অশ্রুজল ভিন্ন যায় না।” তখন রোদ্র উঠিয়াছে। বৃদ্ধ মণিয়ার নিকটে আসিয়া বসিল; এবং তাহার শীর্ণ হস্ত মণিয়ার মস্তকে ও সর্কাজে বুলাইতে লাগিল। অনেকক্ষণ ধরিয়া কাঁদিয়া মণিয়া যখন শান্ত হইল, তখন বৃদ্ধ একে-একে মণিয়ার মনের সকল কথাই টানিয়া বাহির করিয়া লইল। সমস্ত শুনিয়া বুড়া কহিল, “মা, তোমার লম্বা বড়ই জটিল। আমি কি বলিব বল? চক্রী ভিন্ন এ চক্রান্ত ভেদ করা অসম্ভব।”

মণিয়াকে শান্ত করিয়া, বুড়া ঘটিতে দড়ি বাঁধিয়া কূপ হইতে জল উঠাইল; এবং নিজে হাত মুখ ধুইয়া মণিয়াকে জল তুলিয়া দিল। তখন বুড়া মন্দিরের দুয়ারে বসিয়া কণ্ঠলগ্ন একটি রূপার কোটা বাহির করিল; এবং তাহা হইতে একটি ফটিকের গোপাল-মূর্তি বাহির করিয়া পূজা করিতে আরম্ভ করিল। পূজা শেষ হইলে, বুড়া আপন মনে বকিতে আরম্ভ করিল। মণিয়া একমনে তাহার কথা শুনিতে লাগিল। বুড়া গোপালকে

শাসাইয়া কহিল, “বাপু হে, তোমার নাতি আর পারিয়া উঠা যায় না। শেষটা তোমাকে মারিতে পাবে দেখিতেছি। পৃথিবীর যত নষ্টের মূল তুমি। ইহাকে যত্ন দিয়া তোমার কি সুখ হইতেছে? আশুতকাল তুমি সোজা পথে চলিতে শিখিলে না। এখন ইহার একটা উপায় কর। ববনী বেঙ্গাকন্ঠকে কোনও সম্ভ্রান্ত হিন্দু বিবাহ করিবে না, এ কথা কি তুমি জান না?” মণিয়া পাশে দাঁড়াইয়া তন্ময় হইয়া বৃদ্ধের কথা শুনিতেছিল। তাহার কথা শেষ হইলে সে সাগ্রহে জিজ্ঞাসা করিল, “বাবা, গোপাল কি বলিলেন?” বৃদ্ধ উত্তর না দিয়া, বিগ্রহটিকে রূপার কোটার তুলিল; এবং তাহার কণ্ঠে ঝুলাইয়া কহিল, “মা, গোপাল বড় কিছু বলিল না; এইমাত্র জানাইল যে, তুমি কাল হইতে উপবাসী আছ; কিছু আহার কর।” মণিয়া কহিল, “এখানে কোথায় কি পাইব? কোন একটা গ্রাম পাইলে কিছু কিনিয়া খাইব।” “গ্রাম এখনও অনেক দূরে। উপস্থিত গোপালের প্রসাদ খাও।” বৃদ্ধ বস্ত্রমধ্যে হইতে দুই মুষ্টি চূর্ণ বাহির করিল; এবং এক মুষ্টি অশ্বখ-পত্রের মণিয়াকে দিয়া, স্বয়ং আহার করিতে আরম্ভ করিল। আহারান্তে বৃদ্ধ কহিল, “মা, তোমার এখন পূর্বদেশে বাইতে ইচ্ছা করিতেছে—না?” মণিয়া কহিল, “হাঁ।” “মনের বেগ কি কোন মতে দমন করিতে পারিবে না?” “উপস্থিত পারিতেছি না বাবা।” “পারিবে কেমন করিয়া মা? আমরা বলি বটে আমি করি, তুমি কর, কিন্তু প্রকৃতপক্ষে গোপাল যাহা

করান, তাহাই করি। উপস্থিত তুমি পূর্বদিকে গেলে, তোমার প্রিয়জনের অমঙ্গল সম্ভাবনা। কিন্তু যিনি তাহাকে তোমার প্রিয় করিয়াছেন, তিনিই যখন তাহার অমঙ্গল ঘটাইতে চাহেন, তখন নিবারণ করিবে কে? বেলা বাড়িয়া উঠিল,—চল গ্রামের সন্ধানে যাই।”

উভয়ে মন্দির পরিত্যাগ করিয়া গ্রামের সন্ধানে চলিল। তখন করীদ খা দ্রুতগামী অশ্বে আরোহণ করিয়া প্রয়াগ যাত্রা করিয়াছে।

বস্তুতম পরিচ্ছেদ

আপন্ন রক্ষণ

রাত্রি শেষে হরিনারায়ণকে লইয়া যখন অসীম ও সুদর্শন গৃহে ফিরিয়া আসিলেন, তখন ঝড়-বৃষ্টি থামিয়া গিয়াছে,— আকাশ পরিষ্কার হইয়া আসিয়াছে। হরিনারায়ণ আসিয়া দেখিলেন যে, ত্রিবিক্রম বিশ্বনাথের চণ্ডীমণ্ডপে বসিয়া এক প্রৌঢ়ের সহিত কথা কহিতেছেন। সতী আসিয়া দুর্গা ও সুদর্শনের পত্নীকে অন্তঃপুরে লইয়া গেলে, সকলে বস্ত্র পরিবর্তন করিয়া ত্রিবিক্রমের নিকটে বসিলেন। প্রৌঢ় বলিতেছিল, “আর কি তেমন পয়সার জোর আছে? বাপ-পিতামহের আমলে বাহা ছিল, তাহার দশ ভাগের এক ভাগও নাই। আর

পরসা থাকিলেই বা কি হইত ঠাকুর! গ্রামে আমাদের পর্যায়ে পাত্র নাই; সুতরাং আমার আর উপায় নাই। বাগদত্তা কন্ডার বিবাহ হইল না—এ কথা শুনিলে কোন কুলীন-সন্তান আমার মেয়েকে বিবাহ করিতে আসিবে? তাহার উপর অলক্ষণা নাম শুনিলে সকলেই পিছাইয়া যাইবে।” প্রোঢ় একমনে কথা কহিয়া যাইতেছিল। ত্রিবিক্রম উত্তর না দিয়া মন্দ-মন্দ হাসিতেছিলেন। বিশ্বনাথ তাহা দেখিয়া জামাতাকে জিজ্ঞাসা করিলেন, “বাপু, হাসিতেছ কেন?” ত্রিবিক্রম কহিলেন, “অদৃষ্ট-চক্রের অদ্ভুত পরিবর্তন দেখিয়া।”

প্রোঢ়। ঠাকুর, শৈল যেদিন ডুবিয়া গিয়াছিল, সেদিনও আপনি অনেক কথা বলিয়াছিলেন। তখন বুঝিতে পারি নাই যে, শৈল হইতে আমার এমন দুরবস্থা হইবে। এখন জাতি যায়, তাহার উপায় কি?

ত্রিবিক্রম। মিত্রজ্ঞা, তোমার জাতি যাইবে না।

বিশ্বনাথ। উপস্থিত রাত্রি পোহাইলেই যে জাতি যাইবে?

ত্রিবি। যাইবে না।

অসীম। কি করিলে আপনার জাতি রক্ষা হয়?

বিশ্ব। অল্প রাত্রিতে যদি অপর পাত্র পাওয়া যায়, তাহা হইলে জাতি রক্ষা হইতে পারে। কি বল সর্বেশ্বর?

সর্বেশ্বর। সমাজের কথা ত দাদা সমস্তই আপনার জ্ঞান আছে। এ বিষয়ে ব্রাহ্মণ-কায়স্থের সমাজ সমান।

অসীম। যদি আজ রাত্রিতে বিবাহ না হয়, তাহা হইলে কি আপনার কন্যার আর বিবাহ হইবে না ?

ত্রিবি। তৃতীয় প্রহরে যে দ্বিতীয় লগ্নটা ছিল, তাহাও অতীত হইয়াছে। তবে বিধির বিধান—কাল গোষ্ঠলি লগ্নে বিবাহের যোগ আছে।

অসীম। মিত্র মহাশয়ের যদি আপত্তি না থাকে, তাহা হইলে আমি তাঁহার কন্যাকে বিবাহ করিতে প্রস্তুত আছি।

সর্ষে। আপনি, তুমি—?

ত্রিবি। ইনি কানুনগোই হরনারায়ণ রায়ের ভ্রাতা, ভূতপূর্ব কানুনগোই জয়নারায়ণ রায়ের পুত্র অসীমচন্দ্র রায় !

সর্ষে। বাবা, তুমি আমার স্বঘর। তোমার পিতামহ শ্রীনারায়ণ রায় আমাদের বংশে কন্যাদান করিয়াছিলেন।

বৃদ্ধ উঠিয়া উভয় হস্তে অসীমের হস্ত আকর্ষণ করিয়া ধরিল ; এবং উচ্চৈঃস্বরে রোদন করিতে-করিতে কহিল, “বাপু, তুমি ভিন্ন আমার উপায় নাই। তুমি আমার অগতির গতি।” এই সময়ে ত্রিবিক্রম পুনরায় হাসিয়া উঠিলেন। তাহা দেখিয়া বিশ্বনাথ ও হরিনারায়ণ জিজ্ঞাসা করিলেন, “হাসিলে কেন ?” ত্রিবিক্রম কহিলেন, “সে কথা পরে জানাইব।” হরিনারায়ণ তখন অসীমকে কহিলেন, “দেখ, মিত্র মহাশয়ের এখন বড় বিপদ। বিপন্ন ব্যক্তিকে রক্ষা করাই মহতের কর্ত্তব্য। তুমি মহৎ বংশজাত, সুতরাং তোমার উপযুক্ত কথা হইয়াছে। নারায়ণ বোধ হয় মিত্র মহাশয়কে উদ্ধার করিবার জন্য আমাদের অগ্নি রাত্রিতে

এখানে আনিয়াছেন।” হৃদর্শন এই সময়ে উৎসাহে বলিয়া উঠিল, “তবে বিবাহ ঠিক!” সর্কেশ্বর কহিলেন, “ঠাকুর, আমার আর অন্য গতি নাই।” “তবে কন্যা দেখিতে হয়।” ত্রিবিক্রম কহিলেন, “কন্যা পূর্বেই দেখিয়াছি।” হরিনারায়ণ কহিলেন, “বথারীতি আশীর্বাদ ও আত্মদায়ক করিতে হইবে।” ভূপেন্দ্রকে বা মুরশিদাবাদে সংবাদ দিবার উপায় নাই। অসীম, সমস্তই তোমাকে একা করিতে হইবে।” সর্কেশ্বর সানন্দে কহিলেন, “তবে আমি সংবাদটা বাড়ীতে দিয়া আসি?” হরিনারায়ণ কহিলেন, “বাও।” সর্কেশ্বর প্রস্থান করিলে, ত্রিবিক্রম অসীমকে জিজ্ঞাসা করিলেন, “রায়জী, কোন কথা স্মরণ হয়?” অসীম বিস্মিত হইয়া কহিলেন, “কৈ, কিছুই নয়।” “না হইবারই কথা।” “আপনি কি বলিতেছেন, কিছুই বৃষ্টিতে পারিলাম না” “বৃষ্টিতে পারিবে,—ঠিক এখনটা পারিবে না,—ক্রমে সকল কথাই মনে হইবে।”

এই সময়ে কাক ডাকিয়া উঠিল। তাহা শুনিয়া হরিনারায়ণ ও বিশ্বনাথ গায়েখান করিলেন। বিহ্বলকার বিদ্রূপ করিয়া কহিলেন, “কি হে, শঙ্কর-বাড়ী আসিয়াছে বলিয়া কি নিত্য-কর্ম ভুলিয়া পেলেন?” ত্রিবিক্রম হাসিয়া কহিলেন, “নিত্য-কর্মের পূর্বে একটা নূতন কর্ম আছে। তুমি গঙ্গাতীরে বাও, আমি আসিতেছি।” ত্রিবিক্রম উঠিলে বিশ্বনাথ জিজ্ঞাসা করিলেন, “বাপু, পথ চিনিতে পারিবে ত?” ত্রিবিক্রম হাসিয়া কহিলেন, “বিবাহের পূর্বে বহুবার গ্রামের পথে পথে ভিক্ষা

ফিরিয়া গিয়াছি।” হরিনারায়ণ ও বিশ্বনাথ বাহির হইয়া গেলে ত্রিবিক্রম অন্য পথে স্বত্ত্বরালয় ত্যাগ করিলেন। তখন পূর্বদিকে আলোক দেখা দিয়াছে বটে; কিন্তু অন্ধকার দূর হয় নাই। গ্রামের সীমায় ত্রিবিক্রম থমকিয়া দাঁড়াইলেন। পশ্চাতে পদশব্দ শ্রুত হইল। তিনি ফিরিয়া দেখিলেন, এক রমণী তাহার অনুসরণ করিতেছে। রমণী কাছে আসিলে, তিনি তাহাকে জিজ্ঞাসা করিলেন, “তুমি আসিলে কেন? ভয় নাই, আমি পলাইব না। যদি পলাইবার ইচ্ছা থাকিত, তাহা হইলে স্বেচ্ছায় আসিয়া ধরা দিতাম না।” রমণী সতী। সে কহিল, “আমি আপনাকে ধরিয়া রাখিতে আসি নাই। আপনি যেখানে যাইতেছেন, আমাকেও সেখানে যাইতে হইবে।” বিস্মিত হইয়া ত্রিবিক্রম পত্নীকে জিজ্ঞাসা করিলেন, “তোনাকেও যাইতে হইবে? কেন যাইতে হইবে?” “তাহা বলিতে পারি না।” “তোমাকে কে বলিল?” “যে বলো।” “সে কে সতী?” “তাহা ত বলিতে পারি না—সে কোথা হইতে কোন্ দিক দিয়া বলিয়া যায়, তাহাও আমি বলিতে পারি না।”

একষষ্টিতম পরিচ্ছেদ

হরিদাস বাবাজী

প্রভাতে সর্বেশ্বর মন্দিরের গৃহের সম্মুখে পুনরায় নববৎ

বাজিয়া উঠিল। লোকজন আসিয়া নহবৎখানার বাঁশগুলি উঠাইয়া ফেলিল। ঝড়ে যে গাছ পড়িয়াছিল, তাহা কাটিয়া পরিষ্কার করিয়া ফেলিল। দেখিতে দেখিতে মিউগৃহের ক্রীড়িয়া গেল। তখন বিশ্বনাথের গৃহে হরিনারায়ণ স্বয়ং পুরোহিত সাজিয়া আভ্যদয়িকের আয়োজন করিতেছেন। স্বদর্শন তাহার সহকারী; সুতরাং দায়ে পড়িয়া ত্রিবিক্রম বরকর্তা হইয়াছেন।

পল্লীগ্রাম,—দুইশত বৎসর পূর্বের কথা সুতরাং অজস্র অর্থ ব্যয় করিয়াও বরকর্তা বরের মর্যাদা অহুযায়ী বসনভূষণ পাইলেন না। তাহা দেখিয়া হরিনারায়ণ অতিশয় ক্ষুব্ধ হইলেন। বাল্যবন্ধুকে ক্ষুদ্র দেখিয়া ত্রিবিক্রম চিন্তিত হইলেন। এই সময়ে সতী বিষণ্ণবদনে তাঁহার নিকটে আসিয়া দাঁড়াইল। তাহাকে দেখিয়া ত্রিবিক্রম জিজ্ঞাসা করিলেন, “মুখ ভার কেন সতী?” সতী উত্তর না দিয়া কাঁদিয়া ফেলিল। সকলের সম্মুখে কন্ডাকে কাঁদিতে দেখিয়া, বিশ্বনাথ সাগ্রহে জিজ্ঞাসা করিলেন, “কি হইয়াছে মা, কাঁদ কেন মা?” সকলে মিলিয়া সতীকে শাস্ত করিলেন। সে কহিল, “গ্রামের লোক বলিয়াছে,—উনি আমার স্বামী নহেন,—মিথ্যাবাদী জুয়াচোর। তাহারা বাবাকে সমাজে ঠেলিয়া রাখিবে।” বিশ্বনাথ কন্ডার কথা শুনিয়া কহিলেন, “কথাটা আমারও মনে হইয়াছিল বটে, কিন্তু বিবাহের সাক্ষী-সাবুদ সমস্তই উপস্থিত আছে। যে সময়ে সতীর বিবাহ হয়, সেই সময়ে যজ্ঞেশ্বর চট্টোপাধ্যায় দায় উদ্ধারের

চেঁটায় ছিল। পারে নাই বলিয়া, সেই অবধি আমার উপর রাগিয়া আছে। তাহার অল্প চিন্তা করিও না মা,—জামাই যখন ঘরে লইয়াছি, তখন ত ঠেলিতে পারিব না! তুমি নিশ্চিন্ত মনে বেড়াও।”

শিতার নিকট আসিয়া পাইয়া সতী প্রফুল্ল হইল। তখন ত্রিবিক্রম তাহাকে কহিলেন, “পিছনের শিবমন্দিরে একটা তাম্রকুণ্ডে গঙ্গাজল লইয়া যাও, আমি আসিতেছি।” হরিনারায়ণ জিজ্ঞাসা করিলেন, “কি হে, কোথা যাও?” “বরভরণ আনিতে।” “শিবমন্দিরে কি বরভরণ মিলিবে? এ কি শিবের বিবাহ, যে শুষ্ক বিষপত্র দিয়া বর নাজাইব?” “হিসাবনিকাশ পরে দিব ভাই,—তুমি প্রাচীরে মস্ত পড়, আমি দুই দণ্ডের মধ্যেই ফিরিব।”

ত্রিবিক্রম মন্দিরে প্রবেশ করিয়া দেখিলেন যে, সতী পূজার আয়োজন করিয়া এক পার্শ্বে দাঁড়াইয়া আছে। তিনি তাহা দেখিয়া কহিলেন, “সতী, পূজার সময় এখনও হয় নাই। তুমি কি শুচি হইয়া আসিয়াছ?” সতী মন্তক চালনা করিয়া সম্মতি জানাইল। ত্রিবিক্রম কহিলেন, “তুমি এই আসনে বসিয়া তাম্রকুণ্ডের জলের দিকে চাহিয়া থাক।” সতী জিজ্ঞাসা করিল, “আপনি বসিবেন না?” “আমি এই কুশাসনে বসিতেছি।” মন্দিরের দ্বার রুদ্ধ করিয়া দিয়া, পতি-পত্নী আসন গ্রহণ করিলেন। সহসা ত্রিবিক্রম তাম্রকুণ্ডের জলে ফুৎকার দিলেন। দিবামাত্র জলে আগুন লাগিয়া গেল। সতী শিহরিয়া উঠিল। তখন

ত্রিবিক্রম সতীর ললাট স্পর্শ করিলেন। অর্জুদণ্ড কাটিয়া গেল,—
ক্রমে ধূমে মন্দির পরিপূর্ণ হইল।

ত্রিবিক্রম জিজ্ঞাসা করিলেন, “সতী, দেখিতেছ?”
সতী কহিল, “তায়কুণ্ডে আগুন জ্বলিতেছে তাহার মধ্যে
একটা ছবি। না, বন, নিবিড় বন। বনের মধ্যে একটা সরু
পথ। সেই পথ দিয়া একটা লোক চলিতেছে। লোকটা
ভয়ানক কাল, বিস্মী, বদাকাব। পরণে রক্ত-বস্ত্র। লোকটা
ফিরিল। সে কালীপ্রসাদ। সে উপরের দিকে চাহিয়া আছে।”

ত্রিবিক্রম কহিলেন, “সতী, তুমি কালীপ্রসাদের নিকটে
যাও।” উত্তর হইল, “আমার যে ভয় করে!” “তুমি জান,
তুমি কে?” “জানি, আমি তোমার স্ত্রী, আমি সতী।”
“আর কি?” “আমি শক্তি।” “তবে তোমার ভয় কি?”
“কিছু না।” “তুমি কালীপ্রসাদের নিকটে যাও।” “গিয়াছি।
কি বলিব?” “বল যে, আমার কতকগুলো অলঙ্কারের
প্রয়োজন। মাতার ভাণ্ডারে আমার যে অলঙ্কার আছে,
তাহাই আনিতে বল।” “কালীপ্রসাদ জিজ্ঞাসা করিতেছে যে,
অলঙ্কার লইয়া কোথায় বাইবে?” “তাহাকে বল, সন্ধ্যার
পূর্বে এই গ্রামে বিষ্ণুনাথ চক্রবর্তীর গৃহে, পৌছাইয়া দিবে।”
“বলিয়াছি। এখন কি করিব?” “কিরিয়া এস। সতী,
কি দেখিতেছ?” “কালীপ্রসাদ বনপথ ধরিয়া চলিয়াছে।
বনের মধ্যে একটা ভাঙ্গা মন্দির। তাহার সম্মুখে একটা মরা
পড়িয়া আছে,—দুইটা শিয়াল বসিয়া আছে। কালীপ্রসাদ

মন্দিরে প্রবেশ করিল। একটা জবাফুল মরার উপরে ফেলিয়া দিল। কালীপ্রসাদ মরার উপর বসিল। শিয়াল দুইটা বসিয়া আছে।”

“সতী, মন্দিরের ভিতর দেখ।” “দেখিতেছি।” “কি দেখিতেছ?” “পাষণময়ী প্রতিমা।” “কি প্রতিমা?” “বুঝিতে পারিতেছি না,—বড় অদ্ভকার।” “সতী, অদ্ভকার দূর কর।” “কেমন করিয়া করিব,—আমি ত জানি না।” “ভাল করিয়া চাহিয়া দেখ।” “দেখিতেছি।” “কি দেখিতেছ?” “মন্দিরে নীল আলো জলিতেছে,—ভিতরে সিংহবাহিনী পার্শ্বতী।” “প্রতিমার মুখ দেখ।” “দেখিতেছি,—মা হাসিতেছেন।” ত্রিবিক্রমের মুখ বিষন্ন হইল। তিনি পুনরায় তাম্রকুণ্ডের জলে স্নান করিলেন। আশুপ্ত নিবিয়া গেল,—মুহূর্তের মধ্যে ধূম লুকাইয়া গেল। সতী চক্ষু মেলিয়া জিজ্ঞাসা করিল, “আমি কি করিতেছি?” ত্রিবিক্রম কহিলেন, “কিছু না,—চল, গৃহে ফিরিয়া বাই।”

সতী মন্দিরের দুয়ার পুলিয়া বাহির হইয়া দেখিল, এক দম্ভহীন, পলিত-কেশ বৃদ্ধ বৈষ্ণব একটা অপূর্ণ রূপবতী তরুণী বৈষ্ণবীর হাত ধরিয়া দাঁড়াইয়া আছে। তাহাদিগকে দেখিয়া ত্রিবিক্রম হাসিলেন। সতী জিজ্ঞাসা করিল, “আপনি হাসিলেন কেন?” ত্রিবিক্রম কহিলেন, “নিয়তি। সমস্ত কথা এখন বুঝিতে পারিবে না, পরে বুঝাইয়া বলিব।” এই সময়ে বৃদ্ধ বৈষ্ণবীকে কহিল, “না বৃদ্ধা শরীর। কাল ইহার উপর দিয়া

অনেক বক্তাবাত বহিয়া গিয়াছে। দুইটা দিন না জিরাইলে, আর চলিতে পারিব না।” বুড়া মন্দিরের সম্মুখে বসিল। বৈষ্ণবী সহসা পশ্চাদিকে চাহিয়া দেখিল, ত্রিবিক্রম ও সতী দাঁড়াইয়া আছে। তাহাকে পশ্চাদিকে ঘুরিয়া দিতে দেখিয়া বুড়াও ফিরিয়া চাহিল। সে ত্রিবিক্রমকে দেখিয়া জিজ্ঞাসা করিল, “ঠাকুর, বড়ই বুড়া হইয়াছি উঠিয়া প্রণাম করিতে পারিব না। অপরাধ লইবেন না। কাল রাজিতে বড় কষ্ট গিয়াছে। দুইটা দিন না জিরাইলে, পথ চলিতে পারিব না। গ্রামে কি বৈষ্ণবের বাস আছে?” তখন রৌদ্র প্রখর হইয়া উঠিয়াছে। আশ্রয়হীন বৃদ্ধকে দেখিয়া সতীর মনে দয়া হইল। সে কহিল, “বৈষ্ণবের বাস নাই বাবা! তুমি আমার সঙ্গে এস,—আমাদের বাড়ীতে থাকিবে।” বৃদ্ধ কহিল, “তুমি কে না! অন্নপূর্ণা আমার,—বুড়া সন্তানের কষ্ট দেখিয়া গলিয়া গিয়াছ?” বৃদ্ধ যত্নিতে ভর দিয়া উঠিয়া কিরিয়া দাঁড়াইল। ত্রিবিক্রম তখন মন্দ মন্দ হাসিতেছেন। তাহাকে দেখিয়া বৃদ্ধ শিহরিয়া উঠিল, এবং দক্ষিণ হস্তে চক্ষু মুছিয়া কহিল, “একি, আমি কি স্বপ্ন দেখিতেছি! ঠাকুর, বুড়া হইয়াছি, চোখে দেখিতে পাই না,—ছলনা করিও না, তুমি কি সেই?” ত্রিবিক্রম হাসিয়া কহিলেন, “হরিনাস, আমি সেই, আমি সেই বটে! তোমার চক্ষু তোমাকে প্রতারণা করে নাই।” সহসা বৃদ্ধ মন্দিরের উপরে উঠিয়া ত্রিবিক্রমের পদতলে লুটাইয়া পড়িল; এবং কহিল, “ঠাকুর, বৃদ্ধ বয়সে বড় বিষম সমস্ত্য পড়িয়াছি,—

উদ্ধার কর ঠাকুর।” ত্রিবিক্রম বৃদ্ধের হাত ধরিয়া উঠাইয়া কহিলেন, “হরিদাস, সমস্তা যিনি সৃষ্টি করেন তিনিই পূরণ করেন—তুমি আমি তাঁহার হাতে খেলার পুতুল মাত্র।” হরিদাস কহিল, “ঠাকুর, বুড়া বয়সে বিদেশে পথে গোপাল এই যুবতী কন্যা গলায় বুলাইয়া গিয়াছে,—ইহাকে লইয়া কি করিব ঠাকুর? আমি ধর্ম-কর্ম সকল ভুলিয়াছি,—সত্তর বৎসর বয়সে আবার ঘোর সংসারী হইয়াছি,—এ কি ধাঁধায় ফেলিলে ঠাকুর?” “গোপালের কন্যা গোপাল দেখিতেছেন,—তুমি কেবল নিমিত্তের ভাগী। বুড়া হইয়া কি এতদিনের শিক্ষা-দীক্ষা সব ভুলিয়া গেলে হরিদাস?” “ভুলিয়া গেলাম বৈ কি ঠাকুর! এখন গোপালের চিন্তা, পরলোকের চিন্তা ভুলিয়া, উহাকে কি খাওয়াইব,—উহাকে কোথায় শোয়াইব,—উহাকে কেমন করিয়া রক্ষা করিব,—এই চিন্তাই পরম চিন্তা।” “বৈষ্ণবী মায়া, হরিদাস! এতদিন বিষ্ণুসেবা করিয়াও কি তাহা বুঝিলে না? গোপাল সেবক দিয়া ভক্ত উদ্ধার করিতেছেন। কন্যা ভক্তিমতী—তোমার উপযুক্তা কন্যা হইবে। চিন্তা করিও না হরিদাস, গোপাল ছলনা করিতেছেন।” “ঠাকুর, তোমার মত মনের জোর আমার ত নাই,—আমি যে দীনহীন বৈষ্ণব?” “তোমার শক্তি নাই! হরিদাস, সোণার গাঁয়ের মহামারীর বৎসর,—মনে হয়?”

বৃদ্ধ লজ্জায় অধোবদন হইল। তখন সতী ত্রিবিক্রমকে কহিল, “আর রোদ্রে দাঁড়াইয়া থাকিয়া কাজ নাই,—ছেলেকে

লইয়া ঘরে বাই।” হরিদাস জিজ্ঞাসা করিল, “ইনি কি—”
 ত্রিবিক্রম কহিলেন, “ইনি আমার স্ত্রী।” হরিদাস অত্যন্ত
 আশ্চর্য হইয়া জিজ্ঞাসা করিল, “স্ত্রী! এ আবার কি ছলনা
 ঠাকুর! আপনার স্ত্রী!” “চক্রীর চক্রান্ত কে ভেদ করিতে পারে
 হরিদাস?” “ঠাকুর, আবার সংসার?” “মহামায়ার আদেশ,
 —নিয়তি কাহার বাধ্য?”

বুদ্ধ কিয়ৎক্ষণ নীরবে দাঁড়াইয়া থাকিয়া সতীর অনুসরণ
 করিল। ত্রিবিক্রম মন্দির ত্যাগ করিয়া সর্কেশ্বর মিত্রের গৃহে
 প্রবেশ করিলেন।

বিশ্বনাথ চক্রবর্তীর চণ্ডীমণ্ডপে হরিনারায়ণ মন্ত্রপাঠ করাইতে-
 ছেন, অসীম আবৃত্তি করিতেছে। সহসা হরিনারায়ণের কণ্ঠ
 রুদ্ধ হইল,—সুদর্শন ও দুর্গা স্তম্ভিত হইয়া গেলেন। বুদ্ধ বিশ্বনাথ
 আকস্মিক বিপত্তির কারণ বুঝিতে না পারিয়া চারিদিকে চাহিতে
 লাগিলেন। অসীমের হস্তে পিণ্ড অর্দ্ধপথে রহিয়া গেল, হরি-
 নারায়ণের হস্ত হইতে তালপত্রের পুঁথি ভূমিতে পড়িয়া গেল।
 সুদর্শনের মুখে অক্ষুট আর্তনাদ ধ্বনিত হইল। সেই সময়ে
 বুদ্ধ বৈষ্ণবের হস্ত ধারণ করিয়া সতী পিতৃগৃহে প্রবেশ করিল।
 তাহাদিগের পশ্চাতে বৈষ্ণবের তরুণী কন্যাও অন্ধনে প্রবেশ
 করিল। সেই সময়ে মনের অজ্ঞাতসারে অসীম ডাকিলেন
 “গণিয়া!”

দ্বিষষ্ঠিতম পরিচ্ছেদ

দূত প্রেরণ

মধ্যাহ্ন-ভোজন সমাপন করিয়া ক্ষুদ্রকায় হরনারায়ণ রায় একখানা বৃহৎ পালঙ্কের এককোণে আত্মহারা হইয়া যুগপৎ ধূমপান ও নিদ্রাসুখ লাভের চেষ্টা করিতেছিলেন। সহসা গুরুকায় গৃহিণীর গুরুভার-বাহক পদদ্বয়ের শব্দে তাঁহার নৈত্র্যদ্বয় উন্মালিত হইল। গৃহিণী কক্ষে প্রবেশ করিয়া জিজ্ঞাসা করিলেন, “ওগো, ঘুমাইলে নাকি?” হরনারায়ণ কহিলেন, “কেন?” “আর একটা নূতন খবর; সরস্বতী ফিরিয়াছে।” “আর নবীন?” “তাহার কোন সংবাদ নাই।” “বলে কি?” “অনেক রকমই বলে—কতটা সাজা, কতটা ঝুটা, জহরী ভিন্ন চিনিবার উপায় নাই। ডাকিয়া আনিব নাকি?”

হরনারায়ণ সম্মতি জ্ঞাপন করিলেন। মুহূর্ত্ত মধ্যে সরস্বতী আসিয়া প্রণাম করিল এবং নানাছন্দে বিনাইয়া নবীনের বিশ্বাস-ধাতকতার কথা জানাইল। নবীন যে কোথায় গেল, এবং দুর্গা ঠাকুরাণী কোথায় গেলেন, সে সংবাদ সে দিতে পারিল না। তখন হরনারায়ণ জিজ্ঞাসা করিলেন, “সরস্বতী, নূতন খবর শুনিয়াছ?” সরস্বতী অতি বিনীত ভাবে কহিল, “না হজুর এই মাত্র দেশে আসিয়াছি।” “তোমাদের ছোটরায়ের যে বিবাহ; বরকর্ত্তা ভট্টাচার্য—তোমাদের বিজ্ঞানকার ঠাকুর।” সরস্বতী কহিল, “বটে?” ধূর্ত্তা বৈষ্ণবী নিজের অতিমত ব্যক্ত করিল না।

দেখিয়া হরনারায়ণ অয়ঃ প্রস্তাব করিতে বাধ্য হইলেন। তিনি কহিলেন, “দেখ সরস্বতী, মেয়ে আর বৌ যদি এতদিন ডাকাতের হাতে থাকিত, তাহা হইলে হরিনারায়ণ বিছালকার যত বড়ই পণ্ডিত লোক হউক না কেন, নিশ্চিন্ত মনে স্ত্রীর মোহনায় বসিয়া অসীমের বিবাহের ব্যবস্থা করিতে পারিত না। যেমন করিয়া হউক দুর্গা আর স্তুদর্শনের বৌ নবীনের হাতছাড়া হইয়া তাহার নিকট পৌঁছিয়াছে। আর না হয় নবীন টাকা খাইয়া তাহাদের সঙ্গে ভিড়িয়াছে। সরস্বতী, তুমি একবার সংবাদটা আনিতে পার?” সরস্বতী বৈষ্ণবী জীবন-সংগ্রামে অভিজ্ঞতা লাভ করিয়া দূরদর্শিনী হইয়াছিল; সে হরনারায়ণের প্রাণে বহুদূর হইতে টাকার গন্ধ পাইল এবং তৎক্ষণাৎ সাবধান হইয়া গেল। সে কহিল “হজুর, বড় কষ্টের পথ, আমরা দুঃখী মানুষ, তাই সহ্য করিতে পারি। আর যে রকম দেশকাল পড়িয়াছে, থরচে কুলায় না।” রাজনীতিজ্ঞ হরনারায়ণ বুঝিলেন যে সরস্বতী অর্থের কথা বলিতেছে। তিনি তৎক্ষণাৎ বলিয়া উঠিলেন, “সেজন্য চিন্তা করিও না বৈষ্ণবী, ঋচপত্র ঘাড়া লাগে, সমস্তই আমার; আর ঠিক খবর আনিবার বক্শিশ নগদ একশত টাকা।” টাকার কথা শুনিয়া সরস্বতীর প্রেমশূন্য শুষ্ক হৃদয় তৎক্ষণাৎ বিগলিত হইল। সে কহিল, “হজুরের হুকুম কি ঠেলিতে পারি? কবে বাইতে হইবে?” “আজিকার দিনটা কাটাইয়া কাল সকালে একখানা ছোট পানসী লইয়া রওনা হইবে। গহনার নৌকায় গেলে অনেকদিন লাগিবে।” সরস্বতী হুকুম

পাইয়া উঠিল। গৃহিণী টাকা দিবার জন্ত তাহার সহিত কক্ষের বাহিরে আসিলেন।

কক্ষের বাহিরে আসিয়া গৃহিণী বৈষ্ণবীকে তাঁহার অল্পসরণ করিতে ইঙ্গিত করিলেন। বৃহৎ অটালিকা পদভরে কম্পিত করিয়া রায়-গৃহিণী দুই তিনটা বড় দালান পার হইয়া গেলেন ; সরস্বতীও ছায়ার স্রায় তাঁহার পশ্চাৎ পশ্চাৎ চলিল। গৃহিণী অবশেষে অটালিকার আর এক প্রান্তে একটি ক্ষুদ্র কক্ষে প্রবেশ করিয়া সরস্বতীকে ইঙ্গিতে ডাকিলেন। বৈষ্ণবী তখন দুয়ারে দাঁড়াইয়াই ইতস্ততঃ করিতেছিল, কারণ গৃহিণীর কলেবর সে ক্ষুদ্র গৃহ পরিপূর্ণ করিয়া ফেলিয়াছিল এবং তাহাতে আর একজন মনুষ্যের স্থান সঙ্কুলান হইবে কি না, সরস্বতী তাহা স্থির করিতে পারিতেছিল না। গৃহিণী আদেশ করিলে সরস্বতী গৃহে প্রবেশ করিতে বাধ্য হইল। সে প্রবেশ করিলে গৃহিণী দ্বার রুদ্ধ করিয়া দিলেন। হরনারায়ণের পত্নী তাঁহার অজ্ঞপ্তবৎ দক্ষিণ হস্তখানি ক্ষুদ্রকায়া বৈষ্ণবীর স্বক্ষে লুপ্ত করিয়া কহিলেন, “দেখ্ বৈষ্ণবী দিদি, আমার একটা উপকার করিবি?” সরস্বতী রায়-গৃহিণীর হস্তের গুরুভার এবং বিনয়ে, যথোচিত অবনত হইয়া কহিল, “সে কি মা, উপকার করিব কি মা, আমি আপনার নিম্নকের চাকর, আপনার খাইয়া মাতুষ—” রায়-গৃহিণী বাক্য-বুদ্ধে নূতন নহেন ; তিনি বাধা দিয়া বলিলেন, “দেখ্ সরস্বতী, আমি যাহা বলিতেছি, তাহা যদি করিয়া আসিতে পারিস, তাহা হইলে আমার এই গলার হার তোর গলায় ঝুলাইয়া দিব।”

গজ শৃঙ্খলবৎ পুষ্ট হার দেখিয়া দরিদ্রা বৈষ্ণবীর মস্তক বিঘৃণিত হইল। সে সাগ্রহে বলিয়া উঠিল, “কেন পারিব না মা, নিশ্চয়ই পারিব; যদি মাহুষের সাধ্য হয়, তাহা হইলে সরস্বতী নিশ্চয় আপনার হুকুম তামিল করিয়া আসিবে।” গৃহিণী তুষ্ঠা হইয়া হাসিলেন, সরস্বতী সশরীরে স্বর্গে গেল। তখন গৃহিণী কহিলেন, “দেখ, ছোট রায় দেবর বটে, কিন্তু চিরদিন সতীনের মত ব্যবহার করিয়া গেছে। যতদিন মছিল, ততদিন এমন দিন যায় নাই যেদিন আমায় চোখের জল ফেলিতে হয় নাই। বাপের বাড়ীর ষোঁটা বড় বেণী বাজে সরস্বতী, স্ততরাং সে কথা আর ভাবিতে পারিতেছি না। এইবার ছোট রায় বিবাহ করিয়াছে, তাহাকে জন্ম করিবার উপায় হইয়াছে। নূতন বৌ মাহুষ কেমন? তাহার মতি-গতি বুদ্ধি-স্বকি কেমন? বুঝিয়া দুর্গার কাহিনীটা যদি তাহার নিকট লাগাইয়া আসিতে পারিস, তাহা হইলে যদি কোন দিন হাড়ের জালা মিটে! কেমন করিয়া লাগাইবি, সে ভার তোরা। যদি পারিস, তাহা হইলে আমাকে যেমন চিরদিন বেড়া আঙুনে পুড়াইয়া মারিয়াছে, তেমনই বেড়া আঙুন জালিয়া দিয়া আসিবি বুঝিলি সরস্বতী? এমন আঙুন জালিয়া আসিবি, তাহা যেন চিতার আঙুনে না মিশিলে না নিবিয়া যায়। বুঝিলি ত?” সরস্বতী কহিল, “যতদূর সাধ্য করিব মা। তবে সে ত বিয়ের কনে, সে কি এত কথা তলাইয়া বুঝিতে পারিবে?” “একদিনে না পারে, দুমাস-ছমাসে ত পারিবে; না হয় আর একবার যাইবি, তখন তার পথ-খরচ আমি

দিব।" গৃহিণী তখন বাক্স খুলিয়া সরস্বতীকে পথ-থরচ বাবদ এক এক করিয়া পঞ্চাশ টাকা গণিয়া দিলেন; সরস্বতী প্রণাম করিয়া বিদায় হইল।

পথে আসিতে আসিতে সরস্বতী ভাবিতে লাগিল যে হরনারায়ণ রায় সহসা এত মুক্তহস্ত হইলেন কেন; নিশ্চয়ই ইহার ভিতর কোনও গুঢ় তত্ত্ব আছে। তাহা না হইলে ধনহীন ক্ষমতা-শূন্য ভ্রাতার সন্ধানের জন্ত হরনারায়ণ রাশি রাশি অর্থব্যয় করিবেন কেন? তীক্ষ্ণবুদ্ধি বৈষ্ণবী বুঝিল যে, ক্ষমতাশালী হরনারায়ণকে তুষ্ট রাখিতে পারিলে তাহাকে আর ভবিষ্যতে অর্থের জন্ত চিন্তা করিতে হইবে না। সহসা তাহার স্মরণ হইল যে হরনারায়ণ নবীনকে সন্দেহ করিয়াছেন; এই সন্দেহটা যদি সে কোন গতিকে বাড়াইয়া তুলিতে পারে তাহা হইলে ধূর্ত নবীন নাপিত আর কখনও তাহার লাভের অংশ লইতে পারিবে না। মুরশিদাবাদে ফিরিবার পূর্বে নবীনের উপরে সরস্বতীর ক্রোধ দিনের পর দিন বাড়িয়াই চলিতেছিল; কারণ তাহার দৃঢ় দারণা হইয়াছিল, যে লাভের ঋণ অংশ হইতে তাহাকে বঞ্চিত করিবার জন্ত নবীন শিকার লইয়া পাটনা হইতে মুরশিদাবাদ পলাইয়াছে। সে যখন দেশে ফিরিয়া গুনিল যে, নবীন তখনও ফিরে নাই, তখন তাহার সন্দেহ দূর হইল বটে, কিন্তু ক্রোধ গেল না। সরস্বতী দীর্ঘ প্রবাস হইতে ফিরিয়া গৃহ-মার্জনা করিতে প্রবৃত্ত হইল।

ঠিক সেই সময়ে হরিনারায়ণ আনান্দ ভাগীরথীর দীর্ঘ ওক

বেলা পার হইয়া জলে প্রবেশ করিতেছিলেন। একখানা বৃহৎ গহনার নৌকা সেই সময়ে তীরে লাগিল। তাহাতে একজন আরোহী বসিয়া ছিল। সে হরিনারায়ণকে দেখিয়া নৌকার ভিতরে প্রবেশ করিল। হরিনারায়ণ তাহাকে দেখিতে পাইলেন না। অপরাপর আরোহী নৌকা হইতে নামিয়া গ্রামে গেল, কিন্তু সে ব্যক্তি নামিল না; অস্থত্বার ভাণ করিয়া আপাদমস্তক বস্ত্রাবৃত হইয়া শয়ন করিল। হরিনারায়ণ অনান্তে গঙ্গাতীর পরিত্যাগ করিলে সে দূর হইতে তাঁহার অনুসরণ করিল।

ত্রিযষ্টিতম পরিচ্ছেদ

অলঙ্কার

“ও কে?”

প্রশ্ন শুনিয়া দুর্গা ও বড়বধূ স্তম্ভিত হইয়া রহিলেন। বহুক্ষণ কোন উত্তর না পাইয়া নববধূ পুনরায় জিজ্ঞাসা করিল, “ও কে, ও অমন করিয়া চাহিয়া থাকে কেন?” চমক ভাঙ্গিয়া দুর্গা ভ্রাতৃজ্ঞানার দিকে চাহিলেন; সে চাহনি কিন্তু নববধূর নিকট গোপন রহিল না। তখন দুর্গা জিজ্ঞাসা করিলেন; “ও কেমন করিয়া চায়, ভাই, তাহা আমরা কেমন করিয়া বলিব; ও কাহার দিকে চায়?” শৈল কহিল, “কেন, ওঁর দিকে! তোমরা যেন কিছু জান না? মাগী যেন ইহা করিয়া গিলিতে

আসে ; আমি সব বুঝিতে পারি গো, সব বুঝিতে পারি ।” শেখের কথা শুনিয়া দুর্গা হাসিয়া কেলিলেন । জাহা দেখিয়া বধু কহিলেন, “হাসিস কেন ভাই, ওর গায়ে জালা ধরিয়ছে, তাই বলিতেছে ।” এই সময়ে শৈল পুনরায় জিজ্ঞাসা করিল, “মাগি আর কত দিন থাকিবে ? দাঁড়াও, আমি বাবাকে বলিয়া উহাকে এখনই বিদায় করিয়া দিতেছি ।” এই বলিয়া সে ক্রোধভরে অলঙ্কারের ঝঙ্কার দিয়া কক্ষান্তরে চলিয়া গেল । তখন দুর্গা হাসিতে হাসিতে গৃহতলে লুটাইয়া পড়িলেন । বড়বধু বহুকষ্টে হাসি দমন করিয়া কহিলেন, “হাসিস না ভাই, হয়ত এখনই ফিরিয়া আসিবে ।” দুর্গা কহিলেন, “আম্বক, আমি আর হাসি চাপিয়া থাকিতে পারিতেছি না । দাদার হইল ভাল !” ঠাকুরপোর উপযুক্ত গুরুমহাশয় জুটিয়াছে । এখন হইতেই এত শাসন । আমি ত বিবাহের পরে দুই তিন বৎসর অপর লোকের কাছে স্বামীর নাম মুখে আনিতে পারি নাই ।” “তুমি আসিয়াছিলে কত বড়টি, আর শৈলর যে বৃদ্ধা বয়সে বিবাহ হইল ?” “হউক ভাই, এখন হইতে অত বাড়াবাড়ি ভাল নয় ।”

এই সময়ে দূরে পায়ের শব্দ শুনিতে পাইয়া উভয়ে অন্য কথা পাড়িলেন । কিয়ৎক্ষণ পরে একজন দাসী আসিয়া কহিল, “মা ঠাকরুণ, কত্যা ডাকছেন ।” বধু ও ননন্দা সদরে চণ্ডীমণ্ডপে আসিয়া দেখিলেন যে, হরিনারায়ণ এক পাখে বসিয়া আছেন ; বৃদ্ধা বৈষ্ণব ঠাঁহার সম্মুখে বসিয়া তামাকু সেবন করিতেছে ।

হরিনারায়ণ তাহাদিগকে দেখিয়া কহিলেন ; “মা, বিষম বিপদে পড়িয়া তোমাদের ডাকিয়াছি। মণিয়া কোনমতে এখান হইতে যাইতে চাহে না। বাবাজী দেশে ফিরিতে চাহে, কিন্তু মণিয়া তাহার সহিত যাইতে রাজী নয়। আমি তাহাকে লোকজন দিয়া পাটনায় পাঠাইতে প্রস্তুত আছি, কিন্তু সে দেশেও ফিরিতে চাহে না।” পিতার কথা শুনিয়া দুর্গা ঈষৎ হাসিয়া কহিলেন, “বাবা, আমরাও মন্দিরকে লইয়া বড় বিপদে পড়িয়াছি।” বধু অবগুণ্ঠন টানিয়া দিলেন ; তাহা লক্ষ্য না করিয়া হরিনারায়ণ জিজ্ঞাসা করিলেন, “কি বিপদ মা ?” “নূতন বৌ বলে যে মণিয়া নাকি দিনরাত্রি দাদার দিকে চাহিয়া থাকে। সে তাহার বাপের কাছে নালিস করিতে গিয়াছে।” দুর্গার কথা শুনিয়া হরিনারায়ণ ঈষৎ হাসিলেন এবং কহিলেন, “দেখ মা, এই বিষয়ে তোমাদের একটু সাহায্যের প্রয়োজন, মণিয়াকে কোনমতে এখান হইতে সরাইতে হইবে।” দুর্গা কহিলেন, “বাবা, মণিয়া কোন্ সময়ে কি মেজাজে থাকে, তাহা বলা যায় না। যখন তাহার মেজাজ ভাল থাকে, তখন বুঝাইয়া বলিলে হয়ত আমার কথা শুনিতো পারে ; কিন্তু অল্প সময়ে তাহাকে রাজী করা আমার সামর্থ্য তীত। তবে আমি একবার চেষ্টা করিয়া দেখি।”

দুর্গা ও বড়বধু উঠিয়া গেলেন। এই সময়ে ত্রিবিক্রম আসিয়া হরিনারায়ণকে কহিলেন, “দেখ হরি, তুমি যে কাগজপত্রগুলার কথা কহিতেছিলে, সেগুলো একবার দেখিলে ভাল হয় না ? রাজ্যীর বিবাহ হইয়া গিয়াছে ; এখন সে বাদশাহের নিকট

স্বাইতে চাহে, আর তাহাকে সত্ত্বর যাইতেও হইবে। আমি মনে করিতেছি যে, তোমাকে লইয়া মুরশিদাবাদে যাইব।” হরিনারায়ণ কহিলেন, “কাগজপত্র সঙ্গেই আছে, এখনই আনিতেছি; কিন্তু আমরা যদি মুরশিদাবাদে যাই, তাহা হইলে হুর্গা আর বোমাকে কোথায় রাখিয়া যাইব?” পশ্চাৎ হইতে বামাকণ্ঠে কে বলিয়া উঠিল, “তাহারা ত এইখানেই থাকিবে।” হরিনারায়ণ ফিরিয়া দেখিলেন সতী দাঁড়াইয়া আছে। ত্রিবিক্রম জিজ্ঞাসা করিলেন, “তুমি কখন আসিলে?” “এইমাত্র। একবার ঘাটে গিয়াছিলাম, পথে শুনিলাম একজন লোক নাকি আমাদের সকলের সন্ধান করিয়া বেড়াইতেছে। লোকটাকেও দেখিয়া আসিলাম, সে তিহু ময়রার দোকানে বাসা লইয়াছে।” ত্রিবিক্রম কহিলেন, “বটে! হরি, তুমি কাগজপত্র বাহির কর, আমি একবার ঘুরিয়া আসি। সতী, তুমি আমার সঙ্গে এস।”

পতি-পত্নী পথে বাহির হইলে স্বামীর সঙ্গে অবগুষ্ঠনশূন্য সতীকে দেখিয়া গ্রামের লোকে নিন্দা করিতে আরম্ভ করিল; সতী তাহা শুনিয়াও শুনিল না। গ্রাম-সীমায় আসিয়া সতী কহিল, “আমাকে সে ডাকিতেছে।” ত্রিবিক্রম হাসিয়া জিজ্ঞাসা করিলেন, “কে ডাকিতেছে সতী?” “যে ডাকে, যে কথা কহে; তাহাকে ত কোনদিন দেখি নাই?” “সে তোমাকে কোথায় ডাকিতেছে?” “ঐ শ্মশানের দিকে।” “চল, আমিও আসিতেছি।” উভয়ে বিটপিচ্ছায়াচ্ছন্ন নদীতীর অবলম্বন করিয়া শ্মশানে পৌছিলেন। তীরে একটা অতি প্রাচীন তিস্তিডীবৃক্ষ

ঝড়ের দিন গঙ্গালাভ করিয়াছিল, তাহার বৃহৎ কাণ্ডটা উচ্চতীর হইতে নদীগর্ভে সিক্ত সৈকত পর্য্যন্ত একটা প্রশস্ত সেতুর মত পড়িয়া ছিল। ত্রিবিক্রম সেই স্থানে পৌছিলে বৃক্ষশাখায় শৃগালের রব শ্রুত হইল। শুনিবামাত্র ত্রিবিক্রম স্থির হইয়া দাড়াইলেন। তখন নিকটস্থ একটা অশ্বথ বৃক্ষ হইতে একজন মনুষ্য ভূমিতে পতিত হইয়া উভয়কে অভিবাদন করিল।

দূর হইতে আর একজন মনুষ্য পতি-পত্নীর অনুসরণ করিয়া শ্মশান পর্য্যন্ত আসিয়াছিল। সে এই নবাগত ব্যক্তিকে বৃক্ষ হইতে পড়িতে দেখিয়া সহসা মূচ্ছিত হইয়া পড়িয়া গেল। সে শব্দ শুনিয়া ত্রিবিক্রম হাসিলেন। নবাগত ব্যক্তি কালীপ্রসাদ। সে একটা বৃহৎ রূপার বাস্স সতীর হস্তে দিয়া কহিল, “মা, মা তোমাকে দিয়াছেন, তুমি পরিও।” সতী বিস্মিতা হইয়া পেটাকা খুলিয়া দেখিল, তাহা রক্ততর্নিষ্ঠিত হীরক ও মুক্তাখচিত অলঙ্কার-পূর্ণ। খৃষ্টীয় অষ্টাদশ শতাব্দীর প্রথমভাগে গোড়দেশে গৃহস্থের কন্যা সে জাতীয় অলঙ্কার কখন দেখিতেও পাইত না। সতী গৃহস্থের কন্যা; বহালকারের চাকচিক্যে সে আশ্চর্য্য হইয়া গেল এবং কিয়ৎক্ষণ পরে জিজ্ঞাসা করিল, “এগুলি আমি কি করিব?” ত্রিবিক্রম কহিলেন, “কেন, পরিবে।” “লোকে নিন্দা করিবে যে?” “কেন নিন্দা করিবে, আমি দিয়াছি, তুমি পরিবে, ইহাতে দোষ কি?” “আমাদের গ্রামে এ রকম অলঙ্কার কাহারও নাই।” “সতী, আমরা যেখানে ঘাইব, সেখানে তোমার মত স্ত্রীলোক সকলেই এই অলঙ্কার পরে।” আমি

কহিলেন, কাজেই ভক্তিমতী পত্নী তাহা আদেশ বলিয়া শিরোধার্য্য করিয়া লইল।

তখন সতীর হঁস হইল, যে অলঙ্কার আনিয়াছে সে ত নাই ! তখন সে স্বামীকে জিজ্ঞাসা করিল, “যে আনিল সে কোথায় গেল ?” :ত্রিবিক্রম কহিলেন, “সে ভৃত্য, কার্য্য শেষ হইয়া গিয়াছে, চলিয়া গিয়াছে, আবশ্যক হইলে আবার তাহার সাক্ষাৎ পাইবে। চল, ফিরিয়া যাই।” যে ব্যক্তি কালীপ্রসাদকে দেখিয়া মুচ্ছিত হইয়াছিল, সে দেখানে পড়িয়াছিল, সেখানে গিয়া ত্রিবিক্রম সতীকে জিজ্ঞাসা করিলেন, “সতী, এই কি আমাদের সন্ধান লইতেছিল ?” সতী কহিল, “হাঁ।” “তুমি গ্রামে ফিরিয়া যাও, আমি পরে আসিব।” সতী পরম নিশ্চিন্ত মনে বহুমূল্য অলঙ্কার লইয়া পিতৃগৃহে ফিরিয়া গেল।

মুচ্ছিত ব্যক্তির শিয়রে একটা বৃক্ষকাণ্ডের উপরে ত্রিবিক্রম উপবেশন করিলেন। কিম্বৎক্ষণ পরে সে ব্যক্তি চক্ষু মেলিয়া চাহিল এবং ত্রিবিক্রমকে দেখিয়া সভয়ে চক্ষু মুদ্রিত করিল। ত্রিবিক্রম হাসিলেন।

চতুঃষষ্ঠিতম পরিচ্ছেদ

মণিয়ার বিদায়

“মণিয়া।” “হজুর ?” “আমাকে হজুর বলিয়া ডাকিতেছ

কেন?" "জনাব, আপনি আমীর, খোদা আপনাকে বুলন্দ করিয়াছেন। আমি গরীব, পেটের দায়ে মজুরী করিয়া থাই, আমি আপনাকে হজুর বলিব না ত কে বলিবে?"

গ্রামসীমায় একটা অশ্বখ বহুদূর পর্য্যন্ত শাখা প্রশাখা বিস্তৃত করিয়া সুদীর্ঘকাল আধিপত্য করিতেছিল। তাহার নিম্নে মুসলমানদিগের অনেকগুলি কবর ছিল; অশ্বখের অমুগ্রহে বাকীগুলি বৃক্ষকবলিত হইয়া, মাত্র একটা তখনও বিত্তমান ছিল। সম্ভার প্রাক্কালে অসীম ও সুদর্শন তাহার উপর বসিয়া ছিলেন। কবরের নিম্নে গৈরিক-বসনা মণিয়া শ্রামল শম্প-শয্যায় আসন গ্রহণ করিয়াছিল।

সুদর্শন জিজ্ঞাসা করিলেন, "বাঈজী, তুমি এদিকে আসিলে কেন?" মণিয়া হাসিয়া কহিল, "দোহাই ধর্মের ওস্তাদ, কসুবীর যদি ধর্ম থাকে, তাহা হইলে সেই ধর্মের দোহাই; বেজার যদি ঈশ্বরের নাম-গ্রহণের অধিকার থাকে, তাহা হইলে হিন্দুর ভগবান ও মুসলমানের খোদার দোহাই, আমি ইচ্ছা করিয়া জানিয়া এ পথে আসি নাই।" অসীম কহিলেন, "মণিয়া, দাদা হয়ত তোমার কথা অবিশ্বাস করিতেছে, কিন্তু আমি তোমাকে অবিশ্বাস করি নাই।"

মণিয়া। জনাবের আমার উপর চিরদিন মেহেরবাণী।

অসীম। আবার জনাব?

ম। ব্যক্তিগত অবস্থার পার্থক্য কি ভুলিতে আছে জনাব?

সুদর্শন। দেখ বাঈজী, কথাটা বলিতে আমার বড়ই

সকোচ হইতেছে ; তুমি এখন এখানে আসিয়া আমাকে—না, কর্তাকে বড়ই বিপদে ফেলিয়াছ।

ম। ওস্তাদ, সত্যকথা বলিতে কি, আমি তোমার জন্যই এখানে আসিয়াছি।

স্ব। ওরে ছোট রায়, বেটা বলে কি ! আবার যে স্বর পরিয়াছে ?

অ। দাদা, তুমি থাম। মণিয়া তোমাকে নাচাইতেছে, আর তুমি নাচিতেছ। ভয় নাই, তোমার ধর্ম নষ্ট হইবে না। মণিয়া ?

ম। হজুর ?

অ। আবার ?

ম। এমন গোস্বামী কি আমি করিতে পারি হজুর ?

অ। ভাল, তোমার যাহা ইচ্ছা বল।

ম। হকুম করুন।

অ। তুমি এখন কোথায় যাইবে ?

ম। যেদিকে দু'চোখ যায়।

অ। কাহার সঙ্গে যাইবে ?

ম। এই আসমান, তারা, চাঁদ, গাছপালা, চিড়িয়া। আমার মত অবস্থার লোকের সঙ্গীর অভাব কি জনাব ?

অ। মণিয়া, তুমি যুবতী, অসামান্য রূপসী, এই ঘোর হৃদ্দিনে সঙ্গিহীনা অবস্থায় তোমার কি একা চলা উচিত ?

ম। হজুর, অলঙ্কার পোষাক খুলিয়া ফেলা যায়, কিন্তু রূপ

ত মুখোসের মত খুলিয়া ফেলা যায় না। ছনিয়ার হাওয়ায় সঙ্গে মনের হাওয়াও বদলাইয়া যায়; কিন্তু চেহারা যিনি দিয়াছেন, তিনি না বদলাইলে আর কেহ পরিবর্তন করিতে পারে না।

অ। মণিয়া, আমি কি তোমাকে সে কথা বলিতেছি?

ম। হজুর, হকুমে সব হয়, কিন্তু মন বশ হয় না। তাহা যদি হইত, তাহা হইলে বাদশাহের বেগম গোলামের দিকে নজর করিত না।

অ। মণিয়া, আমি কি তোমাকে হকুম করিতেছি?

ম। হজুর, সকল সময়ে জবান ছরত থাকে না। তুমি আমাকে জিহ্বাটা বশে রাখিতে দিবে না। মাতৃষের মন উড়া পাখীর মত, তাহাকে ধরিয়া রাখা বড় কঠিন। যে মন ধরিতে যায়, তাহার উপরদিকে নজর থাকে বলিয়া কত বিপদে পড়ে। জলে পড়ে, গর্ভে পড়ে, হৌচট খায়, কারণ সে ত নিজের পথ দেখিয়া চলে না, উড়া পাখীর পিছন পিছন ধাওয়া করে।

অ। তোমার সহিত কথায় পারিয়া উঠিব না। মণিয়া আমি মিনতি করি, তুমি ফিরিয়া যাও।

ম। জনাবের বেগম বাদীর উপর নারাজ হইয়াছেন এ কথা বাদীর কাণে পৌঁছিয়াছে। খোদাবন্দ, বন্দা-নওয়াজ, আমরা কসবা জাতি, মজুরী করিয়া থাই, আমরা কি কখনও উচু নজর করিতে পারি? হজুর হকুম করিতেছেন, অবশ্য ফিরিয়া যাইব—তবে কোথায় ফিরিয়া যাইব, তাহা বলিতে পারি না।

অ। সে কি কথা মণিয়া, আমার ফিরিয়া যাও বলার অর্থ,
পিতার নিকট ফিরিয়া যাও।

ম। বলিয়াছি ত জনাব, মন উড়া-পাখী, বেগম সাহেবা
বাঁদীর উপর নারাজ হইয়াছেন, বাঁদী বুলন্দ আখতরের নজরের
অন্তরে যাইতেছে।

অ। মণিয়া, আবার বলি তুমি পাটনায় ফিরিয়া যাও।

ম। যো হুকুম খোদাবন্দ।

অ। রহস্য রাখ।

ম। ভোবা ভোবা, জনাবের সহিত রহস্য করিব ?

অ। মণিয়া, আমি মিনতি করি, তুমি পাটনায় ফিরিয়া
যাও।

ম। সে কি কথা মেহেরবান, মোগলের রাজ্যে আমীর কি
কখনও পথের কুকুরের নিকট মিনতি করে ? পাটনার পথে
আমীর চলিয়া যায়, দীন, অনাথ ভিখারী কুকুরের শ্রায় পদাঘাত
লাভ করিয়া পলায়ন করে। হুঃখী-দরিদ্র যখন অন্নের অভাবে
হাহাকার করে, তখন আমীরের ঘরে মদিরা ও সঙ্গীতের শ্রোতে
আনন্দ বহিয়া যায়। জনাব, তুমি সেই আমীর, আর আমি
সেই ভিখারী। আমার নিকট মিনতি করা কি তোমার সাজে
জনাব ? তুমি হুকুম করিয়াছ, আমি তামিল করিবার চেষ্টা
করিব।

সহসা অসীমের গণ্ড বহিয়া দুই বিন্দু অশ্রু পতিত হইল।
মণিয়া তাহা দেখিয়া লক্ষ দিয়া উঠিল এবং উভয় হস্তে অসীমের

পদদ্বয় আলিঙ্গন করিয়া বলিয়া উঠিল, “তুমি কঁাদিতেছ। আমার ছনিয়ার দৌলং, তুমি কঁাদিতেছ কেন! তোমার কিসের দুঃখ বল? তুমি যাহা বলিবে, আমি তাহাই করিব। আমি এখনই পাটনায় ফিরিয়া যাইতেছি। তুমি কঁাদিও না; তুমি চোখের জল মুছিয়া একবার হাস, আমি তোমার হাসি-মুখ দেখিয়া চলিয়া যাই।”

অসীম চক্ষু মার্জনা করিয়া কহিলেন, “মণিয়া, তুমি যাইতে চাহিতেছিলে না বলিয়া আমার চোখে জল আসে নাই। তুমি কি ছিলে, কি অবস্থায় ছিলে, আর আমার দোষে কি হইয়াছে, তাহাই ভাবিয়া চোখে জল আসিয়াছিল।” মণিয়া উঠিয়া দাঁড়াইল এবং অসীমের নিকট হইতে দূরে গিয়া কহিল, “মনে করিও না যে, তোমার জন্ত আমার অবস্থা হীন হইয়াছে, আমি আজ তোমার জন্ত কত উচ্চ, তা কি তুমি জান? দিলের, তুমি ভাবিতেছ আমি কি ছিলাম কি হইয়াছি—শাটিন মঞ্চমলের পেশোয়াজ না পরিয়া, হীরা মুক্তার অলঙ্কার না পরিয়া, এই গেকরা কাপড় পরিয়া বেড়াইতেছি বলিয়া মনে করিও না যে, মণিয়া ছোট হইয়াছে। লোকের চোখে এ বেশ হীন দেখাইতে পারে; কিন্তু তুমি জান না দিলের, এ বেশে আমি আমার কাছে কত উচ্চ। এখন আমি আমার। এখন পথের কুকুরের মত ডাকিলেই আমাকে লোকের কাছে যাইতে হয় না। যাহাকে মনে মনে ঘৃণা করি, অর্থের জন্ত তাহার সঙ্গে হাসিমুখে কথা কহিতে হয় না;—সে যে কত বড় সুখ, কত উচ্চতা, তাহা

বেশা ভিন্ন কেহ বুঝিতে পারে না। জনাব, মণিষা তওয়াইফ চলিল। তুমি আমীর হইয়া, বাদশাহের প্রিয় হইয়া এই দুনিয়ার বন্ধুর পথে অক্ষত চরণে চলিয়া যাইও। বেশাকত্বে বেশার ছায়া কখনও দ্বিতীয়বার ইচ্ছা করিয়া তোমার ঐ পবিত্র দেহ স্পর্শ করিবে না।”

সহসা সেই তরুচ্ছায়াশীতল গ্রাম-সীমা মুখরিত করিয়া দৃঢ়কণ্ঠে উচ্চারিত হইল, “ছি মা, এই কি তোমার সংযম?” সকলে ফিরিয়া দেখিলেন কবরের অদূরে হরিনারায়ণ দাঁড়াইয়া আছেন।

পঞ্চষষ্টিতম পরিচ্ছেদ

নবীনের শাস্তি

“নবীন, তোমার চেতনা ফিরিয়াছে তাহা আমি বুঝিতে পারিয়াছি; সুতরাং চক্ষু মুদ্রিয়া থাকিয়া কোন ফল নাই।” নবীন তৎক্ষণাৎ অতি বিনীত, শাস্ত, শিষ্ট ভক্তের ভাষা উঠিয়া, মাষ্টারকে প্রণাম করিয়া, করযোড়ে দাঁড়াইল। দ্বিবিক্রম জিজ্ঞাসা করিলেন, “নবীন, আজি আবার আমার পিছু লইয়াছিলে কেন?” নবীন উত্তর দিবার চেষ্টা করিল; কিন্তু তাহার গুহ্য কণ্ঠতালু ও জিহ্বা সে উত্তর উচ্চারণ করিল না। তাহার অবস্থা দেখিয়া দ্বিবিক্রম কহিলেন, “পরামাণিক, বস,—অত ভয়

পাইতেছ কেন ? আমি তোমার অনিষ্ট করিব না।” সাহস পাইয়া নবীন অর্ধশুট আঁতর্নাদ করিয়া উঠিল। তখন ত্রিবিক্রম কহিলেন, “অলঙ্কারের লোভে আসিয়াছিলে ;—তুমি জান যে, তোমার মত শত-সহস্র নবীন আসিলেও আমার অঙ্গ স্পর্শ করিতে পারিবে না ?” নবীন ব্যাকুল হইয়া বলিয়া উঠিল, “না—না।” “তবে কি জন্ত আমার পিছু লইয়াছ ?” নবীন নিরুত্তর। তাহা দেখিয়া ত্রিবিক্রম হাসিয়া কহিলেন, “পরামর্গিক, মনে করিয়াছ, চুপ করিয়া থাকিলে আমার নিকট পরিত্রাণ পাইবে ?” নবীন দাসের দৃষ্ট বুদ্ধি তখনও তাহাকে পরিত্যাগ করে নাই। সে ভাবিতেছিল যে, দিনের বেলায় কখনই জলে আগুন লাগিবে না। আর যদিই বা লাগে, কবুল জবানবন্দী পরে দিব। যতক্ষণ বেগতিক না দেখি ততক্ষণ চুপ করিয়াই থাকি। তাহার মনের ভাব বুঝিয়া ত্রিবিক্রম কহিলেন, “মনে করিয়াছ দিনের বেলা, কেমন ? ঐ দেখ জল বাড়িয়া উঠিল।”

দেখিতে-দেখিতে নবীন শুধু ভূমিতে সাঁতার দিতে আরম্ভ করিল। তাহার মনে হইল, নদীর জল সহসা ফাঁপিয়া উঠিয়া তাহাকে ভাসাইয়া লইয়া চলিয়াছে। তখন ত্রিবিক্রম কহিলেন, “ঐ দেখ, একটা প্রকাণ্ড কুস্তীর।” বলিবামাত্র নবীন তারম্বরে চীৎকার করিয়া উঠিল; কারণ, সে স্পষ্ট দেখিতে পাইল, ত্রিবিক্রমের পরিবর্তে একটা প্রকাণ্ড কুস্তীর তাহাকে গ্রাস করিতে আসিতেছে। ভয়বিহ্বল নবীন দ্বিতীয়বার মুচ্ছিত হইয়া পড়িয়া গেল।

যখন তাহার দ্বিতীয়বার মূৰ্ছাভঙ্গ হইল, তখন সে দেখিল যে, সে প্রথমবারে যে শুষ্ক ভূমিতে পড়িয়া ছিল, এখনও সেইখানেই পড়িয়া আছে; আর দূরে ত্রিবিক্রম শুষ্ক কাণ্ডের উপরে বসিয়া আছেন। তাহাকে চক্ষু মেলিতে দেখিয়া ত্রিবিক্রম কহিলেন, “কি নবীন, কেমন আছ?” নবীন ছুইবার আছাড় খাইয়া শরীরে বাথা পাইয়াছিল; সে ধীরে-ধীরে উঠিয়া ত্রিবিক্রমের উভয় পদ জড়াইয়া ধরিল। ত্রিবিক্রম জিজ্ঞাসা করিলেন, “কেমন, এইবার বিশ্বাস হইয়াছে?” নবীন অতি বিনীত ভাবে কহিল, “আজ্ঞে।” “সকল কথা কবুল করিবে?” “আজ্ঞে, নিশ্চয় করিব। প্রাণের তুল্য পদার্থ নাই। এখন ঠাকুর রাখিলে বাঁচি, মারিলে মরি।” “তুমি কে?” “আমি স্রবার কানুনগোই হরনারায়ণ রায়ের গোয়েন্দা।” “আমার পিছু লইয়াছ কেন?” “আপনার পিছু লই নাই,— আপনার সহিত যে স্ত্রীলোকটি ছিলেন, তাঁহার পিছু লইয়া-ছিলাম।” “কেন, সে কি তোমার কোন ক্ষতি করিয়াছে?” “না। তবে তাঁহাকে কাল হরিনারায়ণ বিদ্যালঙ্কারের সহিত একত্র দেখিয়াছিলাম; ভাবিয়াছিলাম যে, তাঁহার নিকট বিদ্যালঙ্কার ঠাকুরের সংবাদ পাইব।” “তুমি কি হরিনারায়ণ বিদ্যালঙ্কারের সংবাদ চাহ?” “কানুনগোই তাঁহারই সন্মানে আমাকে মুরশিদাবাদ হইতে কাশী পাঠাইয়াছিলেন।” “কেন?” “হরিনারায়ণ বিদ্যালঙ্কার কানুনগোই এর বিষম শত্রু। তাঁহাকে জব্দ করিতে না পারিলে, হরনারায়ণ রায়ের

বিস্তর ক্ষতি হইবার সম্ভাবনা।” “তুমি কেমন করিয়া জানিলে যে হরিনারায়ণ এই গ্রামে আছেন?” “তিনি গঙ্গায় স্নান করিতেছিলেন,—আমি নৌকা হইতে তাঁহাকে দেখিয়া নামিয়া পড়িয়াছি।” “এখন কি করিবে?” “ঠাকুর যাহা হুকুম করিবেন।” “আর আমি যদি কোন হুকুম না করি?” “তাহা হইলে যেমন করিয়া পারি, কালুনগোইএর ছোট ভাই অসীম রায় মহাশয়কে বিজ্ঞালঙ্কার ঠাকুরের কাছ-ছাড়া করিব।” “তাহার পর?” “যেমন করিয়া পারি, বিজ্ঞালঙ্কার ঠাকুরকে দূরে সরাইয়া দিব।” “যদি সে না সরিতে চাহে?” “জোর করিব।” “তাহার সহিত কি জোরে পারিবে?” “ছলে বলে কৌশলে যেমন করিয়া পারি। কালুনগোইএর হুকুম আছে যে, আবশ্যক হইলে—” “ব্রহ্মহত্যা করিবে?” “তাহাতেও আপত্তি নাই।” ত্রিবিক্রম হাসিয়া কহিলেন, “নবীন, হরনারায়ণ আমার বাল্যবন্ধু। বাল্যকালে ঢাকায় হরনারায়ণ রায়, হরিনারায়ণ বিজ্ঞালঙ্কার আর আমি একত্র খেলিয়া বেড়াইয়াছি। কালুনগোই হইয়া হরনারায়ণের তাহা হইলে ষথেষ্ট উন্নতি হইয়াছে। দেখ নবীন, তুমি যখন আমার হাতে পড়িয়াছ, তখন তুমি হরিনারায়ণ বিজ্ঞালঙ্কারের কেশাগ্র পর্য্যন্ত স্পর্শ করিতে পারিবে না। আমি আদেশ করিতেছি, তুমি মুরশিদাবাদে ফিরিয়া যাও। হরনারায়ণকে আমি একখানা পত্র দিতেছি,—তাহা দিলেই তোমার সমস্ত দোষ মাফ হইয়া যাইবে। তুমি এখনই গ্রাম ছাড়িয়া চলিয়া যাও,—এখানে থাকিলে দুই দণ্ডের মধ্যে পাগল

হইয়া যাইবে। এখন আমার সহিত এস,—আমি পত্র দিতেছি, তাহা লইয়া এখনই যাত্রা কর।”

ত্রিবিক্রম ও নবীন গঙ্গাতীর পরিত্যাগ করিয়া গ্রামে প্রবেশ করিলেন। বিশ্বনাথ চক্রবর্তীর গৃহে নবীনকে প্রবেশ করিতে দেখিয়া, দূর হইতে দুর্গা ও বড়বধু শিহরিয়া উঠিলেন। হরিনারায়ণ তখনও চণ্ডীমণ্ডপে বসিয়া বৃদ্ধ বৈষ্ণবের সহিত কথা কহিতেছিলেন। তিনি নবীনকে দেখিয়া উঠিতে ঝাইতেছিলেন; কিন্তু ত্রিবিক্রমের ইঙ্গিতানুসারে পুনরায় উপবেশন করিলেন। ত্রিবিক্রম কাগজ কলম লইয়া একখানি ক্ষুদ্র পত্র লিখিলেন, এবং তাহা মোহর করিয়া নবীনের হস্তে দিলেন। নবীন প্রণাম করিয়া উঠিল। ত্রিবিক্রম বিদ্যালঙ্কারকে কহিলেন, “ওহে হরি, হরকে জানাইলাম যে, আমি আবার সংসারী হইয়াছি; এবং সত্ত্বর তাহার সহিত সাক্ষাৎ করিব।” হরিনারায়ণ উত্তর না দিয়া ঈষৎ হাসিলেন।

ত্রিবিক্রম চণ্ডীমণ্ডপে বসিয়া অসীম সংক্রান্ত কাগজপত্র দেখিতে আরম্ভ করিলেন। বৃদ্ধ বৈষ্ণব দূরে সরিয়া গেল। এমন সময়ে অসীমের শব্দ আরম্ভ হইল। উপস্থিত হইলেন। হরিনারায়ণ তাঁহাকে দেখিয়া ঈষৎ হাসিলেন। তিনি আসিয়া সহসা বলিয়া উঠিলেন, “বিদ্যালঙ্কার মহাশয়, মেয়েটা কাদিয়া-কাটিয়া অস্থির করিতেছে; আপনি বাহা হয় একটা ব্যবস্থা না করিলে, আমাকে ত আর ঘরে তিষ্ঠিতে দেয় না। সে বলে ঐ বৈষ্ণবের সঙ্গে কে একটা রূপসী মেয়ে আসিয়াছে,—সে না কি

দিন রাত্রি হাঁ করিয়া বাবাজীর দিকে চাহিয়া থাকে; বাবাজীরও না কি ভাবগতিক ভাল নহে।” হরিনারায়ণ বিষয়ের ভান করিয়া কহিলেন, “মত না কি? তবে কি জানেন মিত্র মহাশয়, অসীম তেমন পাত্র নয়। কিন্তু আপনার কথা যদি কাতর হইয়া পড়েন, তাহা হইলে বাধ্য হইয়া আমাকে ছুঁকথা বলিতে হইবে। দেখুন, এ সকল বিষয়ে স্ত্রীলোকের পরামর্শে চলা উচিত নহে। আপনি যদি নূতন বধুমাতাকে দুই-এক দিন স্থির করিয়া রাখিতে পারেন, তাহা হইলে আমি অসীমের নিকট কোন কথা না বলিয়া মাগীটাকে সরাইয়া দিতেছি।” মিত্রজা কহিলেন, “দেখুন, বাবাজীবন এক প্রকার দয়া করিয়া আমার জাতিরক্ষা করিয়াছে। মাত্র দুই-তিন দিন বিবাহ হইয়াছে,—ইহার মধ্যে কোন কথা বলিতে আমার ভরসা হয় না। তবে কি জানেন,—শৈল আমার নয়নের মণি, আমাদের একমাত্র সন্তান। তাহার চোখে জল দেখিলে, বড়ই অস্থির হইয়া পড়ি।” “তা বটেই ত, তা বটেই ত। আপনি নিশ্চিন্ত থাকুন মিত্রজা মহাশয়,—আমি যেমন করিয়া পারি, মাগীটাকে বিদায় করিয়া দিতেছি।” মিত্রজা সন্তুষ্ট হইয়া প্রস্থান করিলেন।

ত্রিবিক্রম এতক্ষণ একমনে কাগজপত্র দেখিতেছিলেন। তিনি মাথা তুলিয়া কহিলেন, “হরি, বুঝা চেষ্টা! এই নববধু সংসার যাত্রার প্রতিপদে স্বামীকে নাগপাশে বন্ধন করিবে। মণিয়া উপলক্ষ মাত্র,—তুমি কিছুই করিতে পারিবে না।” হরিনারায়ণ ঈর্ষ্য হাসিয়া কহিলেন, “ইহাই যদি অদৃষ্টের নিধন, তাহা হইলে

আমি আর কি করিব ? কিন্তু একবার চেষ্টা করিয়া দেখিতে দোষ কি ? তুমি কাগজপত্র দেখ, আমি আসিতেছি ।”

ষট্‌ষষ্ঠিতম পরিচ্ছেদ

প্রত্যাবর্তনের পথে

মণিয়া অসীমের পদদ্বয় পরিত্যাগ করিয়া দূরে সরিয়া আসিল। অসীম ও সুদর্শন কিংকর্তব্য-বিমূঢ় হইয়া দাঁড়াইয়া রহিলেন,—অনেকক্ষণ ধরিয়া কেহই কোন কথা বলিতে পারিলেন না। তখন মণিয়া কহিল, “বাণজান, আমি আপনার উপদেশ ভুলি নাই,—সংযম ব্রত পরিত্যাগ করি নাই। এক মূর্ত্ত দেবতার চোখে জল দেখিয়া আত্মহারা হইয়া গিয়াছিলাম। খোদার কসম বলিতেছি বাণজান, আমি ইচ্ছা করিয়া এ দেশে আসি নাই।” হরিনারায়ণ কহিলেন, “অসীম, তুমি কি কাদিতেছিলে ?” অসীম কহিলেন, “স্পষ্ট কাদি নাই বটে, তবে মণিয়ার অবস্থা দেখিয়া চোখে জল আসিয়াছিল।”

হরিনারায়ণ। মা, এই সামান্য কারণে আত্মহারা হইলে তোমার ব্রত ত রক্ষা হইবে না ! তোমার ব্রত অতি কঠিন। তুমি যদি সত্যই অসীম রায়কে দেবতার মত ভক্তি কর, তাহা হইলে চিন্তা আরও কঠিন করিতে হইবে।

মণিয়া। আরও কঠিন কেমন করিয়া করিব ?

হরি। দেখ মা, মাতুষের মন মাতুষ যেমন করিয়া গড়িয়া তুলিবে, তাহা সেইরূপ আকার ধরিবে। তুমি যদি চেষ্টা কর, তাহা হইলে অসীমের চোখের জল কেন, একদিন অসীমকে মৃত্যু-যন্ত্রণায় ছট্‌ফট্‌ করিতে দেখিলেও, স্বচ্ছন্দে মুখ ফিরাইয়া চলিয়া যাইতে পারিবে।

ম। সে বড় কঠিন কাজ বাপজান।

হরি। কি করিবে মা! আমার ভগবান ও তোমার খোদা তোমার অদৃষ্টে যাহা লিখিয়াছেন, তাহা থগাইবার শক্তি কি মাতুষের আছে ? কেন যে বিদাতা জীবনের প্রথমে তোমার প্রতি এরূপ বিরূপ হইয়াছেন, তাহা কেমন করিয়া বুঝিব ? যিনি মাতুষের অদৃষ্ট হৃষ্টি করিয়া থাকেন, তিনি আমাদের অদৃষ্টে কি লিখিয়াছেন তাহা তিনিই জানেন ; আমার যাহা ভাল মনে হয়, তাহাই বলিতেছি মাত্র। দেখ মা, যদি তোমার প্রিয় ব্যক্তির মঙ্গল চাহ, তাহা হইলে তাহার ছায়াও স্পর্শ করিও না। তাহাকে যে পথে যাইতে দেখিবে, তাহার বিপরীত পথে যাইও। ইচ্ছা করিয়া তাহাকে দেখিও না, তাহার কথা কাণে তুলিও না, তাহার রূপ মনে আনিও না।

ম। বাপজান, সকল কাজ পারিব,—কেবল শেষেরটি পারিব না।

হরি। যদি চেষ্টা কর, ক্রমে পারিবে।

ম। তবে চেষ্টা করিব। এখন কি করিব বলুন ?

হরি। প্রভাতে পাটনায় ফিরিয়া যাও।

ম। আমি এখনই চলিয়া যাইব মনে করিতেছিলাম।

হরি। সন্ধ্যা হইয়াছে না, এখন চলিয়া গেলে লোকে নানা কথা কহিবে। এখন দিবা কাজ নাই,—আমি প্রভাতে তোমাকে লোক দিয়া পাঠাইয়া দিব।

ম। পিতা যদি গৃহে স্থান না দেন, তাহা হইলে কি করিব?

হ। পাটনা সহরে তোমার স্থানের অভাব হইবে না।

ম। বাপজান, সে কথা কতদূর সত্য হইবে, তাহা বলিতে পারি না। পাটনা সহরে মণিষা বাদ্দিজীর স্থানের অভাব হইবে না বটে, কিন্তু ভিখারিণী মণিষাকে কেহ স্থান দিবে কি না সন্দেহ।

হ। দেখ না, যিনি জীব দিয়াছেন, তিনিই জীবের ব্যবস্থা করিয়া থাকেন। তাঁহার চরণে মতি থাকিলে, তোমার আশ্রয়ের অভাব হইবে না। তুমি এখন গৃহে চল,—আমি তোমার পাটনা-যাত্রার ব্যবস্থা করিয়া দিতেছি।

সকলে বিশ্বনাথ চক্রবর্তীর গৃহে ফিরিয়া আসিলেন। ত্রিবিক্রম তখনও চণ্ডীমণ্ডপে বসিয়া প্রদীপের আলোকে কাগজ-পত্র দেখিতেছিলেন। বৃদ্ধ বৈষ্ণব তাঁহার সম্মুখে বসিয়া ছিল। তিনি হরিনারায়ণকে দেখিয়া বলিয়া উঠিলেন, “কি হরি, অদৃষ্ট-চক্রের গতিরোধ করিতে পারিলে?” হরিনারায়ণ হাসিয়া কহিলেন, “এ আবার কি নূতন ফাঁকীর সৃষ্টি করিতেছ?”

“কাকী আমার নহে, তোমার, ভট্টচাঁদ! অনেক চেষ্টা করিয়া দেখিয়াছি, কিছুতে কিছু হয় না। চক্রীর ইচ্ছা ভিন্ন চক্রের গতিরোধ হয় না। দেখ, এই গ্রামে তুমি যখন নৌকায় সম্পন্ন গৃহস্থের মত কাশী চলিয়াছিলে, তখন আমি অর্ধনির্ধারিত চিত্তাব্লিতে কদর্যা অন্ন পাক করিয়া দেহপাত করিয়াছি। আর সেই আমি—দেখ, দিব্য অঙ্গরাগ, বসন-ভূষণে সজ্জিত হইয়া ঘোর সংসারী হইয়াছি,—এখনও বৎসর ফিরে নাই। তুমি কি মনে কর, আমি চেষ্টা করি নাই? বাড় আসিতেছে, নৌকা ডুববে জানিয়াই নৌকায় উঠিয়াছি। ইচ্ছা ছিল মরিব; কিন্তু চক্রীর ইচ্ছা অন্তরূপ। তোমার চোখের সম্মুখে নৌকা ডুবিল; কিন্তু আমি ত মরিলাম না!” এই সময়ে বৃদ্ধ বৈষ্ণব বলিয়া উঠিল, “ঠিক বলিয়াছ বাবা; বৃন্দাবন ছাড়িয়া দেশে ফিরিলাম, মনে ভাবিলাম যে, সাধের গোপালটিকে উপযুক্ত হস্তে না দিয়া মরিতে পারিব না; কিন্তু গোপালের ইচ্ছা অন্তরূপ। দেশে ত ফিরিলাম না,—কেবল ভবচক্রে ঘুরিয়া মরিলাম।” হরিনারায়ণ জিজ্ঞাসা করিলেন, “কেন বাবাজী, দেশে ফিরিবে না ত কোথায় যাইবে?” “দেশে আর ফিরি কৈ ঠাকুর! মন বলিতেছে, গোপালের ইচ্ছা—যে পথে আসিয়াছি, সেই পথেই যাইতে হইবে।” ত্রিবিক্রম হাসিয়া কহিলেন, “হরিদাস, বুড়া বয়সে মনের স্মৃতি অনেকটা গোপালের সঙ্গে মিলাইয়া আনিয়াছে দেখিতেছি!” বৃদ্ধ ব্যস্ত হইয়া বলিয়া উঠিল, “ছি, ছি, অমন কথা মুখে আনিও না, ঠাকুর! আমি হীন, মহাপাপী, আমার

কমতা কি ?” সহসা ত্রিবিক্রমের নেত্রে দুই বিন্দু অশ্রু দেখা দিল। তিনি কহিলেন, “হরিদাস, তুমি ঠিক পথেই চলিয়াছ। আমি এত চেষ্টা করিয়াও পারিলাম না। কেন যে মহামায়া আমাকে আবার সংসারে ফিরাইয়া আনিলেন, তাহা বুঝিতে পারিলাম না।” “পারিবে বাবা, পারিবে—অধিক বিলম্ব নাই। মাতা পুত্রকে দিয়া ভক্তের সেবা করিতেছেন; তোমার মত সাধককে বিপথে চলিতে দিয়া মা কখনও কি স্থির থাকিতে পারেন ?”

এই সময়ে হরিনারায়ণ বিরক্ত হইয়া বলিয়া উঠিলেন, “ওহে, তোমরা কি বলিতে আরম্ভ করিলে, আমি ত কিছুই বুঝিতে পারিলাম না।” ত্রিবিক্রম কহিলেন, “এ যাত্রায় বোধ হয় আর বুঝিলে না।” বৈষ্ণব কহিল, “সে কি কথা ঠাকুর! সংসারের বন্ধনের মধ্যে থাকিয়া বাপ আমার যাহা বুঝিয়াছে, ইহাই চরম কথা। দুই-এক দিনের মধ্যে চোখের পরদা পড়িয়া যাইবে; তখন দেখিবে, বন্ধুতে বন্ধুতে অধিক প্রভেদ নাই।” হরিনারায়ণ জিজ্ঞাসা করিলেন, “এখন পরমার্থের কথা ছাড়িয়া, বিষয়ের কথা বল। কাগজপত্র দেখিলে ?” ত্রিবিক্রম কহিলেন, “দেখিলাম,—সমস্তই ঠিক আছে।” “অসীম ও ভূপেন্দ্র সমস্ত বিষয়-আশয় হরের নামে লিখিয়া দিয়াছে।” “তাহাতে ক্ষতি নাই। দানপত্রে দান-বিক্রয়ের অধিকার নাই,—সমস্তই দেবোত্তর; ইহারা তিন ভাই সেবাইৎ মাত্র। আমি ভাবিতেছি, দুই-এক দিনের মধ্যেই মুরশিদাবাদ যাত্রা করিব; অসীম ও স্বদর্শন

স্থলপথে এলাহাবাদ যাইবে। হরিদাস চলিতে পারিবে না ; সুতরাং তাহাকে নৌকায় যাইতে হইবে; আর আমরা মুরশিদাবাদ যাইব—কেমন কথা ?” “উত্তম কথা।”

নপুংস্কৃতিম পরিচ্ছেদ

রূপের ঔষধ

হকিম শহীদ-উল্লাহ বর্ধাকার মজুত; তাহার যৌবন বহুদিন অতীত হইয়াছে। বালো ও যৌবনে ভাগ্য-লক্ষ্মীর সহিত সাক্ষাৎ অতি বিরল হওয়ায় যৌবনান্তে অলক্ষ্মী তাহার মুখে একটা চিরস্থায়ী অপ্রসন্নতা অঙ্কিত করিয়া দিয়াছেন। এইজন্যই বোধ হয় সৃষ্টিকিংসক হইলেও যে বোগী একবার তাহাকে দেখিত, সে বিতীর্ণবার তাহার নিকট আসিত না। হকিম শহীদ-উল্লাহের আয় অতি সামান্য ছিল না। কারণ তিনি দিল্লীতে একজন প্রসিদ্ধ হকিমের নিকট চিকিৎসা-শাস্ত্র অধ্যয়ন করিয়াছিলেন এবং সে অভিমান তিনি কখনও বিশ্বৃত হইতে পারেন নাই। আর অল্প এবং ব্যয় অধিক, সুতরাং হকিম সাহেবের অতি কষ্টে দিন গুজরাণ হইত। লোকে বলিত, অর্থাগমের জন্ত তাহাকে অনেক সময়ে নানাবিধ অসদুপায়ও অবলম্বন করিতে হইয়াছে।

পাটনা তখন বড় সহর, স্মতরাং নগরে হকিমের অভাব ছিল না। ইহাদিগের মধ্যে কেহ ধনী, কেহ বা দরিদ্র; কাহারও স্মচিকিৎসক স্মখ্যাতি ছিল, কাহারও বা ছিল না। লোকে বলিত, অনদ্ভূপায়ে অর্থ-উপার্জন করিবার প্রবৃত্তি থাকায় শহীদ-উল্লাহ চিকিৎসা ব্যবসাতে পটু হইয়াও যশোলাভ করিতে পারেন নাই। লোকের কথা মত হউক বা না হউক, যাহারা কোন কারণে প্রকাশ্যে চিকিৎসকের সাহায্য লইতে পারিত না, তাহাদিগের মধ্যে অনেকেই হকিম শহীদ-উল্লাহের নিকট আসিত। এই জ্ঞাত হকিম সাহেবের রোগীর সংখ্যা দিবস অপেক্ষা রাত্রিকালেই বৃদ্ধি পাইত।

কৃষ্ণপক্ষের রাত্রি। গৃহস্থের ঘরে এবং দোকানে বহু আলোক সম্বন্ধে পাটনা নগরীর রাজপথ অন্ধকার। হকিম সাহেবের রোগীরা তীব্র আলোকের পক্ষপাতী ছিল না। স্মতরাং তাঁহার গৃহের প্রবেশদ্বার অন্ধকার এবং সেই অন্ধকারে চারি-পাঁচ জন রোগী লুকাইত ছিল। হকিম সাহেবের একমাত্র পরিচারক তাহাদিগকে একে একে ডাকিয়া লইয়া যাইতেছিল। যাহারা অন্তরে প্রবেশ করিতেছিল, তাহারা আর সে পথে ফিরিতেছিল না। ক্রমে অন্ধকার গৃহদ্বারশূন্য হইয়া আসিল, শেষে এক বখীয়াসী রমণী অবশিষ্ট ছিল; পরিচারক আসিয়া তাহাকে ডাকিয়া লইয়া গেল, তখন হকিম সাহেবের দ্বার শূন্য হইল। প্রোঢ়া যে মুহূর্তে কক্ষমধ্যে প্রবেশ করিল, সেই মুহূর্তে আর একটি বুখাবৃত্তা রমণী দ্রুতপদে অন্ধকার দ্বার-পথে প্রবেশ করিয়া

লুকাইল। পরিচারক ও প্রোচা কক্ষ হইতে কক্ষান্তরে প্রস্থান করিলে অন্ধকারের আশ্রয়ে দ্বিতীয় ব্যক্তি তাহাদিগকে অনুসরণ করিল। তৃতীয় কক্ষে গৃহতলে একটা মলিন শয্যায় হকিম শহীদ উল্লাহ উপবিষ্ট। কক্ষের চারিদিকে ক্ষুদ্র বৃহৎ আধারে হকিম সাহেবের চিকিৎসা-ব্যবসায়ের সাজ-সরঞ্জাম সজ্জিত। প্রোচা কক্ষে প্রবেশ করিয়া অভিবাদন করিয়া দাঁড়াইল; হকিমের মুখের অপ্রসন্নভাব দেখিয়া তাহার কথা কহিতে ভরসা হইল না। হকিম সাহেব ধূমপান করিতেছিলেন। তিনি রোগীর দিকে না চাহিয়াই জিজ্ঞাসা করিলেন, “বেমার?” প্রোচা অপ্রস্তুত হইয়া কহিল, “হকিম সাহেব, বেমার আমার নহে, আমার বেটীর।” “বেটী কোথায়?” “আসিতে চাহে না জনাব।” “তবে চিকিৎসা করিব কেমন করিয়া?” “সেইজন্মই ত আপনার নিকট আসিয়াছি। শুনিলাম, পাটনা সহরে এ রকম রোগের চিকিৎসা আপনি ভিন্ন আর কেহ করিতে পারে না।”

হকিম সাহেব মুখ তুলিয়া চাহিলেন, এবং বৃদ্ধাকে বসিতে বলিয়া জিজ্ঞাসা করিলেন, “বেটীর বয়স কত?” বৃদ্ধ দূরে ভূমিতে উপবেশন করিয়া কহিল, “বিশ বাইশ হইবে।” “বেমার কি?” “তাহা পাটনা সহরের কোন হকিম বসিতে পারিল না; সেইজন্মই ত আপনার নিকট আসিয়াছি। আমি রোগের লক্ষণ বলিয়া যাই, আপনি বুঝিয়া লউন। আমার বেটী তরুণাওয়ারী; দেখিতে খুব সুন্দরী। তাহার এই প্রথম বয়স স্ততরাং খোনার মজ্জিতে বিলক্ষণ দু’গয়সা রোজগার হইত।

বুড়া বয়সে আমার নসীব ফিরিয়া গিয়াছিল। হঠাৎ কোথা হইতে কি হইল, বেটা আমার এক কাকেরকে দেখিয়া পাগল হইয়া গেল। তাহাকে দেখিয়া অবধি মজুরা করা ছাড়িয়া দিল; পাগলের মত পথে পথে ঘুরিয়া বেড়াইতে আরম্ভ করিল; অতুনয় বিনয় কিছুই শুনিল না। লোকে বলিল দানো পাইয়াছে। রোজা আসিয়া কত মন্ত্ৰ বলিল; ওস্তাদ আসিয়া কাড়িল, তাবিজ পরাইল; কিন্তু কিছুতেই কিছু হইল না। আপনি ছাড়া পাটনা সহরের বত নামজাদা হকিম, সকলকেই ডাকিয়া দেখাইয়াছি; কিন্তু কেহই বলিতে পারে নাই বেমারটা কি? এই একমাস হইল কোথায় চলিয়া গিয়াছিল, আজি সকালে ফিরিয়া আসিয়াছে। আমি সেইজন্য এখন আপনার নিকট আসিয়াছি।”

হকিম সাহেব হাঁকার নলে মুখ-সংযোগ করিয়া গম্ভীরভাবে কহিলেন, “বেমার কঠিন, ঔষধ অনেকদিন ব্যবহার করিতে হইবে, নতুবা ফল হইবে না।” বৃদ্ধা কাঁদিয়া কহিল, “জনাব, আমি অতি গরীব, হকিম ও রোজাকে গয়সা দিয়া সর্বস্বান্ত হইয়া গিয়াছি। যাহা কিছু ছিল বেচিয়া কিনিয়া এই দুইটা আশ্রুফি আনিয়াছি। আরাম হইলে যেমন করিয়া পারি আর দুইটা আশ্রুফি আনিয়া দিব।” “দুই আশ্রুফি ত এক সপ্তাহের ঔষধের দাম, দুই তিন সপ্তাহ ঔষধ ব্যবহার না করিলে ফল হওয়া কঠিন।” বৃদ্ধা হকিমের কথা শুনিয়া কাঁদিয়া লুটাইয়া পড়িল এবং কহিল, “হজুর, মা বাপ, আমি গরীব নাচার।”

হকিম শহীদ-উল্লাহ মাছুষ চিনিতেন। তিনি বুঝিলেন যে দাবী-দাওয়া অধিক করিলে শিকার পলাইবে। তিনি কহিলেন, “আচ্ছা, দুইটা আশ্রুফি আন, এক সপ্তাহ পরে আবার আসিও।” বৃদ্ধা কহিল, “ঔষধ যে খাইতে চাহে না জনাব?” হকিম জিজ্ঞাসা করিলেন, “আহারে অকুচি আছে?” বৃদ্ধা কহিল, “না।” হকিম একটা শ্বেতবর্ণ চূর্ণ লইয়া বৃদ্ধার হস্তে দিলেন এবং কহিলেন, “এই ঔষধটা স্নানান্তে সরবতের সহিত পান করাইয়া দিবে, তাহা হইলে তোমার বেটা দুই তিন দিন অজ্ঞান হইয়া থাকিবে; সেই সময়ে নিত্য প্রভাতে এই দ্বিতীয় ঔষধটা দুগ্ধের সহিত মিলাইয়া পান করাইয়া দিও। দুই তিন দিন পরে জ্ঞান হইলে তোমার বেটা আর ঔষধ পান করিতে আপত্তি করিবে না।” বৃদ্ধা দুইটা সূবর্ণ মুদ্রা দিয়া ঔষধ লইল এবং পরিচারক আসিয়া তাহাকে অন্তঃস্থে লইয়া গেল। এই সময়ে দ্বিতীয়া রমণী কক্ষমধ্যে প্রবেশ করিল।

অভ্যাসমত হকিম শহীদ-উল্লাহ তাহাকে জিজ্ঞাসা করিলেন, “বেমার?” রমণী অভিবাদন করিয়া কহিল, “জনাব, আমার বেমার রূপ! রূপ কেমন করিয়া জলিয়া যায় বলিতে পারেন?” বেগুনিন্দিত কণ্ঠস্বর শুনিয়া হকিম শহীদ-উল্লাহ মুখ তুলিয়া চাহিলেন; বুর্ণার আবরণের মধ্যেও রমণীর সুগঠিত অবয়বগুলি স্পষ্ট দেখা যাইতেছিল। হকিম ক্ষুদ্র পাছকা সন্নদ্ধ চরণের দিকে চাহিলেন। কনকবর্ণ সুন্দর ক্ষুদ্র পদদ্বয় দেখিয়া তাঁহার মুখের চিরস্থায়ী অপ্রসন্নভাব মুহূর্তের জন্ত দূর হইল। হকিম শহীদ-

উল্লাহ প্রসন্ন হইয়া রমণীকে কহিলেন “বস।” রমণী গৃহের অপর প্রান্তে এক জীর্ণ গালিচায় উপবেশন করিলে হকিম কহিলেন, “তোমার কি রাত্রিতে নিদ্রা হয়?” প্রশ্ন শুনিয়া রমণী সহসা বুখা দূর করিয়া ফেলিয়া দিল। তাহার রূপে ক্ষুদ্র কক্ষ যেন তৎক্ষণাৎ উজ্জ্বল হইয়া উঠিল। বৃদ্ধ হকিম তাহার দিক হইতে চক্ষু ফিরাইতে না পারিয়া, নির্নিমেষ নয়নে তাহার দিকে চাহিয়া রহিলেন। রমণী কহিল, “হজরৎ, আমার রাত্রিতে নিদ্রা হয়, আমার আহারে অরুচি নাই, আমি উন্মাদিনী নহি;—এই রূপ আমার কাল; এই রূপের জন্ত আমার সমস্ত সুখ-সম্পদ দূর হইয়াছে। আমার এই রূপ অপরের সুখের ঘরেও দুঃখের আগুন জ্বালাইয়া দিয়াছে। হকিম সাহেব, আমার রূপ কেমন করিয়া জ্বলিয়া যায়, তাহা বলিয়া দিতে পারেন? শুনিয়াছি আপনি অষ্টটন ঘটাইতে পারেন, আমার অর্থের অভাব নাই, আপনি যত অর্থ চাহেন আমি দিব। আমার এই অনর্থের মূল রূপ দূর করিয়া দিতে পারেন?” অদৃশ্যবলহী চিকিৎসক হকিম শহীদ-উল্লাহ রমণীর কথা শুনিয়া অত্যন্ত আশ্চর্য হইলেন। তাঁহার অক্লান্ততাকী ব্যাপী জীবনে বহুবিধ নর-নারী বৈধ-অবৈধ সংস্র কারণে তাঁহার সাহায্য ভিক্ষা করিয়াছে; কিন্তু এরূপ অভাবনীয় আবদার অত্যাধি কেহ তাঁহার নিকট করে নাই। বৃদ্ধ হকিম কহিলেন, “বেটী, আমি বৃদ্ধ হইয়াছি, বহুদিন সংসারে আসিয়াছি, অনেক দেখিয়াছি, হাজার হাজার রোগীর চিকিৎসা করিয়াছি; কিন্তু তোমার মত অনুরোধ আজি পর্য্যন্ত কেহ

আমার নিকট করে নাই। রূপ ঈশ্বরের দান, রূপ লাভ মানুষের সাধ্যাত্ত নহে। তোমার দেব দুর্লভ রূপ কেন হারাইতে চাহ মা? মাগুক কি চলিয়া গিয়াছে, না বিবাদ করিয়াছে? প্রথম যৌবনে এই সব সামান্য কারণে বিরাগ আসে বটে, মা! তোমার রূপ জ্বালাইয়া দিতে পারি, কিন্তু একবার জলিয়া গেলে ছুনিয়ার সমস্ত হকিম একত্র হইলেও তোমার এই ভুবনমোহিনী রূপ আর ফিরাইয়া আনিতে পারিবে না।”

রমণী হাসিল এবং ধীরে ধীরে কহিল, “জনাব, আমি কসবী ; শুধু কসবী নহি, কসবীর বেটী কসবী। আজি দশ বৎসর ধরিয়া এই পাটনা সহরের আবাল-বৃদ্ধ-বনিতার মুখে শুনিয়া আসিতেছি যে, আলমগীর বাদশাহের মত আমার রূপ জগজ্জয়ী। রূপের গুণ-ব্যাখ্যান শুনিয়া কণ বধির হইয়াছে। জনাব, বেশ্যার কি মাগুক থাকে? বেশ্যার মাগুক আশরুফি। শুনিয়াছি ‘তুই এক জন বেশ্যার মাগুক থাকে ; কিন্তু তাহারা তখন আর বেশ্যা থাকে না, তাহারা তখন রমণী হইয়া যায়। এই রূপে জগৎ জয় করিয়াছি, পুরুষ জাতিকে অবহেলায় পড়ে দলন করিয়াছি ; কিন্তু সেই রূপই এখন আমার কাল হইয়া দাঁড়াইয়াছে ; রূপ আমার সদগতির অন্তরায়, রূপ আমার কুপথ প্রদর্শক আর কেবল আমার সর্বনাশের কারণ নহে, অনেক গৃহস্থের গৃহদাহের কারণ। জনাব, বেশ্যার রূপ জ্বালাইয়া দিলে ছুনিয়ার মঙ্গল হইবে—আল্লাহ প্রসন্ন হইবেন। কত সতী তুই হাত তুলিয়া আপনাকে দোয়া করিবেন। আর আমি

আমার পাপের ধন দিয়া আপনার দুই হাত আশ্রফিতে ভরিয়া দিব। জনাব, আপনি আমার বাপের বয়সী; মনে বিচার করিয়া দেখুন, যে বেষ্ঠা স্বৈচ্ছায় নিজ রূপ ধ্বংস করিতে চাহে, সে কি কখনও সে রূপ আর ফিরিয়া পাইবার চেষ্টা করে ?”

হকিম রমণীর কথা শুনিয়া স্তম্ভিত হইলেন। তাহা দেখিয়া রমণী তাঁহার পদতলে পাঁচটি স্বর্ণ মুদ্রা ফেলিয়া দিল। স্বর্ণ দেখিয়া শহীদ-উল্লাহের স্তম্ভনোত্তীর্ণ হইল; তাঁহার মুখের চিরস্থায়ী অশ্রুস্রব ভাব ফিরিয়া আসিল। তিনি কহিলেন, “তোমার রূপ দূর করিতে পারি, কিন্তু যন্ত্রণা পাইবে।” রমণী কহিল, “হজরৎ, আমি অসহ নরক যন্ত্রণা সহ্য করিতেছি। ইহা হইতে অসহ্য যন্ত্রণা আর কিছুই হইতে পারে না।” “সর্কাজে ক্ষত হইবে।” “ক্ষতি নাই।” “মূল্য দশ আশ্রফি।” “ঔষধের কার্য্য হইলে আর দশ আশ্রফি দিয়া যাইব।” রমণী আর পাঁচটি আশ্রফি ফেলিয়া দিল। হকিম একটা মৃণ্ডাণ্ডে ঔষধ দিয়া তাহাকে কহিলেন, “ইহা চক্ষু বাঁচাইয়া সর্কাজে লেপন করিও, ক্ষত হইবে, রূপ জলিয়া যাইবে।” রমণী অভিবাদন করিয়া নিষ্ক্রান্ত হইল।

অন্ধকারময় রাজ-পথে এক ব্যক্তি রমণীর জল প্রতীক্ষা করিতেছিল, রমণী তাহা জানিত না। সে রমণীর অঙ্গে হস্তা-র্পণ করিয়া কহিল, “মা, ঔষধটা আমাকে দাও।” রমণী তাহার অঙ্গস্পর্শে শিহরিয়া উঠিল। তাহা দেখিয়া আগন্তুক কহিল, “ভয় নাই মা, আমি যে তোমার সন্তান, আমি হরিদাস।” মণিয়া

ঔষধ বৃক্ষের হস্তে দিয়া আশ্রয়চ্যুত। ব্রততীর জায় বৃক্ষের পাদমূলে
লুটাইয়া পড়িল।

অষ্টবর্ষিষ্ঠম পরিচ্ছেদ

নবীন বৈষ্ণবী

অসীম স্মৃতিগ্রাম পরিত্যাগ করিবার পরে দুই তিনমাস কাটিয়া গিয়াছে, দ্বিবিক্রম ও হরিনারায়ণ মুর্শিদাবাদে চলিয়া গিয়াছেন। সৈয়দ আকবুল্লা খাঁ ও হোসেন আলি খাঁর সহিত মিলিত হইয়া বাদশাহ্ ফরুকখ্‌সিয়ব্ কাজোয়ার যুদ্ধে তাঁহার জ্যোতিতাত পুত্র শাহাজাদা আজ্জুদ্দীনকে পরাজিত করিয়া আগ্রায় পৌঁছিয়াছিলেন। দিল্লী হইতে বাদশাহ্ জহান্নার শাহ্ আগ্রার নিকট আসিয়া যমুনার নিকটে সমুগড় নামক স্থানে শিবির সংস্থাপন করিয়াছিলেন। এই সময়ে হঠাৎ বৃষ্টি আরম্ভ হইয়া যমুনা নদীর জল সহসা বাড়িয়া উঠায় জহান্নার শাহের দলের লোক স্থির করিয়াছিল যে, নদীর জল না কমিলে ফরুকখ্‌সিয়বরের সৈন্ত নদী পার হইতে পারিবে না, তাহার। এই জন্য নিশ্চিন্ত হইয়া বসিয়াছিল কিন্তু সৈয়দ আকবুল্লা খাঁ দুই তিন কোশ দূরে অপর এক স্থানে নদী পার হইয়া সমস্ত সৈন্ত পার করিয়া দিয়াছিলেন এবং বাদশাহ্ ফরুকখ্‌সিয়ব্ সেই সঙ্গে পার হইয়া আকবরের সমাধির নিকট আগ্রা হইতে চার কোশ দূরে শিবির স্থাপন করিয়াছিলেন। এই স্থানের নাম সরাই রোজবাহানী

এবং ইহা আগ্রা হইতে মথুরা ও দিল্লী যাইবার পথে অবস্থিত। জহান্দার শাহের দলের লোক যখন শুনিল যে, ফরুক্‌সিয়রের সৈন্য নদী পার হইয়া আসিয়াছে, তখন তাহারা ছত্রভঙ্গ হইয়া আগ্রার দিকে পলায়ন করিল। ১১২৪ হিজরাকে, ১২ই জিল-হিজ্জা তারিখে, অর্থাৎ বাঙ্গালা সন ১১১৯ সালের পৌষ মাসের শেষ ভাগে রোজবাহানী গ্রামের সরাইয়ের চারি পার্শ্বে ফরুক্‌সিয়রের দলের সৈন্য নিজেদের অস্ত্র-শস্ত্র পরিষ্কার করিতেছিল, বাদশাহী সড়কের উভয় পার্শ্বে বাজার বসিয়া গিয়াছিল, সে বাজারে খাদ্য-দ্রব্য ও পানের দোকানই অধিক কেবল দুই এক-খানা দোকানে বস্ত্র ও অস্ত্র-শস্ত্র বিক্রী হইতেছিল। পানের দোকানগুলিতে অত্যন্ত অধিক জনতা, কারণ প্রত্যেক পানের দোকানের সম্মুখে একজন পুরুষ অথবা রমণী সেতার বাজাইতে-ছিল অথবা গাহিতেছিল।

বাজারের উত্তর সীমায় অরহর ক্ষেত্রের ছায়ায় একজন এক-খানা বড় রকমের পানের দোকান খুলিয়াছিল কিন্তু গায়ক অথবা গায়িকা সংগ্রহ করিতে না পারায় তাহার দোকানে খরিন্দার জুটিতেছিল না। এই সময়ে সেই পথ দিয়া এক বৃদ্ধ ভিক্ষুক তাহার যুবতী কণ্ঠার হাত ধরিয়া মথুরার পথে যাইতেছিল, দোকানদার তাহাকে দেখিয়া জিজ্ঞাসা করিল, “বাবা, তুমি কি গাহিতে জান?” বৃদ্ধা ভিখারী কহিল, “না, জানি না।” পান-ওয়াল আবার জিজ্ঞাসা করিল, “বাবা, তোমার বেটী কি গাহিতে জানে?” বৃদ্ধা বিরক্ত হইয়া বলিল, “তাহা আমি

বলিতে পারি না।” পানওয়ালা তখন অত্যন্ত কাতর হইয়া বৃদ্ধের হাত ধরিয়া বলিল, “বাবা, আমার উপর একটু মেহেরবানি কর, তুমি দয়া না করিলে আমার বড় লোকসান হইবে। একজন গারক বা গায়িকা পাই নাই বলিয়া আমার দোকানে খরিদ্ধার জুটিতেছে না। সন্ধ্যা হইয়া আসিল, সকালবেলা লড়াই বাধিবে, এখন খরিদ্ধার না জুটিলে আমার মাল-মসলা সমস্তই নষ্ট হইয়া যাইবে।” বৃদ্ধ অত্যন্ত বিরক্ত হইয়া রমণীকে জিজ্ঞাসা করিল, “না, তুমি কি গাহিবে?” রমণী একটু ভাবিয়া বলিল, “আমি গাহিলে যদি ইহার উপকার হয় বাবা, তাহা হইলে গাহিতে আপত্তি কি?” পানওয়ালা কতকগুলি কাঁচা অরহরের ডালপালা আনিয়া পথের ধারে কাদার উপর বিছাইয়া দিল, বৃদ্ধ তাহার উপর বসিল, তাহার কণ্ঠ তাহার সম্মুখে দাঁড়াইয়া গান ধরিল—

কাঁচা গেল শ্যামবায়

বিসরি বংশীবট

শ্যাম যমুনাতট

বিসরি যশোদা মায়।

গায়িকার সুস্পষ্ট সুমিষ্ট কণ্ঠস্বর শিবিরের তুমুল কোলাহল ভেদ করিয়া উঠিল, মুহূর্তের জন্ত জন-সম্মত স্তব্ধ হইয়া রহিল, তাহার পর লঙ্করের সমস্ত লোক সেই গায়িকার সন্ধানে ছুটিল। গায়িকা গাহিল—

বিসরি গোপকুল

ধেহুকুল আকুল

বিসরি শ্রীরাধিকায়।

চারিদিক হইতে লোক আসিয়া যখন সেই পানওয়ালার দোকানের সম্মুখে জমিল তখন গায়িকা এই ছইটি চরণ ঘুরাইয়া কিরাইয়া গাহিতে আরম্ভ করিল। একজন শ্রোতা বলিল, “নাগীটা যেন কোকিল রে!” সত্য সত্যই গায়িকা স্ত্রী হইলেও মসৌকৃষ্ণবর্ণা। গায়িকা গাহিল—

তুঁহা পদ পেখন বিরহে অতুখন

চঞ্চল চরণে ধায়।

বিসরি লাজ ভয় সময় অসময়

গোপবধু যমুনায়া।

একজন সিপাহী কাজোয়ার যুদ্ধে লুটিয়া অনেক টাকা পাইয়াছিল, সে গায়িকাকে একটা চাঁদির টাকা দিতে গেল কিন্তু রমণী তাহা লইবার জন্ত হাত বাড়াইয়া দিল না; সিপাহী ক্ষুব্ধ হইয়া টাকাটি বুড়া বৈরাগীকে দিতে গেল কিন্তু সেও মাথা নাড়িয়া টাকা লইতে অস্বীকার করিল। তখন সিপাহী ক্ষুব্ধ হইয়া একজন শ্রোতাকে বলিল, “টাকা লইবে না তো গান গাহিতে আসিয়াছে কেন?” শ্রোতা কহিল, “উহারা পথ দিয়া যাইতেছিল, দোকানদারের খরিদার না জুটায় তাহার অনুরোধে গাহিতে আরম্ভ করিয়াছে।” গায়িকা এই সময়ে গাহিয়া উঠিল—

পদযুগ রাতুল পরশন ব্যাকুল

অতি দীনধিন কাঁয়।

আনমনে যুম্নে বৃহ বৃহ গমনে

উদাসে উজানে যায়।

এই সময়ে জনতার প্রাস্তে কোলাহল উঠিল, লোক চারিদিকে পলাইতে আরম্ভ করিল, পানওয়ালা ব্যস্ত হইয়া উঠিয়া দেখিল যে, একজন সওয়ার পথ হইতে লোক সরাইয়া দিয়া তাহার দোকানের দিকেই আসিতেছে। গান থামিয়া গেল, লোক সরিয়া গেল, পানওয়ালা বিলক্ষণ ছ'পয়সা উপার্জন করিতেছিল, সে মাথায় হাত দিয়া বসিয়া পড়িল। সওয়ার পানওয়ালার দোকানের সম্মুখে আসিয়া বুড়াকে জিজ্ঞাসা করিল, “মণিয়া কোথায়? মণিয়া! মণিয়া বাড়ি! আমি ফরিদ খাঁ, পাটনার ফরিদ খাঁ।” গায়িকা তখন মন্তকের অবগুণ্ঠন টানিয়া দিয়া বুড়ার পশ্চাতে দাঁড়াইয়া ছিল, মোগল বৈরাগীকে জিজ্ঞাসা করিল, “তুই কে?” বুড়া কহিল, “হজুর, আমি হিন্দু ফকির, বাঙ্গালা দেশ হইতে আসিতেছি, মথুরায় যাইব। এ আমার পালিত কন্যা।” উত্তর শুনিয়া দীর্ঘাকার মোগল বোদ্ধা যেন সহসা ক্ষুদ্রকায় হইয়া গেল, যে আশা-বল-দৃপ্ত হইয়া সে আসিয়াছিল, হতাশ হইয়া সে যেন তাহার দেহের সমস্ত বল, দর্প ও গর্ব হারাইয়া ফেলিল, তাহার দীর্ঘ দেহ যেন জরার ভারে নত হইয়া পড়িল। উদ্ধত মোগল শাস্ত শিষ্ট ব্যক্তির স্তায় ফিরিয়া গেল।

তখন চারিদিক হইতে লঙ্ঘরের লোক ফিরিয়া আসিয়া গায়িকাকে পুনরায় গাহিতে অনুরোধ করিল, পানওয়ালা দোকান হইতে উঠিয়া আসিয়া বুকের হাতে পায় ধরিতে লাগিল। তাহার দিগের অনুরোধে বাধ্য হইয়া গায়িকা আবার গাহিল—

পদযুগ রাভুল

পরশন ব্যাকুল

অতি দীন-খিন কায় ।

আনমনে যুমনে

মৃদু মৃদু গমনে

উদাসে উজানে যায় ।

বিসরি বৃন্দাবন

গোপিনী বিনোদন

কাঁহা গেল শ্রামরায় ।

মোগল তখনো অধিক দূর যায় নাই, গায়িকার কণ্ঠস্বর তাহার হৃদয় বিদ্ধ করিল, সে ঘোড়ার লাগাম টানিয়া দাঁড়াইয়া গেল । ফরিদ খাঁ ফিরিল, এবারে অতি দীর্ঘ পদে ফিরিল এবং জনতার প্রাস্তে আসিয়া দাঁড়াইল । তাহাকে দেখিয়া দুই একজন শ্রোতা সন্ত্রমে পথ ছাড়িয়া দিল কিন্তু সে আর অগ্রসর হইল না । ফরিদ খাঁ দেখিল যে গায়িকা মণিয়ার মত বটে কিন্তু তাহার দৃষ্টি চাকলা-বিহীন, স্থির, তাহাতে বারবণিতা স্থলভ নৃত্য নাই, অঙ্গ-ভঙ্গিতে লালিত্য আছে কিন্তু লজ্জাহীনতা নাই । ফরিদ খাঁ দীর্ঘনিশ্বাস ত্যাগ করিয়া সেস্থান হইতে চলিয়া গেল ।

একোনসপ্ততিতম পরিচ্ছেদ

আগ্রা যুদ্ধের পরে

১৩ জিলহিজ্যা তারিখে সকাল হইতে বৃষ্টি পড়িতে আরম্ভ হইল এবং ঘন কুয়াশায় সমস্ত জগৎ অন্ধকার হইয়া গেল । দুই

বাদশাহের পক্ষের লোক যে যেখানে আশ্রয় পাইল লুকাইয়া রহিল। সরাই রোজবাহানীর অনতিদূরে একটা পুরাতন কবরের মধ্যে বুড়া হরিদাস বৈষ্ণব ও গণিয়া আশ্রয় লইয়াছিল, রাত্রিকালে তিনজন রাজপুত সিপাহী, একটা গর্দভ ও দুইটা কুকুর আসিয়া তাহাদিগের সঙ্গী হইল, কারণ পৌষমাসের প্রচণ্ড শীতে বৃষ্টির জন্য অনাবৃত স্থানে বাস করা অসম্ভব হইয়া উঠিয়াছিল। সমস্ত দিন ধরিয়া বৃষ্টি পড়িল। অপরাহ্ণে সিপাহী তিনজন বৃষ্টি থামিয়াছে দেখিয়া চলিয়া গেল, যাইবার সময় হরিদাসকে বলিয়া গেল যে, এখনই দুই ফোঁজে যুদ্ধ বাধিবে মৃতরাং সে যেন আজ আর পথে বাহির না হয়।

আগ্রায় যুদ্ধ যখন শেষ হইল তখন দ্বিতীয় প্রহর রাত্রি অতীত হইয়া গিয়াছে, সমস্ত রাত্রি হরিদাস ও গণিয়া জাগিয়া রহিল, প্রথম রাত্রিতে যুদ্ধের কোলাহলে এবং শেষ রাত্রিতে আহত দিগের চীৎকারে সে রাত্রিতে আগ্রার চারিপার্শ্বের চারি পাঁচ ক্রোশের লোক ঘুমাইতে পারে নাই। পরদিন শুভাতে জুলফিকার খাঁ ও বাদসাহ জহান্দার শাহ পলাইয়া গিয়াছে শুনিয়া সমস্ত লোক আশ্চর্য্য হইয়া গেল। পুরাতন বাদশাহকে ভুলিয়া সকলেই নূতন বাদশাহের বন্দনা করিতে ছুটিল, সেই অবসরে হরিদাস ও গণিয়া কবর হইতে বাহির হইয়া মথুরার পথ ধরিল।

তখন পথের উভয় পার্শ্বের ঘাসের উপরে শিশির জমাট বাধিয়া ছিল, হেমন্তের সূর্য্য তখনও পূর্বাকাশের কোল দখল

করিয়া বসিতে পারে নাই। পূর্বের রাতে যুদ্ধের চিহ্ন আগ্রা হইতে ছুটিয়া আসিয়া এতদূর পর্য্যন্ত পৌঁছিয়াছিল। একটা স্বন্দর ঘোড়া যথাসাধ্য হাত পা ছুড়িয়া শীঘ্র মরিবার চেষ্টা করিতেছিল, একটা বন্দুকের গুলি তাহার উদর ভেদ করিয়া পৃষ্ঠ দিয়া বাহির হইয়া গিয়াছিল। তাহার মৃত্যুর প্রতীক্ষায় দুইটা শকুনি ও কতকগুলো কাক সেই হেমন্তের উষালোকেও পথের ধারে বসিয়াছিল। মণিয়া ঘোড়াটি পার হইবার সময় তাহার মৃত্যু যন্ত্রণা দেখিয়া শিহরিয়া উঠিল, তাহা দেখিয়া বৃদ্ধ বৈরাগী বলিল, “মা, দুনিয়ার থাকিতে হইলে এত সামান্য কষ্ট দেখিয়া শিহরিলে চলিবে কেন? মানুষ ইহার পূর্বপুরুষকে বন হইতে ধরিয়া আনিয়া পোষ মানাইয়াছিল, সেই মানুষই ইচ্ছা করিয়া ইহাকে এত যন্ত্রণা দিয়া মারিতেছে। তুমিও যখন মানুষ, যখন মানুষের সনাজে বাস করিবে তখন মানুষের কাজ দেখিয়া শিহরিলে চলিবে কেন?” মণিয়া দ্বিতীবার শিহরিয়া বলিল, “বাবা, মানুষ ইচ্ছা করিয়া জীবকে এত কষ্ট কেন দেয়, তাহা তো বুঝিতে পারি না।” বৃদ্ধ হরিদাস জিভ বাহির করিয়া বলিল, “অমন কথা মুখে আনিও না মা, আমরা ভগবানের লীলার পুতুল, তিনি আমাদেরকে যে ভাবে খেলান আমরা সেই ভাবেই খেলি।” মণিয়া কথাটা বুঝিতে না পারিয়া জিজ্ঞাসা করিল, “বাবা, তুমি কি বলিলে, আমি বুঝিলাম না। জহান্নার শাহ যদি তাহার ভ্রাতুষ্পুত্রের সহিত যুদ্ধ না করিত তাহা হইলে হয় তো এমন স্বন্দর ঘোড়াটি অকালে মরিত না।”

“যুদ্ধ না করিয়া উপায় কি মা? যিনি পুতুল নাচান তিনি পুতুলকে যে ভাবে নাচান, পুতুল সেই ভাবেই নাচে। জহান্কার শাহ কি ইচ্ছা করিলে যুদ্ধ বন্ধ করিতে পারিত? সিংহাসন ছাড়িয়া দিলেও নহে।” মণিয়া কি বলিতে যাইতেছিল, সহসা অশ্রুট আর্দ্রনাদ শুনিয়া তাহার মুখের কথা মুখেই রহিয়া গেল, মণিয়া অনুসন্ধান করিয়া দেখিল, বাদশাহী সড়কের পার্শ্বে একটা প্রকাণ্ড ক্রোশমিনার আশ্রয় করিয়া একজন দীর্ঘাকার মোগল পড়িয়া আছে এবং তাহার নিম্নে আরো দুই একটা দেহ দেখিতে পাওয়া যাইতেছে। তাহাদের মধ্যে কে জীবিত কে মৃত তাহা বলা কঠিন, মণিয়া তাহা দেখিয়া স্থির থাকিতে না পারিয়া ছুটিয়া গেল এবং মোগলকে দূরে সরাইয়া আনিয়া ক্রোশমিনারের পাদপীঠমূলে শোয়াইয়া রাখিল। হরিসাস দূরে দাঁড়াইয়া কহিল, “মা, সেকন্দ্ৰ হইতে আগ্রা পর্য্যন্ত মৃত দেহ ছড়াইয়া পড়িয়াছে, তুমি কৃত লোকের গুণ্য করিবে? সমস্ত দিন পথ চালালে তবে যদি সন্ধ্যাবেলায় মথুরায় পৌছিতে পারি!” মণিয়া বুড়ার হাতের কমণ্ডলু কাড়িয়া লইয়া মোগলের মুখে জল ছিটাইয়া দিতে দিতে বলিল, “লোকটা এখনো বাঁচিয়া আছে বাবা, যতক্ষণ আছে ততক্ষণ ছাড়িয়া যাইতে পারিব না।” হরিদাস একটু হাসিয়া দূরে বসিল। এই সময় মোগল মুখব্যাধান করিল, তাহা দেখিয়া মণিয়া কমণ্ডলু হইতে তাহার মুখে জল ঢালিয়া দিল, জল দিয়াই মণিয়া চীৎকার করিয়া কাঁদিয়া উঠিল। সে বলিল, “ফরীদ, ফরীদ ভাই।” এই সময়ে বৃদ্ধ হরিদাসও চঞ্চল

ইইয়া উঠিল যে স্থানে ফরীদের দেহ পড়িয়াছিল বুড়া সেই স্থানে আসিয়া আর একটা দেহ পরীক্ষা করিতে আরম্ভ করিল। অল্পক্ষণ পরে ফরীদ চক্ষু মেলিয়া চাহিয়া বলিল, তাহার কণ্ঠস্বর তখনও ক্ষীণ, “আমি ফরীদ খাঁ, পাটনায় আমার বৃদ্ধ পিতামাতা আছেন, তাহাদের সংবাদ দিও, বলিও, ফরীদ পিতামহের মত মরিয়াছে।” মণিয়া চীৎকার করিয়া কঁাদিতে কঁাদিতে বলিল, “ফরীদ, ভাই! আমি যে মণিয়া বাদে, তুমি আমাকে চিনিতে পারিতেছ না?” ফরীদ তাহার দিকে চাহিয়া বলিল, “তুমি দোজখের বাদী, আর আমার মণিয়াজান বেহেশ্তের চামেলী ফুলের মত সফেদী।” মণিয়া তাহার মুখের কাছে মুখ লইয়া গিয়া বলিল, “ফরীদ, ভাই! আমি যে আত্মগোপন করিবার জন্ত রং মাখিয়া আসিয়াছি, আমি সত্য সত্যই মণিয়া, বাদীই বল আর পরীজাদীই বল—আমিই সেই মণিয়া।” তখন ফরীদ বহুকষ্টে তাহার আহত হাত দুইখানা তাহার স্বন্ধে স্থাপন করিয়া বলিল, “মণিয়া! খোদা আমার মত পাগীকেও ভোলে না, তাই মৃত্যুকালে তোমাকে পাঠাইয়া দিয়াছেন। মণিয়া, পাটনায় ফিরিয়া যা, বাপজানকে বলিয়া আয় যে, তাহার বেটা কসবী তওয়াইফের পিছন পিছন ঘুরিত বটে কিন্তু মৃত্যুকালে সে সমস্ত পাপের প্রায়শ্চিত্ত করিয়া গিয়াছে, সে মোগল বাদশাহের সাত পুরুষের নিমক ভুলে নাই। আমার বাপজানকে আমার মরণের খবর দিয়া তোমার যেখানে ইচ্ছা চলিয়া যাইও।” মণিয়া কঁাদিতে কঁাদিতে

বলিল, “ফরীদ, তুই যে বাপ-মায়ের নয়নের মণি, আমি তোকে মরিতে দিব না।”

এই সময়ে বুড়া বৈরাগী আসিয়া মণিয়াকে জিজ্ঞাসা করিল, “কমণ্ডলুতে কি আর জল আছে মা?” মণিয়া মুখ তুলিয়া চাহিয়া দেখিল সেই প্রাচীন ক্রোশমিনারের মূলে রাশি রাশি মৃতদেহের মধ্যে আর একজন পরিচিতের সুপরিচিত মুখ মৃত্যুর কৃষ্ণ আবরণের মধ্যে স্পষ্ট হইয়া উঠিয়াছে। মণিয়া আবার আর্তনাদ করিয়া উঠিল। কমণ্ডলু হইতে দ্বিতীয় ব্যক্তির মুখে জল দিতে দিতে বুড়া কহিল, “মা, গোপালের ইচ্ছা নয় যে, আজ মথুরায় যাই, মনে করিয়া ছিলাম বিশ্রাম ঘাটে বিশ্রাম করিব কিন্তু গোপালের ইচ্ছা অনুরূপ।” মণিয়া তখন মৃত্যুর জন্ত ফরীদকে ত্যাগ করিয়া দ্বিতীয় ব্যক্তির দেহের নিকটে বসিল, অল্পক্ষণ শুশ্রূষার পরে সে ব্যক্তি কহিল, “আমার নাম অসীম রায়, জগতে আমার কেহ নাই, কাহাকেও সংবাদ দিতে হইবে না।” অসীমের মুখের চারিদিকে রক্ত জমিয়া পোষের ভীষণ শীতে তুষারের মত কঠিন হইয়া গিয়াছিল।

সপ্ততিতম পরিচ্ছেদ

সরস্বতীর নবাবতার

দুর্গাঠাকুরাণী কহিলেন, “দেখ বোঁ, মুখখানা কিন্তু বড়ই চেনা

চেনা, আমার সর্বদাই মনে হয় যে ইহাকে অনেকবার দেখিয়াছি।” বধু বলিলেন, “আমারও তাহাই মনে হয় ঠাকুর কি, গলার আওয়াজটা যেন অনেকবার শুনিয়াছি।” নিকটে শৈল বসিয়া ছিল, সে বলিয়া উঠিল, “দিদিদের যেমন কথা! বৈষ্ণবী-দিদি বলিয়াছেন যে তাঁহার বাড়ী তাঁহার চাল-চলন, কথাবার্তা সমস্তই ঢাকাই বাঙ্গালার মত। তোমরা কি কখনও ঢাকায় গিয়াছ যে, উহাকে চিনিবে?”

দুর্গা। ঢাকায় যাইব কেন ভাই? ঢাকার কত লোক আমাদের মুশিদাবাদের আড়পারে ডাहा পাড়ায় বাস করিয়াছে।

বধু—ঢাকাই বাঙ্গাল অনেক দেখিয়াছি কিন্তু ইহার কথাবার্তা তাহাদের মত নহে।

এই সময়ে হাসিতে হাসিতে সতী আসিয়া জিজ্ঞাসা করিল, “কিসের কথা হইতেছে ভাই?” শৈল মুখখানা ভার করিয়া বলিল, “সতী-দিদি, নূতন বৈষ্ণবী প্রথম দিন থেকে ইহাদের দুই জনের কোপ নজরে পড়িয়াছে। গরীবের মেয়ে, দুর্বস্থায় পড়িয়া স্বামীর সঙ্গে বিদেশে আসিয়াছে, তাহার উপর তোমাদের এত রাগ কেন?”

বধু—রাগ কিসের ভাই? গলাটা চেনা চেনা, তাহাই বলিতেছিলাম।

দুর্গা—হ্যাঁ ভাই ছোট-বৌ, তোর নূতন বন্ধু কি গান গাহিতে জানে?

শৈল—না ভাই, উহার যে লজ্জা, উহার মুখ দিয়া গান

বাহির করাই কঠিন। সেদিন উহাকে একথানা নূতন শাড়ী দিয়াছিলাম, লজ্জায় কিছুতেই সেখানা পরিল না।

দুর্গা—আমার কিন্তু মনে হয় ভাই, মাগীটা দিনরাত্তির বহুরূপী সাজিয়াই আছে।

সতী—অমন কথা মুখে আনিও না দিদি, মেয়ে আমার বড় লক্ষী, দুটা একটা জিনিষপত্র দিই বলিয়া কেনা বাঁদীর মত সমস্ত দিন খাটিয়া মরে। সময়ে সময়ে কি ভাবে বটে, এককালে উহাঙ্গর অবস্থা ভাল ছিল, এখন সময় মন্দ পড়িয়াছে, সেই জন্য বোধ হয় দুঃখ করে। শ্রীমতী আমার বড় লক্ষী মেয়ে, উহাকে কেহ দোষ দিও না ভাই।

দুর্গা—না ভাই, তোমার লক্ষীমন্ত মেয়েকে কেহ দোষ দেয় নাই। মাগীর নাম বুঝি শ্রীমতী? আমরা তো এতদিন পর্য্যন্ত জুপাইয়া তাহার মুখ হইতে নামটি বাহির করিতে পারি নাই।

এই সময়ে একটি মধ্যবয়সী সধবা আসিয়া মাথার কাপড় টানিয়া দিয়া দূরে দাঁড়াইল, তাহাকে দেখিয়া সতী জিজ্ঞাসা করিল “কি চাই মা?” রমণী কহিল, “কিছু না মা, ও ভাঁড়ীর কর্তা-দাদা ছোটমাকে ডাকিয়াছেন।” পিতা ডাকিয়াছেন বলিয়া শৈল চলিয়া গেল, রমণী কিন্তু তখনও দাঁড়াইয়া রহিল, তাহা দেখিয়া সতী জিজ্ঞাসা করিল, “আর কি খবর?” রমণী কহিল, “হাতের কাজ সারা হইয়াছে, এখন কি যাটে যাইব মা?” সতী বলিল, “তবে আমিও যাই চল।”

গ্রাম হইতে গঙ্গাতীরের পথে চলিতে চলিতে সতী শ্রীমতীকে

নানা কথা জিজ্ঞাসা করিতেছিল। “তোমরা কতদিন মুর্শিদাবাদে ছিলে?” শ্রীমতী বলিল, “অনেকদিন।” তাহার পরেই সামলাইয়া লইয়া বলিল, “এই চার পাঁচ বৎসর।”

“মুর্শিদাবাদ বুঝি খুব বড় সহর?” “এত বড় শহর বাঙ্গালা মুলুকে নাই, এমন কি ঢাকার চাইতেও বড়।” “তোমরা কোথায় থাকিতে?” “শহরের কাছেই, লালবাগে।” “সেখান হইতে কীরিটেশ্বরী কত দূর?” “পাঁচ ছয় ক্রোশ।” “তুমি কি কীরিটেশ্বরী গিয়াছ?” “কতবার।”

স্নানান্তে দুইজন গ্রামে ফিরিয়া আসিল। শ্রীমতী সতীকে বাড়ী পৌছাইয়া দিয়া সিন্ধু বস্ত্রেই মিত্রগৃহে প্রবেশ করিল। শৈল তখন প্রাক্ষণে বসিয়া তাহার আঙুল-লম্বিত কেশরাশি বিস্তার করিতেছিল। শ্রীমতী তাহার হাতের চিকণী লইয়া চুল আচড়াইতে বসিল। নানাছন্দে বিনাইয়া নানা কথা বলিতে বলিতে শ্রীমতী হঠাৎ বলিয়া বসিল, “ছোট মা, একটা নিবেদন করি, যদি অভয় দাও তো বলি।” শৈল বিস্মিত হইয়া জিজ্ঞাসা করিল, “অভয় কিসের গা?” “না মা, বড় ঘরের কথা, আমরা ছোটলোক, বলিতে ভয় পাই।” “ভাল, অভয় দিলাম, বল।” “এখানে হইবে না ঘরে চলুন।”

প্রাক্ষণ পরিত্যাগ করিয়া দ্বিতলের একটি কক্ষে যাইয়া শৈল জিজ্ঞাসা করিল, “কি বলিতেছিলে বল না।” শ্রীমতী তাহাকে প্রণাম করিয়া কহিল, “মা, আমি কায়স্থের মেয়ে নহি, আমি জাত বৈষ্ণবের মেয়ে। আমার নাম সরস্বতী, আমি আপনার

শুভ্রকুলের অনেক কালের পুরাতন দাসী। আপনার বিবাহের সংবাদ পাইয়া আপনার ভাস্কর ও বড়-মা আমাকে আপনার নিকট পাঠাইয়া দিয়াছেন।” বলিতে বলিতে সরস্বতীর অঙ্গ-ভঙ্গী হাবভাব ও পূর্ববন্ধের ভাষা বদলাইয়া গেল, শৈল তাহা দেখিয়া বিস্মিত হইল। সরস্বতী কহিল, “বিশেষ কারণ না থাকিলে আপনার ভাস্কর ও মা, আমাকে আপনার নিকট পাঠাইতেন না। আপনার ভাস্কর মস্তলোক, এখনও আপনার শুভ্রের নাম না করিয়া ঢাকার লোকে জলগ্রহণ করে না। আপনার শুভ্র-বংশের নাম দেশ বিখ্যাত, আপনি এখন সেই ঘরের বৌ, আপনাকে না বলিলে একটা বিপদ নিবারণ হয় না দেখিয়া তাহার আমাকে আপনার নিকট পাঠাইয়াছেন।” শৈল হঠাৎ জিজ্ঞাসা করিয়া বসিল, “তুমি যদি আমার শুভ্র-কুলের পুরাতন দাসী, তবে এমন করিয়া লুকাইয়া আসিয়াছ কেন? আর তোমার কথাই যে সত্য তাহারই বা প্রমাণ কি?” সরস্বতী হাসিয়া হাসিয়া বলিল, “ঠিক কথা না, বড়-ঘরের বোয়ের সত্য কথা, তোমার শুভ্রের বংশের নামে কলঙ্কের কালী পড়িতেছে বলিয়া তাহার আমাকে তোমার কাছে পাঠাইয়াছেন—আর এই তাহার প্রমাণ।” “সরস্বতী তাহার ট্যাকের খুঁট হইতে একখানা পত্র বাহির করিয়া শৈলর হাতে দিল, শৈল পড়িতে জানিত না স্তত্রাং পত্রখানা লইয়া অঙ্কলে বাঁধিয়া রাখিয়া জিজ্ঞাসা করিল, “আমার শুভ্র-বংশের কলঙ্কের কথাটা বলিলে না?” সরস্বতী ঈষৎ হাসিয়া বলিল, “দেখ ছোট-মা, কথাটা যে

সরস্বতী বৈষ্ণবী তোমায় বলিয়া গিয়াছে তাহা গোপন থাকিবে না, বল তখন আমাকে বাঁচাইবে ?” শৈল দৃঢ়কণ্ঠে কহিল, “হাঁ, বাঁচাইব।” “এই যে কালকালো গোলগাল দুর্গাঠাকুরাণীটিকে দেখিতেছ উনিই যত নষ্টের মূল। ছোট কৰ্ত্তাটিকে মুখে বলেন দাদা কিন্তু উহার জন্মই ছোটকৰ্ত্তা আজ দেশত্যাগী। গ্রামে যখন টি টি পড়িয়া গেল, গ্রামের পাঁচজন মাতঙ্গর লোক মিলিয়া বিতালঙ্কার ঠাকুরকে একঘরিয়া করিয়া দিল, তখন তিনি সন্তানের মায়া ছাড়িতে না পারিয়া কাশীযাত্রা করিলেন। ছোট-কৰ্ত্তা ঐ দুর্গাঠাকুরাণীকে ছাড়িয়া থাকিতে পারিবেন না বলিয়া, ছুঁতায় নাতায় বড়-মার সাথে ঝগড়া করিয়া বাড়ীর বাহির হইয়া পড়িলেন। পথে দুই দলে দেখা, ঠাকুরাণীটি ছোট কৰ্ত্তাকে ছাড়িতে হইবে বলিয়া বৃড়া ব্রাহ্মণকে কাশীতে বাইতে দিতেছে না। দুর্গার লজ্জাসরম একেবারেই নাই। পাটনায় গিয়া বৃড়া বাপের চোখে ধূলা দিয়া স্বামী-স্ত্রীর মত বাস করিয়া আসিল। আর বেশী কথা কি বলিব, ইহাদের দুই-জনকে দুই ঠাই করিতে না পারিলে তোমাদের সংসারের আর মঙ্গল নাই।” শৈল মুখথানাকে কালো মেঘের মত গম্ভীর করিয়া বলিল, “বট্ঠাকুরকে বলিও, তাহাই হইবে।” সরস্বতী আবার একটা সাষ্টাঙ্গ প্রণাম করিয়া কহিল, “ছোট মা, আমি এখন দুই চারি দিন স্ত্রীগ্রামে থাকিব, কোন উপায়ে দুর্গাঠাকুরাণীকে ঘরের বাহির করিতে পারিলে তোমার ভাস্কর মোটাটাকা বক্শিস দিবেন বলিয়াছেন।”

একসপ্ততিতম পরিচ্ছেদ

বাঙ্গালার সুবাদার ও কানুনগোই

চেহেল সতুন প্রাসাদ তখনও সম্পূর্ণ হয় নাই, অসম্পূর্ণ প্রাসাদের মধ্যে বিস্তীর্ণ চন্দ্রাতপ তলে সুবা বাঙ্গালা, বিহার ও উড়িষ্যার সুবাদার মুরশিদ কুলি জাফর খাঁ দরবার করিতেছিলেন। প্রধান কানুনগোই দর্পনারায়ণ রায়, দ্বিতীয় কানুনগোই হরনারায়ণ রায় প্রভৃতি রাজস্ব বিভাগের কর্মচারীগণ তাঁহার দক্ষিণ পার্শ্বে উপবিষ্ট। সুবাদারের দপ্তর ও সৈন্য তখনও জাহাঙ্গীরনগর ঢাকা হইতে আসিয়া পৌঁছায় নাই। ফরুক্‌সিয়র আগ্রার যুদ্ধের পূর্বে রশিদ খাঁ নামক এক ব্যক্তিকে বাঙ্গালার তিন সুবার সুবাদার নিযুক্ত করিয়া পাঠাইয়াছিলেন কিন্তু তিনি মুর্শিদাবাদের তিন জ্রোশ দূরে পরাজিত হইয়াছিলেন। আগ্রার যুদ্ধের সংবাদ তখনও মুর্শিদাবাদে পৌঁছায় নাই, মুর্শিদাবাদের ফৌজদার মহম্মদ খাঁ, সৈয়দ আনুওর খাঁ জোনপুরী এবং মীর বাঙ্গালী প্রমুখ জাফর খাঁর বিশ্বস্ত অনুচরগণ বাবের বাম পার্শ্বে বসিয়াছিলেন। নবাবের জামাতা সুজাউদ্দীন খাঁ বাঙ্গালার তিন সুবার রাজস্ব লইয়া দিল্লী যাত্রা করিয়াছিলেন, পথে এলাহাবাদে ফরুক্‌সিয়র সৈয়দ আব্দুল্লা খাঁ সৈয়দ হোসেন আলি খাঁ রাজস্বের টাকা রক্ষার ছলে তাহাকে এলাহাবাদ দুর্গের মধ্যে লইয়া গিয়া অবশেষে সমস্ত টাকা কাড়িয়া লইয়াছিলেন, সেই অবধি সুজাউদ্দীন খাঁর কোন খবর পাওয়া যায় নাই।

জামাতার খবর না পাইয়া বুদ্ধ নবাব অত্যন্ত চিন্তিত হইয়া পড়িয়াছিলেন। প্রকৃত বাদশাহ কে? জহান্নার শাহ, না, কবরুখ সিয়র, তাহা লইয়া আলোচনা চলিতেছিল, এই সময়ে একজন চোবদার আসিয়া সংবাদ দিল যে, পরগণে বিক্রমপুরের সাবেক ফৌজদার জাহাঙ্গীরনগর ঢাকার সাবেক থানাদার ও জিন্নত মকানী শাহজাদা আজিম-উশ-শানের ভূতপূর্ব থানসামান রায় ত্রিবিক্রম রায় দরবারে পেশ হইতে চাহে। নামটা শুনিয়া জাফর খাঁর মুখে হাসি ফুটিয়া উঠিল, হরনারায়ণ রায়ের মুখ মলিন হইয়া গেল, সৈয়দ আনুওর উঠিয়া দাঁড়াইলেন, দরবারের সকলেই বিস্মিত হইয়া গেল, কারণ ত্রিবিক্রম রায়ের নাম ইতিপূর্বে মুর্শিদাবাদে শোনা যায় নাই। জাফর খাঁ জিজ্ঞাসা করিলেন, “ত্রিবিক্রম রায় কি হিন্দু ফকীর সাজিয়া আসিয়াছে?” চোবদার তসলীম করিয়া বলিল, “জনাব আলী, রায় সাহেব দরবারী পোষাকে আসিয়াছেন।” জাফর খাঁ সৈয়দ আনুওরকে জিজ্ঞাসা করিলেন “তুমি যে উঠিয়া দাঁড়াইলে?” আনুওর বলিলেন, “জনাব আলী, ত্রিবিক্রম রায় আমার পুরাতন বন্ধু, জাহাঙ্গীর নগরে ইব্রাহিম খাঁর আমলে একসঙ্গে মনসব পাইয়াছিলাম।” জাফর খাঁ পেশকার নাজির আহমদ খাঁকে জিজ্ঞাসা করিলেন, “স্ববার মনসরদারদের মধ্যে ত্রিবিক্রম রায়ের নাম কি এখনও আছে?” পেশকার খাতাপত্র উল্টাইয়া বলিল, “জনাব আলী, আলমগীরী আমলের মধ্যে আপনার, দুইজন কাহ্ননগোইএর ও ত্রিবিক্রম রায়ের নাম এখনও আছে।” তাহা শুনিয়া স্বাধীনতার

সৈয়দ আনওরকে বলিলেন, “তুমি গিয়া ত্রিবিক্রমকে লইয়া আইস।” হুকুম শুনিয়া চোবদার একটু ক্ষুণ্ণ হইল, কারণ একজন নতন মনসবদার আনিতে পাইলে সে এক আশরুফী বক্শিস পাইত।

আলমগীরি আমল অর্থাৎ—বাদশাহ্ আওরঙ্গজেব আলম-গীরের রাজ্যকালে নিযুক্ত কর্মচারী মোগল সাম্রাজ্যের শেষ দশায় অত্যন্ত সম্মান পাইতেন। আওরঙ্গজেবের অধীনে, তাঁহার প্রধান মন্ত্রী অমীরউল উমরাহ্ আসদ খাঁ সদাগুণ ও কর্তব্যনিষ্ঠার পরিচয় না পাইলে কোন লোককে মনসব প্রদান করিতেন না। আওরঙ্গজেবের মৃত্যুর পরে, বিশেষতঃ জহান্দার শাহ ও ফরুকখসিয়রের রাজ্যকালে বহু অল্পযুক্ত ব্যক্তি মনসবদার নিযুক্ত হইয়া মোগলসাম্রাজ্যের ধ্বংসের পথ প্রশস্ত করিয়া দিয়াছিল। সৈয়দ আনওর চলিয়া গেলেন এবং ত্রিবিক্রমকে লইয়া আসিয়া যথারীতি দরবারে পেশ করিলেন। ত্রিবিক্রম একাদশ স্বর্ণমুদ্রা নজর দিয়া কুণিণ করিয়া দরবারে মনসব পাইলেন। আদবকায়দা শেষ হইয়া গেলে নবাব জাফর খাঁ তাহাকে জিজ্ঞাসা করিলেন, “ত্রিবিক্রম রায়, তুমি এতদিন কোথায় ছিলে?” ত্রিবিক্রম উত্তর দিলেন, “জনাব, এক আউরতের জন্ত ফকীর হইয়াছিলাম, আর এক আউরতের জন্ত সংসারে ফিরিয়া আসিয়াছি।” বৃদ্ধ নবাব হাসিয়া বলিলেন, “রায়জী, আউরতই দুনিয়ার দুশমন, একদিন সরাফরাজ আউরতের জন্ত প্রাণ হারাইবে।” “জনাবআলী, যখন সংসারে

ফিরিয়া আসিয়াছি, তখন দিন পাতের জন্ত রোজগার করিতে হইবে, সেই জন্ত দরবারে পেশ হইলাম।” নবাব বলিলেন, “তোমার মত বিশ্বাসী কর্মচারী যে কোনও স্ববাদের লুকিয়া লইবে। তোমার মনসব, আয়মা—সমস্তই মৌজুদ, রায়জী, তুমি কি কাম করিতে চাহ?” ত্রিবিক্রম হাসিয়া বলিলেন, “জনাব, চিরকাল খালসার দফতরে ছিলাম, একদিন দিউয়ান-ই তানের কাম করিয়াছি। রাজস্ব বিভাগে যে কোন কাম দিবেন তাহাই করিব।” নবাব বলিলেন, “খালসার সেরেস্তা বেবন্দাবস্ত হইয়া আছে, রায়জী, নতুন বাদশাহের হুকুম পাওয়া পর্যন্ত তুমি এই তিন স্ববার খালসার নায়েব দিউয়ানী করিতে থাক।” সভার সকলে “কেরামত্,” “কেরামত্” বলিয়া নবাবের সাধুবাদ করিল, বৃদ্ধ দর্পনারায়ণ রায়ের মুখ উজ্জল হইয়া উঠিল, কিন্তু ক্ষুদ্রকায় হরনারায়ণের মুখ শুখাইয়া গেল।

ত্রিবিক্রম সভার একপার্শ্বে বসিয়া রহিলেন। সভার কার্য চলিতে লাগিল। দ্বিপ্রহর বেলায় সেদিনের সমস্ত আরজী শুনিয়া নবাব যখন দরবার ত্যাগ করিলেন তখন প্রধান কামুনগোই দর্পনারায়ণ রায় হরনারায়ণকে জিজ্ঞাসা করিলেন “কিহে, তুমি যে ত্রিবিক্রমকে চিনিতেই পারিলে না?” হরনারায়ণ শুষ্ক মুখে বলিলেন, “চিনিতে পারিব না কেন? অনেকক্ষণই চিনিয়াছি, তবে নবাব দরবারে থাকিতে কথা কহা কায়দা বিরুদ্ধ, সেই জন্তই কথা কহি নাই।” ত্রিবিক্রমকে দর্পনারায়ণ ও হরনারায়ণ প্রণাম করিলেন, তখন ত্রিবিক্রম

বলিলেন, “হর, আমার সঙ্গে হরি আসিয়াছে, আমরা লালবাগে বাসা লইয়াছি। তুমি কি সন্ধ্যাবেলায় আমাদের বাসায় আসিবে?” হরনারায়ণ বলিলেন, “হরি যে ভাবে গ্রাম হইতে বিদায় হইয়াছে তাহাতে আমি আর তাহার সহিত সাক্ষাৎ করিতে চাহি না।” ত্রিবিক্রম বলিলেন, “দুর্গার অপবাদে জন্ম সে কিছুমাত্র দুঃখিত নহে। উপস্থিত সে পাটনা হইতে তোমার বৈমাত্রেয় ভাই দুইটির মোক্তার হইয়া আসিয়াছে। আমি বলি, তোমরা দুইজন দেখা করিয়া কাগজপত্র দেখিয়া বিবাদটা মিটাইয়া ফেল, তাহা না হইলে কাল হয় ত নবাব দরবারে অসীম ও ভূপেনের নামে আরজী পেশ হইবে।” হরনারায়ণ শুদ্ধমুখে বলিলেন, “নেহাৎ যদি আরজী পেশ হয় আমি আর কি করিব।” “দেখ হর, অসীম এখন একজন আমীর, সে তোমার আমার মত মনসবদার নহে। সে যখন মূর্শিদাবাদে আসিবে তখন নবাব জাফর কুলী খাঁকে উঠিয়া দাঁড়াইতে হইবে। তুমি যেমন করিয়া ককনপুর পরগণার অংশ লিখাইয়া লইয়াছ তাহা আমি শুনিয়াছি।”

বৃদ্ধ দর্পনারায়ণের সহিত হরনারায়ণের একটা চিরস্থায়ী বিবাদ ছিল, ত্রিবিক্রম তাহা জানিতেন। এক সময়ে দর্পনারায়ণ জাফর খাঁর সহিত বিবাদ করিয়া সুবা বাঙ্গালা, বিহার ও উড়িষ্কার রাজ্যের হিসাব সহি করিতে অস্বীকার করিয়াছিলেন সেই সময়ে হরনারায়ণ নায়েব কাছুনগোই ছিলেন এবং তিনি জাফর খাঁর মন রাখিবার জন্ত রাজ্যের হিসাবে সহি করিয়া

তাঁহার প্রিয়পাত্র হইয়াছিলেন। তখন জাফর খাঁ স্ববা
বাঙ্গালার রাজস্বের দিউয়ান, দর্পনারায়ণ রায় প্রথম কানুন
গোই এবং হরনারায়ণ দ্বিতীয় কানুনগোই। তদবধি দর্পনারায়ণ
জাফর খাঁ বা মুরশিদকুলী খাঁর কোপদৃষ্টিতে পতিত হইয়াছিলেন।
দর্পনারায়ণ এই সময় জিজ্ঞাসা করিলেন, “কি হে হর, রুকনপুরের
দশ আনা অংশ কবে লিখাইয়া লইলে? সে কথা খালসার
পেশকারকে জানাও নাই ত?” হরনারায়ণ তখন বাধ্য হইয়া
বলিলেন, “খুড়া, কাজটা অতি গোপনে হইয়াছিল, সেইজন্য
কথাটা খালসার সেরেস্তায় উঠাই নাই। দুই বৎসর ধরিয়া
যে রূপ গোলমাল চলিতেছে তাহাতে বিষয় আসন্ন রক্ষা করা
কঠিন হইয়া উঠিয়াছে।” ত্রিবিক্রম তাঁহাকে বাধা দিয়া বলিয়া
উঠিলেন, “তুমি কি জাননা যে, রুকনপুর খালসা পরগণা,
খালসার আয়মা বাদশাহের পক্ষ ও মোহর ব্যতীত হস্তান্তর হয়
না, সে কথা দিউয়ান-ই-কুল ও মুস্তোফী ব্যতীত আর কেহ
বাদশাহী দরবারে পেশ করিতে পারে না?” ত্রিবিক্রমের
কণ্ঠস্বর ক্রমে উর্দ্ধে উঠিতেছিল, তাহা শুনিয়া দুই চারিজন হিন্দু
ও মুসলমান ক্রমে তাঁহাদিগের দিকে অগ্রসর হইতেছিল, তাহা
দেখিয়া হরনারায়ণ সভয়ে বলিয়া উঠিলেন, “খুড়া, আর গোল-
মালে কাজ নাই, তুমি আর ত্রিবিক্রম উপস্থিত থাকিয়া আমাদের
শড়ীকী বিবাদটা মিটাইয়া দাও।” বহুদিন পরে শত্রু হর-
নারায়ণকে নিজের আয়ত্তের মধ্যে পাইয়া দর্পনারায়ণ নবের
আনন্দ গোপন করিতে পারিলেন না, তিনি ত্রিবিক্রমকে

বলিলেন, “তবে সন্ধ্যার পরে দরবারের ফেরত তোমাদের বাসায় যাইব, হরনারায়ণও আমার সঙ্গে যাইবে। কথাটা খালসা দম্পরের পেশকারকে জানাইয়া রাখা উচিত ছিল।” হরনারায়ণ অত্যন্ত কাতর হইয়া বলিয়া উঠিলেন, “খুড়া, ইহার পর যাহা বলিবে তাহাই করিব, আর অপমান করাইও না।” রাজেশ্বর হিসাবের কথা শ্রবণ করিয়া দ্বিবিক্রম হাসিলেন।

দ্বিসপ্ততিতম পরিচ্ছেদ

কিরীটেশ্বরীর পথে

সন্ধ্যার অন্ধকারে রত্নশালার দুয়ারে বসিয়া সতী জপ করিতেছিল আর শ্রীমতী চারি হাত তফাতে বসিয়া ছিল। জপশেষ হইলে সতীকে নমস্কার করিতে দেখিয়া শ্রীমতী কহিল “মা, এইবার একটু ছোট মার কাছে যাইব কি?” সতী হাসিয়া বলিল, “মেয়ে, দিনের পর দিন ছোটমার উপর তোমার টান বাড়িয়াই চলিয়াছে আর আমার উপর মায়া-মমতা কমিয়া আসিতেছে। তুই এখন যাইতে পাইবি না, এইখানে বসিয়া থাক।” শ্রীমতী ওরফে সরস্বতী হাসিয়া বলিল, “ছোট মা স্নেহ করেন, তাই ধাই। মা যদি বারণ করেন, না হয় যাইব না।” “তুই বস, আমার বড় কিরীটেশ্বরী দেখিতে ইচ্ছা হয়, সে এখান হইতে কত দূর?” “গাড়ীতে দেড়দিনের পথ।” “পথ কেমন ভয় ডর নাই শু?” “হুন্দর বাদশাহী সড়ক, মা, অনামুখ

ঠাকুরের মন্দিরে একাদশী অমাবস্তায় মূর্শিদাবাদ ডাংপাড়া হইতে কত মেয়ে ছেলে হাঁটিয়া যায়। ভয় ভর কিসের মা? এরা জ্যো কি ভয় ভর আছে? তবে শুনিয়াছি, দক্ষিণ দেশে কিরীটীতে এখনও নৌকা মারে।” “দেখ মেয়ে, কাল একাদশী, আমরা তিন চারিজন একখানা গাড়ী করিয়া ত্রয়োদশীর দিন সন্ধ্যাবেলায় রওনা হইব।” “কর্তা বাবাকে বলিয়াছ কি মা?” “সর্বনাশ, বাবাকে বলিলে কি আর যাইতে পাইব? সঙ্কে দুর্গা যাইবে বোমা যাইবে আর পাড়ার মধ্য বয়সী স্ত্রীলোক দুই একজনকে লইব। তুই আমাদের পথ চিনাইয়া লইয়া যাইতে পারিবি?”

তখন অপ্রত্যাশিত সুসংবাদে বৃদ্ধা বৈষ্ণবীর হৃদয় আনন্দে উদ্দাম নৃত্য করিতে আরম্ভ করিয়াছিল সুতরাং সে অনেকক্ষণ উত্তর দিতে পারিল না। যখন সে উত্তর দিল, তখন কথাটা অল্প ভাবের দাঁড়াইয়া গেল। সরস্বতী বলিল, “আমিও গৃহস্থের বৌ, মা; তোমরা সকলেই ছেলে মানুষ, আমি একা কি তোমাদের এত লোককে সামলাইতে পারিব?” “কেন পারিবি না? এই ঘোষেদের তিনটি বিধবা বৌ গেল মাসে কিরীটেশ্বরী মা’কে দর্শন করিয়া আসিয়াছে। তাহাদের সঙ্গে কেবল দীজু বাগদীর বৌ ছিল, একজনও পুরুষ ছিল না।” “তোমরা যদি সাহস কর মা, তাহা হইলে স্বচ্ছন্দে লইয়া যাইতে পারি। তবে এখন আমি উঠি।” “যা কিন্তু শৈলকে কোন কথা বলিস না।” মনের আনন্দে বৈষ্ণবী দ্বাদশ ঠাকুরকে স্মরণ করিতে করিতে

সরস্বতী বাড়ীর বাহির হইয়া পড়িল। কৃষ্ণা ত্রয়োদশীর দিন সন্ধ্যাকালে দুর্গা, বড় বধু, সতী ও গ্রামের একটি প্রাচীনার সহিত সরস্বতী কিরীটেশ্বরী যাত্রা করিল। গাড়ী সমস্ত রাত্রি চলিল। সকাল বেলা একথানা গ্রামের প্রান্তে গরু খুলিয়া শকটচালক যখন রন্ধনের উদ্যোগ করিল তখন সরস্বতী আহাৰ্য্যের সন্ধানে গ্রামের ভিতর চলিয়া গেল। সে সন্ধান করিয়া জানিল যে, গ্রামের নাম মহীপাল এবং সেই গ্রামে দুই চারিজন পাঠান বাস করে। তাহারা পাঠানের বংশধর বটে কিন্তু বাঙ্গালাদেশের শিষ্ট জলবায়ু তাহাদের পাঠান সুলভ কর্কশতা দূর করিয়া দিয়া তাহাদিগকে বাঙ্গালী কৃষকে পরিণত করিয়াছিল। একজন পাঠান পুরস্কারের লোভে সরস্বতীর নিকট হইতে সংবাদ লইয়া অদীর্ঘ পদক্ষেপে ডাহাপাড়ায় যাত্রা করিল। সরস্বতী কিরিয়া আসিলে প্রবীণা সঙ্গিনী রন্ধন চড়াইয়া দিলেন; আহাৰ্য্যকে যাত্রা করিতে শীতের বেলা পড়িয়া আসিল।

শেষ রাত্রিতে বলদ দুইটিকে যথেষ্ট চলিতে দিয়া শকট চালক যখন ঘুমাইয়া পড়িয়াছিল তখন চারি পাঁচজন লাঠিয়াল গাড়ী চারিদিক হইতে ঘিরিয়া ফেলিল, গাড়োয়ান উঠিয়া দেখিল যে অন্ধকারে গাড়ী লইয়া পলায়ন অসম্ভব, তখন সে বীর পুরুষের মত গাড়ী ও বলদ ফেলিয়া রাখিয়া পলায়ন করিল।

সতী, দুর্গা ও বড় বধু বসিয়া রহিলেন কিন্তু তাঁহাদিগের প্রবীণা সঙ্গিনী ও সরস্বতী বিনাইয়া বিনাইয়া কাঁদিতে আরম্ভ করিল। পূর্বদিকে যখন উষার আলোক দেখা দিল তখন

একজন লাঠিয়াল গাড়ীখানাকে একটা পুষ্করিণীর তীরে খুলিয়া দিয়া স্ত্রীলোকদিগকে নাগিত আদেশ করিল। বড়বধু দেখিতে পাইলেন, সরস্বতী তখনও স্তর করিয়া চোঁচাইতেছে বটে কিন্তু তাহার চক্ষুতে জল নাই। স্ত্রীলোকদিগকে পুষ্করিণীর তীরে একটা ভাঙ্গা মন্দিরের 'মধ্যে বসাইয়া দুইজন লাঠিয়াল পাহারা রহিল আর বাকী দুইজন নিকটের গ্রামের দিকে চলিল।

সেই দিন সেই সময়ে নূতন নগর, মুর্শিদাবাদের এক প্রান্তে একটি ক্ষুদ্র অট্টালিকার এক কক্ষে বসিয়া ত্রিবিক্রম নবীনদাসকে প্রশ্ন করিতেছিলেন। শীতের প্রাদুর্ভাবের জন্মই হোক, আর ভয়ের জন্মই হোক, নবীন কাঁপিতেছিল। কক্ষটি রুদ্ধ, নবীনের অঙ্গে একখানা মোটা কয়ল ছিল, তথাপি সে কাঁপিতেছে। তাহার সম্মুখে একখানা কুশাসনে ত্রিবিক্রম বসিয়াছিলেন, তাঁহার অঙ্গে গরদের একখানা সূক্ষ্ম নামাবলী। নবীনের সম্মুখে একখানা তাম্রকুণ্ড। ত্রিবিক্রম জিজ্ঞাসা করিতেছিলেন, “নবীন আবার আসিয়াছ কেন?” নবীন হাতজোড় করিয়া বলিল, “আছে, বড়-কর্তার ভয়ে।” “আমার হস্তে পড়িয়া তোমার কি অবস্থা হইয়াছিল সে কথা হরনারায়ণকে বলিয়াছিলে?” “আজ্ঞে বলিয়াছিলাম কিন্তু বড়-কর্তা হুকুম করিলেন, নবীন, তুমি ভোল ফিরাইয়া যাও।” “এখন তুমি কি করিতে চাহ?” “দেবতা যাহা হুকুম করিবেন।” “দেখ নবীন, দুইবার তোমাকে অনুগ্রহ করিয়া ছাড়িয়া দিয়াছি, এবার আর ছাড়িব না। তাম্রকুণ্ডের দিকে চাহিয়া দেখ।” নবীন ত্রিবিক্রমের পা জড়াইয়া ধরিয়া

হুইয়া পড়িল এবং কাদিতে কাদিতে কহিল, “ঠাকুর, এই বারটি মাপ করুন, ঐ জলের ভিতরে আগুন দেখিলে আমি সাতদিন ধরিয়া মাথা তুলিতে পারি না। আপনি যাহা বলিবেন তাহাই করিব।”

সহসা ত্রিবিক্রমের মূর্তি পরিবর্তিত হইয়া গেল, নবীন উঠিয়া দাঁড়াইল, তাহার মনে হইল যে, ত্রিবিক্রমের নয়ন-কোণ হইতে উজ্জলবহির শিখা বাহির হইয়া তাম্রকুণ্ডের জলে অগ্নি-সংযোগ করিল। নবীন বসিয়া পড়িল, তাহার হৃদয় চক্ষুর সম্মুখ হইতে সরিয়া গেল। ত্রিবিক্রম জিজ্ঞাসা করিলেন, “কি দেখিতেছ?” নবীন মস্ত-মুগ্ধের মত বলিল, “তাম্রকুণ্ডের জলে আগুন জলিয়াছে।” “দেখ, সতী কোথায়।” “কিরীটেশ্বরীর কাছে, কিরীটকোণার দীঘির পূর্ব পাড়ে ভাঙ্গা মন্দিরের মধ্যে।” ত্রিবিক্রম বিস্মিত হইয়া জিজ্ঞাসা করিলেন, “তাহার সঙ্গে কে কে আছে?” নবীন কহিল, “ভাঙ্গাপাড়ার বিদ্যালঙ্কার ঠাকুরের মেয়ে দুর্গা, স্তদর্শন ঠাকুরের বো, সরস্বতী বৈষ্ণবী, বড়-কর্তার লাঠিয়াল কালীমাল আর ভুবন বাগদী; আর একটি বৃদ্ধা মেয়ে লোক, তাহাকে আমি চিনি না।”

এক মুহূর্তের জন্ত ত্রিবিক্রম চঞ্চল হইয়া উঠিলেন কিন্তু তখনই আবার শান্ত হইয়া জিজ্ঞাসা করিলেন, “অসীম কোথায়?” অল্প-ক্ষণ পরে নবীন কহিল, “অনেক দূর, দিল্লী। আজমীর দরওয়াজার পার্শ্বে একটা বড় ভাঙ্গা বাড়ী, সেখানে একটা ছোট কামরায় হরিদাস বাবাজী আর মণিয়া বাঈজী বসিয়া আছে।” ঘরের

দুই ধারে দুইখানা খাটিয়া, তাহার একখানায় ছোট কর্তা শুইয়া আছেন। ছোট কর্তার বোধ হয় চোট লাগিয়াছে, কারণ তাঁহার সর্বাঙ্গে রক্ত। আর একজন লোক আর একখানা খাটিয়ায় শুইয়া আছে, তাহারও সর্বাঙ্গে রক্ত কিন্তু আমি তাহাকে চিনি না।”

ত্রিবিক্রম তাম্রকুণ্ডে কুৎকার দিলেন, অগ্নি নিভিয়া গেল, তাহার আদেশে নবান্দাস চক্ষু মেলিয়া চাহিল কিন্তু উঠিতে পারিল না। তাহাকে সেই কক্ষে কুশাসনের শয্যায় শয়ন করিতে বলিয়া ত্রিবিক্রম বাহির হইতে শিকল টানিয়া দিলেন। সূর্য্যোদয়ের পরে ঘোল জন বাহক একখানা প্রকাণ্ড শিবিকা লইয়া আসিল। ত্রিবিক্রম দরবারে যাত্রা করিলেন। দ্বিপ্রহরে দরবার শেষ হইয়া গেল, সে দিন অমাবস্তা। সভার শেষে ত্রিবিক্রম দর্পনারায়ণকে জনান্তিকে ডাকিয়া বলিলেন, “খুড়া, এখনও কি উপবাস করিয়া থাক?” বুদ্ধ দর্পনারায়ণ বিস্মিত হইয়া জিজ্ঞাসা করিলেন, “হঠাৎ একথা জিজ্ঞাসা করিলে কেন বাপু? পঞ্চাশ বৎসরের অভ্যাস কি এক দিনে যায়?” “চল, কিরীটেশ্বরী-মাতার পূজা দিয়া আসি।” “কখন যাইবে?” “চল, এখনই যাই।” “চল, তবে বাড়ী হইয়া যাই।”

খালসার দেওয়ান ও প্রধান কাছুনগোইয়ের পাক্ষী এক সঙ্গে চেহেলসেতুন প্রাসাদ পার হইয়া গেল, হরনারায়ণ তাহা দেখিলেন, কিন্তু কিছুই বুঝিতে পারিলেন না। তৃতীয় প্রহর বেলায় লালবাগের ঘাটে পাঁচখানা পাক্ষী এক সঙ্গে পার হইল,

দুইখানা বড় বড় খেয়ার নৌকা এক সঙ্গে বাঁধিয়া তাঁহাদিগকে পার করিতে হইল। একজন বৃদ্ধ মাঝি জিজ্ঞাসা করিল, “এত পাকী কোথায় যাইবে ভাই?” একজন বাহক বলিল, “কিরীটে-বরী যাইবে ও আসিবে, তোরা সব নৌকা ঠিক করিয়া রাখিস্ তোৎ-দাত্রে আবার পাকী পার করিতে হইবে।”

ত্রিসপ্ততিতম পরিচ্ছেদ

আবতুল্লা খাঁ

আগ্রার যুদ্ধের একমাস দুইদিন পরে বাদশাহ্ ফরুকখ্শিয়র দিল্লী হইতে পাঁচ মাইল দূরে অবস্থিত খিজরাবাদ নামক স্থান হইতে জলুস করিয়া আসিয়া শহরের দিল্লী দরওয়াজা দিয়া প্রাসাদে প্রবেশ করিলেন। এই জলুসে বাদশাহের হস্তীর পশ্চাতে আর একটি হস্তীর উপরে একজন লোক বংশদণ্ডের অগ্রভাগে মৃত বাদশাহ্ জহান্দার শাহের ছিন্ন মুণ্ড লইয়া গিয়াছিল এবং আর একটি হস্তীর লাঙ্গুলে মৃত উজীর জুল্ফীকার খাঁর মৃতদেহ বাঁধিয়া দেওয়া হইয়াছিল। অসীম ও ফরীদ খাঁকে লইয়া হরিদাস বৈরাগী, স্মদর্শন ও ভূপেন আগ্রার যুদ্ধের দুই দিন পরেই দিল্লী যাত্রা করিয়াছিল। নূতন বাদশাহ্ যেদিন প্রথম রাজধানীতে প্রবেশ করিলেন, অসীম তখন কতকটা সুস্থ হইয়াছিল, সে দিল্লী

দরওয়াজার পাশে দাঁড়াইয়া স্বদর্শন ও ভূপেনের সঙ্গে শোভাযাত্রা দেখিল।

নূতন বাদশাহ সিংহাসন লাভ করিলে মোগল সাম্রাজ্যের প্রধান ও অপ্রধান কর্মচারীরা কর্মচ্যুত হইতেন, কাহারও বা পদবৃদ্ধি হইত এবং কেহ বা আমীর হইতে পথের ভিখারী হইতেন। বাদশাহ্ ফরুখশিয়র নূতন কর্মচারী নিয়োগ করিলেন। অসীম রায় ও ফরীদ খাঁর কথা কেহ তুলিল না, কারণ অসীম রায় খাস বাদশাহের বন্ধু এবং সেই বাদশাহ্ সাম্রাজ্য পদ লাভ করিয়া দুর্দিনের বন্ধুদের বিস্মৃত হইয়া গিয়া-ছিলেন।

বল পাইয়া অসীম একদিন দরবারে হাজির হইবার চেষ্টা করিলেন কিন্তু পরিচিত লোক খুঁজিয়া পাইলেন না। সৈয়দ আবদুল্লা খাঁ ‘কুতব্-উল্-মুক্’ উপাধি পাইয়া বাদশাহের প্রধান উজীর হইয়াছিলেন কিন্তু তাঁহার সহিত অসীমের বিশেষ পরিচয় ছিল না। সৈয়দ হোসেন আলী খাঁ আগ্রার যুদ্ধে আহত হইয়া পড়িয়াছিলেন, সুতরাং অসীম তাঁহারও সাক্ষাৎ পাইলেন না। দিল্লী দুর্গের মধ্যে অসীমের সঙ্গে আফ্রাসিয়ব্ খাঁর সাক্ষাৎ হইল কিন্তু খাঁ-সাহেব সেই দিন সাম্রাজ্যের তৃতীয় বখ্শী নিযুক্ত হইয়া-ছিলেন বলিয়া অসীমকে চিনিতেই পারিলেন না। অসীম বিরক্ত হইয়া চাকরীর চেষ্টায় দক্ষিণদেশে যাইবার মতলব করিলেন। স্বদর্শন ও ভূপেন স্থির করিলেন যে, ফরীদের চেষ্টনা ফিরিয়া আসিলেই তাঁহারা গোয়ালিয়র ও মান্ডর পথে দাক্ষিণাত্য যাত্রা

করিবেন। একদিন দিল্লী দুর্গের আজমীর দরওয়াজায় নহবত-
খানার নিয়ে অসীমের সঙ্গে আহম্মদবেগের সাক্ষাৎ হইল।
আহম্মদ বেগ তখন গাজীউদ্দীন উপাধি পাইয়াছে কিন্তু তথাপি
সে ফরুক্‌সিয়রের পূর্ব বন্ধুকে চিনিতে পারিল। অসীমের
দিল্লী পরিত্যাগের সঙ্কল্প শুনিয়া নূতন গাজীউদ্দীন খাঁ বাদশাহের
নূতন বন্ধু শরীফউল্লা বা মীর জুম্লাকে ধরিয়া অসীম রায়ের
আরজী বা দরখাস্ত দরবারে পেশ করিল। আগ্রা যুদ্ধের তিন
মাস পরে অসীম বাদশাহের দর্শন পাইলেন, মীর জুম্লা তাঁহাকে
বাদশাহের সম্মুখে লইয়া গেলেন। অসীমের উপরে হাজার
টাকা মূল্যের খেলাত বা পরিচ্ছদ বর্ষিত হইল, তিনি এক হাজার
মৈত্রেয় অধিনায়ক নিযুক্ত হইলেন এবং সুবা বাঙ্গালায় বাদশাহের
যে খালসা পরগণাগুলি ছিল তাহার মধ্যে সরকার জন্নতাবাদের
অন্তর্গত রোহনপুর গ্রাম জায়গীর পাইয়া বাঙ্গালা ফিরিবার
আদেশ পাইলেন। সেই দিন বাদশাহের শিশু-পুত্র ফরুক্‌দাবখৎ
সুবা বাঙ্গালার নাজিম বা সুবাদার নিযুক্ত হইলেন এবং তাঁহার
নামে কার্ধ্য পরিচালনা করিবার জন্ত নবাব জাকরকুলী বা
মুশিদকুলী খাঁ নারেব নাজিম নিযুক্ত হইলেন। মুশিদকুলী খাঁ
উড়িষ্যার সুবাদারী পদলাভ করিয়া মুশিদকুলী খাঁ ত্রাকরপান
নাসীরী উপাধি পাইলেন। মুশিদকুলী খাঁর সনন্দ ও নিজের
জায়গীরের ফরমুন লইয়া অসীম মুশিদাবাদ যাত্রা করিবার
আদেশ পাইলেন।

বাসায় ফিরিয়া আসিয়া অসীম দেখিলেন যে দীর্ঘকাল পরে

ফরীদ খাঁর চেতনা ফিরিয়াছে। স্ব-সংবাদ শুনিয়া সেই দিনই অসীম ভূপেন ও সুদর্শনের সহিত মূর্শিদাবাদ যাত্রার দিন স্থির করিলেন। সন্ধ্যাকালে মণিয়া কোথা হইতে একটা সারেঙ্গী আনিয়া ফরাদের শয্যার পার্শ্বে স্থর বাঁধিতে বসিল, তাহা দেখিয়া বিস্মিত হইয়া সুদর্শন জিজ্ঞাসা করিলেন, “মণিয়া, এ কি করিতেছ?” মণিয়া বলিল, “ওস্তাদ, ফরীদ আজ সারাদিন ঘুমাইয়াছে, হকীম বলিয়া গেল তাঁহাকে ঘুম পাড়াইতে হইবে। সেই জন্ত গান গাহিব মনে করিয়াছি। ফরীদ ভাই, গান শুনবি?” ফরীদ মাথা নাড়িয়া জানাইল যে সে গান শুনিতে চাহে। গান শুনিতে শুনিতে ফরীদ ঘুমাইয়া পড়িল, তখন অসীম আসিয়া মণিয়াকে বলিলেন, “মণিয়া, তোমার সঙ্গে গোটাকতক প্রয়োজনীয় কথা আছে, তুমি একবার বাহিরে আইস।” মণিয়া এসাজ রাখিয়া উঠিয়া গেল।

তখন শীত কমিয়া আসিতেছিল, তথাপি বৃদ্ধ হরিদাস দ্বিতলের আর একটা কক্ষে অগ্নিকুণ্ড জালিয়া বসিয়াছিল, মণিয়াকে লইয়া অসীম হরিদাসের নিকটে গেলে বুড়া বৈরাগী জিজ্ঞাসা করিল, “কি খবর বাবা?” অসীম কহিলেন, “খবর তো সুদর্শনের কাছে শুনিয়াছ বাবাজী।” হরিদাস কহিল, “ভগবান তোমার মঙ্গল করুন, তোমরা কবে দেশে যাইবে?” অসীম কহিলেন, “আমরা কাল যাত্রা করিব স্থির করিয়াছি। তোমার কাছে ফরীদ খাঁকে রাখিয়া আমি মণিয়াকে দেশে লইয়া যাইতে চাহি। আমি তাহাকে না জানিয়া পিতৃ-

গৃহ পরিত্যাগ করাইয়াছি, আমিই তাহাকে পাটনায় তাহার মায়ের কাছে ফিরাইয়া দিতে চাই।” হরিদাস ঈষৎ হাসিয়া কহিল, “বাবা, যে জিনিষটা ইচ্ছা কর তাহা কি তখনই করিতে পার? আমি মণিয়াকে পিতৃগৃহে পৌছাইয়া দিবার জন্য স্ত্রীগ্রাম হইতে পাটনায় আসিয়াছিলাম কিন্তু মণিয়া পিতৃগৃহে রহিল কই? তোমার বা আমার ইচ্ছার উপরে মনিয়ার ভবিষ্যৎ নির্ভর করে না। গোপালের বখন ইচ্ছা হইবে তখন মণিয়া পাটনায় ফিরিয়া যাইবে।” অসীম বিরক্ত হইয়া মণিয়াকে কহিলেন, “মণিয়া, আমি অনুরোধ করি, তুমি আমার সঙ্গে পাটনায় ফিরিয়া চল।” মণিয়া সেলাম করিয়া কহিল, “তসলিমৎ হজুর, এখন ফরীদভাইকে ফেলিয়া স্বর্গে যাইতেও পারিব না।” হরিদাস আবার হাসিল, অসীম অত্যধিক বিরক্ত হইয়া হরিদাসকে জিজ্ঞাসা করিলেন, “বাবাজী, তবে মণিয়া রহিল, তাহার ও ফরীদের জন্য খরচপত্র কত লাগিবে?” হরিদাস কহিল, “এসকল গোপালের খরচ, গোপালই চালাইবেন; বাবা, তুমি দেশে ফিরিয়া যাও, গোপাল তোমার মঙ্গল করুন। খরচ-পত্র তোমাকে কিছুই দিতে হইবে না।”

পরদিন মধ্যাহ্নে ভূপেন ও সুদর্শনের সহিত বাদসাহের সনন্দ-ও ফরমান লইয়া অসীম মুর্শিদাবাদ যাত্রা করিলেন।

চতুঃসপ্ততিতম পরিচ্ছেদ

কিরীটেশ্বরী

সরস্বতী বৈষ্ণবী ও হরনারায়ণের লাঠিঘালগণ সমস্তদিন সেই দীর্ঘিকার পাড়ে জীর্ণ মন্দিরের চারিদিকে বসিয়া রহিল। তাহারা ইচ্ছা করিলে স্ত্রীলোকগুলিকে লইয়া স্বচ্ছন্দে ডাড়া-পাড়ায় চলিয়া যাইতে পারিত, কিন্তু গেল না। সমস্ত দিন স্ত্রীলোকগুলি অভুক্ত রহিল, কেবল সরস্বতী সুবিধা পাইয়া উঠিয়া বল সঞ্চয় করিয়া আসিল। সন্ধ্যার সময়ে দুর্গা বুঝিতে পারিলেন যে ইহারা হরনারায়ণের আদেশের অপেক্ষা করিতেছে। তখন তিনি স্নানের অছিলায় সতী ও বড়বধূকে সঙ্গে লইয়া দীর্ঘিকায় নামিলেন। সরস্বতী তীরে দাঁড়াইয়া রহিল এবং লাঠিঘাল দুইজন দূরে তালবৃক্ষের অন্তরালে অপেক্ষা করিতে লাগিল। এই সময়ে দূরে বহু মহুয়া পদশব্দ শ্রুত হইল। লাঠিঘাল দুইজন স্থির করিল যে হরনারায়ণ পাক্ষী পাঠাইয়াছেন। লোকজন নিকটে আসিলে তাহারা দেখিতে পাইল যে, পাক্ষী মোট দুইখানি, কিন্তু সঙ্গে লোকলস্কর অনেক। তখন একজন লাঠিঘাল হাঁকিল, “কোথাকার পাক্ষী?” একজন অগ্রগামী মশালধারী উত্তর করিল, “মুর্শিদাবাদের। হজুর খালসার দেওয়ান ও কাহ্ননগোই সাহেবের পাক্ষী, লোক তফাতে।”

লাঠিঘালেরা জানিত যে, হরনারায়ণ একজন কাহ্ননগোই সুতরাং তাহারা স্থির করিল যে, হরনারায়ণ স্বয়ং আসিয়াছেন।

পাকী দুইখানা দীর্ঘিকার নিকটে আসিলে তাহারা পাকী থামাইতে বলিল এবং দর্পনারায়ণ ও ত্রিবিক্রম নামিলে তাঁহাদিগকে প্রণাম করিয়া কহিল, “হুজুর, সমস্ত গ্রেপ্তার।” পুরস্কারের পরিবর্তে ত্রিবিক্রম যখন তাহাদিগকে বাধিতে আদেশ করিলেন তখন আর তাহাদের বিশ্বয়ের সীমা রহিল না। পাকী হইতে নামিয়া দর্পনারায়ণ জিজ্ঞাসা করিলেন, “বাপু হে, এসকল কি ? মুর্শিদাবাদে আসিয়াও ঢাকাই চাল ছাড় নাই দেখি।” ত্রিবিক্রম হাসিয়া কহিলেন, “আজ্ঞে, চালটি এবং লাঠিয়াল দুইটি আমার বাল্যবন্ধু হরনারায়ণ রায়ের এবং গ্রেপ্তার হইয়াছে আমার স্ত্রী এবং হরিনারায়ণের কন্যা ও পুত্রবধূ।” ত্রিবিক্রমের কথা শুনিয়া দর্পনারায়ণ এত অধিক বিস্মিত হইলেন যে তিনি অনেকক্ষণ ধরিয়া কথা কহিতে পারিলেন না। যখন তাঁহার বাকশক্তি ফিরিয়া আসিল তখন তিনি পুনরায় জিজ্ঞাসা করিলেন, “ত্রিবিক্রম, তোমার স্ত্রী ? আবার বিবাহ করিলে কবে ? এবং তাহার সহিত দুর্গার কোথায় সাক্ষাৎ হইল ?” ত্রিবিক্রম বলিলেন, “স্বতীগ্রামে গতবৎসর বিবাহ করিচাই সংসারে স্মৃতিতে বাধা হইয়াছি নতুবা এতদিন চিতাগ্নিতে রন্ধন করিয়া আহার করিতাম এবং চিতাভস্মে শয়ন করিতাম।” “আমরাও তো তাহাই শুনিয়াছিলাম কিন্তু দুর্গাকে কোথায় পাইলে ?” “হরিনারায়ণ আমার সহিত পাটনা হইতে মুর্শিদাবাদে আসিতে-ছিল, পথে ঝড়ে নোকা মারা যাওয়ায় স্বতীগ্রামে আমার স্বপ্ত-গৃহে আশ্রয় লইয়াছিল। আমরা দুইজন, স্ত্রীলোকদিগকে

স্বতীগ্রামে রাখিয়া মুর্শিদাবাদে আসিয়াছিলাম।” “হরনারায়ণ ইহাদিগকে বন্দী করিল কেন?” “সে কথা আমি কেমন করিয়া বলিব খুড়া? কাল নবাব দরবারে হরিনারায়ণ বিজ্ঞানকার অসীমরায়ের আরজী পেশ করিবে সেই সময় হয় তো সকল কথা প্রকাশ হইয়া পড়িবে। উপস্থিত আপনি আসিয়া পড়িয়া-
ছিলেন বলিয়া আমাদের ইজ্জত রক্ষা হইয়াছে।”

দর্পনারায়ণ আর কিছু না বলিয়া দীর্ঘিকার পাড়ে উঠিয়া ডাকিলেন, “দুর্গা, ওদুর্গা! আমি দর্পঠাকুরদাদা, তোর কিছু ভয় নাই, আমার কাছে আয়।” লোকজনের গোলমাল শুনিয়া দুর্গা গলাজলে গিয়া দাঁড়াইয়াছিলেন, দর্পনারায়ণের আহ্বান শুনিয়া বড় বধু বলিলেন, “ঠাকুরঝি, তোকে কে ডাকিতেছে।” দুর্গা বলিলেন, “বোধ হয় আমাদের কাছে ছল করিয়া জল হইতে তুলিবার জ্ঞাত কেহ দর্পঠাকুরদাদার নাম করিয়া ডাকিতেছে। আমাদের উঠিয়া কাজ নাই।” এই সময়ে দুই জন মশালচী দুইটা মশাল আনিয়া দর্পনারায়ণের সম্মুখে দাঁড়াইল এবং আলোকে শুভ্রকেশ বৃদ্ধকে দেখিয়া দুর্গা তাঁহাকে চিনিতে পারিলেন। তখন তিনি বলিলেন, “বো, এত ছলাকলা নয়, সত্য সত্যই যে দর্পদাদা দেখিতেছি?” দুর্গা উঠিলেন এবং সিক্তবস্ত্রে দর্পনারায়ণের সম্মুখে গিয়া দাঁড়াইলেন, তাহাকে দেখিয়া বৃদ্ধ বলিলেন, “সত্য সত্যই যে দুর্গা দেখিতেছি। ত্রিবিক্রম, তুমি কেমন করিয়া জ্ঞানিলে?”

অগ্রহায়ণের প্রথমে উত্তর-রাতে প্রভাতে ও সন্ধ্যায় বিলক্ষণ

শীত পড়ে। রজনীর প্রথম যামে উত্তর রাঢ়ের মুক্ত সুদীর্ঘ প্রান্তরে প্রবল শীত বায়ু বহিতেছিল, দুর্গা শীতে কাঁপিতেছিল, তাহা দেখিয়া দর্পনারায়ণ মহিলাদিগকে মন্দিরে পাঠাইয়া দিয়া নিজের ও ত্রিবিক্রমের গরদের জোড় পাঠাইয়া দিলেন এবং ত্রিবিক্রমকে পুনরায় জিজ্ঞাসা করিলেন, “ত্রিবিক্রম, এখন কোথায় আশ্রয় লওয়া যায়?” ত্রিবিক্রম কহিলেন, “কেন, মায়ের মন্দিরে!” “বাছারা যে সমস্ত দিন কিছু খায় নাই।” “পূজা দিতে আসিয়াছে, খাইবে কি খুড়া! হিন্দুর মেয়ে একদিন না খাইলে মরিবে না।” “মন্দির আর কতদূর?” “অর্দ্ধকোশ।” “তবে তুমি মেয়েদের পাকীতে উঠাইয়া দাও, আমরা দুইজন হাঁটিয়াই চলিতেছি।”

মহিলা চতুষ্টয়কে দুইখানি পাকীতে উঠাইয়া দিয়া ত্রিবিক্রম ও দর্পনারায়ণ কিরীটেখরীর মন্দিরাভিমুখে যাত্রা করিলেন। চেহেল সতুন প্রাসাদ নির্মাণকালে মুর্শিদাবাদের দশকোশ সীমার মধ্যে অবস্থিত সমস্ত দেবমন্দির সুবাদারের আদেশে ভাঙ্গিয়া ফেলা হইয়াছিল, সুতরাং যে কষ্টিপাথরের মন্দির মধ্যে মহাপীঠের চিহ্নস্বরূপ প্রস্তর খণ্ড রক্ষিত হইত তাহার ধ্বংসাবশেষ মাত্র চারিদিকে পড়িয়াছিল। সকলে মন্দিরের অদূরে এক ধর্মশালায় আশ্রয় গ্রহণ করিলেন। অমানিশার দ্বিতীয়প্রহর অতীত হইলে পূজা ও বলি সাজ করিয়া দর্পনারায়ণ ত্রিবিক্রমকে জিজ্ঞাসা করিলেন, “কিহে, হরনারায়ণ এমন কাজ করিল কেন?” ত্রিবিক্রম হাসিয়া কহিলেন, “খুড়া, আমি দুইদিন অসীম সম্বন্ধে

কথা কহিয়া হরিনারায়ণের মনের ভাব জানিয়া লইয়াছি, সে মনে করে যে মিথ্যা কথা বলিয়া সে আমাকে প্রতারণা করিতে পারে কিন্তু আমি যে তাহার মনের ভাব কেতাবের হরফের মত পড়িতে পারি তাহা সে বুঝিতে পারে না।”

“সে চাহে কি?” “সে চাহে আমাকে মুর্শিদাবাদ হইতে দূর করিতে আর হরিনারায়ণ বিদ্যালঙ্কারকে দেশান্তরিত করিতে।”

“তাহাতে ফল হইবে কি?” “খালসার দেওয়ানী পদটার উপরে তাহার অনেক দিন ধরিয়াই লোভ ছিল কারণ গোড়ের জায়গীর যে কতদূর মূল্যবান তাহা দিল্লীতে এখনও কেহ জানে না। বাঙ্গালা দেশ নিরুপদ্রব করিয়া রাখিতে পারিলে বাঙ্গালার মাটিতে যে সোনা ফলে, এক স্রুবা বাঙ্গালার রাজস্ব দিয়া কাশ্মীর ও মালব স্রুবা খরিদ করা যায়, তাহা দিল্লীর খালসার সেরেস্তা এখনও বোঝে নাই। বুঝিয়াছে মুর্শিদকুলী, কারণ সে দক্ষিণের ছয় স্রুবার বন্দোবস্ত করিয়া আসিয়াছে আর বুঝিত আজীম উশ্শান। তুরানী মোগল কেবল ঝগড়া করিতে জানে কিন্তু দেশ শাসন করিতে জানে ইরাণী আর সে পাশসা খরচ করিতে শিখিয়াছে হিন্দুস্থানী মুসলমান।” “কথাটা সত্য বটে ত্রিবিক্রম, কিন্তু হরিনারায়ণের কণ্ঠা ও পুত্রবধূকে হরণ করিয়া হরিনারায়ণের কি হইবে?” “স্বর্গগত হরিনারায়ণ খুড়া মৃত্যুকালে বিষয়-আশয়ের দানপত্র হরিনারায়ণ বিদ্যালঙ্কারকে দিয়া গিয়াছিলেন, ককনপুর পরগণা নির্ঝিবাদে ভোগ করিবার জন্ত হর ভাই দুইটির সহিত হরিনারায়ণকে গ্রাম হইতে তাড়াইয়াছিল।

বিজ্ঞানক পাগল মানুষ, সে চিরকাল দাবাখেলা লইয়াই ব্যস্ত, বাস্তবতা পরিত্যাগ করিয়া যাইবার সময় তাঁহার স্মরণ ছিল না যে দলীল দস্তাবেজ তাহার নিকটেই আছে। সে কথা স্মরণ হওয়ায় সে পাটনা হইতে ফিরিয়া আসিয়াছে, সেই জ্ঞাত হর এখন তাঁহার কণ্ঠা ও পুত্রবধূকে ধরিয়া রাখিয়া তাঁহাকে নিজের কঙ্কার মধ্যে রাখিতে চাহে।” “তবে আর রাত্ৰিকালে ফিরিয়া কাজ নাই, সকালে আর চারিখানি পাকী আনাইয়া একত্র যাওয়া যাইবে।”

পঞ্চসপ্ততিতম পরিচ্ছেদ

সুবাদারের বিচার

বাদশাহের দরবার হইতে বিদায় হইবার দুইমাস পরে অসীম মুর্শিদাবাদের উপকণ্ঠে পৌছিল। সংবাদ পাই হরিনারায়ণ ও ত্রিবিক্রম নগরের বাহিরে তাহার সহিত সাক্ষাৎ করিলেন, বৃদ্ধ দর্পনারায়ণ রায় নিজে আসিতে না পারিয়া একজন আমলা পাঠাইয়া দিলেন। ত্রিবিক্রমের মুখে সকল সংবাদ শুনিয়া অসীম ডাহাপাড়া যাত্রার সঙ্কল্প পরিত্যাগ করিল। হরিনারায়ণ জানাইলেন যে, পরগণে রূকণপুরের দশ আনা তের-গুণা দখলের দরখাস্ত পেশ হইয়াছে, হরনারায়ণ অসীম রায়কে

সাক্ষ্য মানিয়া আরজীর হুকুমনামা বিলম্ব করাইতেছে: এসীম
ওনিয়া হাসিল।

একদিন পরে নিয়মমত জলুস করিয়া অসীম বাদশাহী সনন্দ
ও ফরমান মুর্শিদকুলী খাঁকে দিতে চলিলেন। মোগল বাদশাহী
আমলে বাদশাহের ফরমান বা সনন্দ যে দিতে আসিত সে
বাদশাহের তায় সম্মান পাইত। অসীম নিজে হাতীতে চড়িয়া
চলিল, তাহার সম্মুখে চক্ষিশজন হরকরা আগাসোটা ও নিশান
লইয়া চলিল। পশ্চাতে অসীমের সৈন্তদলের পক্ষাশজন সওয়ার
চলিল। এই জলুস একেবারে চেহেল সতুন দরবার কক্ষের
দ্বারে গিয়া দাঁড়াইল। অন্তদিন অসীমকে মুর্শিদাবাদের
ত্রিপলীয়া দরওয়াজা হাতী হইতে নামিতে হইত কিন্তু অত্ৰ তিনি
বাদশাহের পত্র লইয়া আসিয়াছেন বলিয়া মুর্শিদকুলী জাফর খাঁ
নাসীরী নিজে দরবারের দ্বারে আসিয়া অসীমের অভ্যর্থনার
জন্ত দাঁড়াইয়াছিলেন। তাঁহার পশ্চাতে বাঙ্গালার প্রধান
রাজকর্মচারী ও জমিদারগণ দাঁড়াইয়া ছিলেন। অসীম হাতী
হইতে নামিলে মুর্শিদকুলী খাঁ তিনবার তাহাকে কুর্নিশ করিয়া
মখমলের থলিয়ায় আবদ্ধ বাদশাহী ফরমান ও সনন্দ তাহার
নিকট হইতে লইলেন এবং তাহা একখানা সোনার থালায়
রাখিয়া দিল্লীর দিকে ফিরিয়া তিনবার কুর্নিশ করিলেন।
গোলামেরা আসিয়া থালার উপর ছাতা ধরিল, খোজারা স্বর্ণের
আসাসোটা মাহী, মরাতব প্রভৃতি নানা আকারের রাজচিহ্ন
লইয়া দুইধারে সারি বাধিয়া দাঁড়াইল। নকীব হাকিল,

“ফরমান রওয়ান শাহানশাহ্ বাদশাহ্-ই-গাজী আবুল মোজাক্ফর মহম্মদ ফরুকসিয়স সুলতান-উস্-সলাতীন নাসীর-আমীর-উল-মোমীনীন ।”

স্বাদারের শোভাযাত্রা চেহেল সতুন দরবারের দরওজা হইতে মসনদ পর্যন্ত পৌছিল, হরকরাগণ পথ ছাড়িয়া চারিদিকের দেওয়ালে সারি বাধিয়া দাঁড়াইল। মুর্শিদকুলী খাঁ নায়েব নাজিম সৈয়দ আক্রাম খাঁর হস্তে স্বর্ণখালা দিয়া মখমলের থলিয়ার উপরের বাদশাহী মোহর কাটিয়া ফেলিলেন এবং মোহরটি সম্বন্ধে নিজের পাগড়ীর উপর রাখিয়া বাদশাহী ফরমান ও সনন্দ পড়িলেন। ফরখন্দা বখ্তের স্ববাদারীর সনন্দ, নিজের উড়িষ্ঠা স্ববার স্ববাদারীর সনন্দ, সুলজাউদ্দিনের উড়িষ্ঠার নায়েব স্ববাদারীর সনন্দ, নিজের বাঙ্গালা স্ববার নায়ের স্ববাদারীর সনন্দ ও ফরমান পাঠ করিয়া নবাব মুর্শিদ কুলী খাঁ অসীম রাঘের নূতন জায়গীরের ফরমান পাঠ করিতে আরম্ভ করিলেন। ফরমানের নিম্নে একটুকরা অতি স্বল্প কাগজে একটি পার্শী কবিতা লিখিত ছিল—

“সাধুর কবরের উপরের কাঁটাগাছ সন্দর গোলাপ অশ্রু-সন্দর, রাজার পদের ছিন্ন পাছকা মণিমুক্তা শোভিত নূতন পাছকা অপেক্ষা সম্মানের পাত্র, এই কাকের যুবা বাদশাহের যুদ্ধে বাদশাহের গোলাম হুসেন আলী খাঁর সহিত স্বর্গে যাইতে-ছিল কিন্তু এখনও তাহার দুনিয়ায় কর্তব্য শেষ হয় নাই বলিয়া খোদা তাহাকে হুসেন আলীর নিকট ফিরাইয়া দিয়াছেন ।”

“বনামে কুতুব-উল-মুন্স আবদুল্লা সৈয়দ-ই-বাহো

বন্দা-ই বন্দে গান্ বখীদমতে কররক শাহ্ ।”

অনুমনক হইয়া কবিতা দুইটি পড়িয়া নবাব মুর্শিদ কুলী খাঁ এইটু হাসিলেন, ক্ষুদ্র হরনারায়ণ রায় ক্ষুদ্রতর হইয়া দর্পনারায়ণ ও সৈয়দ আক্রমণের মধ্যে মিশিয়া যাইবার চেষ্টা করিলেন। বাদশাহী সনন্দ ও ফরমান পাঠ শেষ হইয়া গেলে মুর্শিদ কুলী খাঁ কাটরা মসজিদের পেশাইমাম সৈয়দ আফজল খাঁকে নূতন বাদশাহের নামে খোৎবা পাঠের আদেশ দিলেন, শেঠ মাণিক চন্দ মুশিদাবাদ জহাঙ্গীর নগর ও কটক টাঁকশালে নূতন টাঁকা ছাপাইবার আদেশ পাইলেন। এই সময় দরবারের আরজ্বেগী উঠিয়া জানাইলেন যে, নূতন মনসবদার আমীর অসীম রায় বাহাদুরের নামে যে আরজী পেশ আছে, আরজদারের জবানবন্দী লইয়া তাহার উপর হুকুম দিতে হুকুম হয়। চতুর মুর্শিদ কুলী খাঁ আবার একটু হাসিলেন। আরজবেগী আরজী পড়িল, প্রধান কানুনগোই দর্পনারায়ণ রায় অসীমকে জিজ্ঞাসা করিলেন, “আমীর সাহেব, আপনি কি আপনার পৈত্রিক তালুকের অংশ কানুনগোই হরনারায়ণ রায়ের নামে লিখিয়া দিয়াছিলেন?” অসীম কহিল, “হাঁ, দিয়াছিলাম কিন্তু তখন আমি জানিতাম না যে আমার পিতা মৃত্যুকালে রুকণপুর পরগণা দেবতাকে দান করিয়াছিলেন এবং আমরা তিন ভাই সেবাইত মাত্র। আমাদের দান-বিক্রয়ের অধিকার ছিল না।” দর্পনারায়ণ পুনরায় জিজ্ঞাসা করিলেন, “রুকণপুর খালসার পরগণা, কানুনগোই হরনারায়ণ

রায় এখন তাহার ষোল আনা দাবী করিতেছেন এবং অসীম রায়ের দানপত্র পাঁচ বৎসর পূর্বে সহি মোহর হইয়া গেলেও হস্তান্তর বাদশাহ্ দরবারে মুস্তোফী বা দিউয়ানী-ই-কুলকে জানানো হয় নাই কেন ?” মুর্শিদ কুলী খাঁ একবার হরনারায়ণের মুখের দিকে চাহিলেন কিন্তু হরনারায়ণ উত্তর না দিয়া মাটির দিকে চাহিয়া রহিলেন। নায়েব স্ববাদের হুকুম দিলেন, “দানপত্র নাকচ, রুকনপুর পরগণা আলমগীর বাদশাহের হুকুম মত হরিনারায়ণ রায়ের তিন পুত্রের নামে সমান ভাবে লেখা যায়।” সভার সকলে “কেরামত কেরামত” বলিয়া স্ববাদেরকে দণ্ডবাদ দিল। নহবৎ বাজিয়া উঠিল, সভাভঙ্গ হইল। ত্রিবিক্রম হরিনারায়ণ বিদ্যালঙ্কার ও অসীমকে ডাকিয়া বলিলেন, “তোমরা এখন ডাহাপাড়ায় গিয়া ঘরবাড়ী দখল কর।” এই সময় দর্পনারায়ণ আসিয়া সেইস্থানে উপস্থিত হইলেন, তাঁহাকে দেখিয়া ত্রিবিক্রম বলিলেন, “খুঁড়া, অসীমকে এখন পৈত্রিক ভিটা দখল করিতে বলিতেছি, তুমি কি বল ?” দর্পনারায়ণ কহিলেন “ঠিক কথাই বলিয়াছি। বিদ্যালঙ্কার তুমিও কত্কা পুত্র বধু লইয়া বাড়ী ফিরিয়া যাও, কতদিন আর দেশে দেশে ভ্রমণ করিয়া ফিরিবে ?” বিদ্যালঙ্কার বলিলেন, “সুদর্শন আসিলে বৌমাকে দেশে পাঠাইয়া দিব কিন্তু আমি আর ডাহাপাড়া গ্রামে বাস করিতে যাইব না। হরের দর্প চূর্ণ করিয়াছি, স্বর্গগত হরিনারায়ণ রায়ের আদেশ পালন করিয়াছি, এখন নিজের প্রায়শ্চিত্ত করিবার জন্য কাশী যাইব। অসীম, তোমার নিজস্ব তুমি

ফিরাইয়া পাইয়াছ। যখন গ্রামে যাইবে তখন আমার ভিটা দখল করিয়া রাখিও। সুদর্শনকে তোমার হাতে দিয়া গেলাম, ভিটা দখল করিয়া তাহাকে ডাকিয়া পাঠাইও। সে দুর্বল, তাহাকে রক্ষা করিও। দুর্গাকে লইয়া এখনই কালী যাত্রা করিলাম।”

সেই দিনই সন্ধ্যার প্রাক্কালে একখানি ক্ষুদ্র পান্সী পাল উঠাইয়া তীর বেগে উত্তর দিকে ছুটিল।

ষট্‌সপ্ততিতম পরিচ্ছেদ

বাড়

অসীমের প্রত্যাবর্তনের পর ছয় বৎসর অতীত হইয়া গিয়াছে। অসীম স্ত্রী ও ভ্রাতার সহিত ডাহাপাড়া গ্রামে বাস করেন, সুদর্শন গান বাঁধিয়া সময় অতিবাহিত করে। অসীমকে রাজকাৰ্য্যে বাঙ্গালার নানীস্থানে যাইতে হয়, তখন ভূপেন্দ্র বাড়ীর কর্তা হইয়া দাঁড়ান। হরনারায়ণ স্বতন্ত্র ঘরে বাস করেন কিন্তু তাঁহার পত্নীর সহিত অসীমের স্ত্রী শৈলর প্রগাঢ় প্রেম। শীতের প্রারম্ভে দিল্লী হইতে বাদশাহের সহিত কুতব-উল-মুন্স সৈয়দ আবদুল্লা খাঁ এবং হুসেন আলী খাঁর বিবাদের সংবাদ আসিতে আরম্ভ করিল। ভারতবর্ষের সর্বত্র রাজকর্মচারীগণ উদ্বিগ্ন হইয়া উঠিলেন। অগ্রহায়ণ মাসের প্রারম্ভে একজন আহদী দিল্লী হইতে অসীমের নামে একখানা পত্র লইয়া আসিল, তাহা পাঠ করিয়া অসীম অত্যন্ত উদ্বিগ্ন হইলেন। তিনি

ভূপেন্দ্রকে সঙ্গে লইয়া একখানি ক্ষুদ্র পান্সীতে গঙ্গা পার হইয়া ত্রিবিক্রমের সহিত সাক্ষাৎ করিতে গেলেন। শৈল অসীমের উদ্বিগ্ন ভাব লক্ষ্য করিয়া জায়ার সহিত পরামর্শ করিতে গেল। হরনারায়ণের পত্নী তাঁহার বিশাল নাসিকায় বিশাল নখ ঢুলাইয়া বলিলেন, “এতদিন যে ছোটকর্তা কি করিয়া প্রাণের দুর্গা-মাকুরাণীকে ছাড়িয়া আছে তাহাই ভাবিয়া ঠিক করিতে পারিতেছিলাম না।” শৈল কহিল, “দিদি, সরস্বতী সন্ধান লইয়া জানিয়াছে যে, লোকটা দিল্লী হইতে আসিল।” “ও সকল বাজে কথা ভাই, বাদশাহ অনেক কাল ছোট কর্তাকে ভুলিয়া গিয়াছে। ছোট কর্তা এখন বাদশাহের নাম করিয়া দুর্গার সহিত বাসলীলা করিতে চলিল। তুই যদি এখন ভাল চাহিস তাহা হইলে সঙ্গে যা।”

হরনারায়ণের স্ত্রী তাহাকে যাহা বুঝাইলেন শৈল তাহাই বুঝিল। বিপদে পড়িয়া ফরুক্‌সিয়ার অসীম ও ভূপেন্দ্রকে স্মরণ করিয়াছিলেন। যখন মীরজুমলা প্রভৃতি সারশূত্র চাটুকারগণ সৈয়দ আকবুল্লা ও হুসেন আলী খাঁর বিরুদ্ধে দাঁড়াইতে সাহস করিল না এবং তিনি যখন শুনিলেন যে, আকবুল্লা খাঁর আঙ্গানে সৈয়দ হুসেন আলী খাঁ আওরঙ্গাবাদ হইতে দিল্লী যাত্রা করিয়াছেন তখন তিনি বুঝিলেন যে, এইবার ময়ূরসিংহাসনে বসিয়াও তিনি আত্মরক্ষা করিতে পারিবেন না, তখন বাল্যের বন্ধু, পিতৃ-বন্ধু যাহাকে যাহাকে মনে পড়িল, হতভাগ্য বাদশাহ প্রাণভয়ে তাঁহাদিগকেই দিল্লীতে ডাকিয়া পাঠাইলেন। অম্বরের মহারাজা

জয়সিংহ কচ্ছবাহা, ঘোষণাপুরের মহারাজা অজিতসিংহ রাঠোর, দ্বিতীয় গীরজুমলা উপাধিধারী শরীফউল্লা খাঁ হইতে কুদ্র অসীম রায় পর্য্যন্ত সকলেই দিল্লীতে আহুত হইলেন।

পরামর্শ অনুসারে শৈল স্থির করিয়া রাখিল যে, অসীম ডাহাপাড়া পরিত্যাগ করিতে চাহিলেই সে সঙ্গে যাইবে। ত্রিবিক্রমের সহিত পরামর্শ করিয়া আসিয়া অসীম যখন বলিলেন যে তাঁহাদের দিল্লী যাত্রা করিতে হইবে, তখন কিছুমাত্র আশ্চর্য্য না হইয়া শৈল বলিল, “তোমরা তো ঘোড়ায় যাইবে, আমি কিসে যাইব?” অসীম অত্যন্ত বিস্মিত হইয়া জিজ্ঞাসা করিলেন, “তুমি কোথায় যাইবে?” শৈল হাসিয়া বলিল, “আমি এই শত্রু-পুরীতে একা বাস করিতে পারিব না, তুমি যেখানে যাইবে আমিও তোমার সঙ্গে যাইব।” অসীম শৈলকে বুঝাইবার চেষ্টা করিলেন কিন্তু সে কিছুতেই বুঝিল না। অবশেষে অসীম বলিলেন, “তবে চল তোমাকে স্ত্রীগ্রামে রাখিয়া যাই।” উত্তরে শৈল বলিল, “সকলের মুখেই শুনিয়াছি যে, আমার স্বপ্নের বংশের কোন বউ বড় হইয়া বাপের বাড়ী যায় না, এখন আমি গেলে জ্ঞাতিরা নিন্দা করিবে।” “দিল্লী ঘোড়ার ডাকে একমাসের পথ, পাকীতে গেলে তিন মাস এবং নৌকায় ছয় মাস। যে বাদশাহের অন্ন খাই, তাঁহার বিপদের সময় তিনি তলব করিয়াছেন, এখন কেমন করিয়া তোমাকে লইয়া যাইব?” “আমাকে লইয়া না গেলে আমি তোমার পায়ে রক্তগন্ধা হইয়া মরিব।”

তখন উপায় না দেখিয়া অসীম, ত্রিবিক্রম ও সুদর্শনের সহিত পরামর্শ করিলেন। স্থির হইল যে দুই খানা পাকী লইয়া সুদর্শন ও ভূপেন্দ্রের সহিত অসীম দিল্লী যাত্রা করিবেন। সুবাদারের পরওয়ানা লইয়া পাকী বেহারার ডাক বশাইয়া দুই মাসে দিল্লী পৌছানো সম্ভব। অসীম মুর্শিদকুলীখাঁর নিকট বিদায় লইয়া পরদিন সুদর্শন ও তাহার পত্নী, শৈল ও ভূপেন্দ্রের সহিত দিল্লী যাত্রা করিলেন। বিদায় কালে ত্রিবিক্রম অনেক দূর আসিয়া অসীমকে বলিয়া দিলেন, “রায়জী, বয়স হইয়াছে, হয় তো তোমার সহিত আর সাক্ষাৎ হইবে না। তিনটি কথা মনে রাখিও, বিপৎকালে স্ত্রীলোকের পরামর্শে চলিও না, স্বার্থের জগৎ কর্তব্যে বিশ্বস্ত হইও না, জীবন-যৌবন-ধন-সম্পদ সমস্তই অস্তি তুচ্ছ, স্ত্রী-পুত্র কেহই তোমার নহে, সংসারে কেবল তুমিই তোমার, একা আসিয়াছ, একাই চলিয়া যাইতে হইবে।” পাকী দুইখানি ও অসীমের হাজার সওয়ার অদৃশ্য হইয়া গেলে ত্রিবিক্রম আপন মনে কহিলেন, “মায়ের ইচ্ছাই পূর্ণ হইল, হর-নারায়ণই জিতিল।”

সপ্তসপ্ততিতম পরিচ্ছেদ

নিজামউদ্দীন

মাঘ মাসের মধ্যভাগে অসীম দিল্লী পৌছিল। পথে কাশীতে পিতার সহিত সাক্ষাৎ করিয়া সুদর্শন তাহার পত্নীকে

রাখিয়া আসিয়াছিল। দুর্গার ভাব দেখিয়া শৈল আশ্চর্য্য হইয়া গেল, কারণ একটিবার সম্ভাষণ ব্যতীত দুর্গা অসীমের সহিত কথা পর্য্যন্ত কহিত না। কাশী হইতে দিল্লী যাত্রা কালে দুর্গা ভূপেন্দ্রকে জড়াইয়া ধরিয়া কাঁদিল, বিপৎসঙ্কুল দিল্লীতে শৈলকে যাইতে নিষেধ করিল, এমন কি তাহাকে কাশীতে থাকিতে অনুরোধ করিল। শৈল মনে করিল এ সমস্ত ছলনা, অসীম একা চলিয়া গেলেই দুর্গা তাহাকে কাশীতে রাখিয়া পলাইবে এবং অগ্র পথে অসীমের সঙ্গে জুটিবে। সে কাহারও কথা না শুনিয়া স্বামীর সহিত দিল্লী যাত্রা করিল।

১১৩১ হিজরার রবি-উদ্-সানী মাসের চতুর্থ দিবসে (২৩শে ফেব্রুয়ারী, ১৭১৯ খৃষ্টাব্দে) আব্দুল্লা খাঁ ও হুসেন আলী খাঁ বাদশাহের দরবারে উপস্থিত হইলেন। ইহার দুই দিন পূর্বে অম্বরের রাজা জয়সিংহ এবং বুদ্ধীর রাজা বুদ্ধসিংহ হাড়া দিল্লী ত্যাগ করিবার আদেশ পাইয়াছিলেন। আব্দুল্লা খাঁ ও হুসেন আলী খাঁর ভয়ে বাদশাহ একে একে সমস্ত বিশ্বস্ত অম্বচরগুলিকে দিল্লী হইতে বিদায় করিতেছিলেন। অসীম দরবারে বাদশাহের দর্শন পাইয়া তোগলকাবাদ বা গাজীয়াবাদে সৈন্ত পাঠাইবার আদেশ পাইলেন, রাজা জয়সিংহ দিল্লী হইতে যাত্রা করিয়া অনতিদূরে অবস্থান করিতেছিলেন। অসীম তাঁহার পরামর্শ লইয়া তোগলকাবাদের নিকটে ওখলা গ্রামে সৈন্ত পাঠাইলেন। তিনি নিজে দিল্লী দরওয়াজার নিকটে সপরিবারে আশ্রয় লইলেন।

হুসেন আলী খাঁ ও আব্দুল্লা খাঁ বাদশাহের দরবারে উপস্থিত হইলে সকলেই মনে করিল যে, উজীর ও প্রধান সেনাপতির সহিত বাদশাহের বিবাদ মিটিয়া গেল। অসীম অস্বাভাবিক দিল্লী দরুওয়াজা দিয়া দিল্লী নগর পরিত্যাগ করিয়া ওখলা যাত্রা করিলেন। তখন দিল্লীতে ভীষণ শীত। প্রত্যুষে পথে অধিক লোকজন ছিল না। অসীম সূর্যোদয় কালে নিজাম-উদ্দীনের সমাধির নিকটে উপস্থিত হইলেন। সমাধির নিকট একটি পুরাতন কবরের মধ্যে বসিয়া এক রমণী ভজন গাহিতেছিল, তাহার কণ্ঠস্বর শুনিয়া অসীম ঘোড়া ফিরাইয়া কবরের দিকে চলিলেন।

আলাউদ্দীন খলজী নির্মিত বিরাট মসজিদের প্রাঙ্গণে শুভ মন্দিরের ক্ষুদ্র সমাধি মন্দিরে বিখ্যাত সাধু নিজাম-উদ্দীন আউলিয়া সমাহিত আছেন। সমাধি মন্দিরের ছায়ার সম্মুখে শাহজহান দুহিতার মুক্ত-সমাধি-মন্দির। এই উভয় সমাধির মধ্যস্থলে মন্দিরের আচ্ছাদনের উপর বসিয়া এক রমণী সারেঙ্গী বাজাইয়া ভজন গাহিতেছিল। অসীম সেই স্থানে আসিয়া দাঁড়াইল। রমণীর সর্বাঙ্গ হরিৎবর্ণ বস্ত্রের বোরখায় আবৃত, স্ততরা তাহার সহিত বাক্যালাপ করা শিষ্টাচার বিরুদ্ধ বলিয়া অসীম দূরেই দাঁড়াইয়া রহিলেন। গীত শেষ হইয়া গেল, অসীম মন্ত্রমুগ্ধের মত শুনিয়া গেলেন, রমণী সারেঙ্গী বাজিয়া উঠিল, একটি সুন্দর বালক সারেঙ্গী উঠাইয়া রমণীর হাত ধরিল। এই সময়ে অসীম গিয়া রমণীর সম্মুখে দাঁড়াইলেন, তাহাকে দেখিয়া রমণী শিহরিয়া

উঠিল এবং বোরখার সম্মুখের আবরণ ফেলিয়া দিয়া সেলাম করিল। অসীম বলিলেন, মণিয়া তোমার কণ্ঠস্বর আমাকে বাদশাহী সড়ক হইতে ডাকিয়া আনিয়াছে। আমি দিল্লী দরওয়াজা হইয়া ওখ্‌লা যাইতে ছিলাম পথে পুরাতন দিল্লীর ধ্বংসের মধ্যে তোমার গলার আওয়াজ শুনিয়া আশ্চর্য হইয়া গেলাম। মণিয়া, তুমি কি বন্দাবন যাও নাই? উত্তরে মণিয়া বলিল, “বন্দাবন গিয়া বিবেচনা করিয়া দেখিলাম যে, আমি পরিত্যাগ করিলে ফরীদ ভাই সংসারে স্থির হইয়া থাকিবে না, সেই জন্য বাবাকে বলিয়া, চারি পাঁচ বৎসর পূর্বে দিল্লী চলিয়া আসিয়াছি। আপনি কবে আসিলেন।” “দুই চারিদিন পূর্বে আসিয়াছি। উজীরের সহিত ঝগড়া আরম্ভ হইলে বাদশাহ আমাদিগকে কোর্জ সমেত তলব করিয়াছেন।” অসীম বিস্মিত হইয়া দেখিলেন যে পূর্বে তাঁহার মূর্তি নয়ন পথে পতিত হইলে মণিয়ার কুরঙ্গনয়ন যেরূপ আনন্দে নাচিয়া উঠিত আজি আর সে ভাবে নাচিল না। তিনি অন্য কথা পাড়িবার উদ্দেশ্যে জিজ্ঞাসা করিলেন, “মণিয়া, ফরাদ খাঁ কোথায়?” মণিয়া কহিল, “উপস্থিত এইখানেই, আমরা কাল দিল্লী হইতে আসিয়াছি, দুইদিন থাকিয়া ফিরিব। আল্লার রূপায় ফরীদের মতিগতি ফিরিয়াছে, তাহার বিবাহ দিয়া তাঁহাকে সংসারী করিয়াছি, সে এখন আমীন খাঁ চীনের লক্ষ্যে পঞ্চশতী।” “ফরীদ খাঁও কি এখানে আসিয়াছে?” “আসিয়াছে বই কি, ফরীদ ভাই আসিয়াছে, তাহার স্ত্রী আসিয়াছে, এই শিশু ফরীদের জ্যেষ্ঠ

পুত্র।” “তবে চল ফরীদ খাঁর সহিত সাক্ষাৎ করিয়া আসি।”

“আপনি আজ এই খানেই থাকুন না কেন?” “চল, থাকিব।”

শিশুর হস্ত ধারণ করিয়া মণিয়া নিজাম-উদ্দীন আউলিয়ার সমাধির চত্বর পরিত্যাগ করিল, অসীম তাহার অনুসরণ করিলেন। অদূরে একটা প্রকাণ্ড ত্রিতল কবরের মধ্যে, একটি জীর্ণ প্রকোষ্ঠে ফরাদ খাঁ সপরিবারে বাস করিতেছিলেন। এখনও যাহারা নিজাম-উদ্দীন আউলিয়ার সমাধিক্ষেত্রে আসে তাহারা জীর্ণ সমাধিমন্দিরে আশ্রয় গ্রহণ করে। যে সমাধিমন্দিরে ফরীদ খাঁ আশ্রয় গ্রহণ করিয়াছিল তাহা আকবরের রাজ্যকালের একজন বিখ্যাত আমীরের। ত্রিতল সমাধিমন্দির, পশ্চাতে মসজিদ ও চারি পার্শ্বে প্রাচীর। মণিয়া ফরীদের পুত্রকে লইয়া সমাধির মধ্যে চলিয়া গেল এবং অল্পক্ষণ পরেই ফরীদ খাঁ আসিয়া অসীমকে আলিঙ্গন করিল। দুই চারিটা কথা কহিয়া ফরীদ খাঁ বলিল, “রাজা সাহেব, আপনার ফোজ কোথায়?” অসীম বিস্মিত হইয়া জিজ্ঞাসা করিলেন, “কেন?” “দিল্লী হইতে থবর আসিয়াছে যে কিল্লা হইতে কুতব-উল্-মুক আবহুল্লা খাঁ বাদশাহী ফোজ দূর করিয়া দিয়া স্বয়ং মহল-সরা দখল করিয়াছে। বাদশাহ এখন বন্দী, সকলেই বিশ্বাস ঘাতক হইয়া দাঁড়াইয়াছে। ইতিকাদ খাঁ, গাজীউদ্দীন খাঁ আহমদ বেগ ও বাদশাহের শত্রুর সাদৎ খাঁ চারিদিক হইতে লোক ডাকাইয়া পাঠাইয়াছেন। আমি এই নিজাম-উদ্দীনে মণিয়ার কাছে স্ত্রী পুত্র রাখিয়া এখনই দিল্লীতে ফিরিয়া যাইব। রাজা সাহেব, আপনি বাদশাহের বন্ধু, আপনি

কি করিবেন?” “আমি কোনও সংবাদ পাই নাই, তবে আপনি যখন ফিরিয়া যাইতেছেন, আমিও যাইব।” “আপনার ফৌজ কোথায়?” “অনেক দূরে ওখলা মণ্ডিতে।” “রাজা সাহেব, আপনি এখনই চলিয়া যান, ফৌজ লইয়া ফিরিয়া আসুন আপনার ফৌজ কি রাজপুত না পাঠান? যে রকম খবর শুনিতেছি তাহাতে আপনার ফৌজে আপনার কথা শুনিবে কিনা সন্দেহ, সমস্ত হিন্দুস্তানী মুসলমান ও রাজপুত নিমক হারাম হইয়া দাঁড়াইয়াছে।” “খাঁ সাহেব আমার ফৌজ বাঙ্গালী হিন্দু।” “তবে আপনি এখনই চলিয়া যান, যত শীঘ্র পারেন ফৌজ লইয়া পুরাণ সহরের কাবুল ফটকের কাছে আসিবেন। আমি দিল্লীর খবর লইয়া আপনার জন্ত সেই স্থানে অপেক্ষা করিব।”

অসীম তখনই ঘোড়ায় চড়িয়া দক্ষিণ দিকে চলিলেন, ফরীদ খাঁ ও অশ্বারোহণে উত্তর দিকে যাত্রা করিল।

অফসপুতিতম পরিচ্ছেদ।

রাজ্যের শেষ দিন

১১৩১ হিজরার রবী-উল-সানী মাসের নবম দিবসে প্রভাতে দিল্লী শহর স্তম্ভিত হইয়া গেল। সকলেই শুনিল যে নগরী

হুসেন আলী ও আবদুল্লা খাঁর হস্তগত, বাদশাহ ফরুকখসিয়র প্রাসাদে বন্দী। কেহ বলিল যে বাদশাহের শত্রুর ঘোড়পুত্রের রাজা অজিত সিংহ জামাতার দুর্দশা দেখিয়া আবদুল্লা খাঁকে হত্যা করিয়াছেন। কেহ বলিল চীন কিলিচ খাঁ নিজাম-উল-মুলক্ ও আমীন খাঁ চীন বাদশাহকে রক্ষা করিবার জন্য প্রাসাদ আক্রমণ করিয়াছেন। কিন্তু পরে লোক দেখিতে পাইল যে এই দুইজন বিশ্বাসঘাতী তুরাণী মোগল সেনাপতি বাদশাহকে রক্ষা করিবার কোন চেষ্টাই করে নাই। সেদিন ফরুকখসিয়রের রাজ্যের শেষ দিন। বিশ্বাসঘাতক মুসলমান ও রাজপুত সেনানীদিগের মধ্যে কেহই হতভাগ্য বাদশাহের সাহায্যে অগ্রসর হইল না দেখিয়া ইতিকাদ খাঁ, ইসলাম খাঁ, মুখলিস খাঁ প্রভৃতি কয়েকজন সামান্য সেনানায়ক নগরীর ভিতরে প্রবেশ করিয়া কিল্লা দিল্লীর-দরওয়াজা পর্যন্ত অগ্রসর হইল, কিন্তু নির্লজ্জ রাজপুত অজিত সিংহ ও সৈয়দ আবদুল্লা খাঁ এই সৈন্তের উপরে গোলা চালাইতে আরম্ভ করায় তাহারা হটিয়া আসিতে বাধ্য হইল। ইতিকাদ খাঁ আহত হইলেন। এই সৈন্তদিগের মধ্যে শিক্ষিত সৈন্ত ছিল না, বাহারা যুদ্ধ করিতে আসিয়াছিল তাহারা কিল্লার কামানের গর্জন শুনিয়া ভয়ে পলাইল।

তৃতীয় গ্রহর বেলা শেষ হইলে হাজার সওয়ার লইয়া অসীম বখশ পুরাতন দিল্লীর কাবুল ফটকের নিকট আসিলেন তখন ফরীদ খাঁ বাহির হইয়া বাদশাহী সড়কে দাঁড়াইলেন। অসীম তাহাকে জিজ্ঞাসা করিলেন, “কি খবর খাঁ সাহেব!” বিষন্ন

বদনে ফরীদ খাঁ কহিলেন, “সংবাদ শুভ নহে রাজা সাহেব, সমস্ত মুসলমান ও রাজপুত বিশ্বাসঘাতক হইয়া দাঁড়াইয়াছে। চীন কিলিচ খাঁ অথবা আমীন খাঁ চীন বাদশাহের উদ্ধার করিবার চেষ্টা করে নাই। কিল্লা আক্রমণ করিতে গিয়া বাদ খাঁ আহত হইয়াছে, বাদশাহের কোন খবরই পাওয়া যাইতেছে না। নূতন শহরের দিল্লী ফটক বন্ধ হইয়া গিয়াছে, সৈয়দদিগের বখ্শী দিলাবর আলী খাঁ দিল্লী ফটকের উপর তোপ মারিয়া আসিয়া আছে, পাছে কেহ দক্ষিণ দিক হইতে বাদশাহের সাহায্য করিতে আসে। সরবুলন্দ খাঁ লাহোরের পথ আগুলিয়া বসিয়া আছে। চল দেখি, ঘুরিয়া অন্ত দরওয়াজা দিয়া ফোজ লইয়া শহরের ভিতর প্রবেশ করা যায় কি না ?”

ফরীদ খাঁর পরামর্শমত অসীম হাজার সওয়ার লইয়া দুই ক্রোশ পথ ঘুরিয়া আজমীর দরজায় আসিয়া শুনিলেন যে সহরের সমস্ত দরজা বন্ধ হইয়া গিয়াছে, হুসেন আলী খাঁর হুকুমে অস্ত্র লইয়া কেহ দিল্লী সহরে প্রবেশ করিতে পাইতেছে না। তখন আজমীর ফটকের বাহিরে, পাহাড়গঞ্জের সরাইতে ফোজ রাখিয়া ও অস্ত্র পরিত্যাগ করিয়া অসীম ও ফরীদ সন্ধ্যাকালে আজমীর ফটকের পথে দিল্লী শহরে প্রবেশ করিলেন।

দিল্লীর রাজপথ জনশূন্য। দোকান বাজার সমস্তই বন্ধ, পথে আলোক পর্য্যন্তও নাই। বহু কষ্টে অন্ধকারে পথ চলিয়া অসীম যখন বাসায় পৌঁছিলেন তখন রাত্রির প্রথম প্রহর শেষ হইয়া গিয়াছে। বাসার সংবাদ লইয়া ও আপাদ-মস্তক লৌহ

বৃক্ষে মণ্ডিত হইয়া সংবাদ সংগ্রহের জন্য অসীম ও ফরীদ খাঁ দ্বিপ্রহর রাত্রিতে বহির্গত হইলেন। চাঁদনী চকের নিকটে তাহারা পথে দুই চারিজন লোক দেখিতে পাইলেন বটে কিন্তু তাহাদের নিকটেই সৈনিক এবং সৈয়দদিগের দলভুক্ত। কিল্লার দক্ষিণ দিকে আওরঙ্গজেবের কন্যা জিনঃ-উন্নিসা বেগমের মসজিদের নিকটে ফরীদ খাঁ দুই চারিজন পরিচিত লোকের সাক্ষাৎ পাইলেন। ফরীদ ও অসীম তাহাদিগের নিকট হইতে জানিতে পারিলেন যে যুদ্ধে হিন্দুস্তানী মুসলমানদের মধ্যে ইতিকাদ খাঁ ও তুরাণী মোগলদিগের মধ্যে আগর খাঁ বীরত্ব প্রদর্শন করিয়া আহত হইয়াছেন। যুদ্ধ খামিয়া গিয়াছে, সম্ভবতঃ হুসেন আলী খাঁ স্বয়ং বাদশাহ হইবেন।

তাহাদিগের সহিত অধিক কথা না কহিয়া ফরীদ ও অসীম যমুনার শুষ্কগর্ভে নামিলেন—এবং দিল্লী দুর্গের পূর্বদিক দিয়া সুলিমগড় দুর্গের নিকটে পৌঁছিলেন। তাহারা দেখিলেন যে যমুনাতীর ও সুরক্ষিত, জাঠ রাজা চুড়ামণের অধীনে সৈয়দদিগের বেতন ভোগী বহু হিন্দু সেনা যমুনা গর্ভে শিবির স্থাপন করিয়াছে। কাবুল ও কাশ্মীর-ফটক দিয়া ঘুরিয়া আসিয়া অসীম ও ফরীদ যখন বাসায় পৌঁছিলেন তখন রাত্রি শেষ হইয়া আসিয়াছে। প্রভাতে ফরীদ খাঁ একাকী নির্গত হইলেন, অসীম তাহাকে বলিলেন যে তিনি আজমীর ফটকের বাহিরে ফৌজের ব্যবস্থা করিতে যাইবেন। ফরীদ খাঁ প্রস্থান করিলে শৈল অসীমকে ডাকিয়া পাঠাইল এবং অসীম অন্দরে আসিলে শৈল

তাহার সুন্দর মুখখানা বাঁকাইয়া কৰ্ণে জিজ্ঞাসা করিল,
 “রাত্রিতে কোথায় গিয়াছিলে? অসীম বিরক্ত হইয়া জিজ্ঞাসা
 করিলেন,—“সে থবরে তোমার প্রয়োজন কি?” ঠিক তা
 দিয়া বলিয়া উঠিল, “বলি আবার রাত্রি বেড়ান অভ্যাস
 কেন? অভ্যাসটা দুগা ঠাকুরাণীকে ছাড়িয়া দিন।
 গিয়াছিল, ঠাকুরাণী কি আবার আসিয়াছেন নাকি?” অসীম
 ক্রুদ্ধ হইয়া বলিলেন, “শৈল তোমার পাপ জিহ্বা খণ্ড খণ্ড করিয়া
 কাটিয়া কুকুর দিয়া খাওয়ান উচিত।” শৈল বিরক্ত কণ্ঠে উচ্চ
 হাস্য করিয়া বলিল, “দাড়াও আগে তোমার পুণ্যবতী ব্রাহ্মণীকে
 জীবন্ত কুকুর দিয়া খাওয়াই, তাহার পরে আমার জিহ্বা কাটিতে
 আসিও। কাল রাত্রিতে কোথায় গিয়াছিলে বল?” অসীম
 অত্যন্ত রাগিয়া বলিলেন, “কিছুতেই বলিব না,” শৈল বলিল,
 “তবে দুর্গা নেহাৎ আসিয়াছে?” অসীম উত্তর না দিয়া বাহিরে
 আসিলেন এবং অস্থারোহণে আজমীর ফটকে যাত্রা করিলেন।

আজমীর ফটকের ভিতরে আপাদ মস্তক বোরখা মণ্ডিত এক
 ভিখারিণী গান গাহিয়া ভিক্ষা করিতেছিল। তাহার কণ্ঠস্বর
 শুনিয়া অসীম তাহার নিকটে গিয়া জিজ্ঞাসা করিলেন—“মনিয়া
 তুমি কখন দিল্লীতে আসিলে?” মনিয়া সেলাম করিয়া বলিল,
 “হুজুর কাল সমস্ত দিন ভিক্ষা মিলে নাই, আট প্রহর খাইতে
 পাই নাই, খোদা আপনার মঙ্গল করিবেন, ঐ একখানা রুটির
 দোকান খুলিয়াছে, দয়াময় একমাত্র আল্লার দিব্য আমাকে এক-
 খানা রুটি কিনিয়া দিন।” মনিয়ার অনুরোধ শুনিয়া অসীম

অত্যন্ত বিস্মিত হইলেন কিন্তু তিনি বুঝিলেন যে বিশেষ উদ্দেশ্যে
 মনিয়া কখনই ভিক্ষায় বাহির হইত না। আজমীর
 একজন রুটি ওয়ালা দোকান খুলিয়া গরম রুটি
 বিক্রি করিতেছিল, অসীম তাহার দোকান হইতে এক পয়সায়
 রুটি কিনিয়া মনিয়াকে দিলেন, মনিয়া একখানা
 রুটি মুখে দিল কিন্তু পরক্ষণেই তাহা বাহির করিয়া অসীমের
 অঙ্গে ছুড়িয়া মারিল, অসীম স্তম্ভিত হইয়া রহিলেন। কুৎসিত
 ভাষায় অসীমকে গালি দিতে দিতে মনিয়া বাকী তিন খানা
 রুটি পথের কতকগুলো কুকুরের দিকে ছুড়িয়া মারিল। যে রুটি
 খানা সে অসীমের অঙ্গে মারিয়াছিল, তিনি তাহা তুলিয়া লইলেন
 না দেখিয়া মনিয়া বলিতে আরম্ভ করিল, “কাকের, হারাম-
 খোর, হারামজাদ, নিমকহারাম আমি কি শূকর যে পথের ময়লা
 তুলিয়া খাইব? তুই হারাম তোর রুটি ও হারাম, তুই নরকে
 গিয়া তোর হারাম খা।” অসীম বুঝিলেন যে মনিয়া ইঙ্গিতে
 তাহাকে রুটিখানা তুলিয়া লইতে বলিতেছে। তিনি ঘোড়া
 হইতে নামিয়া রুটিখানা তুলিয়া লইলেন এবং এবং পরীক্ষা করিয়া
 দেখিলেন যে রুটির ভিতর একটা কঠিন পদার্থ প্রবিষ্ট রহিয়াছে।

অসীম রুটিখানা বস্ত্রের মধ্যে লুকাইয়া পাহাড়গঞ্জের দিকে
 চলিলেন, ফটক পার হইয়া তিনি দেখিলেন যে অশ্লীল ও অশ্রাব্য
 ভাষায় হিন্দু ও রাজপুত জাতিকে গালি দিতে দিতে মনিয়াও
 বাহিরে আসিতেছে। তিনি একটা পুরাতন কবরের সম্মুখে ঘোড়া
 হইতে নামিয়া রুটির ভিতর হইতে কঠিন পদার্থটা বাহির

করিলেন। অসীম দেখিলেন যে তায় নির্মিত একখানা তাবিজের মধ্যে একখানা পত্র রহিয়াছে, পত্র দেখি সর্কাজ রোমাঞ্চিত হইল কারণ পত্রখানি বাদশাহ সিয়রের স্বহস্ত লিখিত। বাদশাহ লিখিয়াছেন,—

“দোস্ত, আজ আমি অন্ধ। নিমকহারান আমার উপর দিয়া তপ্ত শলাকা টানিয়া দিয়াছে। আজ আমি একা, কারণ আমার বাদশাহী ঘুচিয়া গিয়াছে। যদি প্রকৃত বন্ধ হও তাহা হইলে আমাকে মুক্ত করিও।”

পত্র পাঠ শেষ হইবার পূর্বে মনিয়া সেই পুরাতন কবরের নিকট আসিয়া উপস্থিত হইল। অসীম তাহাকে জিজ্ঞাসা করিলেন, “মনিয়া এ পত্র তুমি কোথায় পাইলে?” মনিয়া কহিল, “কিল্লার লাহোর ফটকে ভিক্ষা করিতে গিয়া পাইয়াছি। তুমি এখন চলিয়া যাও, দ্বিপ্রহর রাত্রিতে ফরীদের সহিত দুইটা ঘোড়া লইয়া লাহোর-ফটকের বাহিরে থাকিও। আজমীর ফটকের পাহারা ঘুষ দিয়া বশ করিয়াছি।” এই কথা বলিয়া পুনরায় অকথা ভাষায় রাজপুত রাজা অজিত সিংহকে গালি দিতে দিতে মনিয়া চলিয়া গেল; অসীম বিস্মিত হইয়া তাহার দিকে চাহিয়া রহিলেন।

উনাশীতিতম্ পরিচ্ছেদ

ঋণ পরিশোধ

ফরুক্‌সিয়ারের অধঃপতনের ইতিহাস আজি সুপরিচিত। আবদুল্লা খাঁ প্রাসাদ ও অনর মহল অধিকার করিবার পরে হতভাগ্য বাদশাহ ফরুক্‌সিয়ার, তাহার শত্রুর যোধপুরের রাজা অজিত সিংহের আদেশে তাহার মাতা ও পত্নীর আলিঙ্গন হইতে বিচ্ছিন্ন হইয়া দিউয়ান-ই-খাসে আবদুল্লা খাঁর সম্মুখে আনীত হইয়াছিলেন এবং বিশ্বাসঘাতক সৈয়দের আদেশে তাঁহার চক্ষুর উপর দিয়া তপ্ত শলাকা টানিয়া দেওয়া হইয়াছিল। ইহার পরে বাদশাহ ফরুক্‌সিয়ারকে দিল্লীর দুর্গের মধ্যে তির পোলিয়া-দরওয়াজার মধ্যে আবদ্ধ রাখা হইয়াছিল। আবদুল্লা খাঁ ও হুসেন আলি খাঁ যখন নরপিশাচ অজিত সিংহের সহিত ফরুক্‌সিয়ারকে হত্যা করিবার পরামর্শ করিতেছিলেন তখন ফরীদ খাঁ ও অসীম তাঁহাকে মুক্ত করিয়া জয়পুরের রাজা জয়সিংহের নিকট লইয়া যাইবার চেষ্টা করিতেছিলেন।

সমস্ত দিন বাসায় থাকিয়া সন্ধ্যার পরে অসীম যখন বাহির হইবার উদ্যোগ করিতেছিলেন সেই সময়ে একজন হরকরা সংবাদ দিল যে একটা ভিখারিণী তাহার সহিত সাক্ষাৎ করিতে চায়। অসীম মনে মনে বুঝিলেন যে মনিষা তাহার সহিত

ঋণ পরিশোধ

সাক্ষাৎ করিতে আসিয়াছে তথাপি তিনি হরকর
“ভিখারিণীকে সদর ফটকে অপেক্ষা করিতে বল, আমি
আসিতেছি।” কথাটা কেমন করিয়া অন্তরে পৌঁ
তাহা বুঝিতে পারিলেন না, তাঁহার সম্মুখে একজন হরক
জলন্ত মশাল লইয়া অগ্রসর হইয়া চলিল। ভিখারিণী ম
সে তাহার সর্বাঙ্গ একটা মলিন জীর্ণ বোরথায় আবৃত করিয়া
আসিয়াছিল এবং অসীমকে দেখিয়া বোরথার মুখের পর্দা খুলিয়া
ফেলিল। মশালের উজ্জ্বল আলোক মনিয়ার মুখের উপরে
পড়িতেই ত্রিতলের উপরে একজন হাসিয়া উঠিল। অসীম
বিস্মিত হইয়া উপরের দিকে চাহিয়া দেখিলেন যে ত্রিতলের
গবাক্ষে অবগুষ্ঠন শূণ্য শৈল দাড়াইয়া আছে এবং তাহার
সম্মুখে একজন দাসী একটা প্রদীপ ধরিয়া আছে।

শৈলের মনিয়া-দর্শন যে তাঁহার ভবিষ্যৎ জীবন কতদূর
বিষময় করিয়া তুলিবে অসীম তখন তাহা বুঝিতে পারিলেন না।
তিনি বিরক্ত হইয়া ত্রিতলের বাতায়ন পথ হইতে মুখ ফিরাইয়া
লইলেন। মনিয়াও কিছু না বুঝিয়া বলিল “হজুর আপনি এখন
বাহির হইবেন না। ফরীদ ও আমি সমস্ত ঠিক করিয়া
আপনাকে ডাকিতে আসিব।” মনিয়ার কথা শৈলের কানে
পৌঁছিলে সে আর একবার থিল্ থিল্ করিয়া হাসিয়া উঠিল
অসীম তাহা শুনিয়া আরও অধিক বিরক্ত হইলেন কিন্তু কিছু
বলিলেন না। তাহাকে নীরব দেখিয়া মনিয়া বলিল, “অনৈব
কষ্টে পাঠান আবদুল্লা খাঁকে বশ করিয়াছি কিন্তু রতন চাঁদে

অসীম

বাঈ খবর দিয়াছে যে বাদশাহকে কাল হত্যা
 পাৰি। সুতরাং আজ রাত্ৰিতে যদি কিছু না করিতে পারা
 যাইলে এত যত্ন, আয়োজন ও চেষ্টা সমস্তই বৃথা
 গিয়াছে। মনিয়ার কথা শুনিয়া অসীম কিছুক্ষণ চিন্তা করিয়া
 কহিল,—“দেখ মনিয়া, রাত্ৰিকালে তুমি একা আসিও না,
 করীদ থাকে সঙ্গে আনিও।” অসীমের কথা শেষ হইবার পূর্বে
 শৈলের উচ্চ হাস্যধ্বনি অসীমের ও মনিয়ার কর্ণে প্রবেশ করিল,
 অসীম অত্যন্ত বিরক্ত হইয়া দন্তে দন্ত পেষণ করিতে লাগিলেন।
 মনিয়া সেলাম করিয়া বিদায় হইল।

রাত্ৰির প্রথম প্রহর শেষ হইলে একজন দাসী আসিয়া
 অসীমকে বলিয়া গেল, “ঠাকুরাণী পীড়িত হইয়া পড়িয়াছেন,
 আপনাকে শীঘ্র ডাকিতেছেন।” শৈলের ব্যবহারে অসীম অত্যন্ত
 বিরক্ত হইয়াছিলেন। তিনি দাসীকে বলিলেন, “একজন হর-
 করাকে বলিয়া দাও হাকিম ডাকিয়া আনে, তবে এতরাত্রে
 হাকিম পাইবে কি না সন্দেহ। আমি এখন পোষাক পরিতেছি
 আমার ভিতরে যাইবার বিলম্ব হইবে।” দাসী চলিয়া গেল,
 অসীম সৰ্ব্বাঙ্গে লৌহজাল নির্মিত বর্ম্ম ধারণ করিয়া তাহার
 তাহার উপরে পোষাক পরিতে আরম্ভ করিলেন। সন্ধ্যার পর
 হইতে বৃষ্টি পড়িতে আরম্ভ হইয়াছিল সুতরাং দিল্লীতে সেদিন
 ভীষণ শীত। অসীম একটা মোটা তুলার কুৰ্ত্তা পরিয়া
 তাহার উপরে একটা মেঘচৰ্ম্ম নির্মিত চোগা পরিলেন,
 মস্তকে লৌহ নির্মিত শিরস্ৰাণ স্থাপন করিয়া তিনি যখন পাগড়ী

ঋণ পরিশোধ

বাধিতে আরম্ভ করিলেন তখন সেই দাসী ছুটিয়া
“হুজুর শীঘ্র আসুন, হকিম পাওয়া যায় নাই,
কেমন করিতেছেন।” অসীম দ্রুত পদে অন্তরে গিয়া
যে শৈল তাহার শয়ন কক্ষের তলে পড়িয়া ছটফট কা-
তখন পূর্বের বিরক্তি ভুলিয়া অসীম পত্নীর পার্শ্বে বসিয়া
জিজ্ঞাসা করিলেন, “কি হইয়াছে শৈল? এমন করিতেছ কেন?”
শৈল একটা বিকট চীৎকার করিয়া বলিয়া উঠিল, “তোমার পথ
নিষ্কটক করিবার জন্ত বিষ খাইয়াছি। মণিয়া যে রাস-যাত্রা
করিবার জন্ত সন্ধ্যাকালে তোমাকে ডাকিতে আসিয়াছিল তাহা
নিজের চোখে দেখিয়াছি। অনেক সহ্য করিয়াছি আর পারিলাম
না, এইবারে ডাহিনে বাঁয়ে চিনির নৈবেদ্য প্রাণ ভরিয়া ভোগ
করিও। নারায়ণ সাক্ষী রাখিয়া বিবাহ করিয়াছিলে সেই
সম্পর্কে ডাকিয়াছি, আমার অন্তিমকালে আমাকে এই বিদেশে
ফেলিয়া মণিয়ার সহিত স্মৃতি করিতে বাগানে যাইও না, আমার
প্রাণটা বাহির হইয়া গেলে যাইও।”

শৈলের কথা শুনিয়া অসীম স্তম্ভিত হইয়া গেলেন। সেই
সময়ে বহিষ্কারে বংশীধ্বনি শ্রুত হইল, অসীম চমকিয়া উঠিলেন,
শৈলও তাহা শুনিতে পাইল। এবং অসীমকে জড়াইয়া ধরিয়া
বলিয়া উঠিল, ঐ আসিয়াছে তোমার প্রেমময়ী রাধে আজ শ্রামের
বাশি বাজাইয়া শ্রামকে যমুনা পুলিনে ডাকিতে আসিয়াছে।
যাইও, কাল যাইও, মনের স্থখে বিনা বাধায় ঘোল শত গোপী
লইয়া রাসলীলা করিও, কিন্তু আজিকার দিন ধর্মের অমুরোধে

অসীম

এক।” আবার বাঁশী বাজিয়া উঠিল, অসীম তাহা
‘হরিয়া উঠিলেন, তাঁহার মানস পটে বাদশাহ ফররুখ-
র কান্তি ও মলিন মুখ ফুটিয়া উঠিল, নিমেষের জন্ত
বাহুহারা হইলেন, তিনি দেখিতে পাইলেন যে রক্তবর্ণ
নির্মিত উচ্চ নকরাখানার অঙ্কারময় কক্ষে বাদশাহ
ফররুখ্‌সিয়র উভয় বাহু বিস্তার করিয়া ডাকিতেছেন, “দোস্ত,
আজি তুমি আমাকে ভুলিও না, আমি ময়ূর সিংহাসনের কণ্টকময়
পিচ্ছিল পথে পদস্থলিত হইয়াছি, বাদশাহীর সঙ্গে সঙ্গে সমস্ত
হুনিয়া। আমাকে পরিত্যাগ করিয়া গিয়াছে; বন্ধু, আজ এই
বন্ধুহীন ফররুখ্‌সিয়রকে পরিত্যাগ করিও না।” সঙ্গে সঙ্গে
অসীম গুনিতে পাইলেন বজ্রনাদে ত্রিবিক্রম বলিতেছেন, “তিনটা
কথা মনে রাখিও, বিপৎকালে স্ত্রীলোকের পরামর্শে চলিও না,
স্বার্থের জন্ত কর্তব্য ‘বিস্মৃত হইও না, জীবন-যৌবন-ধন-সম্পদ
সমস্তই তুচ্ছ।” সঙ্গে সঙ্গে আবার বাঁশী বাজিয়া উঠিল। অসীম
উদ্ভ্রান্ত হইয়া বলিয়া উঠিলেন, “শৈল, আমার সম্মুখে কঠোর
কর্তব্য, বাদশাহ ফররুখ্‌সিয়র বিপন্ন, বন্ধুহীন নিরাশ্রয় ফররুখ্-
সিয়র আজ ক্ষুদ্রাদপি ক্ষুদ্র অসীম রায়কে স্মরণ করিয়াছেন তাহা
আমাকে ছাড়িয়া দেও, তুমি স্ত্রী—ধর্মপত্নী, কর্তব্যই একমাত্র ধর্ম,
তুমি আমাকে কর্তব্য পথ হইতে বিচলিত করিও না; যদি ভুল
বুঝিয়া বিষ খাইয়া থাক তাহার এখনও সময় আছে, এখনও
উপায় আছে; আমি হকিম পাঠাইয়া দিতেছি, বাদশাহকে
যদি উদ্ধার করিতে পারি তাহা হইলে এখনই ফিরিয়া আসিব।”

ঋণ পরিশোধ

অসীমের কথা শুনিয়া শৈল তাহার কণ্ঠা-
উচ্চৈশ্বরে কাঁদিয়া উঠিল, সে বলিয়া উঠিল, “আমা-
য়ে তুমি ! ওগো তুমি আমার মৃত্যুকালে এই বিদো-
একা ফেলিয়া কোথায় যাইবে ? অসীম উঠিতে যাইতে
তিনি শৈলকে ক্রোড়ে তুলিয়া লইয়া বসিয়া পড়িলেন ।
দাসীকে বলিলেন, “ছোট কর্তাকে ডাকিয়া আন ।” মুহূর্ত্ত মধ্যে
ভূপেন্দ্র আসিলেন । অসীম অশ্রুঝর কণ্ঠে বলিয়া উঠিলেন,
“ভাই, মণিয়াকে দেখিয়া শৈল বিষ খাইয়াছে, অথচ বাদশাহের
উদ্ধারের জন্য মণিয়া আঁনাকে ডাকিতে আসিয়াছে । আমি
যাইতে পারিব না । ভূপেন, সম্মুখে কঠোর কর্তব্য । মণিয়ার
সঙ্গে বাও, জীবন পণ করিয়া বাদশাহের উদ্ধারের চেষ্টা করিও ।”

অসীম উঠিয়া ভূপেন্দ্রকে আলিঙ্গন ও চুম্বন করিলেন, অন্ধ
যুবা জ্যেষ্ঠভ্রাতা ও ভ্রাতৃজ্ঞায়াকে প্রণাম করিয়া চলিয়া গেল ।
অশ্রু-অন্ধ নেত্রে অসীম তাহাকে বিদায় দিলেন কিন্তু শৈলের
ওষ্ঠ প্রান্তে ক্রুর হাস্যের রেখা ফুটিয়া উঠিল ; সঙ্গে সঙ্গে নিয়তিও
হাসিল ।

দ্বিতীয় প্রহর রাত্রিতে ভীষণাকার দিল্লী দুর্গের প্রাকার বহিয়া
অন্ধ ভূপেন্দ্র আকাশ চুম্বী নকরাখানায় আরোহণ করিতেছিল,
দূর হইতে একজন পাঠানসৈন্য তাহাকে দেখিতে পাইল ।
মণিয়া সেই পাঠানকে উৎকোচ দিয়া বশীভূত করিয়াছিল
সুতরাং সে অগ্ন্যাগ্ন প্রহরীদিগকে সতর্ক না করিয়া নকরাখানায়
ব্রতিলের একটা অন্ধকারময় কক্ষে গিয়া অশ্রুট স্বরে বলিল,

অসীম

যে পথে পেরেক লাগান হইয়াছিল সেই পথে
 আসিতেছে।” অন্ধ বাদশাহ ফররুখ্‌সিয়র উৎকণ্ঠিত
 হইয়া জন্ত প্রতীক্ষা করিতেছিলেন, তিনি ব্যস্ত হইয়া
 পাড়াইলেন, তাহা দেখিয়া পাঠান বলিল, “হজরৎ, আপনি
 হইবেন না, আমি আপনার বন্ধুকে এই স্থানে আনিতেছি।”
 ভূপেন্দ্র পেরেক বহিয়া প্রাকারের উপর উঠিবামাত্র পাঠান তাহার
 নিকটে গিয়া অশ্রুট স্বরে কহিল, “আমি বন্ধু, নিকটে পাহারা
 আছে, সাবধান, আমার হাত ধরিয়া উপরে আইস।” পাঠান
 ভূপেন্দ্রের হাত ধরিয়া তাহাকে বাদশাহের নিকট লইয়া গেল।
 বাদশাহ তাহাকে আলিঙ্গন করিয়া কাদিয়া উঠিলেন। তিনি
 বলিলেন, “দোস্তু, তোমাকে দেখিয়াই চিনিয়াছিলাম, সেই সুদূর
 বঙ্গদেশে তোমার মুখ দেখিয়াই বুঝিয়াছিলাম যে এই নিমক-
 হারামের দুনিয়ায় তুমি কখনও নিমকহারাম হইবে না।” ভূপেন্দ্র
 বাদশাহকে তসলীম করিয়া বলিল, “শাহান্‌শাহ, কথা কহিবেন
 না, যে পথে আমি আসিয়াছি সেই পথেই আপনাকে যাইতে
 হইবে।” ফররুখ্‌সিয়র বলিলেন, “দোস্তু, আমি যে অন্ধ”
 ভূপেন্দ্র বলিল, “শাহান্‌শাহ, আমাকে কি বিশ্বাস হইয়াছেন, তাহা
 পাড়ার অশ্বখ বৃক্ষের তলে প্রথমে আমার সহিতই আপনার
 সাক্ষাৎ হইয়াছিল, আমি যে জন্মান্তর।”

ফররুখ্‌সিয়র ভূপেন্দ্রের হস্ত ধারণ করিয়া বাহির হইলেন।
 অনশনে, অনিদ্রায় ও হুশিহৃত্যে তাহার দেহ দুর্বল হইয়াছিল,
 কক্ষের বাহিরে আসিয়া ছিন্নবস্ত্রে পা জড়াইয়া তিনি পড়িয়া

গেলেন, পাঠান ভীত হইয়া পলায়ন করিল। ৭

বলিলেন, “দোস্ত, তুমি পলাও, শব্দ শুনিয়া এখনই ছুটিয়া আসিবে!” ভূপেন্দ্র বাদশাহকে জড়াইয়া ধরিয়া “শাহানশাহ, অন্ন-দাতাকে মরণের মুখে ফেলিয়া নিঃস্বাস বাঁচাইতে পলাইব? এমন বংশে ভূপেন্দ্র রায় জন্মে দেখিতে দেখিতে চারিদিক হইতে ভীষণ-মূর্ত্তি পাঠান প্রহরী ছুটিয়া আসিল, মুহূর্ত্ত মধ্যে দুই জনের বর্ষা শক্তিহীন অঙ্গ যুবার বক্ষোদেশ বিদীর্ণ করিল। ভূপেন্দ্রের দেহ দিল্লী-দুর্গের লাহোর-দরজার সম্মুখে নিক্ষেপ করিয়া পাঠানগণ হতভাগ্য বাদশাহ ফরুখসিয়রকে তাঁহার কারাগারে আবদ্ধ করিল।

শেষ রাত্রিতে হকিম আসিয়া শৈলকে যখন জোলাপ খাওয়াইতে গেল তখন সে বিকট হাস্তে অট্টালিকা কম্পিত করিয়া বলিয়া উঠিল, “আমি বিষ খাইতে যাইব কেন? তোমাকে মনিয়ার সঙ্গে যাইতে দিব না বলিয়া তামাকপোড়া খাইয়া ছিলাম।” হকিম ফিরিয়া গেল, অসীম উন্মত্তের মত ছুটিয়া বাহির হইলেন।

তখন পূর্বদিক্‌প্রান্তে উষার মধুর হাসি ফুটিতেছিল সঙ্গে সঙ্গে ক্রুরা নিয়তিও হাসিতেছিল।

অশীতিতম পরিচ্ছেদ

“খতম্ শুদ্, বিল্ খয়ের্”

দিন দিল্লী নগরী সহসা জাগিয়া উঠিল, সহস্র সহস্র ভিক্ষুক-গাহজহানের রক্তপ্রস্রবের দুর্গন্ধারে সমবেত হইল; তাহা-দিগের সম্মুখে অবগুষ্ঠনশূন্য মণিয়া ও উষ্ণীষবিহীন উদ্ভ্রান্তচিত্ত অসীম। লাহোর দরজার সম্মুখে সৈয়দদিগের সেনাগণ তাহাদিগের গতিরুদ্ধ করিয়াছিল, কিন্তু তাঁহারা দূর হইতে দেখিতে পাইল যে ত্রিপোলিয়া দরজার নিম্নে দুইটা শব পতিত আছে। বহু কষ্টে দিলাবর আলী খাঁর অনুমতি লইয়া অসীম লাহোর দরওয়াজার ভিতরে প্রবেশের অনুমতি পাইলেন। ত্রিপোলিয়ার উচ্চ তোরণের নিম্নে তালপত্র নির্মিত ছিন্ন চাটাই জড়িত বাদশাহ ফরুখসিয়রের শব পতিত ছিল; ফরুখসিয়রকে চিনিয়া অসীম কুণীশ করিয়া বলিলেন, “শাহানশাহ, ছুনিয়ার বাদশাহ, কাল তুমি দীন ও ছুনিয়ার মালিক ছিলে আর আজ তোমার এই দশা!” তাহার কথা শুনিয়া আবদুল্লা খাঁ ও হোসেন আলীর সৈয়দসেনাগণ পর্য্যন্ত অশ্রুরোধ করিতে পারিল না, দূরে দুর্গন্ধারে দিল্লীর ভিক্ষুক সম্প্রদায় আর্তনাদ করিয়া উঠিল। সহসা অসীন পাগল হইয়া উঠিলেন, তিনি ছুটিয়া দ্বিতীয় শবের নিকটে গিয়া বলিয়া উঠিলেন, “ভাই, ভাইরে ভূপ!”

তখন ও ভূপেন্দ্রের মৃতদেহে বর্ষাধর বিদ্ধ ছিল, অসীম তাহা

“থতম্ শুদ্ বিল্ থয়েব্”

সযত্নে বাহির করিয়া ভূপেন্দ্রের মৃতদেহ কোলে উঠা
এবং তাহা মৃত বাদশাহের পদপ্রান্তে রাখিয়া বলিয়া
“শাহান্‌শাহ্, জহাঁপনা, আমি নিমকহারাম, আমি নি
আমি নিমকহারাম। কিন্তু তুমি অতীতের অন্ধকার প
যাও নাই, আমার ভূপ ভাই অন্ধকারে তোমাকে পথ দেখা
আসিয়াছিল, সেই তোমার সঙ্গে গিয়াছে। আমাদের পিতৃ ঋণ,
তোমার নিমকের ঋণ সে শোধ করিয়াছে; কিন্তু অন্তিম কালে
তুমি যাহাকে দোস্ত্ বলিয়া স্মরণ করিয়াছিলে সে রূপসী
যুবতীর বাহু পাশ ছাড়াইয়া আসিতে পারে নাই।”


অসীমের কথা শুনিয়া বৃদ্ধ সৈয়দ ও পাঠানসৈন্যগণ কাদিতে
আরম্ভ করিল; দেখিতে দেখিতে বখ্‌শী দিলাবর আলী খাঁ ও
সৈয়দ আলী খাঁ আসিয়া পৌঁছিলেন। বাদশাহ ফরুক্‌খ্‌সিয়রের
মৃতদেহ শবাধারে স্থাপিত হইল, দুই চারিজন দরিদ্র প্রভুভক্ত
মন্সবদার ও খোজা ব্যতীত কেহই আসিল না। বাদশাহের
শবাধারের সঙ্গে চারিজন হিন্দু ভূপেন্দ্রের শব বহন করিয়া চলিল।
দেখিতে দেখিতে চাঁদনী চকের পথে সহস্র সহস্র নাগরিক সমবেত
হইল, পথে প্রত্যেক গৃহের দ্বারে অবরোধ-বাসিনী ললনাগণ মৃত
বাদশাহের দেহ দেখিবার জন্য ছুটিয়া আসিলেন; আর্তনাদে গগন
বিদীর্ণ হইল। নূতন শহরের দিল্লী দরওয়াজা ও পুরাতন শহরের
কাবুল দরওয়াজার পথে উভয় শব হুমাযুনের সমাধি মন্দিরে নীত
হইল। সেই বিশাল কবরের গহ্বরে এক অন্ধকারময় কক্ষে
বাদশাহ ফরুক্‌খ্‌সিয়র সমাহিত আছেন।

অসাম

মাধি শেষ হইলে হিন্দুগণ যমুনাতীরে ভূপেন্দ্রের
 কারল। সৈয়দগণের আদেশে সহস্র সহস্র রুটী, তাম্র
 বা, মোগল সম্রাট-বংশের প্রাচীন রীতি অনুসারে,
 র সম্মুখে নিক্ষিপ্ত হইল; মণিয়া এক খণ্ড রুটী তুলিয়া
 তাহাতে নিষ্ঠবন পরিত্যাগ করিয়া ফেলিয়া দিল; সে
 পলািয়া উঠিল, “ভাই সব, নিমকহারাগের রুটী নিমকহালালের
 হারাম।” তাহা দেখিয়া বিশ হাজার ভিক্ষুক রুটী ও মদ্রায়
 নিষ্ঠবন পরিত্যাগ করিয়া দিলাবর আলী ও সৈয়দ আলীর অঙ্কে
 ছুড়িয়া মারিল, তাহারা পলাইয়া বাঁচিল।

কলস ভরিয়া যমুনার জল আনিয়া ভূপেন্দ্রের চিতাগ্নি
 নিক্ষেপিত করিয়া অসীম যখন যমুনা সৈকতে আসিয়া দাঁড়াইলেন,
 তখন তাঁহার উদ্ভাস্ত দৃষ্টি দেখিয়া মণিয়া বলিল, “জনাব, এইবার
 ঘরে ফিরিয়া চলুন!” অসীম উন্নতের মত মণিয়ার মুখের দিকে
 চাহিয়া বলিলেন, “ঘর? কোথায় ঘর?” তখন মণিয়া হাসিয়া
 সস্মেহে অসীমকে আলিঙ্গন করিয়া বলিল, “বুঝিয়াছি ভাই,
 বুঝিয়াছি, গোপাল তোমাকেও ডাকিয়াছে। চল গোপালের
 ঘরে যাই।” উৰ্দ্ধদৃষ্টিনিবদ্ধ অসীম কহিলেন, “চল।”

তখন সন্তঃ-স্নাতা সুসজ্জিতা শৈল অসীমের প্রতীক্ষা করিয়া
 ছিল—আর নিয়তি হাসিতেছিল।



ঐতিহাসিক

শ্রীযুক্ত রাখালদাস বন্দ্যোপাধ্যায়

১। বাঙ্গালার ইতিহাস—১

২য় সংস্করণ, ৩২ খানি চিত্র সম্বলিত, মূল্য ৩ টাকা।

২। বাঙ্গালার ইতিহাস—দ্বিতীয়

৩১ খানি অপ্রকাশিত চিত্র সম্বলিত, মূল্য ৩ তিন টাকা।

৩। রামেন্দুসুন্দর দ্বিবেদী লিখিয়াছেন :—

“বাংলার ইতিহাস এই কয়দিনে একরূপ পড়িয়াছি, আমার এ অবস্থায় নূতন বই পড়ার যেরূপ প্রথা দাঁড়াইয়াছে তার চেয়ে ভালই পড়িয়াছি। প্রথম ভাগ পূর্বে পড়িয়াছিলাম, দ্বিতীয় ভাগ পড়িয়া সেইরূপ আনন্দ পাইলাম। কেবল আনন্দ কেন অনেক নূতন কথা শিখিলাম। বাঙ্গালার ইতিহাসের পাঠান আমলের কথা সেই কালের ষ্টুয়ার্ট ও লেথব্রিজের বহি হইতে যৎকিঞ্চিৎ জানিতাম এ দিকে নূতন তথ্য কি বাহির হইয়াছে তাহার কোনও খবর রাখি নাই। এই সকল বহি হইতে সে সকল কথা জানিয়া শিখিলাম, এ জন্য তোমাকে গুরু বলিয়া কৃতজ্ঞতা স্বীকার করিতে গেলে যদি তোমার অকল্যাণ বোধ কর, তাহাতে ক্ষান্ত থাকিলাম বাঙ্গালার ইতিহাস তোমার পাণ্ডিত্যের ও প্রতিভার উপযোগী হইয়াছে। বাঙ্গালা সাহিত্যও তোমার নিকট ঋণী হইল, কেন না এখন হইতে বাঙ্গালার ইতিহাস জানিতে হইলে বিদেশী পণ্ডিতদেরও এই বাঙ্গালা বহি আশ্রয় করিতে হইবে।”

W. THOMAS Librarian, India Office,
 Calcutta:—

Rakhal Das Banerji.....is one of the
 own Indian workers in the field of Epi-
 graphy and Numismatics. His writings in English
 characterised by an open mind and the em-
 ployment of sound methods and reliable materials.
 The two volumes of which the titles are given above
 should not be passed over in this journal simply
 because they are written in the author's native
 Bengali. It is indeed a gratifying fact that the
 modern devotion of Bengali writers to their own
 language should cover the production of works
 having so strictly sober and methodical character.

"Mr. Banerji's style is simple and entirely
 matter of fact, more so, indeed, than would be
 expected in an English work treating of the same
 subject. His statements are supported by constant
 citations of standard works on Indian Numismatics,
 Epigraphy and History and of the Orientalist
 journals—Journal of the Royal Asiatic Society of
 Great Britain and Ireland, 1917, pp. 853-854.

PROFESSOR JADUNATH SARKAR.—

".....and lastly the monumental history
 (in Bengali) of Rakhal Das Banerji. They have
 all been indebted to coins and inscriptions (and in
 the case of the last two to literary sources as well)
The Student of Bengal's history cannot be
 at stay even with Rakhal Das Banerji's masterly
 work.....Modern Review, April, 1923.

প্রাচীন মুদ্রা—প্রথম ভাগ ২০ খানি চিত্র সম্বলিত,

মূল্য ২০ ।

ভারতবর্ষের প্রাচীন মুদ্রার বিশদ বিবরণ ; ৬

ভাষায় কোন গ্রন্থ নাই। ডাক্তার টমাস বলেন :—

"This volume may be cordially recommended to the attention of specialists, as late Superintendent of the coin department in the Indian Museum writes with full competence, and his statements are supported by constant reference to the literature.—Journal of the Royal Asiatic Society of Great Britain and Ireland. 1917. page 858.

গ্রন্থকার লিখিত ঐতিহাসিক উপন্যাস-মালা

১। শশাঙ্ক (২য় সংস্করণ) মূল্য ২৮ দুই টাকা।

২। করুণা " ২৮ " "

৩। প্রহ্মপাল (৩য় সংস্করণ) মূল্য ১০ আট আনা

৪। মল্লুখ (৩য় সংস্করণ) " ১০ " "

৫। পান্নানের কথা (২য় সংস্করণ) মূল্য ১০

দেড় টাকা।

শ্রীমতী কাঞ্চনমালা দেবীর গল্পের বই

১। গুপ্ত মূল্য ১০ টাকা।

২। স্তবক মূল্য ১০ দেড় টাকা।

৩। রসির ডায়ারী মূল্য ১০ আট আনা।

প্রাপ্তিস্থান—মেসার্স গুরুদাস চট্টোপাধ্যায় এণ্ড সন্স

২০৩/১১ কর্ণওয়ালিস্ স্ট্রীট, কলিকাতা।

